

O Le Liahona

Saunoaga o le Konafesi Aoao

Ua Unaia e Peresitene Nelson
le Au Paia ina ia Faalogo i le Alii

Na Tuuina Atu e Peresitene Nelson
le Folafolaga o le Faamanatuina o le
Lua Selau Tausaga o le Toefuataiga

Ua Faaogaina e le Ekalesia se
Faatusa e Faamamafaina atu
ai le Nofoga Tutotonu
o le Faaola i Lana Ekalesia

Ua Lagolagoina Fitugafulu
Fou o le Pulega Aoao ma le Au
Peresitene Aoao o Alii Talavou

Ua Fofogaina Mai Malumalu Fou e 8



O LE TOEFUATA'IGA O LE ATOATOAGA O LE TALALELEI A IESU KERISO

O SE FOLAFOLAGA O LE FAAMANATUINA O LE LUA SENETURI I LE LALOLAGI

O LE AU PERESITENE SILI MA LE AUFONO A APOSETOLO E TOASEFULULUA O LE EKALEZIA A IESU KERISO O LE AU PAIA O ASO E GATA AI

Matou te folafola atu ma le faamaoni e alofa le Atua i Lana fanau i atunuu uma o le lalolagi. Ua foa'i mai e le Atua le Tamā ia i tatou le soifua mai ma le paia, le soifuaga lē mafaatusalia, ma le taulaga togiola lē i'u a Lona Alo Pele, o Iesu Keriso. E ala i le mana o le Tamā, na toetu mai ai Iesu ma maua le manumalo i le oti. O Ia o lo tatou Faaola, lo tatou Faataitaga Sili, ma lo tatou Togiola.

I le lua selau tausaga talu ai, i se taeao matagofie o le tautotogo i le 1820, a o sailiili le taule'ale'a o Iosefa Samita e fia iloa po o le a le ekalesia e auai ai, sa alu ai e tatalo i le togāvao e lata ane i lona aiga i le setete o Niu Ioka, ISA. Sa i ai ni ana fesili e faatatau i le faaolataga o lona agaga ma sa faatuatua o le a ta'ita'i o ia e le Atua.

I le lotomauualalo, matou te tautino atu ai e faapea i le tali mai i lana tatalo, sa faaali mai ai le Atua le Tamā ma Lona Alo, o Iesu Keriso ia Iosefa ma amatalia ai loa le “toefuata'iga o mea uma” (Galuega 3:21) e pei ona valo'ia mai i le Tusi Pa'ia. I lenei faaaliga, sa ia a'oa'o ai ina ua mavae le maliliu o ulua'i Aposetolo, sa leiloa ai le Ekalesia a Keriso o le Feagaiga Fou mai le lalolagi. O le a avea Iosefa ma mea faigaluega i le toefo'i mai o le Ekalesia.

Matou te faamautū atu i lalo o le ta'ita'iga a le Tamā ma le Alo, na ō mai ai avefe'au faalelagi e a'oa'o Iosefa ma toe-atia'e le Ekalesia a Iesu Keriso. Sa toefuata'i mai e Ioane le Papatiso le pule e papatiso ai e ala i le faatofuina mo le faamagaloga o agasala. O le to'atolu o ulua'i Aposetolo—o Peteru, Iakopo, ma Ioane—sa toefuata'i maia le tofi faa'aposetolo ma ki o le pule o le perisitua. Sa ō mai fo'i isi, e aofia ai Elia, o lē na toefuata'i maia le pule e faamau faatasi ai aiga e faavavau i mafutaga e faavavau lea ua to'ilalo ai le oti.

Matou te molimau atu fo'i o Iosefa Samita na tu'u i ai le mealofoa ma le mana o le Atua e faaliliu ai se faamaumauga anamua: le Tusi a Mamona—O Se Tasi Molimau ia Iesu Keriso. O loo aofia ai i itulau o lenei anotusi pa'ia se tala e uiga i le galuega patino a Iesu Keriso i tagata i le Itulagi i Sisifo i le faato'ā mavae ai

o Lona Toetu. O loo a'oa'o mai ai le faamoemoega o le olaga ma faamalamalama mai ai le mata'upu faavae a Keriso, lea e faatotonugalemū i ai lena faamoemoega. I le avea ai ma se soa o tusitusiga pa'ia i le Tusi Pa'ia, o loo molimau mai ai le Tusi a Mamona o tagata soifua uma o ni atalii ma ni afafine a se Tamā i le Lagi alofa, ua i ai ia te Ia se fuafuaga pa'ia mo ō tatou olaga, ma o Lona Alo, o Iesu Keriso, o loo fetalai mai i aso nei e pei fo'i ona i ai i aso anamua.

Matou te tautino atu O Le Ekalesia a Iesu Keriso o le Au Paia o Aso e Gata Ai, sa faatulagaina i le aso 6 o Aperila, 1830, o le Ekalesia lava lea a Keriso o le Feagaiga Fou ua toefuata'iina. O lenei Ekalesia ua taula i le soifuaga ato'atoa o lona ma'a tulimanu, o Iesu Keriso, ma i Lana Togiola lē i'u ma le Toetu moni. Ua toe vala'auina e Iesu Keriso ia Aposetolo ma tu'u atu ia i latou le pule o le perisitua. Ua Ia vala'aulia i tatou uma ia ō mai ia te Ia ma Lana Ekalesia, ia maua le Agaga Pa'ia, o sauniga o le faaolataga, ma ia maua le olioli tumau.

Ua mou atu nei le lua selau tausaga talu ona amatalia lenei Toefuata'iga e le Atua le Tamā ma Lona Alo Pele, o Iesu Keriso. Ua ōpomau e le faitau miliona i le lalolagi atoa se malamalama'aga o nei mea na tutupu sa valo'iaina.

Matou te ta'utino atu ma le fiafia e aga'i pea i luma le Toefuata'iga folafolaina e ala i faaaliga faifai pea. O le a lē toe tutusa lava le lalolagi, auā o le a “faapotopoto faatasi [e le Atua] mea uma ia tasi ia Keriso.” (Efeso 1:10).

Faatasi ai ma le migao ma le lotofaafetai, i le avea ai ma Ana Aposetolo, matou te vala'aulia ai tagata uma ia iloa—e pei ona matou iloa—o loo matala le lagi. Matou te faamautū atu o loo faailoa mai e le Atua Lona finalo mo Ōna atalii ma afafine pele. Matou te molimau atu o i latou e su'esu'e ma le agaga tatalo i le sāvali o le Toefuata'iga ma galulue i le faatuatua o le a faamanu-iaina e maua ā latou lava molimau e uiga i lona pa'ia ma lona faamoemoega e saunia le lalolagi mo le Afio Mai Faalua o lo tatou Alii ma le Faaola, o Iesu Keriso, ua folafola mai.

O lenei folafolaga sa fofogaina e Peresitene Russell M. Nelson o se vaega o lana savali i le Konafesi Aoao Faaletausaga Lona 190, i le aso 5 o Aperila, 2020, i le Aai o Sate Leki, Iuta.

Sauniga o le Taaeo o le Aso Toonai

- 6 Tuleiga Amata
Perisitene Russell M. Nelson
- 8 Tatou te Lē O Atua Pea ea i Lenei Savali Sili?
Perisitene M. Russell Ballard
- 12 Faamautinoaina o se Faamasinoga Amiotonu
Elder James R. Rasband
- 15 O Se Valaauga e Faapitoa Lona Tamalii
Joy D. Jones
- 18 O Manatuaaga Musuia Faaleagaga
Elder Neil L. Andersen
- 23 Maua'a i o Tatou Loto
Douglas D. Holmes
- 27 O Tatalo o le Faatuatua
Perisitene Henry B. Eyring

Sauniga o le Aoauli o le Aso Toonai

- 30 Lagolagoina o le Au Pulega Aoao, Fitugafulu Eria, ma Taitai Aoao
Perisitene Dallin H. Oaks
- 31 Lipoti a le Matagaluega Suetusi a le Ekalesia, 2019
Kevin R. Jergensen
- 32 O Le Oo Mai o le Tusi a Mamona
Elder Ulisses Soares
- 36 O Mai ia Keriso—Ola o ni Au Paia o Aso e Gata Ai
Elder John A. McCune
- 38 O Se Molimau Ola o le Keriso Soifua
Epikopo Gérald Caussé
- 41 Mafaufau i le Agalelei ma le Silisiliese o le Atua
Elder Dale G. Renlund
- 45 O Le Mana o le Tusi a Mamona i le Liuaina
Elder Benjamin M. Z. Tai
- 48 O Se Faavae Lelei mo Aso Atali
Elder Gary E. Stevenson

Sauniga o le Afiafi o le Aso Toonai

- 52 Osana ma Aleluia—O Le Iesu Keriso Soifua: O Le Fatu lea o le Toefuataiga ma le Eseta
Elder Gerrit W. Gong
- 56 O Le Auala ua Faamanuiaina ai e le Perisitua le Autalavou
Laudy Ruth Kaouk


- 58 O Le Auala ua Faamanuia ai e le Perisitua le Autalavou
Enzo Serge Petelo
- 60 Tutufaatasi i le Faataunuaina o le Galuega a le Atua
Jean B. Bingham
- 66 E Alu Atua o la i o Tatou luma
Perisitene Henry B. Eyring
- 69 O Le Perisitua Mekisateko ma Ki
Perisitene Dallin H. Oaks
- 72 Tatalaina o le Lagi mo se Fesoasoani
Perisitene Russell M. Nelson

Sauniga o le Taaeo o le Aso Sa

- 75 Faataunuuga o le Valoaga
Elder Ronald A. Rasband
- 78 Ina Ia Latou Vaai
Bonnie H. Cordon
- 81 O Se Malamalama Atoatoa o le Faamoemoe
Elder Jeffrey R. Holland
- 84 "Ia Fausia Lenei Fale Mo Lo'u Igoa"
Elder David A. Bednar
- 88 Faalogo ia te Ia
Perisitene Russell M. Nelson
- 92 Alaga Osana
Perisitene Russell M. Nelson

Sauniga o le Afiafi o le Aso Sa

- 93 O Le Fuafuaga Sili
Perisitene Dallin H. Oaks
- 96 O Le Faamanuiaga o Faaaliga Faifai Pea i Perofeta ma Faaaliga Faaletagata Lava Ia e Taitala ai o Tatou Olaga
Elder Quentin L. Cook
- 101 Mauaina o le Malutaga mai Āfā o le Olaga
Elder Ricardo P. Giménez
- 104 O Mai ma Avea ma ni Ō
Elder Dieter F. Uchtdorf
- 107 O Fale e Sili Ona Matagofie
Elder L. Whitney Clayton
- 110 Faasoaina Atua o le Savali o le Toefuataiga ma le Toetu
Elder D. Todd Christofferson
- 114 Agai i Luma i le Faatuatua
Perisitene Russell M. Nelson
- 64 O Au Pulega Aoao ma Taitai Aoao o le Ekalesia a Iesu Keriso o le Au Paia o Aso e Gata Ai
- 116 Lipoti Faafuainumera, 2019
- 117 Tala Fou o le Ekalesia
- 127 *Sau, Mulimuli Mai ia te A'u—Aoao Mai i Savali o le Konafesi Aoao*



São Paulo, Pasila

O Le Konafesi Aoao Faaletausaga Lona 190

Sauniga o le Taeao o le Aso Toonai, 4 Aperila, 2020

Taitai: Peresitene Dallin H. Oaks

Tatalo Amata: Elder Richard J. Maynes

Tatalo Faaiu: Michelle Craig

Musika na saunia e le Aufaipese a le Tapeneko i le Lotoa o le Malumalu*: “Awake and Arise,” *Hymns*, no. 8; “Ua Tafa Ata,” *Viiga*, nu. 1, arr. Wilberg; “It Is Well with My Soul,” Spafford ma Bliss, arr. Wilberg; “O Mai, Fanau a le Alii” *Viiga*, nu. 24; “O Le Talosaga Muamua a Iosefa Samita,” *Viiga*, nu. 14; “Come, Thou Fount of Every Blessing,” Robinson/American folk melody, arr. Wilberg.

Sauniga o le Aoauli o le Aso Toonai, 4 Aperila, 2020

Taitai: Peresitene Henry B. Eyring

Tatalo Amata: Milton Camargo

Tatalo Faaiu: Elder Rubén V. Alliaud

Musika na saunia e le Aufaipese a le Tapeneko i le Lotoa o le Malumalu: “I Luga o Mauga,” *Viiga*, nu. 4, arr. Wilberg; “A Ou Suesue i Mau Paia,” *Viiga*, nu. 174, arr. Murphy; “Fiafia, o le Alii o le Tupu!” *Viiga*, nu. 38; “Faaola o Isaraelu,” *Viiga*, nu. 5, arr. Wilberg.

Sauniga o le Afiafi o le Aso Toonai, 4 Aperila, 2020

Taitai: Peresitene Dallin H. Oaks

Tatalo Amata: Elder Kyle S. McKay

Tatalo Faaiu: Cristina B. Franco

Musika na saunia e le Aufaipese a le Tapeneko i le Lotoa o le Malumalu; “Siona e le Nuu Lelei,” *Viiga*, nu. 22, arr. Kasen; “Lead, Kindly Light,” *Viiga*, nu. 97, arr. Wilberg; “O Le Atua Lo’u Tama,” *Viiga*, nu. 184; “Faalogo Nuu Uma!” *Viiga*, nu. 165, arr. Wilberg.

Sauniga o le Taeao o le Aso Sa, 5 Aperila, 2020

Taitai: Peresitene Dallin H. Oaks

Tatalo Amata: Elder Brook P. Hales

Tatalo Faaiu: Elder Peter M. Johnson

Musika na saunia e le Aufaipese a le Tapeneko i le Lotoa o le Malumalu; “Truth Eternal,” *Hymns*, no. 4; “Le Faavae Malosi,” *Viiga*, nu. 45, arr. Wilberg; “This Is My Beloved Son,” *Children’s Songbook*, 76, arr. Cardon; “Ia Fiafia Tatou,” *Viiga*, nu. 3; “Isaraelu Ua Valaau Mai le Atua,” *Viiga*, nu. 6, arr. Wilberg; “Hosanna Anthem/O Le Agaga o le Atua,” Stephens ma le *Viiga*, nu. 2, arr. Stephens.

Sauniga o le Afiafi o le Aso Sa, 5 Aperila, 2020

Taitai: Peresitene Henry B. Eyring

Tatalo Amata: Elder Kevin R. Duncan

Tatalo Faaiu: Elder Lynn G. Robbins

Musika na saunia e le Aufaipese a le Tapeneko i le Lotoa o le Malumalu: “Viia Le Na Fetaia’i ma Ieova,” *Viiga*, nu. 15, arr. Wilberg; “The Day Dawn Is Breaking,” *Hymns*, no. 52, arr. Murphy; “Ua Ou Iloa Lo’u Faaola,” *Viiga*, nu. 73; “Ia Viia Oe Le Atua,” *Viiga*, nu. 10, arr. Wilberg.

* O musika mo sauniga taitaisi, i lalo o le taitaiga a fuataimi eseese ma le au ta okeni eseese, na muai pueina; o le viiga faaiu sa pueina e le Aufaipese a le Tapeneko ma isi aufaipese e ono mai Akara, Kana; Aai o Mekisiko, Mekisiko; Seoul, Korea i Saute; São Paulo, Pasila; Frankfurt, Siamani; ma Aukilani, Niu Sila.

E Maua Saunoaga o le Konafesi

Ina ia maua saunoaga o le konafesi aoao i luga o le Initoneti i le tele o gagana, asiasi i le conference.ChurchofJesusChrist.org ma filifili se gagana. O loo maua foi lauga i luga o le polokalama faaveai o le Gospel Library. E masani lava i totonu o le ono vaiaso talu ona maea le konafesi

aoao, e maua ai lipine faalogologo ma vitio faa-Peretania i faletusi autu. O loo maua faamatalaga e uiga i le konafesi aoao i mamau e mafai ona faaaogaina e tagata o le ekalesia e i ai manaoga faapitoa i le disability.ChurchofJesusChrist.org.

I Le Faavaa

I Luma: Atavali o le Uluai Faaaliga na saunia e Dan Burr

I Tua: Ata na pueina e Mason Coberly

Puega o Ata o le Konafesi

Ata pu’e i le Aai o Sate Leki, na pueina e Cody Bell, Janae Bingham, Mason Coberly, Weston Colton, Brian Nicholson, ma Leslie Nilsson. O ata pu’e faaopoopo na pueina e Alexandre Borges, Mark Brunson, Nicolas Serey Bustamante, Annette Campbell, Karisa Creer, Cathie Frost, Alejandro Gutierrez, Natalia Hepworth, Korene Knight, Ashlee Larsen, Bruno Lima, Ashley Malili, Melanie Miza, Kendrick Navarro, Arteh Odjidja, Veronica Olson, Elaine Palmer, Melanie Porter, Jonas Rebicki, Mark Romesser, Elizabeth Thompson, Chung Ho Tsai, Emily Utykanski, Marco Vargas, Christopher Walker, Dave Ward, Jonathan Wing, Justin Wright.



West Jordan, Iuta, ISA

O le mekasini faavaomalo o Le Ekalesia a Iesu Keriso o le Au Paia o Aso e Gata Ai

O Le Au Peresitene Sili: Russell M. Nelson, Dallin H. Oaks, Henry B. Eyring
O le Korama a Aposetolo e Toasefululua: M. Russell Ballard, Jeffrey R. Holland, Dieter F. Uchtdorf, David A. Bednar, Quentin L. Cook, D. Todd Christofferson, Neil L. Andersen, Ronald A. Rasband, Gary E. Stevenson, Dale G. Renlund, Gerrit W. Gong, Ulisses Soares

Faatonu: Randy D. Funk

Faufautua: Becky Craven, Sharon Eubank, Cristina B. Franco, Walter F. González, Larry S. Kacher, Jan E. Newman, Adrián Ochoa, Michael T. Ringwood, Vern P. Starfill

Pule Faatonusili: Richard I. Heaton

Faatonusili o Mekasini a le Ekalesia: Allan R. Loyborg

Pule o Mea Tau Pisinisi: Garff Cannon

Pule Faatonu: Adam C. Olson

Pule Faatonu Lagolago: Ryan Carr

Faasalalau Lagolago: Camilla Castrillon

Au Tūsitusi ma Faatonotonu: David Dickson, David A. Edwards, Matthew D. Flitton, Garrett H. Garff, Jon Ryan Jensen, Aaron Johnston, Charlotte Larcabal, Michael R. Morris, Eric B. Murdock, Joshua J. Perkey, Jan Pinborough, Richard M. Romney, Mindy Selu, Lori Fuller Sosa, Chakell Wardleigh, Marissa Widdison

Faatonusili o Faatufugaga: Tadd R. Peterson

Mamanu: Jeanette Andrews, Fay P. Andrus, Mandy Bentley, C. Kimball Bott, Thomas Child, Joshua Dennis, David Green, Colleen Hinckley, Eric P. Johnson, Susan Lofgren, Scott M. Mooy, Aleni Regehr, Mark W. Robison, K. Nicole Walkenhorst

Faatonu o le Puletaofia o Meotino: Collette Nebeker Aune

Pule i le Gaosiga: Ammon Harris, Jane Ann Peters

Gaosiga: Ira Glen Adair, Julie Burdett, José Chavez, Bryan W. Gygi, Ginny J. Nilson, Marissa M. Smith

Tailolomi: Joshua Dennis, Ammon Harris

Faatonusili Lomitusi: Steven T. Lewis

Faatonusili o Faletusi: Nelson Gonzalez

Mo le okaina o mekasini, alu i le store.ChurchofJesusChrist.org po o le Faletusi Tutotonu i Pesega. Telefoni 64127. Totogi o le Mekasini: \$0.55 (Samoa) I i le kopi. Totogi mo le Tausaga Atoa \$6.60 (Samoa).

Auina atu tusitusiga ma faafesili i luga o le initoneti i le liahona.

ChurchofJesusChrist.org: pe meli mai i le *Liahona*, flr. 23, 50 E. North Temple, Salt Lake City, UT 84150-0023, USA; po o le i-meli: liahona@ChurchofJesusChrist.org.

Liahona (o lona uiga i le Tusi a Mamonā o le "tapasa" po o se "faatonuāla") e lomia i le faa-Alepania, Aminia (Sasae), Pisilama, Palekeria, Kemupotia, Sepuano, Saina, Kalaotia, Siekisolovakia, Tenimaka, Take, Iglisi, Estonia, Fiti, Finelani, Farani, Siamani, Eleni, Hanikeri, Initu, Iselani, Initonesia, Italia, Iapani, Kiripati, Korea, Latvia, Lituania, Malakasa, Masela, Monokolia, Nouei, Polani, Potukale, Romania, Rusia, Samoa, Saina (ua faafaigoifeina), Silovenia, Sipaniolo, Suetena, Swahili, Tagaloka, Tahiti, Tai, Toga, Iukureini, Urutu, ma Viatename. (E eseese lava gagana.)

© 2020 Puletaofia e le Intellectual Reserve, Inc. Ua taofia aia tatau uma. Lomia i le lunaita Setete o Amerika.

Faamatalaga o le Puletaofia: Vagana ua faailoa mai, e mafai e tagata taitoatasi ona kopi anomea mai le *Liahona* mo lo latou lava faaagaina patino, e le faia ai ni pisinisi (e aofia ai valaauga o le Ekalesia). O lenei aia tatau e mafai ona faaleagaina i soo se taimi. E le tatau ona kopiina ia ata pe afai o loo faaalila le faasaina i le laina o faaalologa faatasi ai ma le faatufugaga. Ia auina mai fesili e uiga i le puletaofia i le Intellectual Property Office, 50 E. North Temple St., FL 13, Salt Lake City, UT 84150, USA; email: cor-intellectualproperty@ChurchofJesusChrist.org.

Mo le Auaifaitau i le Lunaita Setete ma Kanata:

May 2020 Vol. 44 No. 5. LIAHONA (USPS 311) Samoan (ISSN 1045-0947) is published monthly by The Church of Jesus Christ of Latter-day Saints, 50 E. North Temple St., Salt Lake City, UT 84150. USA subscription price is \$10.00 per year; Canada, \$12.00 plus applicable taxes. Periodicals Postage Paid at Salt Lake City, Utah. Sixty days' notice required for change of address. Include address label from a recent issue; old and new address must be included. Send USA and Canadian subscriptions to Salt Lake Distribution Center at address below. Subscription help line: 1-800-537-5971. Credit card orders (American Express, Discover, MasterCard, Visa) may be taken by phone or at store.ChurchofJesusChrist.org. (Canada Post Information: Publication Agreement #40017431)

POSTMASTER: Send all UAA to CFS (see DMM 507.1.5.2). NONPOSTAL AND MILITARY FACILITIES: Send address changes to Distribution Services, Church Magazines, P.O. Box 26368, Salt Lake City, UT 84126-0368, USA.



Sandy, luta, ISA

Faailaga i le Faasologa Faalafapeta

Andersen, Neil L., 18
 Ballard, M. Russell, 8
 Bednar, David A., 84
 Bingham, Jean B., 60
 Caussé, Gérald, 38
 Christofferson, D. Todd, 110
 Clayton, L. Whitney, 107
 Cook, Quentin L., 96
 Cordon, Bonnie H., 78
 Eyring, Henry B., 27, 66
 Giménez, Ricardo P., 101
 Gong, Gerrit W., 52
 Holland, Jeffrey R., 81
 Holmes, Douglas D., 23
 Jergensen, Kevin R., 31
 Jones, Joy D., 15
 Kaouk, Laudy Ruth, 56
 McCune, John A., 36
 Nelson, Russell M., 6, 72, 88, 92, 114
 Oaks, Dallin H., 30, 69, 93
 Petelo, Enzo Serge, 58
 Rasband, James R., 12
 Rasband, Ronald A., 75
 Renlund, Dale G., 41
 Soares, Ulisses, 32
 Stevenson, Gary E., 48
 Tai, Benjamin M. Z., 45
 Uchtdorf, Dieter F., 104

Faasino Autu

Agaga Paia, 88, 96
 Agalelei, 41
 Agavaa, 58
 Aiga, 107
 Alii, 60
 Alofa, 18, 23, 36, 81, 110
 Alofa mutimutivale, 12
 Alualu i luma o le tagata lava ia, 15, 45, 69
 Anapogi, 72
 Aoaina, 104
 Atamai, 18
 Atamu ma Eva, 60
 Ata o le faalataga, 69
 Auai, 69
 Aualofa, 60
 Avea ma Soo, 104, 107
 Eseta, 52
 Faaaliga, 15, 23, 88, 96
 Faaaliga faaletagata lava ia, 18, 88, 96
 Faaipoipoga, 69
 Faaleagaga, 48, 107
 Faamalologa, 12
 Faamanuiga, 58
 Faamanuiga faapeteriaka, 56
 Faamanuiga o le perisitua, 56
 Faamasinoga, 12, 69
 Faamasino tonu, 12
 Faamaturuga, 8
 Faamoemoe, 81
 Faapotopotoina o Isaraelu, 66, 78
 Faataitaga, 78, 110
 Faatuatua, 27, 48, 72, 101, 114
 Faigata, 6, 8, 32, 36, 38, 56, 88, 93, 101, 107
 Feagaiga, 84
 Fefe, 6
 Filemu, 6, 12, 36
 Galuega faafaifeautalai, 27, 66, 75, 104, 110
 Galuega faalemamalumu, 52, 66, 81, 84, 114
 Iesu Keriso, 6, 12, 36, 38, 41, 45, 48, 52, 66, 72, 78, 81, 84, 88, 93, 101, 104, 110, 114

Igoa o le Ekalesia, 72
 Iosefa Samita, 6, 8, 15, 18, 27, 32, 58, 60, 66, 75, 84, 88, 96, 101, 104, 110
 Ki, 69
 Liua, 45
 Loto faafetai, 41
 Lotogatasi, 23, 60
 Malamalama o Keriso, 78
 Malamalama, 48, 56, 75, 88, 92, 114
 Mana, 27
 Manuia, 107
 Molimau, 18, 32, 48
 Olioli, 101
 Paseka, 52
 Perisitua, 15, 58, 60, 66, 84
 Perisitua Mekisateko, 69
 Perofeta, 1, 75, 88, 96
 Salamo, 23, 45, 104
 Saolotoga, 23, 69
 Sauaga, 8
 Saunia, 6
 Sauniga, 69, 84
 Sootaga, 23
 Suesue i tusitusiga paia, 107
 Taitaiga, 23
 Taitai o le Ekalesia, 30
 Talafaasolopito o aiga, 84, 88
 Tama Faalelagi, 18, 41, 81, 88
 Tamaitai, 15, 60
 Tatalo, 27, 72
 Taulaga, 23, 110
 Toefuataiga, 8, 15, 27, 52, 60, 66, 75, 81, 88, 93, 110, 114
 Toetu, 52, 93, 110
 Togiola, 12, 38, 41, 52, 56, 93, 101
 Tusi a Mamonā, 12, 32, 38, 45, 110
 Tusitusiga Paia, 88
 Uluai Faaaliga, 6, 8, 15, 18, 27, 92, 69
 Upumoni, 69
 Valaauga i le Ekalesia, 96
 Valoaga, 75

Mea na Faamamafa mai mai le Konafesi Aoao Faaletausaga Lona 190



Sa i ai ia Peresitene Russell M. Nelson se savali manino i le konafesi aoao: “Faalogo ia te Ia.”

“E ao ona tatou saili atu, i ala uma tatou te mafaia, e faalogo ai ia Iesu Keriso, o lē e fetalai mai ia i tatou e ala i le mana ma le auunaga a le Agaga Paia,” na aoao mai ai Peresitene Nelson.

“O le faamoemoega o leni konafesi ma konafesi aoao uma o le fesoasoani lea ia i tatou ia faalogo ia te Ia” (itulau 7).

I se konafesi na taulai atu i le Uluai Faaaliga ma le Toefuataiga, sa aoaoina ai i tatou e mafai ona tatou faalogo ia te Ia, e faapei foi ona sa faia e Iosefa Samita i le Vao Paia. I le siomia ai e aafiaga o se faama’i oti i le lalolagi atoa ua aafia ai le fia miliona, sa aoaoina ai i tatou e faalogo ia te Ia mo se faasinoala i o tatou mafatiaga. O le vaavaai agai atu i se lumanai susulu mo le Ekalesia ma i tatou taitoatasi, sa aoaoina ai i tatou

ia toefaafou a tatou taumafaiga e faalogo ia te Ia ma mulimuli ia te Ia.

“O vaega e tele o leni konafesi aoao ia Aperila 2020,” na saunoa ai Peresitene Nelson, “. . . e mafai ona aoteleina i upu paia faapoloaiga se fa: ‘Faalogo ia te Ia.’ Matou te tatalo mo la outou taulaiga i le Tama Faalelagi, o lē na fetalai mai na upu, ma i Lona Alo Pele, o Iesu Keriso, ia avea ma mea sili ona taua e manatua pea mai mea uma na tutupu.”

A o e suesue i savali o leni konafesi, saili “ia faalogo, uai atu, usitaia afioga a le Faaola,” o le a e iloaina ua faataunuuna folafolaga a le perofeta i lou olaga “o le faaitiitia o le fefe ma le faateleina o le faatuatua” (itulau 114).

- Ua folasia mai e Peresitene Nelson se faatusa fou mo le Ekalesia i le itulau 73.
- Ua folasia mai e Peresitene Nelson se folafolaga e uiga i le Toefuataiga i le itulau 91.
- Ua taitai e Peresitene Nelson se potopotoga paia i le itulau 92.
- Ua fofogaina mai e Peresitene Nelson ni malumalu fou se valu i le itulau 115.
- Aoao atili i le auala e mafai ai ona tatou fesoasoani i isi e #FaalogoiateIa i le [HearHim.Church ofJesusChrist.org](https://www.hearhim.churchofjesuschrist.org). ■

O ATA O LE LOMIGA LENI

Ua matou taumafai e faapepa konafesi taitasi e ala i ata matou te lolomiina. E ui ina tulagaese konafesi taitasi, o ata o leni lomiga o loo atagia ai nisi o tulaga e le masani ai na tuuina mai i leni konafesi

E le gata i ata mai le faasalaluga, ae o le a e mauaina foi atapue mai le Lotoa matagofie o le Malumalu (e ui e le masani ona gaogao ona o le KOVITI-19 ma le galuega o le fauga), faapea foi ma atavali e faiā ma le Toefuataiga o le talalelei ma atapue na auina mai e tagata o le au paia o i latou lava o loo auai ai i le konafesi i le salafa o le lalolagi.



WALTER RINEY
VALAUA'U'U LE IGOA, SAUNIA E WALTER



Saunia e Peresitene Russell M. Nelson
Peresitene o Le Ekalesia a Iesu Keriso o
le Au Paia o Aso e Gata Ai

Tuleiga Amata

E ao ona tatou saili atu, i ala uma tatou te mafaia, e faalogo ai ia Iesu Keriso, o lē e fetalai mai ia i tatou e ala i le mana ma le auaunaga a le Agaga Paia.

O’u uso e ma tuafafine pele, a o matou faafeiloai atu ia te outou i lenei konafesi aoao faasolopito ia Aperila 2020 o Le Ekalesia a Iesu Keriso o le Au Paia o Aso e Gata Ai, mo ni mafuaaga ua tou silafia lava, ua ou tu ai i i luma o se potu gaogao.

E aunoa ma so’u iloa, ina ua ou folafola atu ia te outou i le konafesi aoao ia Oketopa o lenei konafesi ia

Aperila o le a “manatua pea” ma o le a “le galo lava,” o le lauga atu i se aofia o alala mai ii e itiiti ifo ma le 10 tagata o le a avea ai lenei konafesi ma konafesi e matua manatua pea ma lē galo lava *mo a’u!* Ae o le iloaina o loo outou auai mai e ala i fesootaiga faaeletonika, ma le fātuga matagofie a le auaipese o le “It Is Well with My Soul,” ua aumai ai se mafanafana tele i *lo’u* agaga.



E pei ona outou silafia, o le auai i lenei konafesi aoao ua matuā faatapu-laaina lava ona o se vaega o a tatou taumafaiga ina ia avea ma ni tagatanuu lelei i le lalolagi atoa ma ia faia mea uma tatou te mafaia e taofia ai le pipisi o le KOVITI-19. O lenei vairasi ua i ai sona aafiaga tele i le lalolagi atoa. Ua fesuia’i ai foi a tatou sauniga faale-Ekalesia, auaunaga faafaifeautalai, ma galuega faalemalumalu mo sina taimi.

E ui o tapu i aso nei e fesootai i se vairasi matautia, ae o tofotofoga patino o le olaga ua sili atu i lo lenei faamai pipisi. O ni tofotofoga o le lumanai e ono tupu mai se faalavelavae faafuasei, se mala faalenatura, po o se lototiga o le tagata ia sa le’i faamoemoeina.

E faapefea ona tatou onosaia ia tofotofoga? Ua ta’u mai e le Alii ia i tatou, “afai ua saunia outou o le a outou le matatau ai lava.”¹ Ioe, e mafai ona tatou teuina a tatou lava faaputuga faaleoleo o meaai, vai, ma teugatupe. Ae e tutusa foi le taua tele i lo tatou manaomia ona faatumu o o tatou faleteuoloa *faaleagaga* faaleta-gata lava ia i le faatuatua, upumoni, ma le molimau.

O le tatou sailiga silisili lava i le olaga o le saunia lea e feiloai ma lo tatou Mataisau. Tatou te faia lenei mea e ala i le tauivi i aso taitasi ia avea atili e pei o lo tatou Faaola, o Iesu Keriso.² Ma e tatou te faia *lena mea* pe a tatou salamo i aso taitasi ma maua Lana faamamāāga, faamalologa, ma le mana faamalosiāu. Ona mafai lea ona tatou lagonaina le filemu ma le olioli tumau, e oo lava i taimi faigata. O le mafuaaga tonu lea ua augani mai ai le Alii ia i tatou ia tutu i nofoaga paia ma “aua le masii ese.”³

I lenei tausaga, ua tatou faamantuina ai le 200 tausaga o se tasi o mea


silisili ona taua na tupu i le talafaa-solopito o le lalolagi—o le faaali mai o le Atua le Tama Faavavau ma Lona Alo Pele, o Iesu Keriso ia Iosefa Samita. I lena faaaliga e tasi, na tusi ane ai le aao o le Atua le Tama ia Iesu Keriso ma fetalai mai, “O Lo’u Atalii Pele lenei. Faalogo ia te Ia!”⁴

O lena apoapoaiga na tuuina atu ia Iosefa e mo i tatou uma taitoatasi. E ao ona tatou saili atu, i ala uma tatou te mafaia, e faalogo ai ia Iesu Keriso, o lē e fetalai mai ia i tatou e ala i le mana ma le auaunaga a le Agaga Paia.

O le faamoemoega o lenei konafesi ma konafesi aoao uma o le fesoasoani lea ia i tatou ia faalogo ia te Ia. Ua matou tatalo, ma valaaulia outou ia tatalo, ina ia faatasi mai le Agaga o le Alii ma i tatou i se faatelega na’ua e mafai ai ona e faalogo i savali ua i ai i le Faaola e faapitoa mo oe—savali o le a aumaia le filemu i lou agaga. O savali o le a faamaloloina lou loto nutimomoia. O savali o le a faamalamalamaina lou mafaufau. O savali o le a fesoasoani ia te oe ia iloa le mea e fai pe a e agai i luma i taimi o faigata ma tofotofoga.

Matou te tatalo mo lenei konafesi ina ia manatua pea ma lē galo lava ona o savali o le a outou faafofoga i ai, o faasilasilaga tulagaese o le a faia, ma aafiaga ia o le a valaauliaina outou ia auai ai.

Mo se faataitaiga, i le faaiuga o le sauniga o le taeao o le Aso Sa, o le a tatou taloina ai se faapotopotoga paia i le lalolagi atoa pe a ou taitaia outou i le Alalaga paia o le Osana. Matou te tatalo o le a avea ma se faatumutumu faaleagaga mo oe a o faailoa atu i se lotogatasi i le lalolagi atoa lo tatou lotofaafetai sili i le Atua le Tama ma Lona Alo Pele e ala i le viia o i La’ua i lenei ala tulaga ese.



ATA O KERISO, SAUNIA E HENRICH HOFMANN

Mo lenei aafiaga paia, tatou te faa-aogaina ai se solosolo mamā pa’epa’e. Ae afai e leai sau solosolo, ia tau lava ina talotalo mai lou lima. I le maea ai o le Alalaga o le Osana, o le a auai faatasi le potopotoga ma le aufaipese i le lagiina “O Le Agaga o le Atua.”⁵

O’u uso e ma tuafafine pele, o lenei konafesi o le a ofoofogia. O le a tulaga ese lenei tausaga pe a tatou taulai atu ma le loto i le Faaola ma Lana talalelei. O aafiaga sili ona taua ma tumau o lenei konafesi faasolopito pe a suia o tatou loto ma tatou amataina se sailiga o le olaga atoa e faalogo ia te Ia.

Susu maia i le konafesi aoao ia Aperila 2020! Ou te iloa o le Atua lo tatou Tama

Faalelagi ma Lona Alo, o Iesu Keriso, o loo mafaufau mai ia i tatou. O le a faatasi i La’ua ma i tatou i taulumaga uma o nei aso mamalu e lua a o tatou saili ia latalata atili atu ia i La’ua ma faamamalu i La’ua. I le suafa paia o Iesu Keriso, amene. ■

FAAMATALAGA

1. Mataupu Faavae ma Feagaiga 38:30.
2. Tagai i le 3 Nifae 27:27.
3. Mataupu Faavae ma Feagaiga 87:8.
4. Iosefa Samita—Talafaasolopito 1:17.
5. *Viiga*, nu. 2.



Curitiba, Paraná, Pasila



Saunia e Peresitene M. Russell Ballard
Sui Peresitene o le Korama a Aposetolo e Toasefululua

Tatou te Lē O Atu pea ea i Lenei Savali Sili?

E ao ina tatou manatua e le aunoa le tau na totogiina e Iosefa ma Ailama Samita, faatasi ai ma le anoanoai o isi alii ma tamaitai ma fanau faatuatua, e faavae ai le Ekalesia.

Faafetai tele lava, Peresitene, mo lenei amataga matagofie. Uso e ma tuafafine i le 215 tausaga talu ai, sa fanau mai ai se tama itiiti ia Iosefa ma Lusi Maki Samita i Veromota i se itulagi ua lauiloa o Niu Egelani i le itu i matusisifo o le Iunaite Setete.

Sa talitonu Iosefa ma Lusi Maki ia Iesu Keriso, sa suesue i tusitusiga paia, sa tatalo naunautai, ma sa savavali ma le faatuatua i le Atua.

Sa la faaigoaina le la atalii faatoa fanau mai ia Iosefa Samita le Itiiti.

E uiga i le aiga o Samita, na saunoa ai Polika Iaga: “Na tulimatai le fofoga o le Alii i luga [o Iosefa Samita], ma luga o lona tama, ma luga o le tama o lona tama, ma luga o o latou tuua e oo lava ia Aperamo, ma mai ia Aperamo e oo atu i le lolo, mai le lolo e oo atu ia Enoka, ma mai ia Enoka e oo atu ia Atamu. Na Ia tulimataiina lena aiga ma

lena toto a o salalau atu mai lona puna faavae e oo atu i le fanau mai o lena tagata. [O Iosefa Samita] sa muai faauuina i le faavavau e pulefaamalumalu i lenei tisipenisione mulimuli.”¹

Sa alofagia tele e lona aiga, ma sa sili ona latalata Iosefa le Itiiti i lona uso e matua atu o Ailama, o le sa ono ona tausaga i le taimi na fanau mai ai Iosefa.

Ia Oketopa talu ai, sa ou saofai ai i autafa o se maamafola i le magalafu sa i le tamai fale o Samita i Saronā, i Veromota, i le mea sa fanau mai ai Iosefa. Sa ou lagonaina le alofa o Ailama mo Iosefa ma mafaufau ia te ia a o sii lona uso pepe i ona lima ma aoao o ia ia savali.


Sa feagai ia Tama ma Tina ma faigata patino ma sa faamalositia ai i la’ua e fesiita’i faafia lo la aiga a o lei oo ina fiu i Niu Egelani ma faia ai le faaiuga lototoa e sii mamao ese i sisifo i le Setete o Niu Ioka.

Ona sa tutufaatasi le aiga, o lea sa latou sao mai nei luitau ma faafetaiaia faatasi le galuega faalotovaivai o le toe tau amata foi i se laueleele e selau-eka (0.4 km²) i le vaomatua i Manasetā, e lata i Palamaira, Niu Ioka.

Ou te le o mautinoa pe o silafia e le toatele o i tatou ia luitau faaletino ma faalelagona o le toe tauamata na feagai ma le aiga o Samita—o le tatuuina o laau, totoina o laau ’aina ma le vaomu’a, fauina o se tamai fale ogalaau ma isi fausaga faafaatoaga, faigaluega i nai galuega leipa togiaso, ma oloa sa gaosi i le fale e faatau i le taulaga.

E oo atu i le taimi na taunuu ai le aiga i Niu Ioka i sisifo, ua mumu saesae le tapisa o le eria i mataupu faalelotu—sa lauiloa o le Toefafagu Tele Faalua.

I le taimi lea o felafolafogaiga ma le faitagai o pati faalelotu, sa maua ai e Iosefa se faaaliga ofofofia, ua



Buenos Aires, Atenitina

lausilafia i ona po nei o le Uluai Faaaliga. Ua faamanuiaina i tatou i le i ai o uluai talatusitusia e fa ia o le a ou faaaogaina.²

Sa tusia e Iosefa: “I le gasologa o lea taimi o le vavaō tele sa faaosoina ai lo’u mafaufau e manatunatu mamafa ma le mautonu tele; ae e ui ina sa loloto o’u mafaufauga ma malos i le tele o taimi, ae sa ou le auai lava i se tasi o ia vaega uma, e ui ina sa ou auai i a latou faatasiga eseese i le tele o taimi sa mafai ai. . . . [Peitai] sa matua tele na’uā le faanununu ma le fefinau i totonu o lotu eseese, sa le mafai e se tagata talavou e pei ona sa ou i ai, ma le lē masani tele i tagata ma mea, ona maua se faaiuga mautinoa po o ai ua sa’o ma o ai foi ua sese.”³

Sa liliu atu Iosefa i le Tusi Paia e sue ai tali i ana fesili ma sa faitauina le Iakopo 1:5: “A e afai ua leai se potu i so outou, ina ole atu ia i le Atua, o le foai tele mai i tagata uma ma le toe ta’uta’ua, ona foaiina mai ai lea ia te ia.”⁴

Sa ia tusia: “E leai lava se mau o tusitusiga paia na oo mai i le lotu o se tagata ma le mana tele nai lo o lenei mau i lo’u lotu i lea taimi. Sa foliga ua ulu mai ma se mana tele i lagona uma o lo’u lotu. Sa ou mafaufau ma saga mafaufau pea i ai.”⁵

Na oo ina iloa e Iosefa sa lei maua i le Tusi Paia ia tali uma i fesili o le olaga; ae, na te aoaoina alii ma tamaitai i le ala e mafai ai ona latou maua tali ia latou fesili e ala i le talanoa sa’o atu i le Atua e ala i le tatalo.

Sa ia faaopoopo mai: “O lea, e tusa ai ma lenei, la’u filifiliga lea e ole atu ai i le Atua, sa ou alu atu ai i le togavao e faia lenei taumafaiga. O le taeao o se aso matagofie lava ma le manino, i le amataga lava o le tau totogo o le afe valu selau luasefulu.”⁶

Sa lei pine, ae fai mai Iosefa e faapea “[sa] oo mai [se malamalama] i o’u luga [ma] sa ou vaaia ni Tagata e toalua, o lo laua pupula ma le mamalu e lē mafaamatalaina, o tutu mai i o’u luga a’e i le ea. Sa fetalai mai le tasi o i laua ia te a’u, ma fofoga mai ia te a’u i lo’u igoa ma fetalai mai, a’o tusi ane i le tasi—[Iosefa,] *O Lo’u Atalii Pele lenei Faalogo ia te Ia!*”⁷

Ona fetalai mai ai lea o le Faaola, “Iosefa, lo’u atalii e, ua faamagaloina au agasala. Alu i ou ala, savali i a’u tulafono ma tausi i a’u poloaiga. Faauta, o a’u o le Alii o le mamalu. Sa faasatauroina au mo le lalolagi ina ia mafai ona maua e i latou uma o e talitonu mai i lou igoa le ola e faavavau.”⁸

Sa toe faaopoopo mai e Iosefa, “Sa lei umi ona ou maua o le pule ia te a’u, ina ia mafai ona ou tautala atu, sa ou fesili atu i Tagata o e sa tutu mai i o’u luga i totonu o le malamalama, po o le fea o nei lotu uma ua sa’o.”⁹

Sa ia ta’ua: “Sa laua fetalai mai ia te a’u o tapuaiga faalelotu uma ua talitonu i aoaoga faavae sese, ma e leai se tasi o i latou na faamaonia e le Atua e faapea o lana ekalesia ma le malo. Ma . . . i le taimi lava lea na [ou] mauaina ai se folafolaga e faapea, o le a faaaliga mai ia te a’u le atoatoaga o le talalelei i se taimi o le lumanai.”¹⁰

Na faamauiina foi e Iosefa, “Sa ou vaai i le tele o agelu i lenei faaaliga.”¹¹

Ina ua mavae lenei faaaliga mamalu, sa tusia e Iosefa: “Na faatumulia lo’u agaga i le alofa, ma mo le tele o aso, na mafai ona ou olioli ma le fiafia tele. . . . Sa i ai le Alii faatasi ma a’u.”¹²

Sa manu mai o Ia mai le Vao Paia e amata lenei tapenaga ia avea o se perofeta a le Atua.

Sa amata foi e Iosefa ona aoao mea sa oo i ai perofeta anamua—teenaina,



faafeagai, ma sauaga. Na manatua e Iosefa lona faasoa atu o mea sa ia vaaia ma faalogo ai i se tasi o faifeau o le sa lalamua i le taufaaolaolaga faalelotu:

“Sa ou ofo lava i lana amio; sa lē gata ina manatu faatauvaa o ia i la’u faamatalaga, ae ma le inoino tele, ua fai mai o lea mea atoa ua mai le tiapolo, e faapea ua lē toe i ai ni mea faapea o faaaliga vaaia po o faaaliga i ona po nei; e faapea o mea uma faapena sa gata i aposetolo, ma e faapea o le a lē toe i ai lava ia mea.

“E ui i lea, sa vave ona ou iloa, o lo’u faamatala atu o le tala sa faaosoina ai se faailoga tagata tele faasaga mai ia te a’u i totonu o polofesa o mea tau lotu, ma sa avea ma pogai o sauaga tetele, sa faateleina pea lava; . . . ma sa taatele lenei mea i totonu o ituaiga uma—ma sa auaufaatasi uma e sauaina a’u.”¹³

E tolu tausaga mulimuli ane, i le 1823, na toe tatala mai a le lagi o se vaega o le Toefuataiga faifai pea o le talalelei a Iesu Keriso i aso amuli. Sa faamau e Iosefa e faapea sa faaali atu se agelu, e igoa ia Moronae ia te ia ma faapea atu “o i ai i le Atua se galuega mo a’u ou te faia . . . [ma e faapea] o loo i ai se tusi ua teuina, ua tusia i luga o papatusi auro” o loo i ai “le atoatoaga o le Talalelei tumau—faavavau . . . e pei ona sa tuuina atu

e le Faaola i tagata sa i ai anamua [o Amerika].”¹⁴

Mulimuli ane, sa maua e Iosefa, faaliliu, ma lolomiina faamaumauga mai anamua, lea ua lauiloa i le asō o le Tusi a Mamona.

O lona uso o Ailama, o le sa avea mona lagolago e le aunoa, aemaise o le sosoo ai ma le taotoga tiga o lona vae na toe a uma ai lona soifua i le 1813, o se tasi o molimau o papatusi auro. O ia foi o se tasi o tagata e toaono o le Ekalesia a Iesu Keriso ina ua faatulagaina i le 1830.

I o la’ua soifuaga, sa fetaiiai faatasi Iosefa ma Ailama ma tagata faatupu faalavelave ma sauaga. Mo se faataitiga, sa la mafatia faatasi i tulaga aupito pagatia i le Falepuipui i Liperate mo le lima masina i le taimi o le taumalulu o le 1838–39.

Ia Aperila 1839, na tusi atu ai Iosefa i lona faletua o Ema e faamatala ai lo la tulaga i le Falepuipui o Liperate: “Ou te talitonu ua tusa nei ma le lima masina ma le ono aso talu ona ma i ai i lalo o le vaaiga a se leo-leo gutuleaga i po ma ao, ma i totonu o papuipui, o ta’igafi, ma le ‘o’i’o’i o faitotoa uamea, o se falepuipui faavauvau pogisa ma le palapala. . . . O le a aveesea i ma’ua mai lenei [nofoaga] po o le a lava le tulaga ae ma te fiafia i ai. Po o le a lava le mea ma te oo i ai, e le mafai ona ma oo atu i se isi lua e sili atu ona leaga nai lo lenei. . . . O le a ma le moomoo lava e toe foi ma i le Falepuipui o Liperate i Clay County Misuri. Ua lava lea e oo i le faavavau.”¹⁵

A o fetaiiai ai ma sauaga, sa faaalila e Ailama le faatuatua i folafolaga a le Alii, e aofia ai se faamaoniga e sola ese mai ona fili pe afai na te filifili e fai. I se faamanuiaga na maua e Ailama i le 1835 i lalo o aao o Iosefa Samita, sa folafola atu ai e le Alii ia

te ia: “O le a ia te oe le mana e te solaese ai mai lima o ou fili. O le a sailia lou ola ma le naunautaiga e le uma, ae o le a e solaese. *Pe afai e te malie i ai*, ma e manao i ai, *o le a ia te oe le mana i lou lava faitalia e te oti ina ia faamamaluina ai le Atua.*”¹⁶

Ia Iuni i le 1844, sa tuuina atu ai ia Ailama le filifiliga e ola pe oti ina ia faamamaluina ai le Atua ma ia “faamau faailoga e ia lana molimau i lona toto”—e tutufaatasi ma lona uso pele o Iosefa.¹⁷

I se vaiaso a o loma le malaga lē maalofia le oti i Karefaasi, i le mea sa fasiotia faamoemoeina ai i laua e se au faaaupegaina o tagata palaaai o e sa valiina o latou mata ia aua nei iloa, sa tusia ai e Iosefa e faapea “sa ou fautuaina lo’u uso o Ailama e ave lona aiga i le isi setima ma o i Cincinnati.”

Ou te lagonaina pea le lotomomomo pe a ou manatuaina le tali a Ailama, “Iosefa, *e le mafai ona ou tuua oe.*”¹⁸

O lea na o ai Iosefa ma Ailama i Karefaasi, i le mea na avea ai i la’ua o ni maturo mo le faamoemoeaga ma le suafa o Keriso.

O le faasilasilaga aloaia o le faamaturoida na ta’ua ai mea nei: “O Iosefa Samita, le Perofeta ma le Tagatavāai a le Alii, . . . na ia aumaia le Tusi a Mamona, lea na faaliliuina e ia i le meaalofo ma le mana o le Atua, ma sa avea ma ala na faasalalau atu ai i konetineta e lua; auina atu le ‘atoatoaga o le talalelei tumau-faavavau, ua i ai i ona totonu, i itu e fa o le lalolagi; aumai faaaliga ma poloaiga ua i ai i le tusi lenei o Mataupu Faavae ma Feagaiga, ma le tele o isi tusi ma aoaoga poto mo le manuia o le fanauga a tagata; faapotopoto le tele o afe o le Au Paia o Aso e Gata Ai, faavae se aai tele, ma tuua se ta’uta’ua ma se igoa e lē mafai ona faaumatia. . . . Ma e pei

o le toatele o le ‘au faauuina a le Alii i taimi anamua, na faamau faailogaina ofi e [Iosefa] lana misiona ma lana galuega i lona lava toto; ma e faapena foi i lona uso o Ailama. *Ile soifuaga sa lei fevaevaea’i i la’ua, ma sa lei tuueseeseina foi i laua i le oti!*”¹⁹

Ina ua mavae le faamaturoida, sa toefaafoi atu tino o Iosefa ma Ailama i Navu, mulumulu, ma faaofuina ina ia mafai e le aiga o Samita ona vaai ia latou pele. Sa ta’ua e lo la tina peleina: “Sa ou taofiofi mo se taimi umi neuro uma, faaosofia malosiaga uma o lo’u agaga, ma valaau atu i le Atua ia faamalosiā a’u; ae ina ua ou ulu atu i le potu, ma vaaia tino maluu o o’u atalii ua taoto uma mai i luma o o’u mata; ma faalogoina masusu ma leo oi a lo’u aiga ma le fetagisi mai laugutu o a la’ua ava, fanau, uso, ma tuafafine, sa matua tele naua. Sa ou faagoto ifo i lalo ma tagi atu i le Alii, i le mamafatu o lo’u agaga, ‘Lo’u Atua! Lo’u Atua e! Se a ea le mea ua e tuulafoaia ai lenei aiga?’”²⁰

I le taimi lena o le faanoanoa ma le mamafatu, sa ia faalogoina i la’ua o fai mai, “Tina, aua tou te fetagisi mo i ma’ua, ua ma faatoilaloina le lalolagi i le alofa.”²¹

Ua Ia manumalo lava i le lalolagi. O Iosefa ma Ailama Samita, e faapei foi o le au Paia o loo faamatalaina i le tusi o Faaaliga, “na o mai mai le puapuaga tele, ua ta foi o latou ofu, ma ua faasinasinaina o latou ofu i le toto o le Tamai Mamoe [ma] ua . . . i luma o le nofoalii o le Atua, ua latou auuina foi ia te ia i lona malumalu i le ao ma le po: o lē tietie foi i le nofoalii e mau ma i latou.

“Latou te le toe fia aai, e le toe fia inu foi; e le ogotia i latou i le la, po o se vevela.

“Aua o le Tamai Mamoe o loo i luma o le nofoalii na te fafaga ia i tatou ma ta’ita’i ia te i tatou i puna o

vai ola; e sōloieseina foi e le Atua o loimata uma nai o latou mata.”²²

A o tatou faamanatuina lenei sauniga fiafia, le lona 200 tausaga o le Uluai Faaaliga, e ao ina tatou manatua e le aunoa le tau na totogiina e Iosefa ma Ailama Samita, faatasi ai ma le anoanoai o isi alii ma tamaitai ma fanau faatuatua, e faavae ai le Ekalesia ina ia mafai ai e oe ma au ona sapi i le tele o faamanuiaga ma upumoni faaaliga ua tatou maua i ona po nei. E le tatau lava ona faagaloina lo latou faatuatua!

E tele taimi sa ou manatunatu ai pe aisea lava na soona faatigainaina ai Iosefa ma Ailama ma o la aiga. Atonu ina ua o latou iloa le Atua e ala i lo latou puapuagatia i auala semanu e le mafai ai ona tutupu. E ala mai i na puapuaga, sa latou manatunatu ai i Ketesemane ma le satauro o le Faaola. E pei o la Paulo, “Auā ua foaiifuaina ia te outou ona o Keriso, e le na ona ia faatuatua ia te ia, a ia faatigaina foi outou ona o ia.”²³

A o lumanai lona maliu i le 1844, sa tusia e Iosefa se tusi faamalosiā i le Au Paia. O se valaau ia faatino, lea lava e faaauau i le Ekalesia i ona po nei.

“Uso e [ma tuafafine], *tatou te lē o atu pea ea i lenei savali sili?* O atu i luma ae le o le solomuli. Lototetele, uso e [ma tuafafine]; o atu pea, o atu pea i le manumalo! . . .

“. . . O lea, ia tatou osi atu, o se ekalesia ma se nuu, ma se Au Paia o Aso e Gata Ai, se taulaga i le Alii i le amiotonu.”²⁴

A o tatou faalogologo atu i le Agaga i le faamanatuina o le 200 tausaga i le faaiuga o lenei vaiaso, mafaufau po o le a se taulaga o le a e ofoina atu i le Alii i le amiotonu i aso o lumanai nei. Ia lototetele—faasoā atu i se tasi e te talitonuina, ma o le mea e sili ona taua, faamolemole ia faaavanoa se taimi e fai ai!

Ou te iloa e finagalo malie le Faaola pe a tatou tuuina atu ia te Ia se taulaga mai o tatou loto i le amiotonu, e faapei foi ona sa faamalieina o Ia i le taulaga faamaoni a na uso ofoofogia o Iosefa ma Ailama Samita, ma isi Au Paia faatuatua uma. Ou te molimau atu ai ma le paia a’ia’i i nei mea i le suafa paia ma mamalu o lo tatou Alii o Iesu Keriso, amene. ■

FAAMATALAGA

1. Brigham Young, i le *Aoaoga a Peresitene o le Ekalesia: Iosefa Samita* (2007), 544; tagai foi i Brigham Young, “Remarks,” *Deseret News*, Oct. 26, 1859, 266.
2. O loo i ai ni tala autu e fa o le Uluai Faaaliga lea sa ou siina mai; tagai i le “Joseph Smith’s Accounts of the First Vision,” josephsmithpapers.org.
3. Iosefa Samita—Talafaasolopito 1:8.
4. Tagai i le Iosefa Samita—Talafaasolopito 1:11.
5. Iosefa Samita—Talafaasolopito 1:12.
6. Iosefa Samita—Talafaasolopito 1:14.
7. Iosefa Samita—Talafaasolopito 1:17.
8. I le Iosefa Samita, “History, circa Summer 1832,” 3, josephsmithpapers.org; spelling, punctuation, and capitalization standardized.
9. Iosefa Samita—Talafaasolopito 1:18.
10. Iosefa Samita, “Church History,” *Times and Seasons*, Mar. 1, 1842, 707; tagai foi i le josephsmithpapers.org.
11. Iosefa Samita, “Journal, December 1835–1836,” 24, josephsmithpapers.org.
12. Iosefa Samita, “History, circa Summer 1832,” 3, josephsmithpapers.org; punctuation and capitalization standardized.
13. Iosefa Samita—Talafaasolopito 1:21–22.
14. Iosefa Samita—Talafaasolopito 1:33–34.
15. Iosefa Samita, “Letter to Emma Smith, 4 April 1839,” 1–2, josephsmithpapers.org; spelling, punctuation, and capitalization standardized.
16. Iosefa Samita, i le “Minute Book 1,” 186, josephsmithpapers.org; emphasis added; punctuation standardized.
17. Tagai i le Mataupu Faavae ma Feagaiga 136:39.
18. Iosefa Samita, “History of Joseph Smith,” *The Latter-day Saints’ Millennial Star*, Apr. 19, 1862, 248; faaopoopo le faamamafa.
19. Mataupu Faavae ma Feagaiga 135:3; faaopoopo le faamamafa.
20. “Lusi Maka Samita, Talafaasolopito, 1845,” 312–13, josephsmithpapers.org; spelling and punctuation standardized.
21. “Lusi Maka Samita, Talafaasolopito, 1845,” 313, josephsmithpapers.org.
22. Faaaliga 7:14–17.
23. Filipi 1:29.
24. Mataupu Faavae ma Feagaiga 128:22, 24; ua faaopoopo le faamamafa.



IOSEFA MA AILAMA SAMITA O LOO TUTU I AUTAFA O LE VAITAFE, SAUNIA E THEODORE S. GORICA



Saunia e Elder James R. Rasband
O Le Fitugafulu

Faamautinoaina o se Faamasinoga Amiotonu

Ina ia mautinoa se faamasinoga amiotonu, o le a aveesea e le taulaga togiola a le Faaola le lavelave o le lē iloa o se mea ma le matuitui tiga o faatiga na faia e isi.

Ua Aoa Mai e le Tusi a Mamona le Aoaoga Faavae a Keriso

Ia Oketopa talu ai, sa luiina ai i tatou e Peresitene Russell M. Nelson e mafaufau pe faapefea ona ese o tatou olaga pe afai “e aveese faafuasei [lo tatou] malamalama na maua mai le Tusi a Mamona?”¹ Sa ou mafaufau loloto i lana fesili, ou te mautinoa foi e faapena le toatele o outou. E tasi se manatu e oo mai pea lava—a aunoa ma le Tusi a Mamona ma lona manino e uiga i le mataupu faavae a Keriso ma Lana taulaga togiola, o fea ou te liliu i ai mo se filemu?

O le mataupu faavae a Keriso—lea e i ai mataupu faavae ma sauniga faaola o le faatuatua ia Keriso, salamo, papatisoga, le meaalofo o le Agaga Paia, ma le tumau e oo i le iuga—ua anoanoai taimi ua a’oa’o mai ai i tusitusiga paia uma o le Toefuataiga ae faatasi ma le mana faapitoa i totonu o le Tusi a Mamona.² E amata le mataupu faavae i le faatuatua ia Keriso, ma o ona elemene uma taitasi e faalagolago i le faatuatua o Lana taulaga togiola.

E pei ona a’oa’o mai Peresitene Nelson, “Ua tuuina mai e le Tusi a Mamona le atoatoaga ma le malamalamaaga sili ona mausali o le Togiola a Iesu Keriso e maua i soo se mea.”³ O le tele lava o lo tatou malamalama i le meaalofo paia a le Faaola, o le tele foi lea o lo tatou iloa, i o tatou mafau-fau ma i o tatou loto,⁴ o le moni o le faamautinoaga a Peresitene Nelson e faapea “o upumoni o le Tusi a Mamona ua i ai le *mana* e faamalolo ai, faamafanafana, toefuatai, fesoa-soani, faamalosi, faatoafimalie, ma faafiafia o tatou agaga.”⁵

Ua Faamalieina e le Togiola a le Faaola Manaoga Uma o le Faamasinotonu

O se sao taua o le Tusi a Mamona e aumaia le filemu i lo tatou malamalamaaga o le Togiola a le Faaola, o ona aoaoga ia e faapea e faataunuu e le taulaga alofa mutimutivale a Keriso manaoga uma o le faamasinotonu. E pei ona faamatala mai e Alema: “Ua togiola ai e le Atua lava ia mo agasala a le lalolagi, e faataunuu ai le fuafuaga o le alofa mutimutivale, e faamalie ai

manaoga o le faamasinotonu, ina ia mafai ona avea le Atua ma Atua ua atoatoa, faamasinotonu, ma se Atua alofa mutimutivale foi.”⁶ O le fuafuaga mutimutivale a le Tama⁷—ua ta’ua foi e tusitusiga paia o le fuafuaga tele o le fiafia⁸ po o le ata o le faaolataga⁹—sa le mafai ona faataunuuina se’i vagana ua faamalieina uma manaoga o le faamasinotonu.

Ae o a tonu lava “manaoga o le faamasinotonu”? Mafaufau i le aafiaga o Alema lava ia. Manatua, a o tama talavou, sa alu atu ma saili “e lepeti le ekalesia”¹⁰ O le mea moni, sa ta’u atu e Alema i lona atalii o Helamana e faapea sa ia “mafatia ai i tiga o seoli” ona sa ia mataalia i le “fasiotia o le toatele o fanau [a le Atua]” e ala i le taitai “ese atu i latou i le faafanoga.”¹¹

Na faamatala e Alema ia Helamana e faapea na i’u ina oo mai le filemu ia te ia ina ua “tau ane [lona] mafaufau” i aoaoga a lona tama “e uiga i le afio mai o . . . Iesu Keriso . . . e togiola mo agasala a le lalolagi.”¹² Sa augani atu Alema ua salamo mo le alofa mutimutivale o Keriso¹³ ona ia lagona lea o le olioli ma le toomaga ina ua ia iloa sa togiolaina e Keriso ana agasala ma totogi uma le faamasinotonu na manaomia. E toe fai atu, o le a le mea e manaomia e le faamasinotonu mai ia Alema? E pei ona a’oa’o mai mulimuli ane e Alema lava ia “E leai se mea le mama, e mafai ona mautofi i le malo o le Atua.”¹⁴ O lea, masalo o se vaega o le toomaga o Alema faapea, a na le ai’oia e le alofa mutimutivale, semanu e taofia o ia e le faamasinotonu mai le toe foi atu e mau faatasi ma le Tama Faalelagi.¹⁵

Ua Faamalolo e le Faaola Manu’a e Lē Mafai ona Tatou Faamaloloina

Ae pe na taulai atu ea le olioli o Alema ia te ia lava—i lona aloese mai

le faasalaga ma *lona* mafai ona toe foi atu i le Tama? Ua tatou iloa sa mafatia foi Alema ia i latou sa ia taitaieseina mai le upumoni.¹⁶ Ae sa le mafai e Alema ona faamalolo ma toefafoi mai i latou uma sa ia taitaieseina. Sa le'i mafai e ia lava ona faamautinoa o le a tuuina atu ia i latou se avanoa talafeagai e aoao ai le mataupu faavae a Keriso ma ia faamanuiaina e ala i le ola ai i ona mataupu faavae faafiafiaina. Na te le'i mafai ona toe faafoi mai i latou atonu sa maliliu o tauaso pea ona o ana aoaoga sese.

E pei ona a'oa'o mai Peresitene Boyd K. Packer i se tasi taimi: "O le manatu na laveaiina Alema . . . o lenei: O le toefuataiina o le mea e le mafai ona e toefuata'i, o le faamaloloina o le manu'a e le mafai ona e faamaloloina, o le faaleleia o le mea na e lepetia ma e le mafai ona e faaleleia, o le faamoe-moega tonu lea o le togiola a Keriso."¹⁷ O upumoni faafiafiaina lea na "tau ane" i le mafaufau a Alema sa le gata na mafai ona toe faamamāina ai o ia ae o i latou foi sa ia faatiga i ai e mafai ona faamaloloina ma faaatoatoaina.

Ua Faamautinoaina e Le Taulaga a le Faaola se Faamasinoga Amiotonu

O le tele o tausaga a o le'i laveaiina Alema e lenei aoaoga faavae mautinoa, sa a'oa'o mai ai le Tupu o Peniamina e uiga i le lautele o le faamalologa ua ofoina mai e le taulaga togiola a le Faaola. Sa tautino mai e le Tupu o Peniamina e faapea o "tala fiafia o le olioli tele" na tuuina atu ia te ia e "se agelu mai le Atua."¹⁸ Faatasi ma na tala fiafia o le upumoni o le a mafatia Keriso ma maliu mo a tatou agasala ma mea sese ina ia mautinoa "ia oo mai ai se *faamasinoga tonu* i luga o le fanauga a tagata."¹⁹

O le a tonu le mea e manaomia e se "faamasinoga tonu"? I le fuaiupu

e sosoo ai, sa faamatala e le Tupu o Peniamina faapea, ina ia mautinoa se faamasinotonu, sa togiola le toto o le Faaola "mo agasala a i latou o e na pauu i le solitulafono a Atamu" ma mo i latou "o e na maliliu e aunoa ma le iloa o le finagalo o le Atua e uiga ia te i latou, po o e na agasala i le lē iloa."²⁰ Sa ia aoao mai, o se faamasinotonu sa manaomia ai foi le "togiola o le toto o Keriso mo" agasala a fanau laiti.²¹

Ua a'oa'o mai e nei mau se aoaoga faavae mamalu: e faamaloloina e le taulaga togiola a le Faaola, i le avea ai ma se meaalofo foi fua, i latou o e agasala i le lē iloa o se mea—o i latou, e pei ona ta'ua e Iakopo e "leai se tulafono ua tuu mai."²² O le tali atu a le tagata ia mo le agasala e faalagolago lea i le malamalama ua tuuina mai ia i tatou ma e faalagolago i lo tatou tomai e faaoga ai lo tatou faitalia.²³ Ua tatou iloina leni upumoni faamalolo ma mafanafana ona o le Tusi a Mamona ma isi tusitusiga paia o le Toefuataiga.²⁴

E moni lava, afai ua i ai se tulafono ua tuu mai, lea tatou te iloa ai le finagalo o le Atua, tatou te tali atu la. E pei ona faamamafa mai e le Tupu o Peniamina: "Talofa i lē e iloa ua fouvale o ia e faasaga i le Atua! Ona e lē oo mai le olataga i se tasi faapena vagana ai e ala i le salamo ma le faatuatua i le Alii o Iesu Keriso."²⁵

O leni foi mea o le tala fiafia o le mataupu faavae a Keriso. E le gata e faamalolo ma toefaaleleia e le Faaola i latou o ē agasala i le lē iloa o se mea, ae faapea foi, mo i latou o ē agasala e faasaga i le malamalama, ua ofo mai e le Faaola le faamalologa i luga o tuutuuga o le salamo ma le faatuatua ia te Ia.²⁶

Masalo sa "tau ane" ai Alema i nei upumoni e lua. Pe mata na lagona moni ea e Alema le mea na



O KERISO O LOO TATALO I LE FAATOAGA O KETESEMAVE SAUNIA E HERMANN CLEMENTZ

ia faamatalaina o le "suamalie . . . [o le] olioli"²⁷ pe ana ia manatu na faasaoina o ia e Keriso ae tuua pea e faavavau le tiga o i latou sa ia taitaieseina mai le upumoni? E mautinoa e leai. Mo Alema ina ia lagona le filemu atoatoa, sa manaomia foi e i latou sa ia faatiga i ai le avanoa ina ia faaatoatoaina ai.

Ae faapefea tonu la ona faaatoatoaina i latou—po o i latou atonu tatou te faatiga i ai? E ui tatou te le malamalama atoatoa i gasologa paia lea e faamaloloina ai e le taulaga togiola a le Faaola ma toefaaleleia, tatou te iloa lena mea e faamautinoa ai se faamasinoga amiotonu, o le a aveesea e le Faaola le lavelave o le lē iloa o se mea ma le matuitui tiga o faatiga na faia e isi.²⁸ E ala i leni mea ua Ia faamautinoa mai o le a tuuina mai i fanau uma a le Atua le avanoa, faatasi ma se vaaiga manino, e filifili ai e mulimuli ia te Ia ma talia le fua-fuaga sili o le fiafia.²⁹

O Le A Fusufusia e le Faaola Mea Uma sa Tatou Nutimomoiaina

O upumoni lava nei na aumaia ia Alema le filemu. Ma o nei lava upumoni e tatau foi ona aumaia ia i tatou le filemu tele. I le avea ai ma alii ma tamaitai natura, e taia uma ai i tatou, pe i nisi taimi e fetoi ai, le tasi ma le isi ma mafua ai ona tiga. E pei ona molimau ai soo se matua, o le tiga e fesootai ma a tatou mea sese e lē ona o le fefe i lo tatou lava faasalaga ae o le fefe ne'i ono tatou

faatapulaaina le fiafia o a tatou fanau pe i nisi ala e taofia ai i latou mai le vaايا ma le malamalama i le upumoni. O le folafolaga mamalu o le taulaga togiola a le Faaola e faapea, e tusa ai ma tatou mea sese o ni matua, Na te lē tuua'ia a tatou fanau ma folafola mai le faamalologa mo i latou.³⁰ Ma e tusa pe latou te agasala e faasaga i le malamalama—e pei ona tatou agasala uma—e faaloaloa mai Lona aao o le alofa mutimutivale³¹ ma o le a Ia togiola i latou pe afai latou te vaai atu ia te Ia ma ola ai.³²

E ui e i ai i le Faaola le mana e faaleleia ai mea e le mafai ona tatou faaleleia, ae ua Ia poloaiina i tatou ia faia mea uma tatou te mafaia e faia ai le toefaaleleiga o se vaega o la tatou salamo.³³ E le gata e aveesea e a tatou agasala ma mea sese lo tatou sootaga ma le Atua ae faapena foi a tatou sootaga ma isi. Atonu o nisi taimi o a tatou taumafaiga e faamalolo ma faaleleia e faigofie e pei o se faatoesega, ae o isi taimi o le toefaaleleiga e ono manaomia ai le tele o tausaga o taumafaiga lotomauualalo.³⁴ Ae, mo le tele o a tatou agasala ma mea sese, e le mafai ai ona tatou faamaloloina atoatoa i latou ua tatou faamanualaiaina. O le folafolaga ofofofia o le filemu e maua mai le Tusi a Mamona ma le talalelei toefuataiina e faapea, o le a fusifusia e le Faaola mea uma sa tatou nutimomoiaina.³⁵ Ma o le a ia fusifusia foi i tatou pe a tatou liliu atu ia te Ia i le faatuatua ma salamo i faatiga na tatou faia.³⁶ Ua Ia ofo uma mai nei meaalofa ona e alofa o Ia ia i tatou uma i se alofa atoatoa³⁷ ma ona ua Ia tuuto e faamautinoa se faamasinoga amiotonu lea e faamamaluina uma le faamasinotonu ma alofa mutimutivale. Ou te molimau atu e moni nei mea i le suafa o Iesu Keriso, amene. ■

FAAMATALAGA

1. Russell M. Nelson, “Malelega Faaii,” *Liahona*, Nov. 2019, 122.
2. Tagai i le 2 Nifae 31; 3 Nifae 11:28, 32, 35, 39–40; Mataupu Faavae ma Feagaiga 10:62–63, 67–70; 68:25; Mose 6:52–54; 8:24; Mataupu Faavae o le Faatuatua 1:4.
3. Russell M. Nelson, “O Le Tusi a Mamona: Faamata e Faape'i Lou Olaga e Aunoa ma Ia?” *Liahona*, Nov. 2017, 62.
4. Tagai i le Mataupu Faavae ma Feagaiga 8:2–3.
5. Russell M. Nelson, “O Le Tusi a Mamona: E Faape'i Lou Olaga e aunoa ma Ia?” 62.
6. Alema 42:15.
7. Tagai i le Alema 42:15.
8. Tagai i le Alema 42:8.
9. Tagai i le Alema 24:14; Mose 6:62.
10. Tagai i le Mosaea 27:8–10.
11. Alema 36:13, 14.
12. Alema 36:17, 18.
13. Tagai i le Alema 36:18.
14. Alema 40:26; tagai foi i le 1 Nifae 15:34; Alema 7:21; 11:37; Helamana 8:25.
15. Tagai i le 3 Nifae 27:19; tagai foi i le Mose 6:57.
16. Tagai i le Alema 36:14–17.
17. Boyd K. Packer, “O Le Taeaio Pupula o le Faamagaloga,” *Ensign*, Nov. 1995, 19–20.
18. Mosaea 3:2, 3.
19. Mosaea 3:10; faaopoopo le faamamafa.
20. Mosaea 3:11; tagai foi i le 2 Nifae 9:26.
21. Mosaea 3:16; tagai foi i le Mosaea 15:25; Moronae 8:11–12, 22.
22. 2 Nifae 9:25.
23. Tagai i le 2 Nifae 2:26–27; Helamana 14:29–30.
24. Tagai i le Mataupu Faavae o le Faatuatua 1:2; tagai foi Mataupu Faavae ma Feagaiga 45:54. I le faalateleina o le aoaoga faavae o le papatisoga mo e ua maliliu, na saunoa ai le Perofeta o Iosefa i se tasi taimi: “A o faamasinoina ma ta'usalaina e le tasi vaega o tagata le isi e aunoa ma le alofa mutimutivale, ua silasila mai le Matua Sili o le vanimonimo i luga o le aiga atoa o tagata ma se popole faatama ma le manatu faamatua; e silasila o Ia ia te i latou o Ana fanau. . . . O Ia o se Faitulafono faautauta, ma o le a faamasinoina tagata uma, e le fuaina i manatu pumoomoo, ma manatu faapitoa o tagata. . . . O lea Ia faamasinoina i latou, 'e le tusa ai ma mea e le o i ai ia i latou, ae tusa ai ma mea ua ia i latou'; o i latou o e ua ola e aunoa ma le tulafono, o le a faamasinoina e aunoa ma le tulafono, a o i latou o e i ai le tulafono, o le a faamasinoina e lena tulafono. E le tatau ona tatou masalosalo i le faautautaga ma le atamai o le Ieova Silisili; o le a Ia tauia le faamasinoga po o

le alofa mutimutivale i nuu uma e tusa ai ma ni o latou aiaiga eseese, o latou auala e maua ai le atamai, tulafono ia e pulea ai, o auala e fesoasoani ia i latou e maua ai faamatalaga tonu, ma . . . o le a oo lava ina tatau ona tatou ta'uta'u atu o le Faamasino o le lalolagi atoa ua faia le mea sa'o”

(*Aoaoga a Peresitene o le Ekalesia: Iosefa Samiia* [2007], 404).

25. Mosaea 3:12; tagai foi i le 2 Nifae 9:27.
26. Tagai i le Mosaea 3:12; Helamana 14:30; Moronae 8:10; Mataupu Faavae ma Feagaiga 101:78. O tagata taitoatasi e mafai ona lē iloa se mea e uiga i poloaiga ma feagaiga faapitoa pe e le mafai ona faatino lo latou faitalia i nisi o tulaga ae e mafai ona tali atu i isi tulaga ona o le Malamalama o Keriso ua latou mauaina (tagai i le 2 Nifae 9:25; Moronae 7:16–19). O le Faaola, o lo tatou faamasino ma ua faamautinoa mai se faamasinoga amiotonu, o le a tuueseeseina nei tulaga (tagai i le Mamona 3:20; Mose 6:53–57). Ma ua la totogia le tau mo ia mea uma—o le vaega muamua e le faatuaoia ma le vaega mulimuli e tusa ma tuutuuga o le salamo.
27. Alema 36:21.
28. Tagai i le Mosaea 3:11; tagai foi i le D. Todd Christofferson, “Togiola,” *Liahona*, Me 2013, 110; Alema 7:11–12 (“o le a Ia ave i ona luga tiga ma ma'i o ona tagata. . . . Ma o le a ia ave i ona luga o latou vaivaiga”); Isaia 53:3–5 (“E moni ua na tauave o tatou tiga, ma na tauave o tatou faanoanoa”); 61:1–3 (“Ua fauuina a'u e Ieova e . . . fufusi i e loto momomo, . . . e avatu le fiafia i e faanoanoa i Siona, e foaiina atu ia i latou le matagofie e sui a'i le lefulefu, o le uu o le olioli e sui a'i le faanoanoa”). O se aoaoga lava le siiina mai e le Faaola mai i nei fuaiupu i le Isaia ina ua Ia faalauiloa atu Lana Mesia: “O le aso nei ua taunuu ai lenei Tusi, o outou o faalogologo ai” (tagai i le Luka 4:16–21).
29. I le lalolagi o agaga, “e tala'i atu le talalelei i ē lē iloa se mea, o ē lē salamo, ma ē fouvale ina ia mafai ona faasaolotoina i latou mai lo latou pologa ma agai i luma i faamanuiga ua faapolopolo e se Tama Faalelagi alofa mo i latou.” (Dallin H. Oaks, “Faalagolago i le Alii,” *Liahona*, Nov. 2019, 27). Tagai i le 1 Peteru 4:6; 2 Nifae 2:11–16; Mataupu Faavae ma Feagaiga 128:19; 137:7–9; 138:31–35.
30. Tagai i le Mose 6:54. Sa a'oa'o mai e Peresitene M. Russell Ballard lenei aoaoga faavae e faatatau i le pule i le ola: “Na o le Alii lava na te silafia mea auiliili uma, ma o ia na te faamasinoina a tatou mea e fai



Saunia e Joy D. Jones
Peresitene Aoao o le Peraimeri

O Se Valaauga e Faapitoa Lona Tamalii

I le avea ai ma tamaitai o le faatuatua, e mafai ona tatou mafaufau i mataupu faavae o le upumoni mai aafiaga o le Perofeta o Iosefa lea e tuuina mai ni malamalamaaga mo le mauaina o a tatou lava faaaliga.

- iinei i le lalolagi. Pe a ia faamasinoina i tatou, ou te lagona o le a Ia aumaia mea uma lava e iloilo: o uiga o le tino e fananau mai ma i tatou, o tulaga o o tatou mafaufau, lo tatou gafatia faaleatamai, aoaoga tatou te maua, o uputuu a o tatou tama, lo tatou ola maloloina, ma isi mea faapena. Ua tatou a'oa'o mai tusitusiga paia o le toto o Keriso o le a togiola mo agasala a tagata 'o e na maliliu e aunoa ma le iloa o le finagalo o le Atua e uiga ia te i latou, po o e na agasala i le lē iloa' (Mosaea 3:11)" ("Pule i le Ola: O Nisi Mea Ua Tatou Iloa, A O Nisi Mea Tatou Te Le Iloa E Uiga I Le Pule i le Ola," *Ensign*, Oct. 1987, 8; *Tambuli*, Mar. 1988, 18)
31. Tagai i le Iakopo 6:5; Mosaea 29:20; 3 Nifae 9:14; Mataupu Faavae ma Feagaiga 29:1.
 32. Tagai i le Helamana 8:15.
 33. Tagai i le Levitiko 6:4–5; Esekielu 33:15–16; Helamana 5:17; Mataupu Faavae ma Feagaiga 58:42–43.
 34. Na o le pau lea o ituaiga o taumafaiga na auai ai Alema (tagai i le Alema 36:24).
 35. Na a'oa'o mai e Peresitene Boyd K. Packer leni mataupu mamana:
 "E i ai taimi e le mafai ai ona e fonoina le mea na e sasaea. Atonu o lea agasala ua leva, po o le teena e tagata ua faamanu'aina au taumafaiga e faalelei. Atonu ua loloto tele le manu'a ua le mafai ai ona e taulimaina e tusa lava po o le a lou naunau i ai e faaleleia.
 "E le mafai ona taliaina lou salamo vagana ua i ai se faaleleiga. Afai e le mafai ona e faaleleia le mea na e faia, ua saisaitia oe. E faigofie ona malamalama i lou lagonaina o le leai o se fesoasoani ma le leai o se faamoemoe ma le pogai ua e fia manao ai e faavaivai, e pei ona oo ia Alema. . . .
 "Pe faapefea ona toe faaleleia mea uma, tatou te le iloa. Atonu e le mafai ona faia ia mea uma i leni olaga. Ua tatou iloa mai faaaliga ma asiasiga o loo faaauu pea e auuina a le Alii galuega o le togiola i tala atu o le veli.
 "O leni iloa e tatau ona avea o se faamafanafanaga i e ta'umamāina e faapea foi i e ta'usalaina. O loo ou mafaufau i matua o e ua mafatia na'ua ona o sesē o a latou fanau faalogogata ma ua aveesea ai le faamoemoe" ("O Le Taeao Pupula o le Faamagaloga," 19–20).
 36. Tagai i le 3 Nifae 12:19; tagai foi i le Mataio 6:12; 3 Nifae 13:11.
 37. Tagai i le Ioane 15:12–13; 1 Ioane 4:18; Dieter F. Uchtdorf, "O Le Alofa Atoatoa e Faateaseina ai le Fefe," *Liahona*, Me 2017, 107.

Ou te faafetai i le taulai atu o la'u tautalaga i matafaioi faifaipea a tamaitai i le Toefuataiga. E manino lava i le talafaasolopito atoa sa i ai lava se nofoaga faapitoa a tamaitai i le fuafuaga a lo tatou Tama Faalelagi. Na aoao mai Peresitene Russell M. Nelson: "O le a le mafai ona fua le faatosinaga a . . . tamaitai, e le gata i aiga ae faapea i le Ekalesia a le Alii, o ni ava, tina, ma tinamatutua; o ni tuafafine ma ni aunts; o ni faiaoga ma taitai; aemaise ai o ni faataitaiga aupito silisili ma ē puipua ma le faamaoni le faatuatua."¹

I le popofou o le Aualofa i Navu, i le 178 tausaga ua mavae, na apoapoai atu ai le Perofeta o Iosefa Samita i tamaitai ina ia "ola e tusa ai ma lo [latou] avanoa."² O a latou faataitaiga o loo aoao mai ai i tatou i aso nei. Sa latou mulimuli ma le lotogatasi i le siufofoga o le perofeta ma ola ma le faatuatua mausali ia Iesu Keriso a o latou faataitaaina le faavae ua tatou tutu ai nei. Uso e, o lo tatou taimi leni. Ua i ai se tatou galuega paia mai

le Alii, ma o a tatou sao faamaoni ma tulagaese e taua tele.

Na faamatalaina mai e Peresitene Spencer W. Kimball: "O le avea ma se tamaitai amiotonu i le taimi faaii i leni lalolagi, a o lumanai le afio mai faalua o lo tatou Faaola, o se valaauga e faapitoa lona tamalii. O le malosi ma aafiaga o tamaitai amiotonu i aso nei e mafai ona faasefuluina [le tulaga] e oo i ai i taimi e sili atu ona filemu."³

Na faapena foi ona talosaga mai Peresitene Nelson: "Ou te augani atu ai i o'u tuafafine o [le] Ekalesia . . . e laa i luma! Tu i lou tulaga tonu ma le manaomia i lou aiga, i lou nuu, ma i le malo o le Atua—ia sili atu nai lo le mea sa e i ai muamua."⁴

Talu ai nei, na faamanuiaina a'u, faatasi ai ma se vaega o tamaiti Peraimeri, e feiloai ma Peresitene Russell M. Nelson i se fale e faatusa i le fale o le aiga o le au Samita i Palamaira, Niu Ioka. Faalogo ao aoao atu e lo tatou perofeta tamaiti i mea e mafai ona *latou* faia e laa ai i luma.

Sister Jones: “Ou te fia iloa pe i ai sau fesili e te fia fesili ai ia Peresitene Nelson. O loo e saofai iinei ma le perofeta. E i ai se mea ua leva ona e fia fesili ai i se perofeta? Ia, Pearl.”

Pearl: “E faigata le ave ma se perofeta? E te, pisi tele?”

Peresitene Nelson: “Ioe e faigata. O mea uma e faatatau i le ave atili ma Faaola e faigata. Mo se faataitaiga, ina ua finagalo le Atua e tuu atu ia Mose Tulafono e Sefulu, o fea na Ia ta’u atu ia Mose e alu i ai? I luga o le tumutumu o se mauga, i luga o le Mauga o Sinai. O lea na savali ai Mose i luga o le tumutumu o lena mauga e aumai Tulafono e Sefulu. Ia, atonu na mafai ona fetalai mai le Tama Faalelagi, ‘Mose, amata mai oe iina, ae amata atu a’u iinei, ma o le a ou faafetauia oe i le afa o le auala.’ Leai, e fiafia le Alii i taumafaiga, aua o taumafaiga e aumaia ai tau i lea e le mafai ona oo mai e aunoa [ma taumafaiga]. Mo se faataitaiga, na ave ni au lesona piano?”

Tamaiti: “Ioe.”

Pearl: “E ave la’u vaiolini.”

Peresitene Nelson: “Ma e te faataitaia?”

Tamaiti: “Ioe.”

Peresitene Nelson: “O le a le mea e tupu pe a e le faataitaia?”

Pearl: “E galo ia oe.”

Peresitene Nelson: “Ioe, e te le alualu i luma, a ea? O le tali la o le ioe, Pearl. E manaomia ai le taumafaiga, le tele o le galue malosi, tele o suesuega, ma e leai se iuga. Manaia! Manaia, ona o loo tatou alualu pea i luma. E oo lava i le olaga a sau o loo tatou alualu i luma.”

O le tali atu a Peresitene Nelson i nei fanau pele ua faalateleina mai ia i tatou taitoatasi. E fiafia le Alii i taumafaiga, ma o taumafaiga e aumaia ai tau. Tatou te aoao pea. O loo tatou alualu pea i luma pe a tatou taumafai

e mulimuli i le Alii.⁵ E le o faamoemoe mai o Ia ia atoatoa i le asō. Tatou te feaei pea i la tatou lava Mauga o Sinai. E pei o taimi ua mavae, ioe, e manaomia e la tatou faigamalaga se taumafaiga, galue malosi, ma le suesue, peitai o lo tatou tautino atu ia alualu i luma e aumai ai ni tau i faavavau.⁶

O a nisi mea tatou te aoaoina mai le Perofeta o Iosefa Samita ma le Uluai Faaaliga e uiga i taumafaiga, galue malosi, ma le suesue? E tuuina mai ia i tatou e le Uluai Faaaliga le taiala mo o *tatou* matafaiioi tulagaese ma faaauaia. I le ave ai ma tamaitai o le faatuatua, e mafai ona tatou mafaufau i mataupu faavae o le upumoni mai aafiaga o le Perofeta o Iosefa lea e tuuina mai ni malamalamaaga mo le mauaina o a tatou lava faaaliga. Mo se faataitaiga:

- Tatou te galulue i lalo o tulaga faigata.
- Tatou te liliu atu i tusitusiga paia ia maua ai le potō e faatino ai.
- Tatou te faataitaia lo tatou faatuatua ma le faalagolago i le Atua.
- Tatou te faaaogaina lo tatou malosi e augani atu ai i le Atua e fesoa-soani mai ia i tatou e tetea atu i le faatosinaga a le tiapolo.
- Tatou te ofoina atu manaoga o o tatou loto i le Atua.
- Tatou te taulai atu i Lona malamalama e taitaia a tatou filifiliga o le olaga ma ia i ai i o tatou luga pe a tatou liliu atu ia te Ia.
- Ua tatou iloa Na te silafia i tatou taitoatasi i le igoa ma e i ai matafaiioi patino mo i tatou e faataunuū.⁷

E le gata i lea, na toefuatai mai e Iosefa Samita le malamalama faapea o loo ia i tatou le gafatia paia ma le taua e faavavau. Ona o lena sootaga ma lo tatou Tama Faalelagi, ou te talitonu

Na te *faamoemoeina* i tatou ia maua faaaliga mai ia te Ia.

Na faatonuina e le Alii Ema Samita ina ia “maua le Agaga Paia,” aoao atili, “tuu ese mea o lenei lalolagi, . . . saili mo mea o se lalolagi sili atu ona lelei,” ma “pipii i [ana] feagaiga” ma le Atua.⁸ O le aoaoina e taua mo le alualu i luma, aemaise lava ona o le mafutaga faifaiepa a le Agaga Paia o loo aoaoina i tatou i mea e manaomia mo i tatou taitoatasi ona tuu ese—o lona uiga o mea e ono *faalavelave* ia i tatou pe *faatuai* lo tatou alualu i luma.

Na saunoa Peresitene Nelson, “Ou te aioi atu ia te outou ia faateleina lo outou gafatia faaleagaga e maua ai faaaliga.”⁹ O loo tumau pea upu a lo tatou perofeta ia te a’u a o ou mafaufau ai i le gafatia a tamaitai e laa ai i luma. O lona aioi mai ia i tatou, o se faailoga lea o le taua. O loo ia aoao mai i tatou i le ala e ola ai faaleagaga i se lalolagi e ma’i-faaleagasala e ala i le mauaina ma faatino ia faaaliga.¹⁰ A o tatou faia, faamamaluina ma ola i poloaiga a le Alii, ua folafola mai ia i tatou, e pei o Ema Samita, “se pale o le amiotonu.”¹¹ Na aoao mai e le Perofeta o Iosefa le taua o le *iloaina* faapea o le ala o loo tatou tulitulimatai atu i ai i lenei olaga ua faamaonia e le Atua. A aunoa ma lena malamalama o le a tatou “vaivai i [o tatou] mafaufau ma matapogia.”¹²

I lenei konafesi, o le a tatou faalogo ai i upumoni lea e uunaia i tatou ia suia, faaleleia, ma faamama o tatou olaga. O faaaliga patino, o le a mafai ai ona tatou taofia mea na ta’ua e nisi o le “lofituina e le konafesi aoao”—pe a tatou o ese mai ma le naunautai ia faia o *mea uma* i le taimi nei. E tele pulou e pulouina e tamaitai, ae e le mafai, ma e le manaomia, le pulouina uma i le taimi e tasi. E fesoasoani le Agaga ia i tatou e fuafua po o fea le galuega e taulai i ai i le asō.¹³

O le faatosinaga alofa a le Alii e ala i le Agaga Paia e fesoasoani mai ia i tatou ina ia iloa mea *Na te faamua-mua mo lo tatou alualu i luma*. O le usitaia o faaaliga patino e taitai atu ai i le *alualu i luma* patino.¹⁴ Tatou te faalogo ma faatino.¹⁵ Na fetalai mai le Alii, “Ole atu i le Tama i lo’u igoa, i le faatuatua ma le talitonu o le a oulua maua, ma o le a oulua maua ai le Agaga Paia, lea na te faaali atu mea uma e tatau mo le fanauga a tagata.”¹⁶ O lo tatou matafaioi faifaiepa o le mauaina o faaaliga faifaiepa.

Pe a tatou mauaina se tikeri sili atu o le agavaa i le faia o lea mea, o le a mafai ona tatou maua le mana sili i a tatou matafaioi taitoatasi e auaina atu ai ma faataunuuga o le galuega o le faaolataga ma le faaeaga—ina ia “tuu ese [moni ai] mea o lenei lalolagi, ma saili mo mea o se lalolagi sili atu ona lelei.”¹⁷ Ona mafai lea ona tatou uunaia ma le mataalia la tatou tupu-faia faia’e e fai lea mea e tasi.

Uso e ma tuagane, tatou te saili uma lava le mana o le Atua i o tatou olaga.¹⁸ E i ai se lotogatasi matagofie i le va o tamaitai ma alii i le faataunuuga o le galuega a le Atua i lenei vai-taimi. Tatou te mauaina le mana o le

perisitua e ala i feagaiga, lea na muai osia i vai o le papatisoga ona sosoo ai lea ma totonu o puipui o malumalu paia.¹⁹ Na aoao mai Peresitene Nelson, “O tamaitai uma ma alii uma e osia ni feagaiga ma le Atua ma tausia na feagaiga, ma o e auai ma le agavaa i sauniga o le perisitua, e mauaina le avanoa tuusao i le mana o le Atua.”²⁰

O la’u tautinoga patino i le asō i le avea ai ma se tamaitai, ou te le’i iloa-ina lava muamua i lo’u olaga na *ou mauaina*, e ala i a’u feagaiga, le mana o le perisitua.²¹ Uso e, ou te tatalo o le a tatou iloa ma faapelepele i le mana o le perisitua ao tatou “pipii atu [ia tatou] feagaiga,”²² opogi le moni o tusitusiga paia, ma usitai i upu o o tatou perofeta soifua.

Sei o tatou tautino atu ma le lototoa lo tatou tuuto i lo Tama Faalelagi ma lo tatou Faaola, “ma le faatuatua lē mafaagaetia ia te ia, ma le faalagolago atoa i galuega a ia o lē ua malosia aoao e laveai.”²³ Sei o tatou faaauuina ma le fiafia lenei faigamalaga e agai atu i lo tatou gafatia mauiluga faaleagaga ma fesoasoani ia i latou o siomia i tatou ia faia lea mea e tasi e ala i le alofa, auunaga, taitaiga, ma le agaalofo.

Na faamanatu mai ma le alofa ia i tatou e Elder James E. Talmage, “O le siamupini maoae i le lalolagi o tamaitai ma le tulaga faatamaitai o Iesu Keriso.”²⁴ I le iloiloga mulimuli o matafaioi faifaiepa a tamaitai i le Toefuataiga, ma mo i tatou uma, o le a le matafaioi e sili ona taua? Ou te moli-mau atu o le *faalogo ia te Ia*,²⁵ mulimuli ia te Ia,²⁶ faalagolago ia te Ia,²⁷ ma ia avea ma se faalautega o Lona alofa.²⁸ Ou te iloa o loo soifua o Ia.²⁹ I le suafa paia o Iesu Keriso, amene. ■

FAAMATALAGA

1. Russell M. Nelson, “O Se Talosaga i O’u Tuafafine,” *Liahona*, Nov. 2015, 95–96.
2. Iosefa Samita, i le “Nauvoo Relief Society Minute Book,” 38, josephsmithpapers.org.
3. *Aoaoga a Peresitene o le Ekalesia: Spencer W. Kimball* (2006), 217.
4. Russell M. Nelson, “O Se Talosaga i O’u Tuafafine,” 97.
5. Tagai i le Mataupu Faavae ma Feagaiga 58:26–28.
6. Tagai i le Mataupu Faavae ma Feagaiga 6:33.
7. Tagai i le Iosefa Samita—Talafaasolopito 1:11–17.
8. Mataupu Faavae ma Feagaiga 25:8, 10, 13.
9. Russell M. Nelson, “Faaaliga mo le Ekalesia, Faaaliga mo o Tatou Olaga,” *Liahona*, Me 2018, 96.
10. Tagai i le 2 Nifae 9:39.
11. Mataupu Faavae ma Feagaiga 25:15.
12. *Lectures on Faith* (1985), 68.
13. Tagai i le Mataupu Faavae ma Feagaiga 42:61.
14. Na saunoa Peresitene Henry B. Eyring:

Ia, afai e na o oe ma a’u o loo faia se asiasiga (maimau pe ana mafai), lea e te lagona ai le saoloto e fesili mai soo se mea e te manao e fesili mai, ou te mafaufau lava atonu e te fai mai se tala faapea: ‘Oi, Brother Eyring, na ou lagonaina nisi o mea ia na e faamatalaina. Na pa’i mai le Agaga Paia i lo’u loto ma lo’u mafaufau i lea taimi ma lea taimi. Ae o le a ou manaomiaina pea pe afai o le a le faatoilaloina pe faaseseina a’u. E mafai lena mea? E mafai, ma, a fai e mafai, o le a se mea e manaomia ia maua ai lena faamanuiaga?

“Ia, sei o tatou amata i le vaega muamua o lau fesili. Ioe, o lea lava. Soo se taimi lava ou te manaomia ai lena faamautinoaga—ma ou te manaomiaina foi mai lea taimi i lea taimi—ou te



San Bernardo, Santiago, Chile



Saunia e Elder Neil L. Andersen
O Le Korama a Aposetolo e Toasefululua

manatuaina le auuso e toalua O Nifae ma Liae, ma isi auuuna a le Alii na galulue faatasi ma i la'ua, na feagai ma le tetee tele. Sa latou galulue i se lalolagi na faateleina le amioleaga. Sa latou taulimaina ni taufaasese matautia. O lea ou te maua ai le lototele—ma e faapena foi outou—mai upu o le fasifuaiteu lea e tasi a Helamana. O le faamautinoaga ua tuuina i totonu o le tala o mea uma na tutupu i le tausaga atoa, e toetoe lava e pei o fai atu i le tusitala e le o se mea e ofo ai. Faalogo:

“Ma i le tausaga e fitusefulu ma le iva sa amata ona i ai o finauga e tele. Peitai o Nifae ma Liae, ma le toatele o o la'ua uso o e sa malamalama e uiga i matautu moni o le mataupu faavae, i le mauaina o le tele o faaaliga i aso taitasi, sa oo ina latou talai atu i le nuu, ma o lea na oo ai ina latou faaumaina lo latou finau i lena lava tausaga.” [Helamana 11:23]

Sa ‘tele [a latou] faaaliga i aso taitasi.’ Mo oe la ma a’u o tali na o lau fesili muamua. Ioe, e mafai ona maua le mafutaga a le Agaga Paia ina ia maua ai le tele o faaaliga i aso taitasi. O le a le faigofie. Ae e mafai. O le mea e manaomia o le a eseese mo tagata taitasi aua tatou te amata mai le mea o tatou i ai i o tatou lava tulaga uiga ese o aafiaga o le olaga” (“O Meaalofa a le Agaga mo Taimi Faigata” [Brigham Young University fireside, Sept. 10, 2006], 3–4, speeches.byu.edu).

- 15. Tagai i le 2 Nifae 2:16.
- 16. Mataupu Faavae ma Feagaiga 18:18.
- 17. Mataupu Faavae ma Feagaiga 25:10.
- 18. Tagai i le Mataupu Faavae ma Feagaiga 121:26, 33, 41, 45–46.
- 19. Tagai Mataupu Faavae ma Feagaiga 84:19–21.
- 20. Russell M. Nelson, “O Oa Faaleagaga,” *Liahona*, Nov. 2019, 77.
- 21. Tagai Russell M. Nelson, “O Oa Faaleagaga,” 76–79; Dallin H. Oaks, “O Ki ma le Pule o le Perisitua,” *Liahona*, Me 2014, 49–52; Henry B. Eyring, “O Tamaitai ma le Aoaoina o le Talalelei i le Aiga,” *Liahona*, Nov. 2018, 58–60.
- 22. Mataupu Faavae ma Feagaiga 25:13.
- 23. 2 Nifae 31:19.
- 24. James E. Talmage, *Jesus the Christ*, lomiga lona 3 (1916), 475.
- 25. Tagai i le Iosefa Samita—Talafaasolopito 1:17.
- 26. Tagai i le Matai 4:19–20.
- 27. Tagai i le Faataoto 3:5–6; Mataupu Faavae ma Feagaiga 11:12.
- 28. Tagai i le Ioane 13:34; Moronae 7:47.
- 29. Tagai i le 2 Nifae 33:6; Mataupu Faavae ma Feagaiga 76:22.

O Manatuaga Musuia Faaleagaga

Pe a faapouliuligia e faigata faaletagata lava ia po o tulaga faalelalolagi sili atu lo tatou auala, e pei lava manatuaga musuia faaleagaga mai i la tatou tusi o le ola o ni ma'a susulu lea e fesoasoani e faamalamalama le auala o i luma.

E sefuluvalu tausaga talu ona mavave le Uluai Faaaliga, na tusia ai e le Perofeta o Iosefa Samita se tala auiliili o lona aafiaga. Sa feagai o ia ma le teenaina, sauaga, faamaasiasia, tau-faamata'u, ma osofaiga matuia.¹ Ae sa ia faaauau pea ona molimau atu ma le lototoa e uiga i lana Uluai Faaaliga: “Sa ou vaai moni lava i se malamalama, ma i totonu o lena malamalama na ou vaai ai i ni Tagata se toalua, ma sa laua fetalai moni mai lava ia te au; ma e ui ina sa inosia ma sauaina au i lo'u fai atu sa ou vaai i se faaaliga vaaia, ae e moni. . . . Sa ou iloaina, ma sa ou iloaina sa silafia e le Atua, ma sa le mafai ona ou faafitiaina.”²

I ona itula faigata, sa toe foi i tua manatuaga o Iosefa i le toetiiti atoa le luasefulu tausaga i le mautinoa o le alofa o le Atua mo ia ma mea na tutupu ia na faaulufale mai ai le Toefuataiga ua loa ona valoia. I le toe manatunatu ai i lana malaga faaleagaga, na saunoa ai Iosefa: “Ou te le fa'ia lava se tasi i le le talitonu i la'u

talafaasolopito. Pe ana ou le vaai i le mea sa ou vaai i ai semanu ou te le talitonu foi a'u ia i ai.”³

Ae na moni lava ia aafiaga, ma na te lei faagaloina lava pe faafitia, ma sa faamautuina lemu lana molimau a o agai atu o ia i Karefasi. “Ou te alu atu e pei o se tamai mamoe a fasia,”



Aai o Sate Leki, Iuta, ISA

na ia saunoa ai, “ae ou te filemu e pei o le taeao i le tauvevela; o ia te au le loto fuatiaifo e mama i le Atua, ma tagata uma.”⁴

O Au Aafiaga o Musuia Faaleagaga

O loo i ai se lesona mo i tatou i le faataitaiga a le Perofeta o Iosefa. Faatasi ai ma le taitaiga toafilemu ua tatou maua mai le Agaga Paia, mai lea taimi i lea taimi, ua faamautinoa mamana ma patino mai e le Atua ia i tatou taitoatasi e faapea na te silafia i tatou ma e alofa ia i tatou ma o loo Ia faamanuiaina patino ma le manino i tatou. Ona oo lea i taimi o o tatou faigata, e toe aumaia e le Faaola i o tatou mafaufau nei aafiaga.

Mafaufau i lou lava olaga. I le tele o tausaga, sa ou faalogo ai i le fiaafe o aafiaga maoae faaleagaga mai le Au Paia o Aso e Gata Ai i le salafa o le lalolagi, e faamautu mai ai ia te a’u e aunoa ma se fesiligia e silafia ma alofa le Atua ia i tatou taitoatasi, ma e finagalo ma le naunautai o Ia e faaalua mai o Ia lava ia i tatou. O nei aafiaga e mafai ona oo mai i taimi taua i o tatou olaga, pe i taimi atonu e foliga muamua mai o ni mea tutupu e faaleano i ai, ae e faafeao mai lava e se faamautuuga tulagaese faaleagaga malosi o le alofa o le Atua.

O le manatuaina o nei aafiaga musuia faaleagaga tatou te o ifo ai i o tatou tulivae, ma tautino atu e pei ona faia e le Perofeta o Iosefa: “O le mea na ou mauaina e mai le lagi. Sa ou iloaina, ma sa ou iloaina sa silafia e le Atua.”⁵

Faataitaiga e Fa

Manatu i o outou lava manatuaga musuia faaleagaga a o ou faasoa atua ni nai faataitaiga mai isi.

I ni tausaga ua mavae, sa talosagaina ai e se peteriaka toeaina o se siteki, e lua ni alatoto o le fatu ua āu

ina le aoga, ia Dr. Russell M. Nelson i lena taimi e fesoasoani ane, e ui o le taimi lea sa leai se taotoga e foia ai le alatoto lona lua ua faaleagaina. Sa i’u ina ioe atu Dr. Nelson e faia le taotoga. O upu nei a Peresitene Nelson:

“Ina ua maea ona faamautu le puni o le alatoto muamua, sa matou tatalaina le alatoto lona lua. Sa matou maua ai o loo atoa lelei, peitai sa matua fefete ma sa le mafai ai ona toe galue e pei ona tatau ai. A o suesueina lenei alatoto, sa manino le uunaiga i lo’u mafaufau: *Faaitiitia le faatamilosaga a le mama*. Sa ou ta’u atua lena savali i la’u soatau. ‘O le a lava le ‘afu’afu o le alatoto *pe a* mafai ona ta faaitiitia le mama i lona tele masani.’

“Ae e faapefea? . . . Sa manino lelei le oo mai o se ata i lo’u mafaufau, na faaali mai ai le ala e mafai ona su’i ai—e fai ai se gauga ii ma se afe i o. . . . Ou te manatuaina pea lena ata faalemafaufau—sa atoa lelei ma sa i ai ma ni laina togitogi i mea e tatau ona su’i ai filo. Sa mae’a le lipeaina e pei o le ata na tusia i lo’u mafaufau. Sa matou faata’ita’ia le alatoto ma maua ai ua matua faaitiitia le liki. Sa fai mai la’u soatau, ‘O se vavega.’”⁶ Sa soifua le peteriaka mo le tele o tausaga.



Dr. Russell M. Nelson

Sa ta’ita’ia ia Dr. Nelson. Ma sa ia iloaina sa silafia e le Atua sa ia iloaina na ta’ita’iina o ia.

Sa ma faatoa feiloai atu ma Kathy ia Beatrice Magré i Farani i le 30 tausaga talu ai. Sa ta’u mai talu ai nei e Beatrice e uiga i se mea na aafia ai lona ola faaleagaga ina ua mavae lona papatisoga o se tamaitai talavou. O ana upu ia:

“Sa malaga le autalavou a le matou paranesi ma o latou taitai i le Matafaga i Lacanau, e tasi ma le afa itula mai Bordeaux.

“A o le’i talii mai i le fale, sa tonu i se tasi o taitai e toe aau tasi lava ma tofu i galu ma ana matatioata. Ina ua toe manu a’e i luga, ua leai lana matatioata. . . . Ua leiloa i le vasa.

“O le leiloa o lana matatioata o le a le mafai ai ona ia aveina lana taavale. O le a mamao le mea e pa’ulia ai i matou mai le fale.

“Sa fautuaina e se tuafafine na faatumulia i le faatuatua ia matou tatalo.

“Sa ou tomumu faapea o le a augapiu se mea e mafai e le tatalo, ma sa ou auai atu ma le musua i le vaega e tatalo faatasi a o matou tutu i le vai ua i o matou puimanava ma ua pouliuli.

“Na uma loa le tatalo, sa falō ifo o’u lima e faapisi i tagata uma. A o



Beatrice Magré

ou asuasu solo le suasami, sa mau lana matatioata i lo'u lima. Sa tuiā lo'u agaga i se lagona mamana e faapea e faafofoga moni mai lava le Atua ia tatou tatalo.”⁷

I le fasefulu lima tausaga mulimuli ane, sa ia toe manatua lelei ai e pei sa faato'a tupu ananafi. Sa faamanuiaina Beatrice ma sa ia iloaina sa silafia e le Atua sa ia iloaina sa faamanuiaina o ia.

O aafiaga o Peresitene Nelson ma Tuafafine Magré sa matua eseese lava, ae, mo i la'ua uma, sa faaleleva pea i o la'ua loto se manatuaga musuia faaleagaga lemafaagaloina o le alofa o le Atua.

O nei mea tutupu musuia e tele ina oo mai i le a'oa'o ai e uiga i le talalelei toefuataiina po o le fefaasoai o le talalelei ma isi.

O le ata lenei na pueina i São Paulo, Pasila, i le 2004. O Floripes Luzia Damasio o le Siteki o Ipatinga Pasila, sa 114 tausaga le matua. I lona ta'ua ai o lona lilii mai, sa faamatala mai ai e Tuafafine Damasio ia te a'u e faapea sa tuuina atu e faifeautalai i lona nuu se faamanuiaga faaleperisitua i se pepe na ma'i tigaina ma sa toe malosi faavavega. Sa fia iloa atili e ia. A o tatalo o ia e uiga i le la savali, sa oo mai se molimau lemafaafitia o

le Agaga, na faamautu mai ia te ia o Iosefa Samita o se perofeta a le Atua. I le 103 o ona tausaga, na papatiso ai, a o lona 104, na fai ai ona faaeega paia. O tausaga uma na sosoo ai, sa ia malaga ai i le pasi i le 14-itula e faaalu se vaiaso i le malumalu. Na maua e Tuafafine Damasio se faamautuuga faalelagi ma sa ia iloa sa silafia e le Atua sa ia iloaina e moni le molimau.

O se manatuaga faaleagaga lenei mai la'u uluai misiona i Farani i le 48 tausaga talu ai.

A o ma tala'i, sa ma tuua ma la'u soa se Tusi a Mamona i se olomatua. Ina ua ma toe foi atu i le falemautotogi a le fafine pe tusa ma se vaiaso mulimuli ane, sa ia tatalaina le faitotoa. A o le'i faia lava se upu, sa ou lagonaina se mana na pa'i mai faaleagaga. Sa faaaau pea nei lagona o'oo'o a o valaaulia i ma'ua e Tuafafine Alice Audubert ma te o atu i totonu ma sa ta'u mai sa ia faitauina le Tusi a Mamona ma sa ia iloaina e moni. A o ma tuua lona fale i lona aso, sa ou tatalo “Le Tama Faalelagi, faamolemole fesoasoani mai ia te a'u ia le galo lava ia te a'u le mea sa faatoa ou lagonaina.” E le'i galo lava ia te a'u.

I se taimi sa peiseai o se taimi masani lava, i se faitotoa e faapei lava

foi o le fiaselau o isi faitotoa, sa ou lagonaina ai le mana o le lagi. Ma sa ou iloaina sa silafia e le Atua sa ou iloaina na matala mai se pupuni o le lagi.

Faapatino ma Lēmafaafitia

O nei taimi musuia faaleagaga e eseese taimi e oo mai ai ma i ni ala eseese, e faapatino mo i tatou taitoatasi.

Mafaufau i faaitaiga e sili ona e fiafia i ai i tusitusiga paia. O i latou sa faalogo i le Aposetolo o Peteru sa “tulia o latou loto.”⁸ O le fafine sa Lamana o Apisu sa talitonu i le “faaaliga ofoofogia a lona tama.”⁹ Ma sa oo mai se siufofoga i le mafaufau o Enosa.¹⁰

Sa faamatala e la'u uo o Clayton Christensen se aafiaga i le taimi sa ia faitauina ai ma le agaga tatalo le Tusi a Mamona faapea: “O se agaga matagofie, mafanafana, ma le alofa . . . na faapea ona siomia ai a'u ma faatumulia ai lo'u agaga, na opoina ai a'u i se lagona o le alofa lea ou te le'i mafaufauina e mafai ona ou lagonaina, [ma sa faaaau pea ona i ai nei lagona i lea po ma lea po].”¹¹

E i ai taimi e gotouga ifo ai nei lagona i o tatou loto e pei o se afimumu, e faamalamalama ai o tatou agaga. Sa faamatalaina e Iosefa Samita e faapea o nisi taimi tatou te maua ai ni “taaga faafuasei o manatu” ma o nisi taimi “o le tafe moni mai o le atamai.”¹²

I le tali atu a Peresitene Dallin H. Oaks i se alii faamaoni o le sa fai mai na te le'i maua lava sea ituaiga o aafiaga, sa fautuaina ai, “Atonu ua tali faafia mai au tatalo, ae na tamauina ou faamoemoega i se faailoga tele po o se leo leotele na'ua, ua e manatu ai e le'i i ai sau tali.”¹³ Sa fetalai le Faaola lava Ia e uiga i le faatuatua tele o se nuu o e “sa [faamanuiaina] i le afi ma le Agaga Paia, [ae sa] latou te lei iloa”¹⁴



O Sister Floripes Luzia Damasio ma Elder Andersen.



Elder Andersen o loo papatisoina Alice Audubert.

E Faapefea ona E Faalogo ia te Ia?

Sa tatou faalogo talu ai nei ia Peresitene Russell M. Nelson o saunoa mai: “Ou te valaaulia outou ina ia mafaufau loloto i ai e le aunoa, e uiga i lenei fesili autu: E faapefea ona outou faalogo ia te Ia? Ou te valaaulia foi outou e uia laasaga e faalogo lelei ai e le aunoa ia te Ia.”¹⁵ Sa ia toe faia lena valaaulia i lenei taeao.

Tatou te faalogoina o Ia i a tatou tatalo, i o tatou fale, i tusitusiga paia, i a tatou viiga, a o tatou aai ma feinu ma le agavaa i le faamanatuga, a o tatou tautino atu lo tatou faatuatua, a o tatou auauna atu i isi, ma a o tatou auai i le malumalu faatasi ma le au talitonu. O taimi musuia faaleagaga e oo mai pe a tatou faalogo ma le agaga tatalo i konafesi aoao ma pe a lelei atili lo tatou tausiga o poloaiga. Ma tamaiti, o nei aafiaga e mo outou foi. Ia manatua, o Iesu “na aoao ma auauna atu i tamaiti . . . i mea sili ma le ofoofogia.”¹⁶ Na fetalai le Alii:

“[O lenei malamalama ua] tuuina atu e lo’u Agaga ia te outou, . . . ma e lē mafai ona outou mauaina e aunoa ma lo’u mana;

“O le mea lea, e mafai ona outou molimau atu sa outou faalogo i lo’u leo, ma iloa a’u upu.”¹⁷

E mafai ona tatou “faalogo ia te Ia” ona o le faamanuiaga o le Togiola le mafaatusalia a le Faaola.

E ui ina le mafai ona tatou filifilia le taimi e maua ai nei taimi musuia, ae na tuuina mai e Peresitene Henry B. Eyring le fautuaga lenei ia tatou tapenapenaga: “O le po nei, ma le po taeao, atonu e te tatalo ma mafaufau loloto, ma faia ni fesili: Pe na auina mai e le Atua se savali mo na o au? Pe na ou vaaia Lona aao i lo’u olaga po o olaga o lo’u [aiga]?”¹⁸ O le faatuatua, ususitai, lotomauualalo ma le manatu moni e matala ai pupuni o le lagi.¹⁹

O se Faataitaiga

Atonu e te mafaufau i ou manatuaga faaleagaga i le ala lea. Faatasi ai ma le tatalo e le aunoa, o se naunautauga e tausia a tatou feagaiga, ma le meaalofo o le Agaga Paia, tatou te faatautaia ai lo tatou ala i le olaga. Pe a oo ina faapouliuliga e faigata faaletagata, masalosalo, po o le lotovaivai lo tatou ala, pe taitai atu foi i tatou e tulaga faalelalogagi e le mafai

ona tatou puleaina, e taumafaufau pe faapei le lumanai, o manatuaga musuia faaleagaga mai la tatou tusi o le ola e pei o ni maa susulu e fesoasoani e faamalamalama ai le auala o i luma, e faamautinoa mai ai ia i tatou o loo silafia e le Atua i tatou, e alofa ia i tatou, ma sa Ia auina mai Lona Alo, o Iesu Keriso e fesoasoani ia tatou toe foi atu i le aiga. Ma pe a faataatia ese e se tasi ona manatuaga musuia ma ua se pe ua lē mautonu, tatou te faasaga atua i latou i le Faaola a o faasoa atu lo tatou faatuatua ma manatuaga ia i latou, ma fesoasoani e toe tata’i i latou ia toe maua na taimi faaleagaga taua sa latou faapelepeleina.

O nisi aafiaga e matua paia tele ma e tatou te puipuia i lo tatou manatuaga faaleagaga ma aua ne’i faasoa atua.²⁰

“E tautatala agelu i le mana o le Agaga Paia; o le mea lea, latou te fetalai mai afioga a Keriso.”²¹

“E [le’i] taofia le auauna mai o agelu i le fanauga a tagata.

“Aua faauta, ua i ai i latou i lana pule, e auauna mai e tusa ma . . . le poloai mai o ia, e faaali mai i latou lava ia te i latou ua i ai le faatuatua



O le tatalo, tausaiaina o feagaiga, ma le Agaga Paia e fesoasoani ia i tatou e folau ai i le olaga.



O manatuaga faaleagaga e tai pei o ni maa susulu e faamalamalamaina le auala o i luma atu.



Tatou te faasoa atu lo tatou faatuatua ma manatuaga e faasaga atu ai e ua leiloloa i le Faaola.

malosi ma le mafau fau mausali i uiga uma o le amioatua.”²²

“A o le Fesoasoani, o le Agaga Paia lea, . . . na te a’oa’o ia te outou i mea uma lava, e faamanatu mai foi o ia ia te outou i mea uma.”²³

Opomau ou manatuaga paia. Talitonu i ai. Tusi i lalo. Faasoa atu i lou aiga. Talitonu e oo mai ia te oe mai lou Tama Faalelagi ma Lona Alo Pele.²⁴ Tuu atu latou te aumaia le onosai i ou masalosologa ma le mala-malama i ou tulaga faigata.²⁵ Ou te folafola atu a e aloaia ma le naunautai ma faapelepele ma le faaeteete ia mea tutupu musuia faaleagaga i lou olaga, o le a tele atu isi mea e oo mai ia te oe. E silafia e le Tama Faalelagi oe ma e alofa ia te oe.

O Iesu o le Keriso, ua toefuatai mai Lana talalelei, ma a tatou tumau faamaoni, ou te molimau atu o le a avea i tatou ma Ana e faavavau, i le suafa o Iesu Keriso, amene. ■

FAAMATALAGA

1. Tagai i le *Au Paia: O Le Tala e uiga i le Ekalesia a Iesu Keriso i Aso e Gata Ai*, vol. 1, *O Le Tulaga o le Upumoni, 1815–1846* (2018), 150–53; tagai foi Iosefa Samita, “History, 1838–1856, volume A-1 [23 December 1805–30 August 1834],” 205–9, josephsmithpapers.org; *Saints*, 1:365–66.
2. Iosefa Samita—Talafaasolopito 1:25.
3. *Aoaoga a Peresitene o le Ekalesia: Iosefa Samita* (2007), 515.
4. Mataupu Faavae ma Feagaiga 135:4.
5. E uunaia lava a’u e le aunoa i upu o i le Iosefa Samita—Talafaasolopito: “Sa ou vaai i se faaaliga vaai, sa ou iloa lena mea, ma sa ou iloa sa silafia e le Atua lena mea” (Iosefa Samita—History Talafaasolopito 1:25). O le a tatau ona tu atu o ia i luma o le Atua ma faailoa atu faapea na tutupu moni lava nei mea i le Vao Paia i lona soifuaga, ma e le mafai lava ona toe tutusa lona olaga ona o lena mea. Pe tusa o le 25 tausaga talu ai, sa ou faatoa faalogo ai i sina esesega o lenei fasifuaitau na ta’ua e Elder Neal A. Maxwell. Na ia aumaia le faataitaiga lenei: “I tausaga ua leva ia Me 1945, sa i ai se taimi faapena mo a’u i le motu o Okinawa i le 18 o ona tausaga. Sa matuai leai lava so’u toa ae sa o se faamanuiaga mo a’u ma isi i le taimi o tu’ipomu lo matou tulaga i meatau a Iapani. Ina ua mavae uafana sa seloa mai lo matou tulaga, sa i’u ina pa’u’u tonu pomu a le fili i le mea sa matou i ai. Sa tatau loa lava ona latou tafanaina e pāpā ai, ae sa i ai se tali mai le lagi i se tatalo se tasi atuavale ma le manatu faapito. Sa mau i le tu’ipomuina. . . . Sa faamanuiaina a’u, ma sa ou iloa sa silafia e le Atua sa ou iloa” (“Becoming a Disciple,” *Ensign*, June 1996, 19).
6. Russell M. Nelson, “O Le Mana Toafilemu o le Tatalo,” *Liahona*, Me 2003, 8.
7. Tala patino mai ia Beatrice Magré na faasoa atu ia Elder Andersen on Oct. 29, 2019; follow-up email on Jan. 24, 2020.
8. Galuega 2:37.
9. Alema 19:16.
10. Tagai i le Enosa 1:5.
11. Clayton M. Christensen, “The Most Useful Piece of Knowledge,” *Liahona*, Jan. 2009, 23.
12. Tagai i le *Aoaoga: Iosefa Samita*, 209.
13. Dallin H. Oaks, *Life’s Lessons Learned: Personal Reflections* (2011), 68–69.
14. 3 Nifae 9:20.
15. Russell M. Nelson, “E Faapefea Ona E #Faalogoiatela? O Se Valaaulia Faapitoa,” Feb. 26, 2020, blog. ChurchofJesusChrist.org.
16. 3 Nifae 26:14.
17. Mataupu Faavae ma Feagaiga 183:35–36. O lagona e o mai faatasi e le aunoa ma le malamalama faaleagaga. “Ua vave ona oulua manatua o le Alii lo oulua Atua. Ua oulua vaai i se agelu, ma sa fetalai mai o ia ia te oulua; ioe, sa oulua faalogo i lona siufofoga mai lea taimi i lea taimi; ma sa fetalai mai foi o ia ia te oulua i se leo filemu itiiti, peitai ua oulua te’a atu ma le toe lagonaina, na oulua le mafafai ai ona lagona ana fetalaiga” (1 Nifae 17:45).
18. Henry B. Eyring, “E, ia Manatua, ia Manatua Lava,” *Liahona*, Nov. 2007, 69.
19. Tagai i le 2 Nifae 31:13; Moronae 10:4. Na asiiasi atu Peresitene Dallin H. Oaks i le matou misiona i Bordeaux, Farani, i le 1991. Sa ia faamatala i a tatou faifeautalai e faapea o le manatu moni o lona uiga o le tagata sa tatalo o loo fai atu i le Alii se mea faapenei: “Ou te le o ole atu ona o le faailoa, ae ma le faamaoni atoatoa e faatino le tali i la’u tatalo. Afai e aumai e Lau Afio lenei tali ia te a’u, o le a ou faatinoia ia suia ai lo’u olaga. O le a ou tali atu.”
20. “Ua tuuina mai i le toatele ia latou iloa mealilo a le Atua; e ui i lea ua tuuina i latou i lalo o se poloaiga saolele ia latou lē faaali atu ia mea tau lava e tusa ai ma le vaega o lana afioga na te tuuina mai i le fanauga a tagata, e tusa ma le gauai ma le filiga latou te tuu atu ia te ia” (Alema 12:9). Na saunoa Elder Neal A. Maxwell: “E moomia ai musumusuga ia iloa le taimi e faasoa atu ai [aafiaga faaleagaga]. Ou te manatua le faalogo atu ia Peresitene Marion G. Romney, o le sa faaogaina faatasi le agamalie ma le poto, o saunoa, “Semanu e tele atu o tatou aafiaga faaleagaga pe ana faapea tatou te le soona talanoa e uiga i ai” (“Called to Serve” [Brigham Young University devotional, Mar. 27, 1994], 9, speeches.byu.edu).
21. 2 Nifae 32:3.
22. Moronae 7:29–30.
23. Ioane 14:26.
24. O upumoni o le talalelei ua avanoa mo tagata uma. I le vaiaso a o lumanai le konafesi, ina ua maea la’u lauga, sa ou gauai atu faaleagaga i se tusi e ta’ua *Divine Signatures: The Confirming Hand of God* (2010), na tusia e Gerald N. Lund, o le sa auauna atu o se Pulega Aoa Fitugafulu mai le 2002 i le 2008. I lo’u fiafia, o upu a Brother Lund sa o se molimau lona lua i mataupu faavae na faasoaina i lenei lauga o le konafesi ma o le a faafiaina ai soo se tasi e naunau e aoao atili e uiga i manatuga musuia faaleagaga.
25. O se tasi o upusii e fiafia i ai Peresitene Thomas S. Monson e mai le tusisolo Sikotilani o James M. Barrie: “Na tuu mai e le Atua ia i tatou manatuaga, ina ia mafai ai ona tatou maua fuarosa o Iuni i le Tesema o o tatou olaga” (i le Thomas S. Monson, “Think to Thank,” *Liahona*, Jan. 1999, 22). E moni foi lena mea i o tatou manatuaga faaleagaga. E ono sili ona fesoasoani i taimi malulu o faigata o o tatou olaga pe a tatou moomia na manatuaga faaleagaga o “Iuni.”



Saunia e Douglas D. Holmes
Fesoasoani Muamua i le Au Peresitene Aoa o
Alii Talavou Na Faamaloloina Talu Ai Nei

Maua'a i o Tatou Loto

O loo taumafai le Alii e fesoasoani mai ai ia i tatou—i tatou uma—ia avatu Lana talalelei ia maua'a i o tatou loto.

Uso e ma tuafafine, e ma'eu le matagofie o le taimi ua tatou ola ai nei. A o tatou faamanatuina le amataga o le Toefuataiga, ua talafeagai foi ona faamanatuina le Toefuataiga faifaipea o loo tatou molimauina. Ou te olioli faatasi ma outou e ola i lenei vaitaimi.¹ O loo faaauau pea ona faatulagaina lelei e le Alii, e ala mai i Ana perofeta, mea uma e manaomia e fesoasoani ia i tatou e saunia ai ia taliaina o Ia.²

O se tasi o na mea e manaomia o le ta'imua fou mo Tamaiti ma le Autalavou. O le toatele o outou ua masani i le faamamafa a lenei polokalama i le setiina o sini, faatusa fou o le auai, ma konafesi Mo le Malosi o le Autalavou. Peitai e le tatau ona tatou tuu atu i na mea e faanenefuina la tatou vaai i mataupu faavae o loo fausia ai le polokalama ma lo latou faamoemoega: ia fesoasoani e avatu le talalelei a Iesu Keriso ia maua'a i loto o a tatou tamaiti ma le autalavou.³

Ou te talitonu afai tatou te vaavaai manino atili i nei mataupu faavae, o le a tatou iloa o lenei [polokalama] o se mea e sili atu nai lo o se polokalama mo tagata e i le vaitausaga o le 8 i le 18. O le a tatou vaai i le auala o loo taumafai le Alii e fesoasoani mai ai ia i tatou—i tatou uma—ia avatu Lana talalelei ia maua'a i o tatou loto. Ou te

tatalo ia fesoasoani mai le Agaga Paia ia i tatou ia aoao faatasi.

Sootaga—"Ia faatasi ma i Latou"⁴

O le mataupu faavae muamua o sootaga. Talu ai ona o i latou o se vaega masani o le Ekalesia a Iesu Keriso, e galo ai ia i tatou i nisi taimi le taua o sootaga i la tatou malaga faifaipea ia Keriso. E le o faamoemoeina i tatou e saili pe savavali na o i tatou i le ala o feagaiga. Tatou te manaomia le alofa ma le lagolago mai i matua, isi tagata o le aiga, uo, ma taitai o e o loo savalia foi le ala.

O nei ituaiga o sootaga e manaomia ai le taimi. Taimi e faatasitasi ai. Taimi e 'ata ai, taalo ai, aoao ai, ma auauna atu ai faatasi. Taimi e talisapaia ai e isi mea e fiafia ma luitau ai isi. Taimi e tatala ai [talanoaga] ma talanoa faamaoni i le tasi ma le isi a o tatou tauivi ia sili atu ona lelei faatasi. O nei sootaga o se tasi lea o faamoemoega o le faatasitasi o ni aiga, korama, vasega, ma faalapotopotoga. O faavae ia o le auaunaga mataalia.⁵

Na tuuina mai e Elder Dale G. Renlund ia i tatou se ki e atiaeina ai nei sootaga ina ua ia saunoa: "O le auauna atu ma le mataalia i isi, e tatau lava ona tatou vaai atu ia i latou . . . e ala atu i se vaaiga mai fofoga o le Tama Faalelagi.

Ona faatoa mafai lea ona tatou amata ona malamalama i le taua moni o se agaga. Ona faatoa mafai lea ona tatou lagonaina le alofa o loo i ai i le Tama Faalelagi mo Ana fanau uma."⁶

O le vaai atu i isi e pei [ona silasila mai i ai] le Atua o se meaalofa lea. Ou te valaaulia i tatou taitoatasi ia saili mo lenei meaalofa. A o faapupulaina o tatou mata ia vaai,⁷ o le a mafai foi ona tatou fesoasoani atu i isi ia vaai ia i latou lava e pei ona [silasila mai le] Atua.⁸ Na faamamafa mai e Peresitene Henry B. Eyring le mana o lenei mea ina ua saunoa mai: "O le mea o le a sili ona taua o le mea e aoaoina [e isi] mai ia te [oe] i le pe o ai moni lava i latou ma le mea e mafai ona avea moni ai i latou. O la'u mate o le a le mafai ona latou aoaoina tele mai lauga. O le a latou mauaina mai lagona po o ai oe, tagata e manatu e i ai i latou, ma pe o ai e te manatu e ono latou avea ai."⁹ O le fesoasoani atu i isi ina ia malamalama i lo latou faasinomaga moni ma le faamoemoega o se tasi lea o meaalofa silisili e mafai ona tatou tuuina atu.¹⁰ O le vaai i isi ma i tatou lava e pei ona silasila mai ai le Atua e fili "faatasi [o latou loto] i le lotogatasi ma le alofa."¹¹

Faatasi ai ma le faaauau pea ona faateleina o malosiaga faalelagi o loo fetosoaia i tatou, tatou te



manaomia le malosi lea e sau mai sootaga alofa. A o tatou fuafuaina la gaoioiga, fonotaga, ma isi faatasiga, sei o tatou manatuaina o se faamoe-moega autu o nei faatasiga o le fausia lea o sootaga alofa e tuufaatasia i tatou ma fesoasoani e avatu le talalelei a Iesu Keriso ia maua'a i o tatou loto.¹²

Faaaliga, Faitalia, ma le Salamo— "Fesootai i Latou ma le Lagi"¹³

Ioe, e le lava le na o le fusia faatasi. E tele vaega ma faalapotopotoga e ausia le lotogatasi i mafuaaga eseese. Peitai, o le lotogatasi tatou te sailia o le tasi ia Keriso, ia fesootai i tatou ma Ia.¹⁴ Ina ia fesootai o tatou loto ma le lagi, tatou te manaomia aafiaga faaleagaga taitoatasi, e pei ona saunoa manino mai ai Elder Andersen ia i tatou.¹⁵ O na aafiaga e oo mai a o molioo mai e le Agaga Paia le afioga ma le alofa o le Atua i o tatou mafau-fau ma loto.¹⁶

E oo mai lenei faaaliga e ala mai i tusitusiga paia, aemaise lava le Tusi a Mamona; e ala i upu musuia mai perofeta soifua ma isi soo faamaoni; ma e ala mai i le leo filemu itiiti.¹⁷ O nei upu e sili atu nai lo se vai-tusi i luga o se itulau, leo o galu i o tatou taliga, po o ni manatu i o tatou mafau-fau, po o ni lagona i o tatou loto. O le afioga a le Atua o le mana faaleagaga.¹⁸ O le upumoni ma le malamalama.¹⁹ O le auala o loo tatou lagonaina ai o Ia! O le afioga e amatalia ma faateleina lo tatou faatuatua ia Keriso ma faasasao ai i totonu o i tatou se mana o ia avea atili faapei o le Faaola—o le salamo ma savali lea i le ala o feagaiga.²⁰

Ia Aperila ua mavae, na fesoasoani mai ai Peresitene Russell M. Nelson ia i tatou ia malamalama i le matafaioi tutotonu o le salamo i lenei malaga faavaloaga.²¹ Sa ia saunoa mai: "A

tatou filifili e salamo, ua tatou filifili e sui! Ua tatou faatagaina le Faaola e suia i tatou i o tatou lava ituaiga tagata silisili. . . . Tatou te filifili ia avea atili e faapei o Iesu Keriso!"²² O le faagasologa o le suiga, uunaia e le afioga a le Atua, o le ala lea tatou te fesootai ai ma le lagi.

O le autu o le valaaulia a Peresitene Nelson ia salamo o le mataupu faavae o le faitalia. E tatau ona tatou *filifili* le salamo mo i tatou lava. E lē mafai ona faamalosia le talalelei i totonu o o tatou loto. E pei ona saunoa Elder Renlund, "O le sini a lo tatou Tama Faalelagi i tulaga faamatua, o le le tuu atu lea i Ana fanau e *faia* le mea sa'o; ae o le tuu atu i Lana fanau e *filifili* e fai le mea sa'o."²³

I polokalama ia ua suitulaga ai [le polokalama] a Tamaiti ma le Aulalavou, e silia ma le 500 tulaga manaomia eseese e faamaea ai ina ia mafai ai ona mauaina ia aloaiaaga eseese.²⁴ I le asō, e tasi lava le mea taua. O se valaaulia ia *filifili* ia avea atili faapei o le Faaola. Tatou te faia lenei mea e ala i le mauaina o le afioga o le Atua e ala i le Agaga Paia ma faatagaina Keriso e suia i tatou i o tatou lava ituaiga tagata silisili.

Ua sili atu lenei mea nai lo se faatinoga o le setiina o sini po o le faaleleia o le tagata lava ia. O sini ua na o ni meafaigaluega ia e fesoasoani e fesootai i tatou ma le lagi e ala i faaaliga, faitalia, ma le salamo—ia o mai ia Keriso ma maua Lana talalelei ia maua'a i o tatou loto.

Auai ma le Ositaulaga—"Tuu Atu ia i Latou e Taitai"²⁵

Ma le mea mulimuli, ina ia avatu le talalelei a Iesu Keriso ia maua'a i o tatou loto, tatou te manaomia le auai ai—e tuuina atu lo tatou taimi ma

taleni i ai, ia ositaulaga i ai.²⁶ Tatou te mananao uma lava e ola i se olaga e i ai se uiga, ma e faapitoa lava le moni o lenei mea i le tupulaga faia'e. Latou te mananao i se galuega.

O le talalelei a Iesu Keriso o le galuega aupito silisili lea i le lalolagi. Na saunoa mai Peresitene Ezra Taft Benson: "Ua poloaiina i tatou e le Atua ina ia avatu lenei talalelei i le lalolagi uma. O le galuega lena e tatau ona tuufaatasia ai i tatou uma i aso nei. E na o le talalelei lava o le a faasaoina le lalolagi mai le mala o lona faatafunaina. E na o le talalelei lava o le a tuufaatasia ai alii [ma tamaitai] o ituaiga ma atunuu uma i le filemu. E na o le talalelei lava o le a aumaia le olioli, fiafia, ma le faaolataga i le aiga o tagata."²⁷

Na folafola mai Elder David A. Bednar, "A o tatou faamalosiaina le aulalavou e ala i le valaauliaina ma le faatagaina o i latou e galulue, o le a agai atu i luma le Ekalesia i ni auala ofoofogia."²⁹ Ua tele ina tatou le valaauliaina ma faatagaina le aulalavou e ositaulaga mo lenei galuega sili a Keriso. Na matauina e Elder Neal A. Maxwell, "Afai e matuā mafatia [a tatou] talavou [i le galuega a le Atua], o le a sili atu ona lofituina i latou e le lalolagi."²⁸

O le polokalama a Tamaiti ma le Aulalavou e taulai atu i le faamalosiaina o le aulalavou. Latou te filifilia a latou lava sini. O au peresitene o korama ma vasega ua tuu atu ai a latou matafaioi e tatau ai. O le aufono a le aulalavou a le uarota, e tai pei lava o le aufono a le uarota, e taulai atu i le galuega o le faaolataga ma le faaeaga.³⁰ Ma o korama ma vasega e amata a latou fonotaga e ala i le fefautuagai e uiga i le auala e faia ai le galuega ua tuuina atu e le Atua ia i latou.³¹

Na saunoa mai Peresitene Nelson i le autalavou o le Ekalesia: “Afai e te filifili e, pe afai e te manao ai . . . e mafai ona avea oe o se vaega taua o se mea telē, o se mea maoae, o se mea malualii! . . . O outou o e aupito silisili *ua* auina mai e le Alii i lenei lalolagi. Ua ia te outou le gafatia ina ia atamamai ma popoto sili atu ma tele atu la outou uunaiga i le lalolagi nai lo soo se isi lava tupulaga ua mavae atu!”³² I se isi taimi, na saunoa atu Peresitene Nelson i le autalavou: “Ou te talitonu atoatoa ia te outou. Ou te alofa ia te outou, ma e faapea foi le Alii. O tatou o Lona nuu, ua auai faatasi i Lana galuega paia.”³³ Tupulaga talavou e, pe mafai ea ona outou lagonaina le faatuatua e Peresitene Nelson o outou ma le taua o outou i lenei galuega?

Matua ma taitai matutua, ou te valaulia outou ia vaavaai atu i le autalavou e pei ona silasila i ai Peresitene Nelson. A o lagonaina e le autalavou lo outou alofa ma le faatuatua, a o outou uunaia ma aoao atu i latou i le ala e taitai ai—ona o ese ai lea mai o latou ala—o le a latou faamaofaina outou i lo latou malamalama, tomai, ma le tuuto atu i le talalelei.³⁴ O le a latou lagona le olioli i le filifili e auai ma le ositaulaga mo le mafuaaga sili



Bluffdale, Iuta, ISA

a Keriso. O le a maua’a atili Lana talalelei i o latou loto, ma o le a agai atu i luma le galuega i auala ofoofogia.

Folafolaga ma le Molimau

Ou te folafola atu, pe a tatou taulai atu i nei mataupu faavae—sootaga, faaaliga, faitalia, salamo, ma le ositaulaga—o le a goto ifo loloto le talalelei a Iesu Keriso ma maua’a i o tatou loto uma. O le a tatou vaaia le agai i luma o le Toefuataiga i lona faamoemoega tupito, le togilaina o Isaraelu ma le faatuina o Siona,³⁵ lea o le a nofotupu ai Keriso o le Tupu o tupu.

Ou te molimau atu o loo faaauau pea ona faia e le Atua mea uma e tatau ai e saunia ai Lona nuu mo lena aso. Tau ina ia tatou vaai i Lona aao i lenei galuega matagofie a o tatou tauivi uma ia “o mai ia Keriso, ma faatoatoaina ia te ia.”³⁶ I le suafa o Iesu Keriso, amene. ■

FAAMATALAGA

1. Tagai i le Mataupu Faavae ma Feagaiga 45:12. Na saunoa mai Peresitene Nelson: “Tau lava ina mafaufau i le manaia ma le faanatinati o lena galuega uma: o perofeta uma e amata mai ia Atamu sa vaai i o tatou aso. Ma sa talanoa perofeta taitasi e uiga i o *tatou* aso, pe a faapotopotoina ia Isaraelu ma o le a saunia le lalolagi mo le Afio Mai Faalua o le Faaola. Mafaufau i ai! Mai i tagata uma ua ola ai i le paneta o le lalolagi, o *i tatou* o tagata ua auai i lenei mea maoae faaiu, o le faapotopotoina. Se mea ina a ofoofogia!” (“Faamoemoe o Isaraelu” [faigalotu a le autalavou i le lalolagi atoa, 3 Iuni, 2018], HopeofIsrael. ChurchofJesusChrist.org.

Na aoao mai Elder Jeffrey R. Holland: “O se taimi sili lenei ua tatou ola ai!” “O le talalelei a Iesu Keriso o le upumoni aupito mautinoa, sili ona malupuipua, sili ona faatuatua, ma sili ona tauia i le fogaelele ma i le lagi, i le olaga nei ma i le faavavau. E leai se mea—leai lava, leai se tasi, leai se faatosinaga—o le a taofia lenei Ekalesia mai le faataunuaina o lana misiona ma le iloaina o lona taunuuga ua folafola mai a o lei faavaeina le lalolagi. . . . E leai se mea e fefe pe le mautonu ai e uiga i le lumanai.

“E le pei o isi vaitausaga i o tatou luma, o lenei tisipenisione o le a le oo i se liliuese faafaalapotopotoga; o le a le vaaia le leiloloa o ki o le perisitua; o le a le mafatia i le taofia o faaaliga mai le siufofoga o le Atua Silisiliese. . . . Oka se taimi ina a ola ai!”

“. . . Afai e te lei matauina, ou te lagona le toafimale e uiga i aso e gata ai. . . . Talitonu. Tulai a’e i luga. Ia faamaoni. Ma faia le mea sili e uiga i le aso ofoofogia lea ua tatou ola ai nei.” (Facebook post, Me 27, 2015; tagai foi i le “Be Not Afraid, Only Believe” [saunoaga o faiaoga o le Matagaluega o Aoga a le Ekalesia, Feb. 6, 2015], broadcasts.ChurchofJesusChrist.org).

2. Tagai i le Ioane 1:12.

3. E lei umi talu ona valaauina i matou o se Au Peresitene Aoao o Alii Talavou, ae talanoa mai Peresitene Henry B. Eyring ia i matou i luitau ma avanoa tulaga ese o loo feagai ma le autalavou a le Ekalesia i aso nei. Na ia fautuaina i matou e taulai atu i mea ia o le a fesoasoani e aveina atu le talalelei a Iesu Keriso i le loloto o latou loto. O lena fautuuga ua avea o se taiala mo i matou o le Au Peresitene o Alii Talavou.

4. Tagai i le “Be with Them,”

ChurchofJesusChrist.org/callings/aaronic-priesthood-quorums/my-calling/leader-instruction/be-with-them.

5. Tagai i le Mosaea 18:25; Moronae 6:5.

6. Dale G. Renlund, “E Ala Mai i Fofoga o le Atua,” *Liahona*, Nov. 2015, 94; tagai foi i le Mose 1:4–6.

Sa aoao mai e Peresitene Monson:

“Ua ia i tatou le tiutetauave e vaai atu ai i tagata, e le o tagata o loo latou i ai ae o tagata e mafai ona avea ai i latou. Ou te augani atu ia te outou ia mafaufau ia i latou i lenei ala” (“Vaai Atu i Isi o Tagata e Mafai ona Avea ai i Latou,” *Liahona*, Nov. 2012, 70).

Sa aoao mai e Elder Neal A. Maxwell:

“O le tele lava o taimi, o le *le tausisia* e se tagata talavou o tulaga faatonuina a le Ekalesia, po o ana fesili e foliga mai e feteenai, po o ona masalosaga faaaliga e vave ona faailogaina ai o ia. O taunuuga e mafai ona mamaoese ma, i nisi taimi, faasea. O le alofa moni e le fiafia i le faailogaina!” (“Unto the Rising Generation,” *Ensign*, Apr. 1985, 9).

7. Tagai i le 2 Tupu 6:17.

8. Na saunoa Stephen L. Richards, o se uso o le Au Peresitene Sili: “O le ituaiga iloaitino e aupito maualuga o le mafai lea ona iloa e isi ma faaali atu ia i latou o latou lava uiga sili ona lelei, o natura lelei o loo i totonu o i latou” (in Conference Report,



- Apr. 1950, 162; in David A. Bednar, “Ia Atamai,” *Ensign*, Dec. 2006, 35; *Liahona*, Tes. 2006, 19). Tagai foi i le 2 Tupu 6:17.
9. Henry B. Eyring, “Teaching Is a Moral Act” (saunoaga i le Iunivesite o Polika Iaga, Aok. 27, 1991), 3, speeches.byu.edu; emphasis added; tagai foi i le Henry B. Eyring, “Fesoasoani ia i Latou e Faatutu ni Sini Mauululuga,” *Liahona*, Nov. 2012, 60–67.
 10. Tagai i le Mose 1:3–6.
 11. Mosaea 18:21; tagai foi i le Mose 7:18.
 12. “O alii talavou o loo i ai ni sootaga malolosi ma lelei ma se aiga, ua, ma taitai [o le Au Paia o Aso e Gata Ai] lea e fesoasoani ia i latou e atiina ae se sootaga ma lo latou Tama Faalelagi, e foliga mai o le a tumau malosi. O elemene o polokalama faapitoa—e pei o le mataupu aoaoina, polokalama o gaioioga a [Alii Talavou], faamoemoega o mea e ausia e le tagata lava ia . . . atonu e itiiti se aafiaga saoloto i na sootaga. . . . O le fesili taua e le o le auala o loo faatinoaina ai ma le atoatoa o ia elemene o polokalama faapitoa, ae o le auala o saofagā ai i ni sootaga lelei e faamalosi ai le faasinomaga faalelotu o alii talavou o le [Au Paia o Aso e Gata Ai]” (“Be with Them,” ChurchofJesusChrist.org/callings/aaronic-priesthood-quorums/my-calling/leader-instruction/be-with-them).
 13. Tagai i le “Connect Them with Heaven,” ChurchofJesusChrist.org/callings/aaronic-priesthood-quorums/my-calling/leader-instruction/connect-them-with-heaven.
 14. Tagai i le Ioane 15:1–5; 17:11; Filipi 4:13; 1 Ioane 2:6; Iakopo 1:7; Ominae 1:26; Moronae 10:32.
 15. Ua tumu tusitusiga paia i faaitaiga o lenei mea; e na o le lua lenei: 1 Nifae 2:16; Enosa 1:1–4.
 16. Tagai i le Luka 24:32; 2 Nifae 33:1–2; Iakopo 3:2; Moronae 8:26; Mataupu Faavae ma Feagaiga 8:2–3.
 17. Tagai i le 2 Timoteo 3:15–16; Mataupu Faavae ma Feagaiga 68:3–4; 88:66; 113:10.
 18. Tagai i le 1 Tesalonia 1:5; Alema 26:13; 31:5; Helamana 3:29; 5:17; Mataupu Faavae ma Feagaiga 21:4–6; 42:61; 43:8–10; 50:17–22; 68:4.
 19. Tagai i le Ioane 6:63; 17:17; Alema 5:7; Mataupu Faavae ma Feagaiga 84:43–45; 88:66; 93:36.
 20. Tagai i le Ioane 15:3; 1 Peteru 1:23; Mosaea 1:5; Alema 5:7, 11–13; 32:28, 41–42; 36:26; 62:45; Helamana 14:13.
 21. Tagai i le 2 Nifae 31:19–21; 32:3, 5.
 22. Russell M. Nelson, “E Mafai Ona Tatou Faia ia Lelei Atu ma Ia Tatou Lelei Atu,” *Liahona*, Me 2019, 67.
 23. Dale G. Renlund “Ina Filifili Ia o Outou i le Aso Nei,” *Liahona*, Nov. 2018, 104.
 24. O lenei fuainumera e aofia ai tulaga manaomia o polokalama faasikauti, lea na avea talu ai nei o se vaega o le polokalama o gaioioga a le Ekalesia mo tamaiti ma alii talavou, aemaise i le Iunaite Setete ma Kanata. I eria ia e le'i auai i le Sikauti, o le aofai o tulaga manaomia sa silia ma le 200. Ma le isi, o polokalama eseese o gaioioga mo tamaiti, teineiti, alii talavou, ma tamaitai talavou na mamanuina eseese, ma ua sili atu ai ona lavelave mo aiga.
 25. Tagai i le “Let Them Lead,” ChurchofJesusChrist.org/callings/aaronic-priesthood-quorums/my-calling/leader-instruction/let-them-lead.
 26. Tagai i le Omnae 1:26; 3 Nifae 9:20; 12:19; Mataupu Faavae ma Feagaiga 64:34. “O se tapuaiga e le manaomia le ositaulagaina o mea uma, e le i ai lava se mana e lava e maua ai le faatuatua e manaomia mo le ola ma le faaolataga” (*Lectures on Faith* [1985], 69).
 27. Ezra Taft Benson, *The Teachings of Ezra Taft Benson* (1988), 167; in *Preach My Gospel: A Guide to Missionary Service* (2019), 13; tagai foi ia Russell M. Nelson, “Hope of Israel,” HopeofIsrael.ChurchofJesusChrist.org.
 28. Fonotaga ma Elder David A. Bednar; tagai foi i le “2020 Temple and Family History Leadership Instruction,” Feb. 27, 2020, ChurchofJesusChrist.org/family-history.
 29. Neal A. Maxwell, “Unto the Rising Generation,” 11. Na faauau pea Elder Maxwell, “I le faatinoga, e toa fia au peresitene o korama a tiakono ma aoao e aofia ai i le na o le valaauina o se tasi e ofoina atu se tatalo pe tufaina le faamanatuga? Uo se, o agaga faapitoa moni lava nei, ma e mafai ona latou faia ni mea taua pe a tuuina i ai se avanoa!
 30. Tagai i le *Tusitaulima Aoao: Auauna Atu i Le Ekalesia a Iesu Keriso o le Au Paia o Aso e Gata Ai*, 2.2, ChurchofJesusChrist.org.
 31. O loo maua le tele o punaao i le Gospel Library e fesoasoani i le autalavou e taitai ai, e aofia ai “Punaao mo le Au Peresitene o Korama ma Vasega,” “e Faaagaina ai le *Sau, Mulimuli Mai ia te A'u—Mo le Korama a le Perisitua Arona ma Vasega a Tamaitai Talavou*,” ma i punaao mo vasega a Tamaitai Talavou ma korama a le Perisitua Arona i “Tofiga o le Uarota po o Paranesi.”
 32. Russell M. Nelson, “Hope of Israel,” HopeofIsrael.ChurchofJesusChrist.org. I le faagasologa o lenei lava faigalotu, na saunoa ai Peresitene Nelsona: “Sa faapolopolo e lo tatou Tama Faalelagi Ana agaga aupito sili ona tamalii—atonu e mafai ona ou fai atu o Lana 'au aupito lelei—mo le toe laasaga lenei. O na agaga tamalii—na tagata taaalo silisili ona lelei, na toamanumanu—o outou!”
 33. Russell M. Nelson, malelega amata i le “Tamaiti ma le Autalavou: O Se Talanoaga Faafesagai ma Elder Gerrit W. Gong,” Nov. 17, 2019, broadcasts.ChurchofJesusChrist.org.
 34. Na saunoa Peresitene Nelson: “E manaomia ona tatou tuu atu i le autalavou e taitai, aemaise lava i latou ua valaauina ma vaetofaina e auuuna atu i au peresitene o vasega ma korama. O le a faamatuu atu ia i latou le pule o le perisitua. O le a latou aoao i le auala e maua ai musumusuga i le taitaiga o a latou vasega po o korama” (i le “Children and Youth Introductory Video Presentation,” Sete. 29, 2019, ChurchofJesusChrist.org).
- Na saunoa Elder Quentin L. Cook, “Ua talosagaina tatou talavou ia faia atili o latou lava tiutetauave faaletagata lava ia a o talavou—e aunoa ma le faia e matua ma taitai o mea e mafai e le autalavou ona faia mo i latou lava” (“O Fetuunaiga e Faamalosi ai le Autalavou,” *Liahona*, Nov. 2019, 40).
35. Na aoao mai Peresitene George Q. Cannon: “Ua faapolopoloina e le Atua agaga mo lenei tisipenisione o e ua i ai le lototoa ma le naunautai e fetai ai ma le lalolagi, ma mana uma o le tiapolo, o ē e vaaia ma ē le vaaia, ia folafola atu le talalelei ma faatumauina le upu moni ma fausia le Siona a lo tatou Atua e le fefefe i soo se taunuuga. Ua Ia auina mai nei agaga i lenei tupulaga e faataatia le faavae o Siona e le toe mafai ona faatoilaloina, ma ia faatuina ni fanau o le a amiotonu, ma o le a ava i le Atua, ma ava ia te Ia i mea uma, ma usitai ia te Ia i tulaga uma” (“Remarks,” *Deseret News*, May 31, 1866, 203); tagai foi i le *Aoaoga a Peresitene o le Ekalesia: Iosefa Samita* (2007), 186.
 36. Moronae 10:32.



Saunia e Peresitene Henry B. Eyring
Fesoasoani Lua i le Au Peresitene Sili

O Tatalo o le Faatuatua

Pe a tatou tatalo i le faatuatua, o le a avea i tatou ma se vaega taua i le galuega a le Alii a o la sauniaina le lalolagi mo Lona Afio Mai Faalua.

O le tatalo a Elder Maynes i le amataga o lenei uluai sauniga o le konafesi aoao ua taliina. Ua oo mai musumusuga ia te i tatou e ala i savali ofoofogia ma musika matagofie. O le folafolaga a Peresitene Russell M. Nelson e faapea o lenei konafesi o le a manatua pea ua amata lava ona faataunuaina.

Ua atofaina e Peresitene Nelson lenei tausaga e avea ma “se vaitau o seneturi e lua e faamanatuina ai le 200 tausaga talu ona faali mai le Atua le Tama ma Lona Alo Pele, o Iesu Keriso, ia Iosefa Samita i se faaaliga.” Na valaaulia i tatou e Peresitene Nelson ia faia se fuafuaga patino e saunia ai i tatou lava mo lenei konafesi faasolopito, lea na ia saunoa ai o le faamantua o le a avea ma “se taimi o suiga iloga i le talafaasolopito o le Ekalesia, ma o lau vaega e taua tele.”¹

E pei o a’u, masalo na e faafofoga i lana savali ma fesili ifo ia te oe lava, “O le a se auala e taua tele ai la’u vaega?” Masalo na e faitau ma tatalo e uiga i mea na tutupu o le Toefua-taiga. Masalo, e sili atu i lo se isi lava taimi muamua, na e faitauina ai tala o na taimi ina ua faailoa mai e le Atua le Tama Lona Alo Pele. Masalo na e faitau i mea na tutupu i le taimi na fetalai mai ai le Faaola i fanau a lo

tatou Tama Faalelagi. Ou te iloa na ou faia na mea uma ma isi mea.

Sa ou mauaina maufaasino i a’u faitauga i le perisitua a le Atua ma le tatalaga o tisipenisione. Na faamaualaloina a’u ina ua ou iloina o a’u sauniuniga mo lenei konafesi o se taimi lea o suiga iloga i la’u lava ia talafaasolopito. Sa ou lagonaina ni suiga i lo’u loto. Sa ou lagonaina se lotofaafetai fou. Sa ou lagonaina le faatumulia i le olioli i le avanoa o le valaauliaina ia auai i lenei faamanatuga o le Toefua-taiga faifai pea.

Ou te mafaufau ona o sauniuniga faaeteete, o loo lagonaina ai e isi le olioli sili atu, faamoemoega sili atu, ma sili atu ona naunau e auauna i soo se matafaioi e manaomia mai e le Alii.

O mea maoae na tutupu tatou te faamamaluina, o le amataga o le tisipenisione mulimuli na valoiaina, lea o loo saunia ai e le Alii Lana Ekalesia ma Lona nuu, o i latou o loo tauaveina Lona suafa, ia talia o Ia. I le avea ai ma se vaega o a tatou sauniuniga mo Lona afio mai, o le a Ia siitia ai i tatou taitoatasi ina ia mafai ona tatou tutulai a’e i luitau faaleagaga ma avanoa e le faatusalia i soo se mea na vaai i le talafaasolopito o lenei lalolagi.

Ia Setema 1840, na folafola mai ai e le Perofeta o Iosefa Samita ma ona

fesoasoani i le Au Peresitene Sili le folafolaga lenei: “O le galuega a le Alii i nei aso e gata ai, o se galuega maoae tele ma e toetoe e le oo i ai le malamalama o tagata soifua. O ona mamalu e le mafaamatalatalaina, ma o lona maoae e le mafaatusalia. O le autu lea sa uunaia ai loto o perofeta ma alii amiotonu mai le foafoaga o le lalolagi e oo i tupulaga uma e sosoo ai e oo mai i le taimi nei; ma o le tisipenisione moni lava o le atoaga o taimi, lea o mea uma o ia Keriso Iesu, pe o i le lagi po o le lalolagi, o le a faapotopoto faatasi ia te Ia, ma a oo ina toefuatai mai mea uma, e pei ona fetalai e perofeta paia uma talu ona faavae le lalolagi; aua o iina o le a tupu ai le faataunuaina mamalu o



Mixco, Kuatemala



folafolaga na faia i tamā, a o maoae, mamalu, ma matagofie le faaaliga mai o le mana o le Silisiliese.”

Sa faaauau ona latou faapea mai: “Tatou te lagona le naunautaiga e agai i luma ma tuufaatasia o tatou malosiaga mo le fausiaina o le Malo, ma le faatuina o le Perisitua i lo la atoatoaga ma mamalu. O le galuega e tatau ona faataunuaina i aso e gata ai o se galuega e maoae lona taua tele, ma o le a manaomia le faaaogaina o le malosiaga, atamai, taleni, ma agavaa o le Au Paia, ina ia taavale atu i luma ma lena mamalu ma le malosi na faamatalaina mai e le perofeta [o Tanielu] [tagai i le Tanielu 2:34–35, 44–45]; a o le iuga o le a manaomia le manatu tasi i ai o le Au Paia, ina ia faataunuaina galuega e maoae tele le taua ma le matagofie.”²

O le tele o auiliiliga o mea o le a tatou faia ma le taimi o le a tatou faia ai i le gasologa o le Toefuataiga e le'i faaaliga maia. Ae na iloa lava e le Au Perisitene Sili i na uluai aso le lautele ma le loloto o le galuega ua tuu mai e le Alii i o tatou luma. Na o ni nai faataitaiga nei o mea ua tatou iloa o le a tutupu:

E ala mai i Lana Au Paia, o le a ofo mai ai e le Alii le meaalofa o Lana talalelei “i atunuu uma, ituaiga, gagana, ma nuu.”³ O le a faaauau pea ona faia e tekinolosi ma vavega se vaega—e faapena foi i tagata taitoatasi o “fai faiva i tagata”⁴ o ē auauna atu ma le mana ma le faatuatua faateleina.

O i tatou o se nuu o le a lotogatasi atili i le lotolotoi ai o fetaua'iga faateleina. O le a faapotopotoina i tatou i le malosiaga faaleagaga o vaega ma aiga e faatumulia i le malamalama o le talalelei.

E oo lava i se lalolagi lē talitonu o le a iloina Le Ekalesia a Iesu Keriso o le Au Paia o Aso e Gata Ai ma iloina le mana o le Atua ua i ai i ona luga. O soo faatuatua ma lotototoa o le a tauaveina ma le lē fefe, lotomauualalo, ma le saoloto i o latou luga le suafa o Keriso i o latou olaga i aso uma.

E mafai faapefea la e i tatou taitoatasi ona auai i lenei galuega taua ma le mamalu? Na a'oa'o mai Perisitene Nelson i le auala e tuputupu a'e ai i le mana faaleagaga. Pe a tatou aveina le salamo o se avanoa fiafia ona o lo tatou faatuatua faatupulaia o Iesu o le Keriso, pe a tatou malamalama ma talitonu e faafofoga mai le Tama Faalelagi i a tatou tatalo uma, pe a tatou tauivi e usitai ma ola i poloaiga, ua tatou ola i lo tatou mana e maua ai faaaliga faifai pea. E mafai ona avea le Agaga Paia ma a tatou soa tumau. E tumau pea se lagona o le malamalama ia i tatou e tusa lava pe faasolo pogisa le lalolagi o siomiaina i tatou.

O Iosefa Samita o se faataitaiga o le ala e tuputupu a'e ai i lena mana faaleagaga. Sa ia faaali mai ia i tatou o le tatalo o le faatuatua o le ki lea i faaaliga mai le Atua. Sa ia tatalo i le faatuatua, ma le talitonu o le a tali mai le Atua le Tama i lana tatalo. Sa ia tatalo i le faatuatua, sa talitonu e na o Iesu Keriso na mafai ona faasao-lotoina o ia mai le ta'usalaga sa ia lagonaina mo ana agasala. Ma sa ia tatalo i le faatuatua, ma le talitonu na manaomia ona ia maua le Ekalesia moni a Iesu Keriso e maua ai lena faamagaloga.

I lana auaunaga faaperofeta atoa, sa faaaoga ai e Iosefa Samita ia tatalo o le faatuatua e maua ai faaaliga faifai pea. A o tatou feagai ai ma luitau o nei aso ma luitau e lei oo mai, o le a tatou manaomia foi ona faataitaia lea lava mamanu e tasi. Sa saunua Perisitene Polika Iaga, “Ou te le iloa se isi lava auala mo le Au Paia o Aso e Gata Ai nai lo mo mānava uma ina ia avea ma se tatalo taua i le Atua ia taiala ma faatonu lona nuu.”⁵

O nei upu mai tatalo o le faamana-tuga e tatau la ona faamatalaina ai o tatou olaga i aso taitasi: “Ia manatua pea o ia.” O “Ia” o loo faasino ia Iesu Keriso. O upu e sosoo ai, “ma tausi i ana poloaiga,” ua fautua mai ai le uiga o le manatua pea o Ia.⁶ A tatou manatua pea Iesu Keriso, e mafai ona tatou fesili atu i tatalo leleoa, “O le a se mea e finagalo o Ia ou te faia?”

O se tatalo faapena, na ofo atu i le faatuatua ia Iesu Keriso, na amatalia ai lenei tisipenisione mulimuli. Ma o le a i ai i le fatu o vaega o le a faia e i tatou taitoatasi i lona faagasologa faifai pea. Ua ou iloina, e pei ona outou iloina, ni faataitaiga matagofie o tatalo faapea.

Muamua o Iosefa Samita. Sa ia ole atu i se faatuatua faatamaitiiti i le mea e finagalo le Alii na te faia. O Lana tali na suia ai le talafaasolopito o le lalolagi.

Ia te a'u, o se lesone sili ona taua e sau mai le tali a Iosefa i le osofaiga a Satani a o tootuli Iosefa e tatalo.

Ou te iloa mai aafiaga e taumafai Satani ma ana auauna ia tatou lagonaina e le tatau ona tatou tatalo. Ina ua faaaoga e Iosefa Samita lona malosi atoa e valaau atu ai i le Atua e laveai o ia mai le mana na taumafai e noatia o ia, o lana tatalo mo se toomaga sa taliina ma na faaali mai ai le Tama Faalelagi ma Iesu Keriso.

O le taumafaiga a Satani e taofia le amataina o le Toefuataiga sa matuā ogaoga ona o le tatalo a Iosefa sa matuā taua. Ua i ai ia te oe ma a'u ni vaega laiti ifo e fai i le Toefuataiga faifai pea. Ae o le a taumafai le fili o le Toefuataiga e taofi i tatou mai le tatalo. O le faataitaiga o le faatuatua o Iosefa ma lona naunautaiga e mafai ona faamalosia ai i tatou i o tatou naunautaiga. O se tasi lenei o mafuaaga e tele e faafofia ai i a'u tatalo le faafetai i le Tama Faalelagi mo le Perofeta o Iosefa.

O Enosa i le Tusi a Mamona o le isi faataitaiga lea mo la'u tatalo o le faatuatua a o ou taumafai e fai la'u vaega i le Toefuataiga faifai pea. Po o le a lava lau vaega o le a i ai, e mafai ona e ave o ia e fai ma se faufautua patino.

E pei o Iosefa, sa tatalo Enosa i le faatuatua. Sa ia faamatalaina lona aafiaga i le ala lenei:

“Ma sa matelaina lo'u agaga; ma sa ou tootuli i lalo i luma o lo'u Tufuga, ma ou tagi atu ia te ia i le tatalo malosi ma le faatauana mo lo'u lava agaga; ma sa ou tagi atu ia te ia i le aso atoa; ioe, ma ina ua oo mai le po sa ou sii maualuga a'e pea lo'u leo sa oo ina oo atu i le lagi.

“Ma sa oo mai se siufofoga ia te au, ua fetalai mai: Enosa e, ua faamagaloina au agasala, ma o le a faamanuiaina oe.

“Ma o au, o Enosa, sa ou iloa e le mafai ona pepelo le Atua; o le mea lea, sa tafi ese ai lo'u lagona o a'u sese.

“Ma sa ou fai atu: Le Alii e, ua faapea ea ona faia lenei mea?

“Ma sa fetalai mai o ia ia te au; Ona o lou faatuatua ia Keriso, o lē e te lei faalogo lava pe na e vaai muamua i ai. Ma e tele tausaga e mavae atu ae lei faaali mai e ia o ia lava i le tino; o le mea lea, inā alu ia, ua faamamāina oe i lou faatuatua.”⁷

O le lesona ua faamanuiaina ai o loo i ai i upu nei: “Ona o lou faatuatua ia Keriso, o lē e te lei faalogo lava pe na e vaai muamua i ai.”

Sa i ai le faatuatua o Iosefa ia Keriso e alu atu ai i le togavao ma ia tatalo foi mo le faasaolotoina mai mana o Satani. Sa le'i vaai o ia i le Tama ma le Alo, ae na ia tatalo i le faatuatua ma le malosi atoa o lona loto.

O le aafiaga o Enosa na a'oa'oina ai a'u i le lesona taua lava lea e tasi. Pe a ou tatalo i le faatuatua, e ia te a'u le Faaola e fai ma o'u puluvaga i le Tama ma e mafai ona ou lagonaina ua oo a'u tatalo i le lagi. E oo mai tali. E maua faamanuiaga. O loo i ai le filemu ma le olioli e oo lava i taimi faigata.

Ou te manatua le taimi, i le avea ai ma uso sili ona fou o le Korama a Aposetolo e Toasefululua, sa ou tootuli ai i le tatalo faatasi ma Elder David B. Haight. Sa pei o ia o lo'u matua lea ua i ai nei, faatasi ma luitau ua ou oo i ai a'u ia i le taimi nei. Ou te manatua lona leo a o ia tatalo. Ou te le'i pupula e vaai atu i ai, ae sa peisea'i ia te a'u sa ataata. Sa ia talanoa ma le Tama Faalelagi faatasi ma le olioli i lona leo.

Na mafai ona ou faalogoina i lo'u mafaufau lona fiasia ina ua ia fai mai, “I le suafa o Iesu Keriso.” Sa foliga mai ia te a'u e peisea'i na lagona e Elder Haight ua faamania mai e le Faaola i lona taimi le savali na ia tatalo atu ai i le Tama. Ma sa ou mautinoa o le a taliaina i se ataata.

O le a faateleina lo tatou tomā e fai ai a tatou saofaga taua i le

Toefuataiga faifai pea ofoofogia a o tatou tuputupu ae i lo tatou faatuatua ia Iesu Keriso i le avea ma o tatou Faaola ma lo tatou Tama Faalelagi i le avea ma o tatou Tama alofa. Pe a tatou tatalo i le faatuatua, o le a avea i tatou ma se vaega taua i le galuega a le Alii a o Ia sauniaina le lalolagi mo Lona Afio Mai Faalua. Ou te tatalo ina ia tatou maua uma le olioli i le faia o le galuega ua Ia valaauliaina i tatou taitoatasi e faatino.

Ou te molimau atu o loo soifua Iesu Keriso. O Lana Ekalesia ma le malo lenei i le lalolagi. O Iosefa Samita o le perofeta o le Toefuataiga. O Peresitene Russell M. Nelson o le perofeta a le Alii i le lalolagi i aso nei. O loo ia umia ki uma o le perisitua i Le Ekalesia a Iesu Keriso o le Au Paia o Aso e Gata Ai. I le suafa o Iesu Keriso, amene. ■

FAAMATALAGA

1. Russell M. Nelson, “My 2020 Invitation to You: Share the Message of the Restoration of the Savior's Gospel,” Jan. 1, 2020, blog.ChurchofJesusChrist.org.
2. *Aoaga a Peresitene o le Ekalesia: Iosefa Samita* (2007), 512–13.
3. Mosaea 15:28.
4. Mataio 4:19.
5. *Discourses of Brigham Young*, sel. John A. Widtsoe (1954), 43–44.
6. Mataupu Faavae ma Feagaiga 20:77.
7. Enosa 1:4–8.



Sandy, Iuta, ISA



Fofogaina e Peresitene Dallin H. Oaks
Fesoasoani Muamua i le Au Peresitene Sili

Lagolagoina o le Au Pulega Aoao, Fitugafulu Eria, ma Taitai Aoao

Uso e ma tuafafine, o le a ou tuuina atu nei ia te outou le Au Pulega Aoao, Fitugafulu Eria, ma Taitai Aoao o le Ekalesia mo la outou palota lagolago.

Faamolemole ia faailoa mai lau palota i le auala masani po o fea lava o e i ai. Afai e i ai nisi e faatu'iese i soo se tofiga e tuu atu, matou te talosaga atu ia e faafesootai atu la outou peresitene o le siteki.

E tuuina atu tatou te lagolagoina Russell Marion Nelson o le perofeta, tagatavaai, ma talifaaaliga ma o le Peresitene O Le Ekalesia a Iesu Keriso o le Au Paia o Aso e Gata Ai; Dallin Harris Oaks o le Fesoasoani Muamua i le Au Peresitene Sili; ma Henry Bennion Eyring o le Fesoasoani Lua i le Au Peresitene Sili.

O e e lagolagoina ia faailoa mai.

O i latou e faatuiese, pe afai e i ai, ia faailoa mai.

E tuuina atu tatou te lagolagoina Dallin H. Oaks o le Peresitene o le Korama a Aposetolo e Toasefululua ma M. Russell Ballard o le Sui Peresitene o le Korama a Aposetolo e Toasefululua.

O i latou e finagalo i ai, ia faailoa mai.

A i ai se faatuiese, faailoa mai.

E tuuina atu tatou te lagolagoina e avea ma uso o le Korama a Aposetolo e Toasefululua: M. Russell Ballard, Jeffrey R. Holland, Dieter F. Uchtdorf, David A. Bednar, Quentin L. Cook, D. Todd Christofferson, Neil L. Andersen, Ronald A. Rasband, Gary E. Stevenson, Dale G. Renlund, Gerrit W. Gong, ma Ulisses Soares.

O i latou e finagalo ai, faamolemole ia faailoa mai.

Ai sē faatuiese, ia faailoa mai.

E tuuina atu tatou te lagolagoina ia fesoasoani i le Au Peresitene Sili ma le Korama a Aposetolo e Toasefululua o ni perofeta, tagatavaai, ma talifaaaliga.

O i latou uma e lagolagoina, faailoa mai.

O e au ese ai, pe afai e i ai, i lea faailoga e tasi.

E tuuina atu tatou te faamalolo mai uso nei o Fitugafulu Eria: Elders Jorge T. Becerra, Mark S. Bryce, Jeremy R. Jaggi, Kelly R. Johnson, Adeyinka A. Ojediran, ma Moisés Villanueva.

O e fia au faatasi ma i matou e faailoa atu le lotofaafetai mo la latou tautua matavela, faamolemole faailoa mai.

E tuuina atu tatou te faamalolo mai ma le agaga faafetai le Au Peresitene Aoao o Alii Talavou: Stephen W. Owen o le Peresitene, Douglas D. Holmes o le Fesoasoani Muamua, ma M. Joseph Brough o le Fesoasoani Lua.

O i latou e fia afaatasi ma i matou e tuu atu le agaga faafetai i nei uso mo la latou auaunaga maoae, faamolemole ia faailoa mai.

E tuuina atu tatou te faamalolo mai uso nei o Fitugafulu o le Pulega Aoao: Jorge T. Becerra, Matthew S. Holland, William K. Jackson, Jeremy R. Jaggi, Kelly R. Johnson, Thierry K. Mutombo, Adeyinka A. Ojediran, Ciro Schmeil, ma Moisés Villanueva.

O i latou uma e lagolagoina, faailoa mai.

O ē 'au ese ai, i lea lava faailoga e tasi.

Ua tuuina mai tatou te lagolagoina uso nei o ni Fitugafulu Eria: Jay D. Andersen, Faapito Auapaau, Frederick K. Balli Jr., Kevin W. Birch,



Curitiba, Paraná, Pasila

John W. Boswell III, J. Francisco Bührer, Suchat Chaichana, Matthew R. Clarke, L. Guido Cristobal, Edmarc R. Dumas, Carlos A. Gabaldón, M. Andrew Galt IV, Clark G. Gilbert, Leonard D. Greer, Vladislav Y. Gornostaev, D. Martin Goury, Richard I. Heaton, Broc C. Hiatt, David H. Huntsman, Norman C. Insong, Daniel Kabason, Federico M. Kähnlein, Jeffrey J. Kerr, Youngjoon Kwon, David G. LaFrance, Ricardo C. Leite, Marcelo Louza, Jose G. Manarin, Jeremiah J. Morgan, Mark A. Mortensen, Eduardo F. Ortega, Nathan D. Pace, Michael M. Packer, Omar I. Palacios, Jorge W. Pérez, Kyrylo Pokhylko, Sergio A. Poncio, Arthur Rascon, Miguel A. Reynoso, Gustavo G. Rezende, Robert G. Rivarola, Tonga J. Sai, Luciano Sankari, Rosendo Santos, Henry Savstrom, J. Matthew Scott, James E. Slaughter, Robert T. Smith, Ricardo A. Spencer, Colin C. Stauffer, David C. Stewart, Jared W. Stone, Arlen M. Tumaliuan, Martin J. Turvey, Yan C. Vega, Paul B. Whippy, Chad R. Wilkinson, ma Dow R. Wilson.

O i latou uma e lagolagoina, faailoa mai.

O i latou e faatuiese, pe afai e i ai.

Ua tuuina mai ina ia tatou lagolagoina e avea ma Au Peresitene Aoao fou o Alii Talavou, Steven J. Lund e avea ma Peresitene, Ahmad Saleem Corbitt e avea ma Fesoasoani Muamua, ma Bradley Ray Wilcox e avea ma Fesoasoani Lua.

O e e lagolagoina ia faailoa mai.

A i ai se faatuiese faailoa mai.

E tuuina atu tatou te lagolagoina isi Au Pulega Aoao, Fitugafulu Eria, ma Taitai Aoao e pei ona i ai nei.

O i latou uma e lagolagoina, faailoa mai.

O i latou e faatuiese, pe afai e i ai.

Matou te valaaulia i latou o e na faatuiese i soo se tofiga ia faafesootai tou peresitene o siteki.

Matou te faafetai atu mo lo outou faatuatua faifai pea ma tatalo mo taitai o le Ekalesia. ■

Lipoti a le Matagaluega Suetusi a le Ekalesia, 2019

Fofogaina e Kevin R. Jergensen

Pule Faatonusili, Matagaluega Suetusi a le Ekalesia

I Le Au Peresitene Sili o Le Ekalesia a Iesu Keriso o le Au Paia o Aso e Gata Ai

Uso Pele: E pei ona faatonuina ai i le faaaliga o loo tusia i le vaega e 120 o le Mataupu Faavae ma Feagaiga, o le Aufono e Faafoeina ia Sefuluai—lea e aofia ai le Au Peresitene Sili, o le Korama a Aposetolo e Toasefululua, ma le Au Epikopo Pulefaamalumalu—e faatagaina tupe faaalu o tupe a le Ekalesia. E faaaogaina e totino o le Ekalesia tupe ia ogatusa ma paketi, aiaiga faavae, ma faiga faavae ua faamaoniaina e le Ekalesia.

O le Matagaluega Suetusi a le Ekalesia, lea e aofia ai ni tamalii faapolofesa ma e tutoatasi lava mai isi matagaluega uma ma totino a le Ekalesia, ua i ai le tiutetauave e faatino ai suegatusi mo le faamoemoega o le tuuina atu o le faamautinoaga talafeagai e tusa ai ma saofaga na tauaaoina, o tupe na faaalu, ma le malupuipua o aseta a le Ekalesia.

E tusa ai ma suegatusi ua faatinoina, ua manatu ai le Matagaluega Suetusi a le Ekalesia e faapea, i tulaga uma o meatotino, o saofaga na mauaina, o tupe na faaaluina, ma aseta a le Ekalesia mo le tausaga 2019 ua faamaumauina ma faatautaia e tusa ma paketi, o aiaiga faavae, ma faiga masani faatausitusi ua faamaoniaina e le Ekalesia. O loo mulimulitaia e le Ekalesia ia faiga masani o loo aoaoina atu i ona tagata o le ola lea i se paketi, aloese mai le nofoaitalafu, ma le sefeina o ni tupe mo le taimi e manaomia ai.

E tuuina atu ma le faaaloalo lava,
Matagaluega Suetusi a le Ekalesia

Kevin R. Jergensen
Pule Faatonusili ■



Saunia e Elder Ulisses Soares
O Le Korama a Aposetolo e Toasefululua

O Le Oo Mai o le Tusi a Mamona

O mea moni faasolopito ma molimau faapitoa o le Tusi a Mamona ua molimau mai o le oo mai o le Tusi a Mamona o se vavega moni lava.

A’o fono ai ma toeaiina o le Ekalesia i se tasi taimi, na folafola atu ai e le Perofeta o Iosefa Samita: “A aveese le Tusi a Mamona ma faaaliga, o fea la le tatou lotu? Ua leai se mea.”¹ O’u uso e ma tuafafine pele, o le oo mai faava-vega o le Tusi a Mamona o le vaega iloga lona lua lea o le gasologa o le Toefuataiga o le talalelei a Iesu Keriso i lenei tisipenisione, na sosoo ma le Uluai Faaaliga. O loo molimau mai le Tusi a Mamona i le alofa o le Atua mo Ana fanau, ma le taulaga togiola paia

ma le lē manatu faapitoa a le Alii o Iesu Keriso, faapea ai ma Lana galuega tauluga i totonu o sa Nifae ina ua mavae Lona Toetu.² O loo molimau mai foi o le a tasi le toe vaega o le aiga o Isaraelu e ala i Lana galuega o aso e gata ai ma o le a lē lafoaiina ese i latou e faavavau.³

A o tatou susesue i le oo mai o lenei tusi o tusitusiga paia i nei aso e gata ai, ua tatou iloa o le galuega atoa sa ofoofogia—mai le mauaina e le Perofeta o Iosefa o papatusi auro mai

se agelu paia i lona faaliliuga e ala i le “meaalofa ma le mana o le Atua,”⁴ o lona faasaoina, ma le lolomiina e le aao o le Alii.

O le oo mai o le Tusi a Mamona na amata a o le’i taitai mauaina e Iosefa Samita papatusi auro mai lima o le agelu o Moronae. Na valoia e perofeta anamua e uiga i le oo mai o lenei tusi paia i o tatou aso.⁵ Na talanoa Isaia i se tusi ua faamaufaailogaina, faapea o le taimi e faaali mai o le a fefinauai tagata i le afioga a le Atua. O lenei tulaga o le a maua ai le talaaga e mafai ai e le Atua ona faatino Lana “galuega ofoofogia ma le mea e ofo ai,” ma mafua ai ona “fano le poto o latou tagata popoto, e mavae [ai] foi le mafaufau o latou tagata mafaufau” a o le agamalu o le a “faatupuina lo latou fiafia ia Ieova; o tagata matitiva foi e olioli i latou i le Paia o Isaraelu.”⁶ Na talanoa Esekiel e uiga i le laau a Iuta (o le Tusi Paia) ma le laau a Efaraima (o le Tusi a Mamona) na aumai faatasia e avea ma tusi e tasi. O Esekiel (i le Feagaiga Tuai) ma Liae (i le Tusi a Mamona) na faailoa mai o le a la “tutupu faatasi” e faafememea’i aoaoga sese, faatuina le filemu, ma aumaia i tatou i le malamalama o feagaiga.⁷

I le afiafi o le aso 21 o Setema, 1823, tolu ma le afa tausaga talu ona maua le Uluai Faaaliga, na asia ai Iosefa e le agelu o Moronae, o le perofeta mulimuli o sa Nifae i Amerika anamua, o se taunuuga o ana tatalo faamaoni. I le taimi o a la’ua asi-asiga lea na alu ai le po atoa, na ta’u atu ai e Moronae ia Iosefa o loo i ai i le Atua se galuega ofoofogia mo ia e faataunu—o le faaliliuga ma le faasalalauina atu i le lalolagi o upu musuia a perofeta anamua o le konetineta o Amerika.⁸ O le aso na sosoo ai, na alu ai Iosefa i le nofoaga, e le mamao mai lona fale, lea na tanuina ai e Moronae



Bountiful, Iuta, ISA

papatusi i le faaiuga o lona soifua, i seneturi anamua. O iina, na toe vaai ai Iosefa ia Moronae, o le na faatonuina o ia ia saunia ia lava e mauaina papatusi i le lumanai.

I le fa tausaga na sosoo ai, i le aso 22 o Setema i tausaga taitasi, na maua ai e Iosefa nisi faatonuga mai ia Moronae e faatatau i le malamalama e uiga i le auala e tatau ona pulea ai le malo o le Alii i aso e gata ai. O sauniuniga a Iosefa na aofia ai ni asiasiga mai agelu a le Atua, lea na faaalua mai ai le ofoofogia ma le mamalu o mea o le a tutupu i lenei tisipenisione.⁹

O lana faaipoiuga ia Ema Hale i le 1827 o se vaega o lona sauniuniga. Sa ia faia se matafaioi taua e fesoasoani ai i le Perofeta i lona olaga atoa ma lana galuega. O le mea moni, ia Setema 1827, na o ai Ema ma Iosefa i le mauga, ma sa ia faatalitali mo ia o tuuina atu e le agelu o Moronae tala faamaumau i lima o Iosefa. Na maua e Iosefa le folafolaga o le a faasaina papatusi pe afai e tuuto atu e ia ana taumafaiga uma e tausia ai le saogalemua o papatusi seia oo ina toe faafoi atu i lima o Moronae.¹⁰

A'u soa pele i le talalelei, o le tele o mea na maua i aso nei mai taimi anamua na tupu i le taimi o suesuega o gaioiga a tagata anamua pe maua faafuasei foi i le taimi o se galuega faakonekarate. Peitai, na taitai atu Iosefa Samita i papatusi e se agelu. O le taunuuga o lona lava mea o se vavega.

O le faagasologa o le faaliliuga o le Tusi a Mamona o se vavega foi. O lenei faamaumauga paia anamua sa le'i "faaliliuina" i se auala masani lea e faaliliuina ai e tagata popoto anotusi anamua i le aoaoina o se gagana anamua. E tatau ona tatou tagai atili atu i le faagasologa o se "faaaliga" faatasi ma le fesoasoani o mea faigaluega faaletino



ATA NA TUSA E JOSHUA DENNIS

na aumai e le Alii e ese mai i le "faaliliuga" e se tasi ua i ai le malamalama o gagana. Na tautino mai e Iosefa Samita e faapea e ala i le mana o le Atua, "Na ou faaliliuina ai le Tusi a Mamona mai [tusitusiga o ata vane anamua], le malamalama lea sa le iloa e le lalolagi, ae na ou tu ai na o a'u i lea mea ofoofogia na tupu, o se talavou e le'i a'oga, e faafetaia'ia le poto faalelalolagi ma le valea faateleina o le seneturi sefuluvalu, i se faaaliga fou."¹¹ O le fesoasoani a le Alii i le faaliliuga o papatusi—ua manino foi—pe a mafaufau i le taimi puupuu faavavega na faaluina e Iosefa Samita e faaliliu ai.¹²

Na molimau tusiupu a Iosefa e uiga i le mana o le Atua lea na faaali mai a o galulue ai i le faaliliuga o le Tusi a Mamona. Na saunoa Oliva Kaotui i se tasi taimi: "O aso ia e le mafai ona faagaloina—o le nofo i lalo o le leo o se siufofoga na faatonotonu mai e musumusugaa le lagi, na fagua ai le lotofaafetai silisili o [lo'u] nei loto! Sa ou faaauu pea i lea aso ma lea aso, sa le'i faalavelaveina, e tusitusi mai lona fofoga, a o faaliliuina e ia . . . 'Le Tusi a Mamona.'¹³

Na faaalua e talaaga faasolopito faapea mai le taimi na maua ai e Iosefa Samita ia papatusi i le 1827, na faia ni

taumafaiga e gaioia [papatusi] mai ia te ia. Na ia matauina faapea sa "faaoga taumafaiga malolosi silisili e aveese [ai papatusi] mai ia te [ia]" ma sa "faaoga togafiti uma sa mafai ona faia mo lona faamoemoe."¹⁴ Na i'u lava ina faamaalolia le malaga ese o Iosefa ma Ema mai Manasete, Niu Ioka, i Haramoni, Penisilevania, e saili se nofoaga saogalemua e faaauu ai le galuega faaliliu, ia mamao mai kegi ma tagata na mananao e gaioia papatusi.¹⁵ E pei ona matauina e se tasi o tusitalafaasolopito: "O lea na faaiuina ai le vaega muamua faigata o le tausiga a Iosefa o papatusi. . . . Ae sa saogalemua ia faamaumauga, ma i ana tauiviga e faasaina i latou, e leai se masalosalo na a'oa'oina e Iosefa le tele o auala a le Atua ma tagata lea o le a aoga mo ia i le taimi a sau."¹⁶

A o faaliliuina le Tusi a Mamona, sa iloa e Iosefa o le a filifili e le Alii ni molimau e vaavaai i papatusi.¹⁷ O le vaega lea o le mea na faatuina e le Alii Lava Ia ina ua Ia fetalai mai, "O fofoga o molimau e toalua pe toatolu e faamautu ai upu uma."¹⁸ O Oliva Kaotui, Tavita Uitimea, ma Matini Harisi, o nisi ia o uluai soa a Iosefa i le faatuina o le galuega ofoofogia a le Atua i lenei tisipenisione, ma

o uluai molimau ia na valaauina e tuuina atu se molimau faapitoa o le Tusi a Mamona i le lalolagi. Sa latou molimau mai o se agelu, o lē na sau mai le afioaga o le Alii, na faaali atua ia i latou ia faamaumauga anamua ma sa latou vaai i mea o vaneina i totonu o papatusi. Sa latou molimau atu foi na latou faalogo i le siufofoga o le Atua mai le lagi o tautino mai o faamaumauga ia sa faaliliuina e ala i le meaalofo ma le mana o le Atua. Ona poloaiina lea o i latou e molimau atu i nei mea i le lalolagi atoa.¹⁹

Na valaauina faavavega e le Alii isi molimau e toavalu ia vaai i papatusi auro mo i latou lava ma ia avea ma molimau faapitoa o le upumoni ma le paia o le Tusi a Mamona i le lalolagi. Sa latou molimau na latou vaai ma suesueina ma le totoa ia papatusi ma ona mataitusi sa togitogia. E oo lava i le lotolotoi o faigata, sauaga, ituaiga uma o faafitauli, ma e oo lava i nisi o i latou na mulimuli ane vaivai i lo latou faatuatua, ae sa le'i teena lava e nei molimau filifilia e toa sefulutasi o le Tusi a Mamona a latou molimau sa latou vaai i papatusi. Sa le'i toe tuua na o Iosefa Samita ma le malamalama e uiga i le asiasiga a Moronae ma papatusi auro.

Sa faamaumauina e Lusi Maka Samita e faapea na taunuu atu lona atalii i le fale ua lofituina i le olioli ina ua uma ona faaali i molimau ia papatusi. Sa faamatalaina e Iosefa i ona matua, “Ua ou lagonaina e pei ua faamatuina mai a'u i se avega lea sa toetoe ina a mamafa tele ona ou tauavea, ma ua olioli ai lo'u agaga, ua le o toe tuua nei na o a'u i le lalolagi.”²⁰

Na feagai Iosefa Samita ma le tele o le tetee i le lolomiina o le Tusi a Mamona ina ua faaiuina lona faaliliuga. Sa mafai ona ia faatalitonuina se tagata lomitusi e igoa ia Egbert B.

Grandin i Palamaira, Niu Ioka, e lolomiina ina ua mokesiina e Matini Harisi, i se faatinoga o le faatuatua tele ma le ositaulaga, lana faatoaga o se faamaoniga mo le tau o le lolomiga. Ona o se vaega o le tetee faifai pea ina ua maea le faasalalauina o le Tusi a Mamona, na faatau atu ai ma le faamaoni e Matini Harisi le 151 eka (0.6 km²) o lana faatoaga e totogi motu ai le tau o le lolomiga. E ala mai i se faaaliga na tuuina atu ia Iosefa Samita, na faatonuina ai e le Alii Matini Harisi e aua ne'i manumanu i ana meatotino ae totogi le tau o le lolomiga o le tusi lea e aofia ai “le upumoni ma le afioga a le Atua.”²¹ Ia Mati 1830, e 5,000 uluai kopi o le Tusi a Mamona na lolomiina, ma i le asō, ua silia ma le 180 miliona kopi ua uma ona lolomiina i le silia ma le selau gagana.

O mea moni faasolopito ma molimau faapitoa o le Tusi a Mamona ua molimau mai, o le oo mai o le Tusi a Mamona o se vavega moni lava. Ae ui i lea, o le mana o lenei tusi e le na o lona talafaasolopito maoae o fua i ai ae i ana savali mamana ma lē mafaatusalia ua suia ai olaga e le mafaitaulia—e aofia ai ma a'u!

Sa ou faitauina le Tusi a Mamona mo le taimi muamua ina o avea a'u ma se tagata aoga seminare talavou. E pei ona fautuaina mai e o'u faiaoga, sa amata ona ou faitauina e amata i ona itulau o le faatomuaga. O le folafolaga o loo i ai i itulau muamua o le tusi o loo tatagi pea i lo'u mafaufau: “Ia mafaufau loloto i o [outou] loto . . . ona o'le atu lea i le Atua [i le faatuatua] . . . i le suafa o Keriso pe moni le tusi. O i latou o ē e mulimuli i lenei ala . . . o le a latou maua se molimau i le moni ma le paia o le tusi e ala i le mana o le Agaga Paia.”²²

O le mafaufau ai i lona folafolaga, saili ma le naunautai ia iloa atili ai

e uiga i lona moni, ma i se agaga o tatalo, sa ou suesue ai i le Tusi a Mamona, auaua'i, a o ou faamaeaina ia lesone atofaina faalevaiaso o le seminare. Ou te manatuaina, e pei na tupu ananafi, se lagona mafanafana na amata faasolosolo maēna i lo'u agaga ma faatumulia ai lo'u loto, faamaninoina lo'u malamalamaaga, ma oo ina ou fiafia atili ai, e pei ona faamatalaina e Alema i lona tala'iina o le afioga a le Atua i lona nuu.²³ O lona lagona na iu lava ina liua i le malamalama lea na mautu i lou loto ma avea ma faavae o la'u molimau i mea taua na tutupu ma aoaoga o loo maua i lenei tusi paia.

E ala i nei aafiaga patino lemafaatauina, na avea moni ai le Tusi a Mamona ma ma'a'au'au na lagolagoina lo'u faatuatua ia Iesu Keriso ma la'u molimau o le aoaoga faavae o Lana talalelei. Na avea ma se tasi o poutu na molimau mai ia te a'u e uiga i le taulaga togiola paia a Keriso. Na avea ma o'u talita i lou olaga atoa e tetee atu ai i taumafaiga a le fili e faavaivaia lo'u faatuatua ma faaofi mai i lo'u mafaufau le lē talitonu ma tuuina mai ia te a'u le lototele e tautino atu ai ma le toa la'u molimau o le Faaola o le lalolagi.

A'u uo pele, o la'u molimau o le Tusi a Mamona na oo mai i lea fuaitau ma lea fuaitau²⁴ o se vavega i lo'u loto. E oo mai i lenei aso, o loo faaaauu pea ona tuputupu a'e lenei molimau a o faaaauu pea ona ou sailiili, faatasi ai ma se loto faamaoni, ina ia malamalama atoatoa i le afioga a le Atua e pei ona i ai i lenei tusi tulagaese o tusitusiga paia.

I tagata uma o e o faalogo mai i lo'u leo i le asō, ou te valaaulia outou e avea ma se vaega o le oo mai ofofofogia o le Tusi a Mamona i lou lava ia olaga. Ou te folafola atu ia te oe a e suesue soo ma le agaga tatalo i

ona upu, e mafai ona e taumafa i ana folafolaga ma faamanuiaga silisili i lou olaga. Ou te toe faamautu tasi atu le folafolaga o loo tatagi pea i ona itulau: afai tou te “ōle atu i le Atua, le Tamā Faavavau, i le suafa o Iesu Keriso, pe ua le moni ea nei mea; ma afai tou ōle atu ma le loto faamaoni, ma le manatu moni i ai, ma le faatuatua ia Keriso,” i le alofa mutimutivale “o le a ia faaali mai le moni o ia mea ia te outou, i le mana o le Agaga Paia.”²⁵ E mafai ona ou faamautinoa atu ia te outou o le a Ia avatu ia te outou le tali i se ala patino lava, e pei ona Ia faia mo a’u ma le toatele o isi i le lalolagi atoa. O lou aafiaga o le a ofoofogia ma paia mo oe e pei o aafiaga o Iosefa Samita mo ia, e faapea foi mo uluai molimau ma mo i latou uma na saili ia maua se molimau o le sa’olele ma le faatuatua o lenei tusi paia.

Ou te tuu atu la’u molimau o le Tusi a Mamona o le afioga moni a le Atua. Ou te molimau atu o lenei faamaumauga paia “ua faamatala mai ai mataupu faavae o le talalelei, ua faatulaga mai ai le fuafuaga o le faaolataga, ua ta’u mai ai foi i tagata mea e ao ona latou faia e maua ai le filemu i le olaga nei ma le olataga e faavavau i le olaga a sau.”²⁶ Ou te molimau atu o le Tusi a Mamona o le meafaigaluega lea a le Atua ua faataunuu ai le faapopotoina o Isaraelu i o tatou aso ma ia fesoasoani ai i tagata ia iloa Lona Alo, o Iesu Keriso. Ou te molimau atu o loo soifua le Atua ma e alofa ia i tatou ma o Lona Alo, o Iesu Keriso, o le Faaola o le lalolagi, o le maa tulimanu o la tatou tapuaiga. Ma ou te fai atu ai nei mea i le suafa paia o lo tatou Togiola, lo tatou Matai, ma lo tatou Alii, o Iesu Keriso, amene. ■

FAAMATALAGA

1. Iosefa Samita, i le “Minute Book 1,” 44, josephsmithpapers.org; also at

- Church History Library, Salt Lake City; capitalization standardized.
2. Tagai i le 3 Nifae 11–26.
 3. Tagai i le Esekielu 37:21–28; 1 Nifae 13:34–41; 3 Nifae 20:46; 21:1–11; itulau autu o le Tusi a Mamona.
 4. Faatomuaga i le Tusi a Mamona.
 5. Tagai i le Faaaliga 14:6–7; 1 Nifae 19:21.
 6. Isaia 29:14, 19; tagai foi i fuaiupu 11–13.
 7. Tagai i le Esekielu 37:16–17; 2 Nifae 3:12.
 8. Tagai i le Iosefa Samita—Talafaasolopito 1:27–47; tagai foi i le Mataupu Faavae ma Feagaiga 27:5; Iosefa Samita, “History, 1838–1856, volume A-1 [23 December 1805–30 August 1834],” 5, josephsmithpapers.org.
 9. Tagai i le Iosefa Samita—Talafaasolopito 1:54; tagai foi Iosefa Samita, “Church History,” *Times and Seasons*, Mar. 1, 1842, 707, josephsmithpapers.org.
 10. Tagai i le Iosefa Samita—Talafaasolopito 1:59; *Aooga a Peresitene o le Ekalesia: Iosefa Samita* (2007), 57–59.
 11. Iosefa Samita, “History, 1838–1856, volume E-1 [1 July 1843–30 April 1844],” 1775, josephsmithpapers.org; also at Church History Library, Salt Lake City; punctuation standardized. Tagai foi Iosefa Samita, “Letter to James Arlington Bennet, 13 November 1843,” 1, josephsmithpapers.org; also at Church History Library, Salt Lake City.
 12. Tagai i le John W. Welch, “Timing the

- Translation of the Book of Mormon: ‘Days [and Hours] Never to Be Forgotten,’” *BYU Studies*, vol. 57, no. 4 (2018), 11–50.
13. Oliver Cowdery, tusia i le Iosefa Samita—Talafaasolopito 1:71, vaefaamatalaga; tagai foi i le *Latter Day Saints’ Messenger and Advocate*, Oct. 1834, 14.
 14. Iosefa Samita—Talafaasolopito 1:60.
 15. Tagai i le Iosefa Samita—Talafaasolopito 1:60–62.
 16. Andrew H. Hedges, “‘All My Endeavors to Preserve Them’: Protecting the Plates in Palmyra, 22 September–December 1827,” *Journal of Book of Mormon Studies*, vol. 8, no. 2 (1999), 23.
 17. Tagai i le 2 Nifae 27:12–14; Eteru 5:1–3.
 18. Mataio 18:16.
 19. Tagai i le “O Le Mau a Molimau e Toatolu,” Tusi a Mamona.
 20. Joseph Smith, in Lucy Smith, *Biographical Sketches of Joseph Smith, the Prophet, and His Progenitors for Many Generations* (1880); see also “Lucy Mack Smith, History, 1845,” 154, josephsmithpapers.org.
 21. Mataupu Faavae ma Feagaiga 19:26.
 22. Faatomuaga i le Tusi a Mamona; tagai foi i le Moronae 10:3–5.
 23. Tagai i le Alema 32: 41–43.
 24. Tagai i le 2 Nifae 28:30.
 25. Moronae 10:4.
 26. Faatomuaga i le Tusi a Mamona.



Olmué, Marga Marga, Chile



Saunia e Elder John A. McCune
O Le Fitugafulu

O Mai ia Keriso—Ola o ni Au Paia o Aso e Gata Ai

E mafai ona tatou faia mea faigata ma fesoasoani i isi e faia lea mea e tasi, aua ua tatou iloa lē e mafai ona tatou faalagolago i ai.

Faafetai lava, Elder Soares, mo lau molimau mamana ma faaperofeta o le Tusi a Mamona. Lata mai nei lava, sa ou maua ai le avanoa tulaga ese e u’u ai se itulau o uluai pepa o le Tusi a Mamona. I luga o lenei itulau patino, mo le uluai taimi i lenei tisipenisione, sa faamauina ai upu lototoa nei a Nifae: “O le a ou alu ma fai mea ua poloaiina e le Alii, aua ua ou iloa e lē tuuina mai e le Alii ni poloaiiga i le fanauga a tagata, vagana o le a saunia e ia se ala mo i latou ina ia mafai ai ona latou faataunuaina o le mea ua ia poloaiina ai i latou.”¹

A o ou u’uina lenei itulau, sa faatumulia a’u i se agaga talisapaia loloto mo taumafaiga a Iosefa Samita e 23 tausaga le matua, o lē na faaliliuina le Tusi a Mamona e ala i le “meaalofa ma le mana o le Atua.”² Sa ou lagona foi le agaga talisapaia mo upu a se Nifae talavou, o lē na talosagaina e faatino se galuega faigata tele i le mauaina mai o papatusi apamemea mai ia Lapana.

Na iloa e Nifae afai e faaauau pea ona tumau le taulai atu i le Alii, o le a manuia o ia i le faataunuaina o lenei poloaiiga. Sa tumau pea lona taulai

atu i le Faaola i lona olaga atoa e ui sa ia mafatia i faaososoga, tofotofoga faaletino, ma le faalataina foi e nisi o lona lava aiga patino.

Na iloa e Nifae lē e mafai ona faatuatuaina e [le Alii].³ E le’i pine i le maea ona alaga atu, “E, le tagata leaga e ua i ai a’u! Ioe, ua faanoanoa lo’u loto ona o lo’u tino,”⁴ Na ta’ua e Nifae, “Sa avea lo’u Atua ma o’u lagolago; sa ia taitaia a’u e ala mai i o’u puapuaga i le vao; ma sa ia faasaoina a’u i luga o vai o le moana loloto.”⁵

I le avea ai ma soo o Keriso, e le faapea o le a le oo ai ni luitau ma tofotofoga i o tatou olaga. E masani ona manaomia i tatou e faia ni mea faigata lea afai tatou te taumafai e fai na o i tatou o le a lofituina ma atonu e le gafatiaina. A o tatou taliaina le valaulia a le Faaola ia “o mai ia te au,”⁶ o le a Ia tuuina mai le lagolago, mafanafana, ma le filemu e manaomia, e pei ona Ia faia mo Nifae ma Iosefa. E oo lava i o tatou tofotofoga sili ona loloto, e mafai ona tatou lagona le opo mafanafana o Lona alofa pe a tatou faalagolago ia te Ia ma taliaina Lona finagalo. E mafai ona tatou lagonaina le olioli ua faapolopolo mo

Ona so’o faamaoni, auā o “Keriso o le olioli ia.”⁷

I le 2014, a o auauna atu i se misi-ona talai, sa aafia ai lo matou aiga i ni mea na tutupu sa le’i faamoemoeina. A o faasee atu i lalo o se maupuepue tifatō i luga o se laupapa umi, na pa’ū ai le ma atalii uii ma mafatia ai i se manu’a i lona faiai na lamatia ai lona ola. A o faasolo ina ogaoga lona tulaga, na faataalise atu o ia e le au faigaluega faafomai i totonu o le potu tipitipi mo faalavelave faafuasei.

Sa tootutuli lo matou aiga i luga o le fola o se isi potu avanoa o le falemai, ma sasaa atu o matou loto i le Atua. I le lotolotoi o lenei taimi lē mautonu ma tiga, sa faatumulia i matou i le alofa ma le filemu o le Tama Faalelagi.

Sa matou le iloa po o le a le mea o i ai i le lumanai pe o le a matou vaai e toe ola mai lo ma atalii. Sa manino tele lo matou iloa o lona ola sa i aao o le Atua ma o taunuuga, mai se vaaiga e faavavau, o le a aoga mo lona lelei ma lo matou lelei. E ala i le meaalofa o le Agaga, sa matou saunia atoatoa ai e taliaina soo se taunuuga.

Sa le’i faigofie! O le faalavelave na i’u ai i le nofo mo le lua masina i le



Millcreek, Iuta, ISA

falemai a o ma pulefaamalumu ai i le silia ma le 400 faifeautalai faifeautalai. Sa oo lo ma atalii i lona le toe manatuaina o mea. O mea na faia ina ia toe malosi ai, sa aofia ai vasega faafomai uumi ma faigata faaletino, faaletautala, ma faalegaluega. Na tumau lava luitau, ae i le aluga o taimi sa matou molimauina se vavega.

Tatou te malamalama lelei e le o tofotofoga uma tatou te fetia'i o le a maua ai se taunuuga na tatou moomoo i ai. Peitai, a o tatou tumau pea ona taulai atu ia Keriso, o le a tatou lagona le filemu ma vaai i vavega a le Atua, po o a lava na [vavega], i Lona taimi ma i Lana lava ala.

O le a i ai taimi o le a le mafai ai ona tatou vaai i soo se ala o le a i'u lelei ai ni tulaga i le taimi nei ma ono faapea atu ai, e pei o Nifae, "Ua faanoanoa lo'u loto ona o lo'u tino."⁸ Atonu e i ai taimi e na o le pau le faamoemoe ua tatou maua o loo ia Iesu Keriso. E ma'eua sea faamanuiaga o le maua o lona faamoemoe ma le faalagolago ia te Ia. O Keriso o le o le a tausia pea i taimi uma Ana folafolaga. O Lona malologa ua mautinoa lava e mo tagata uma e o mai ia te Ia.⁹

E matua naunau o tatou taitai ina ia lagona e tagata uma le filemu ma le mafanafana lea e oo mai e ala i le faalagolago ma le taulai atu i le Faaola o Iesu Keriso.

O lo tatou perofeta soifua, o Peresitene Russell M. Nelson, o loo folafola atu le faaaliga a le Alii mo le lalolagi ma mo tagata o le Ekalesia a Keriso: "O la tatou savali i le lalolagi e faigofie ma faamaoni: tatou te valaauliaina fanau uma a le Atua i itu uma e lua o le veli ia o *mai i lo latou Faaola*, maua faamanuiaga o le malumu paia, maua le olioli tumau, ma agavaa mo le ola e faavavau."¹⁰



O lenei valaaulia ia "o mai ia Keriso" e i ai ona aafiaga *patino* mo le Au Paia o Aso e Gata Ai.¹¹ I le avea ai ma tagata o le Ekalesia a le Faaola, ua tatou osia ni feagaiga ma Ia ma ua avea ma Ona atalii ma afafine faaleagaga na fanau.¹² Ua tuuina mai foi ia i tatou le avanoa e galulue faatasi ai ma le Alii i le valaauliaina o isi e o mai ia te Ia.

Pe a tatou galulue faatasi ma Keriso, o a tatou taumafaiga sili e tatau ona tatou taulai i ai o totonu lea o o tatou lava aiga. O le a i ai taimi o le a feagai ai tagata o le aiga ma uo mamae ma luitau. O leo o le lalolagi, atonu foi o o latou lava manaoga, e ono mafua ai ona latou fesiligia le upumoni. E tatau ona tatou faia mea uma tatou te mafaia e fesoasoani ai ia i latou ia lagona uma le alofa o le Faaola ma lo tatou alofa. Ua faamanatu mai ia te a'u le fuaiupu o le mau lea ua avea ma a tatou viiga pele "Ia Fealofani" lea e aao mai i tatou, "E iloa ai, o outou o o'u so'o, pe 'a outou, fealofani."¹³

I lo tatou alofa mo i latou o e fesiligia le upumoni, e ono taumafai ai le fili o le olioli uma ina ia tatou lagona ina lo tatou faalataina o i latou tatou te alolofa i ai pe afai *tatou te* faaauau pea ona tatou ola i le atoatoaga o le talalelei ma a'oa'o atu ana upumoni.

O lo tatou tomai e fesoasoani i isi ia o mai ia Keriso po o le toe foi mai ia Keriso o le a fuaina tele i lo tatou lava tautinoga faaletagata lava ia e tumau ai i luga o le ala o feagaiga.

Afai o lo tatou faanaunauga moni o le lavea'i o i latou tatou te alolofa i ai,

e tatau la ona tatou tutumau mausali i tatou lava ia Keriso e ala i le opogiina o Lana Ekalesia ma le atoatoaga o Lana talalelei.

I le toe foi atu i le tala ia Nifae, tatou te iloa o le naunautaiga o Nifae e faalagolago i le Alii sa faatosina ina e le naunautaiga a ona matua e faalagolago i le Alii ma e ala i le la faaitaiga o le tausiga o feagaiga. Na faaaliga ma le matagofie leni mea i le faaaliga a Liae o le laau o le ola. Ina ua mavae ona ai e Liae le fua suamalie ma olioli o le laau, sa "vaavaai solo atu [ona] mata, pe atonu e [na te] iloa atu foi [lona] aiga."¹⁴ Sa ia vaai atu ia Sarai, Sama, ma Nifae o loo tutu "e peiseai sa latou le iloa le mea e tatau ona latou o i ai."¹⁵ Ona fai mai lea o Liae, "Sa oo ina ou talo atu ia te i latou; ma sa ou fai atu foi ia te i latou ma se leo tele ia latou o mai ia te a'u, ma aai i le fua."¹⁶ Faamolemole ia matau sa le'i tuua lava e Liae le laau o le ola. Sa ia tumau faaleagaga faatasi ma le Alii ma valaaulia lona aiga e o mai i le nofoaga sa i ai o *ia* e aai i le fua.

E mafai e le fili ona faatosina nisi ia tuua le olioli o le talalelei e ala i le tuueseeseina o aoga a Keriso ma Lana Ekalesia. E na te faatalitoniua i tatou e mafai ona tatou tumau mausali i luga o le ala o feagaiga na o i tatou lava, e ala i lo tatou lava faaleagaga, e tutoatasi mai Lana Ekalesia.

I nei aso e gata ai, sa toefuatai mai le Ekalesia a Keriso ina ia fesoasoani i fanau o le feagaiga a Keriso ia tumau i luga o Lana ala o feagaiga.

I le Mataupu Faavae ma Feagai-ga tatou te faitau ai, "Faauta, o la'u mataupu faavae leni—ai se e salamo ma *sau ia te a'u*, o ia lava lea o la'u ekalesia."¹⁷

E ala i le Ekalesia a Keriso, ua faamalosi i tatou e ala i aafiaga o se



Saunia e Epikopo Gérald Caussé
Epikopo Pulefaamalumu

nuu o le Au Paia. Tatou te faalogo i Lona siufofoga e ala i Ana perofeta, tagatavaai ma talifaaaliga. E sili atu ona taua, e ala i Lana Ekalesia ua tatou maua ai faamanuiaga taua o le Togiola a Keriso lea e na o le auai i sauniga paia e mafai ai ona iloa.

O Le Ekalesia a Iesu Keriso o le Au Paia o Aso e Gata Ai o le Ekalesia lava lea a Keriso i luga o le fogaeleele, ua toefuatai mai i nei aso e gata ai mo le manuia o fanau uma a le Atua.

Ou te molimau atu pe a tatou o mai ia Keriso ma ola o ni Au Paia o Aso e Gata Ai, o le a faamanuia-ina i tatou faatasi ai ma se fuataga faaopoopo o Lona alofa, Lona olioli, ma Lona filemu. E pei o Nifae, e mafai ona tatou faia mea faigata ma fesoasoani i isi e faia lea mea e tasi, aua ua tatou iloa lē e mafai ona tatou faalagolago i ai.¹⁸ O Keriso o lo tatou malamalama, o lo tatou ola, ma lo tatou faaolataga.¹⁹ I le suafa o Iesu Keriso, amene. ■

FAAMATALAGA

1. 1 Nifae 3:7.
2. Itulau autu o le Tusi a Mamona; tagai foi i le faatomuaga o le Tusi a Mamona.
3. Tagai i le 2 Nifae 4:19.
4. 2 Nifae 4:17.
5. 2 Nifae 4:20.
6. Mataio 11:28.
7. Russell M. Nelson, “O Le Olioli ma le Ola Ai Faaleagaga,” *Liahona*, Nov. 2016, 82.
8. 2 Nifae 4:17.
9. Tagai i le Mataio 11:28–30.
10. Russell M. Nelson, “Faamalosia Ia i le Galuega Nei,” *Liahona*, Me 2018, 118–19; faaopoopo le faamamafa.
11. Tagai i le Mataupu Faavae ma Feagaiga 20:59.
12. Tagai i le Mosaea 5:7.
13. Ioane 13:35; tagai foi i le “Ia Fealofani,” *Viiga*, nu. 195.
14. 1 Nifae 8:13.
15. 1 Nifae 8:14.
16. 1 Nifae 8:15.
17. Mataupu Faavae ma Feagaiga 10:67; faaopoopo le faamamafa.
18. Tagai i le 2 Nifae 4:19.
19. Tagai i le Salamo 27:1.

O Se Molimau Ola o le Keriso Soifua

O le savali autu o le Tusi a Mamona o le toefuatai maia lea o le iloa moni o le matafaioi taua a Iesu Keriso i le faaolataga ma le faaeaga o tagata.

I se aso la o le tautotogo i le 2017, sa sologa lelei lava le fale tatala mo le Malumu o Pale Farani ae faalatalata atu loa se alii i se tasi o taitai o le maimoaga ma se faailoaga faanoanoa i ona foliga. Sa ia fai mai e nofo o ia i talaane o le malumu ma tautino mai o ia o se tagata sa matua tetee lava i le fauina o le malumu. Sa ia

faamatalaina i se tasi aso a o ia sioa atu i fafo mai le faamalama o lona falemautotogi, sa ia matamata ai i se masini telē (crane) o tuu ifoa i lalo se faatusa o Iesu mai le lagi ma tuu lemu i luga o le eleele o le malumu. Sa tautino mai e lea alii o lena aafiaga sa suia atoa ai ona lagona agai i le tatou Ekalesia. Sa ia iloa o tatou o soo o Iesu Keriso ma sa aoi mai mo le tatou faamagaloga mo ni manu’aga ua te’a sa ono ia faamatua’iaina.

O le faatusa o le *Christus*, lea ua faamamaluina le lotoa o le Malumu o Pale ma isi lotoa o le Ekalesia, ua molimau atu e uiga i lo tatou alolofa mo le Faaola. O le uluai faatusa maamora o le galuega a le tusiata Tenimaka o Bertel Thorvaldsen, na vaneina i le 1820—o le tausaga lava e tasi o le Uluai Faaaliga. O le faatusa o loo tu o se vaaiga uigaese mai le tele o galuega faatufugaga o lena vaiata, lea na matua atagia ai mafatiaga o Keriso i luga o le satauro. O le galuega a Thorvaldsen ua tuu mai ai le Keriso soifua, o le na mauaina le manumalo i le oti ma, faatasi ma aao mafola, ua valaaulia ai tagata uma ia o mai ia te Ia. Ua na o tulaga o fao i



Sandy, luta, ISA

Ona aao ma vae ma le manu'a i Lona itu o loo molimau mai i le tiga lē mafaamatalaina na Ia onosaia ina ia faaolaina ai tagata uma.

Masalo o le tasi mafuaaga tatou te fiafia ai i lenei faatusa o ni tagata o Le Ekalesia a Iesu Keriso o le Au Paia o Aso e Gata Ai ona e faamanatu mai ai ia i tatou le faamatalaga ua tuuina mai i le Tusi a Mamona e uiga i le faaali atu o le Faaola i le konetineti o Amerika:

“Ma faauta, sa latou vaaia se Tagata ua afio ifo mai le lagi; ma sa laei o ia i se ofutalaloa paepae; ma sa afio ifo o ia ma tu i le totonugalemu o i latou. . . .

“Ma sa oo ina ia faaloaloa mai lona aao ma fetalai mai i tagata, ua faapea mai:

“Faauta, o Au o Iesu Keriso, . . .

“ . . . Ma ua ou inu i lona ipu oona lea na tuuina mai e le Tamā ia te au, ma ua ou faamamaluina le Tamā i lou aveina i ou luga o agasala a le lalolagi.”¹

Ona Ia valaauliaina lea o alii taitasi, fafine, ma tamaiti ia o mai i luma ma tuu mai o latou lima i Lona itu ma tagotago i tulaga o fao i Ona aao ma vae, o lea na maua ai se molimau patino o Ia moni lava o le Mesia ua loa ona faatalitali i ai.²

O lenei vaaiga maoae o le taulaiga sili o le Tusi a Mamona. O le “tala fiafia” atoa o le talalelei o loo i ai i lenei ata o le Faaola o loo faaloaloa mai ma le agalelei Ona “aao o le alofa muti-mutivale:³ e valaaulia tagata taitoatasi ia o mai ia te Ia ma maua faamanuiaga o Lana Togiola.

O le savali autu o le Tusi a Mamona o le toefuatai maia lea o le iloa moni o le matafaioi taua a Iesu Keriso i le faaolataga ma le faaeaga o tagata. O lenei autu o loo ta'ua pea mai le itulau o le faatomuaga e oo



atu i upu mulimuli lava o le mataupu mulimuli. I le gasologa o seneturi o le liliuese ma le fenumiai faaleagaga, na leiloloa pe faapi'opi'oina ai le uiga loloto atu o mea na faia e Keriso i Ketesemane ma luga i Kolokota. Masalo na matuā lagona le faagaetia o Iosefa Samita, a o ia faaliliuina le 1 Nifae, na ia iloina ai lenei folafolaga ofoofogia: “O talafaamaumau mulimuli nei [o le Tusi a Mamona] . . . o le a faamaonia ai le moni o talafaamaumau muamua [le Tusi Paia] . . . ma o le a faailoa mai ai mea manino ma pele na aveesea mai ia i latou, ma o le a faailoa atu ai i ituaiga, gagana, ma tagata uma, o le Tamai Mamoe a le Atua o le Alo lea o le Tama Faava-vau, ma o le Faaola o le lalolagi; ma e ao i tagata uma ona o mai ia te ia, [a leai] e le mafai ona faaolaina i latou.”⁴

O upumoni manino ma pele e uiga i le Togiola a le Faaola o loo ta'ua atoa i le Tusi a Mamona. A o ou lisiina

atu nisi o nei upumoni, ou te valaaulia outou ia mafau i le auala ua suia ai pe mafai foi ona suia ai lou olaga.

1. O le Togiola a Iesu Keriso o se mea-alofa fua ua ofo mai i *tagata uma* o ē *ua* soifua mai, o ē o loo soifua i le *taimi nei*, ma ē o le *a* soifua mai i le lalolagi.⁵
2. E faaopoopo atu i le tauaveina o a tatou agasala, na ave ai e Keriso i Ona lava luga o tatou faanoanoaga, vaivaiga, puapuaga, ma'i, faapea ai ma mafatiaga uma e tupu i tulaga faaletino o le tagata. E leai se mafatia, tiga, po o faanoanoaga Na te le'i mafatia ai mo i tatou.⁶
3. O le taulaga togiola a le Faaola ua mafai ai ona tatou manumalo i taunuuga lē lelei o le Pa'ū o Atamu, e i ai le oti faaletino. Ona o Keriso, o fanau uma a le Atua e fananau mai i lenei lalolagi, po o le a lo latou amiotonu, o le a oo i le toefaatasia o o latou agaga ma tino e ala i le mana o le Toetutu⁷ ma toe foi atu ia te Ia ina “ia faamasinoina . . . e tusa ma a [latou] galuega.”⁸
4. I se faatusatusaga, o le mauaina o faamanuiaga atoatoa o le Togiola a le Faaola ua i ai tuutuuga i lo tatou filiga⁹ i le ola ai i le “mataupu faavae a Keriso.”¹⁰ I lana miti, sa vaaia ai Liae i le “ala lauitiiti ma le vaapiapi”¹¹ lea e tau atu i le laau o le ola. O ona fua, lea ua faatusa i le alofa o le Atua e pei ona faailoaina e ala i faamanuiaga maoae o le Togiola a Keriso, “ua silisili ona pele ma silisili ona manaomia . . . [ma] o le aupito silisili lea o mea-alofa uma a le Atua.”¹² Ina ia mafai ona maua o lenei fua, e tatau ona tatou faatinoina le faatua-tua ia Iesu Keriso, salamo, “faalogo i le afioga a le Atua,”¹³ maua sauniga taua, ma tausia feagaiga paia seia oo i le iuga o o tatou olaga.¹⁴



5. E ala i Lana Togiola, e le gata e faamama ese e Iesu Keriso a tatou agasala, ae ua Ia saunia foi le mana *gafatia* lea e mafai ai e Ona soo ona “[tuu ese] le tagata natura,”¹⁵ alualu i luma “[i] lea fuaitau i luga o lea fuaitau,”¹⁶ ma faateleina i le paia¹⁷ ina ia i ai se aso e mafai ai ona latou avea ma tagata atoatoa i fofoga o Keriso,¹⁸ agavaa e toe ola faatasi ma le Atua¹⁹ ma maua faamanuiaga uma o le malo o le lagi.²⁰

O le isi upumoni faamafanafana o loo i ai i le Tusi a Mamona e faapea, e ui e lē mafuatia ma e mo tagata uma, ae o le Togiola a le Alii o se meaalofa e ofoofogia le patino ma e faaletagata lava ia, ua talafeagai ia i tatou patino taitoatasi.²¹ E pei lava ona valaaulia e Iesu soo taitoatasi o sa Nifae ia tagotago i Ona manu’a, sa Ia maluu mo i tatou taitoatasi, patino, e peisea’i na o oe po o a’u le tagata na i ai i le lalolagi. Ua Ia tuuina mai ia i tatou se valaaulia patino ia o mai ia te Ia ma utuvai mai faamanuiaga ofoofogia o Lana Togiola.²²

O le natura patino o le Togiola a Keriso e faasolo ina moni atili a o tatou mafaufau i faataitaiga o alii ma tamaitai ofoofogia i le Tusi a Mamona. E aofia ai ia i latou ia Enosa, Alema, Sesoroma, Tupu o Lamona ma lona toalua, ma le nuu o le Tupu o Peni-amina. O a latou tala o le liuaina ma molimau totoa ua maua ai se molimau

ola o le auala e mafai ona suia ai o tatou loto ma liua ai o tatou olaga e ala i le lelei ma le alofa mutimutivale lē mafuatia o le Alii.²³

Sa fesili atu le perofeta o Alema i lona nuu i lenei fesili vailiili Na ia fai atu: “Afai ua oo ia te outou se liuga o le loto, ma afai ua outou lagona le fia pepese i le pese o le alofa togiola, ou te fia fesili atu, e mafai ea ona outou lagonaina *nei*”²⁴ O lenei fesili e taua tele i le asō, ona i le avea ai ma soo o le Alii, e taua ona faafeaoina i tatou e Lona mana togiola, uunaia i tatou, ma suia i tatou i aso uma taitasi.

O le fesili a Alema e mafai foi ona tofeaaupuina e fesili ai: o anafea le taimi mulimuli na e lagonaina ai le faatosinaga matagofie o le Togiola a le Faaola i lou olaga? E tupu lenei mea pe a e lagonaina se olioli “logolelei ma suamalie”²⁵ e oo mai ia te oe ma molimau atu i lou agaga ua faamagaloina au agasala; pe o ni tofotofoga tiga ua faafuasei ona māmā le tauaveina; pe ua faamalūlūina foi lou loto ma ua mafai ona e faailoa atu le faamagaloga i se tasi na faatiga ia te oe. Pe atonu foi e te matauina i taimi taitasi le faateleina o lou gafatia e alofa ma auuina atu ai i isi, pe o loo faia e le faagasologa o le faapaiaga oe o se tagata ese, ua mamanuina i le faataitaiga a le Faaola.²⁶

Ou te molimau atu o nei aafiaga uma e moni ma o ni faamaoniga o olaga e mafai ona suia e ala i le

faatuatua ia Iesu Keriso ma Lana Togiola. Ua faamanino e le Tusi a Mamona ma faalateleina lo tatou iloa e uiga i lenei meaalofa paia. Pe a outou suesueina lenei tusi, o le a outou faalogo i le siufofoga o le Keriso soifua o valaauliaina outou ia o mai ia te Ia. Ou te folafola atu afai e te taliaina lenei valaaulia ma mamanu lou olaga i Lana faataitaiga, o le a oo mai Lana faatosinaga togiola i lou olaga. E ala i le mana o le Agaga Paia, o le a liua ai e le Faaola oe i lea aso ma lea aso “seia oo i le aso e atoatoa ai”²⁷ e pei ona Ia tautino mai, o le a e “vaai i o’u mata ma iloa o i ai A’u.”²⁸ I le suafa o Iesu Keriso, amene. ■

FAAMATALAGA

1. 3 Nifae 11:8–11.
2. Tagai i le 3 Nifae 11:14–15.
3. Alema 5:33.
4. 1 Nifae 13:40.
5. Tagai i le 2 Nifae 9:21; 26:24–27; Mosaea 3:13.
6. Tagai i le Alema 7:11–12.
7. Tagai i le 2 Nifae 10:25.
8. Mosaea 3:24; tagai foi i le 2 Nifae 2:4, 10, 26; 9:6–7, 12–13, 15, 22; Mosaea 3:12; 16:7–8; Alema 11:41–44; 42:6–8, 23; Helamana 14:16; Mamona 9:12.
9. Tagai i le 2 Nifae 9:21; Mosaea 3:12; Helamana 5:11; 14:18.
10. 2 Nifae 31:21; tagai foi i le 3 Nifae 27:20–21.
11. 1 Nifae 8:20.
12. 1 Nifae 15:36.
13. 1 Nifae 15:24.
14. Tagai i le 2 Nifae 31.
15. Mosaea 3:19.
16. 2 Nifae 28:30.
17. Tagai i le Mosaea 3:19.
18. Tagai i le 2 Nifae 27:27; Moronae 10:32–33.
19. Tagai i le 2 Nifae 2:8; Mosaea 2:41.
20. Tagai i le Alema 11:37.
21. Tagai i le 2 Nifae 9:21.
22. Tagai i le Ominae 1:26; Alema 5:33; Moronae 10:32–33.
23. Tagai i le Enosa 1; Mosaea 5; Alema 12; 18–19; 36.
24. Alema 5:26; ua faaopoopo le faamamafa.
25. Alema 36:21.
26. Tagai i le Mosaea 3:19.
27. Mataupu Faavae ma Feagaiga 50:24.
28. Mataupu Faavae ma Feagaiga 93:1.



Saunia e Elder Dale G. Renlund
O Le Korama a Aposetolo e Toasefululua

Mafaufau i le Agalelei ma le Silisiliese o le Atua

Ou te valaaulia outou ia manatua i aso taitasi le silisiliese o le Tama Faalelagi ma Iesu Keriso ma mea ua La'ua faia mo outou.

I le aluga o taimi, aemaise lava i taimi faigata, ua uunaia i tatou e perofeta ina ia manatua le silisiliese o le Atua ma ia mafaufau i mea na Ia faia mo i tatou o ni tagata taitoatasi, o ni aiga, ma o se nuu.¹ O lenei faatonuga o loo maua i totonu o tusitusiga paia ae o loo iloga le lauiloa i totonu o le Tusi a Mamona. Ua faamatalaina e le itulau autu o se tasi o faamoemoega o le Tusi a Mamona o le “faailoa atu i le toe vaega o le aiga o Isaraelu mea tetele na faia e le Alii mo o latou tamā.”² O loo faaiu le Tusi a Mamona i le talosaga a Mamona: “Faauta, ou te apoapoai atu ia te outou pe a outou faitauina nei mea . . . ia outou manatua le alofa mutimutivale tele o le Alii i le fanauga a tagata, . . . ma manatunatu i ai i o outou loto.”³

O le i ai pea lava o aioiga mai perofeta ina ia tomanatu ai i le agalelei o le Atua e ofoofogia.⁴ E finagalo lo tatou Tama Faalelagi ia i tatou ia manatuaina Lona agalelei ma le agalelei a Lona Alo Pele, e le mo le faamalieina o i La'ua lava, ae mo le faatosinaga a lena manatuaga ia i tatou. E ala i le mafaufau i lo La'ua agalelei, e faateleina ai la tatou

vaaiga ma le malamalamaaga. E ala i le manatunatu i lo La'ua agaalofa, o le a atili ai ona tatou lotomauualalo, lototatalo, ma tumau.

O se aafiaga faamomoiloto ma se tagata gasegase ua faaalua ai le ala e mafai ai ona suia i tatou e le loto-faafetai mo le agalelei ma le agaalofa. I le 1987, sa ou masani ai ia Thomas Nielson, o se tamalii lelei na manao-mia se taotoga o le fatu. Sa 63 ona tausaga ma sa nofo i Logan, Iuta, i le Iunaite Setete. I le mavae ai o auu-naga faamiliteli i le taimi o le Taua Lona Lua o le Lalolagi, sa ia faaipoipo atu ai ia Donna Wilkes i le Malumalu i Logan Iuta. Na avea o ia ma se tagata lei piliki malosi ma faamanuiaina. I tausaga mulimuli ane na faapitoa lava lona fiafia e galulue faatasi ma le tama matua a lona afafine, o Ionatana, i taimi

o tu'uaga o a'oga. Na atiae e le toalua se sootaga faapitoa i se vaega ona sa vaaia e Toma se vaega tele o ia lava ia Ionatana.

Na iloa e Toma o le faatalitali mo se fatu e foai mai sa o se tulaga faa-popoleina. Sa lē o ia o se tagata e lava le onosa'i. Sa mafai lava ona ia setiina ma ausia ni sini e ala i le galue malosi ma le naunautai. O le tauviga ma se fatu le lelei, ma le taofia o le agai i luma o lona olaga, na fesili mai ai Toma ia te a'u i nisi taimi po o le a se mea o o'u faia ia faatele'a'i ai le faagasologa. Ma le fiamalie, sa ia fautuaina mai ni auala e mafai ona ou agai i ai ina ia vave ona maua se fatu mo ia.

I se tasi o aso fiafia ae matautia, na maua ai se fatu na foai mai mo Toma. Na tutusa le telē ma le ituiga toto, ma e laitiiti le tagata e ona [le fatu] na o le 16 tausaga. O le tagata e ona le fatu na foaia atu, o Ionatana, le atalii faapelepele o le afafine o Toma. I le amataga o lena aso, na matua manu'a tigaina Ionatana ina ua lavea le taavale sa ia tietie ai i se nofoaafi.

Ina ua ou asiasi atu ia Toma ma Donna i le falema'i, sa lofituina i la'ua. E ese le faigata o le vaai faalema-faufau atu i lagona sa la aafia ai, i le



Provo, Iuta, ISA



iloaina o le ola o Toma e mafai ona faaumiumi i le faaaogaina o le fatu o le tama a le la tama. I le taimi muamua, sa la mumusu e mafaufau i le fatu na ofoina mai e matua faavauvau o Ionatana, le la afafine ma le la atalii faaletulafono. Na iloa lelei e Toma ma Donna, e ui, e le o toe iloa e Ionatana se mea, ma ua la malamalama o a la tatalo mo se fatu foai mo Toma sa le'i mafua ai le faalavelave faafuasei a Ionatana. Leai, o le fatu o Ionatana o se meaalofa e mafai ona faamanuia ai Toma i lona taimi o mafatiaga. Sa la iloaina atonu o le a oo mai se mea lelei mai lenei faalavelave ma filifili ai ia faia loa.

Sa sologa lelei le taotoga. Mulimuli ane, sa avea Toma ma se tagata ese. O le suiga na sili atu nai lo le faaleleia o le soifua maloloina po o le lotofaafetai. Sa ia ta'u mai ia te a'u na te mafaufau ia Ionatana i taeao uma, i lona afafine ma lona atalii faaletulafono, i le meaalofa na ia mauaina, ma le mea na manaomia ai lena meaalofa. E ui lava na manino mai pea ona uiga lelei malie masani ma le lototele, ae na ou matauina Toma ua sili atu ona naunautai, manafanafa, ma agalelei.

Na soifua Toma mo le isi 13 tausaga faaopopo i le mavae ai o le taotoga, o tausaga semanu na te le mauaina. I lana saafiafiga na ia ta'ua ai o nei tausaga na tuu atu ai ia te ia ina ia pa'i atu i olaga o lona aiga ma isi i le agalelei ma le alofa. O ia o se tagata limafoai patino i le toatele ma

o se faaitaitaiga o le faamoemoe ma le naunautaitaiga.

E pei foi lava o Toma, ua tatou tofumu uma ni meaalofa e mafai ona tatou saunia ai i tatou lava, meaalofa mai lo tatou Tama Faalelagi ma Lona Alo Pele, e aofia ai le faaolataga e ala i le taulaga togiola a Iesu Keriso.⁵ Ua tatou mauaina le ola i lenei lalolagi; o le a tatou maua le ola faaletino i le olaga a sau; ma le faaolataga ma le faaeaga e faavavau—pe afai tatou te filifili i ai—o ia mea uma ona o le Tama Faalelagi ma Iesu Keriso.

Soo se taimi lava tatou te faaoga ai, faamanuiaina ai, pe mafaufau foi i nei meaalofa, e tatau ona tatou mafaufau i le taulaga, agalelei, ma le alofa o ē na foaia maia. O le migao mo ē na foai maia e sili atu nai lo lo tatou lagonaina o le lotofaafetai. O le manatunatu i a La'ua meaalofa e mafai ma e tatau ona suia ai i tatou.

O le tasi suiga ofoofogia o le suiga o Alema le Itiiti. A o alu atu Alema “i lea mea ma lea mea ma le fouvale faasaga i le Atua,”⁶ sa faaali mai se agelu. Faatasi ma “se leo o se faititili,”⁷ sa a'oa'i ai e le agelu Alema mo le sauaina o le Ekalesia ma “gaoi ese o loto o tagata.”⁸ Na faaopopo atu e le agelu lenei apoapoiga: “Alu ia, ma ia e manatua le

faatagataotauaina o ou tamā . . . ; ma manatua mea tetele na fai e [le Atua] mo i latou.”⁹ Mai apoapoiga uma e mafai ai, o le mea lea na faamamafa atu e le agelu.

Na salamo ma manatua e Alema. Na faasoa mulimuli atu e Alema le apoapoiga a le agelu i lona atalii o Helamana. Sa fautua atu Alema, “Ou te manao ina ia e faia e pei ona ou faia, i le manatuaina o le faatagataotauaina o o tatou tamā; ona sa i ai i latou i le pologa, ma sa leai se tasi sa mafai ona laveiina i latou vagana ai le Atua o Aperaaamo, . . . Isaako, ma . . . Iakopo; ma sa ia laveiina moni i latou i o latou puapuaga.”¹⁰ Sa fai atu ma le faigofie Alema, “Ou te tuu atu lo'u faalagolago ia te ia.”¹¹ Sa malamalama Alema e ala i le manatuaina o le laveaiga mai le nofopologa ma le lagolago i le taimi o “tofotofoga ma faalavelave o ituaiga eseese uma,” tatou te iloa ai le Atua ma le mautinoa o Ana folafolaga.”¹²

O nisi o i tatou ua i ai se aafiaga e matautia e pei o Alema, ae o lo tatou suiga e ono tutusa le loloto. Na folafola mai e le Faola anamua:

“Ou te avatu foi ia te outou le loto fou, ma ou tuu i totonu ia te outou le agaga fou; ou te aveesea le loto maaa . . . , ma ou avatu ia te outou le loto aano.



San Bernardo, Santiago, Chile

“Ou te tuuina atu lo’u agaga i totonu ia te outou. . . .

“ . . . E fai foi outou mo’u nuu, e fai foi a’u mo outou Atua.”¹³


Na ta’u atu e le Faaola toetu ia sa Nifae le auala e amatalia ai le suiga. Na ia faailoa atu se vaega taua i le fuafuaga a le Tama Faalelagi ina ua Ia fetalaiaga:

“Na auina mai a’u e lo’u Tama, ina ia sii ae a’u i luga o le satauro; ma a mavae ona sii ae o a’u i luga o le satauro, ina ia mafai ona *aumai* o tagata uma ia te a’u. . . .

“Ma le pogai lenei na sii ai a’u i luga, o lea, e tusa ai ma le mana o le Tamā, o le a ou *aumai* ai tagata uma ia te a’u.”¹⁴

O le a le mea e manaomia e aumai ai oe i le Faaola? Mafaufau i le gauai atu o Iesu Keriso i le finagalo o Lona Tama, Lona manumalo i le oti, Lona tauaveina i Ona lava luga o au agasala ma mea sese, Lona mauaina o le mana mai le Tama e faia ai aioiga mo oe, ma Lana togiola sili e lē i’u mo oe.¹⁵ Pe le o lava ea nei mea e aumai ai oe ia te Ia? Ua lava mo a’u. O Iesu Keriso o loo “tu mai ma aao mafola, ma le faamoemoe ma le naunautai e faamalolo, faamagalo, faamamā, faamalosia, faaleleia, ma faapaiaina [oe ma a’u].”¹⁶

O nei upumoni e tataua ona aumaia ia i tatou se loto fou ma uunaia i tatou e filifili e mulimuli i le Tama Faalelagi ma Iesu Keriso. Ae e oo lava i loto fou atonu e “faigofie ona se ese, . . . faigofie ona tuua le Atua [tatou te] alolofa i ai.”¹⁷ Ina ia tetee atu i lenei lagona, e manaomia ona tatou manatunatu i aso uma i meaalofo ua tatou maua ma mea e manaomia e na meaalofo. Na fautua mai le Tupu o Peniamina, “E faapea lava ona ou manao ia outou manatua, ma manatua pea lava pea, le silisiliese o le Atua . . . ma lona



agalelei ma lona tali-tiga ia te outou.”¹⁸ Afai tatou te faia, tatou te agavaa mo faamanuiaga faalelagi ofoofogia.

O le mafaufau i le agalelei ma le alofa mutimutivale o le Atua e fesoasoani ia i tatou ina ia faateleina ai le nofouta faaleagaga. O se taunuuga, o le faateleina o le nofouta faaleagaga e mafai ai ona tatou iloa le moni o mea uma lava e ala i le mana o le Agaga Paia.¹⁹ E aofia i lea mea se molimau o le moni o le Tusi a Mamona, iloina o Iesu o le Keriso, o lo tatou Faaola ma le Togiola patino, ma le taliaina o Lana talalelei na toefuatai mai i nei aso e gata ai.²⁰


Pe a tatou manatua le silisiliese o lo tatou Tama Faalelagi ma Iesu Keriso ma mea ua La faia mo i tatou, o le a tatou lē faasamasamanoa ia i La’ua, e pei lava ona lē faasamasamanoa Toma i le fatu o Ionatana. I se auala fiafia ma migao, na manatua ai e Toma i aso taitasi le faalavelave na aumaia ia te ia se ola faaumiumi. I le faagaetia tele i le iloina e mafai ona faaolaina ma faaeaina i tatou, e ao ona tatou manatuaina e oo mai le faaolataga ma le faaeaga i se tau maoae.²¹ E mafai ona tatou olioli ma le migao a o tatou iloina a aunoa ma Iesu Keriso o le a tatou malaia, ae o Ia, e mafai ai ona tatou maua le meaalofo silisili e mafai ona aumai e le Tama Faalelagi.²² E moni, o lenei migao e mafai ai ona tatou olioli i le folafolaga “o le ola faavavau i le lalolagi lenei” ma i’u ai ina maua le “ola

faavavau . . . o le mamalu ola pea lava” i le lalolagi a sau.²³

Pe a tatou mafaufau i le agalelei o lo tatou Tama Faalelagi ma Iesu Keriso, e faateleina lo tatou faalagalo ia te i La’ua. E suia a tatou tatalo ona ua tatou iloa o le Atua o lo tatou Tama ma o i tatou o Ana fanau. Tatou te le saili e suia Lona finagalo ae ia ogatusa o tatou loto ma Lona [finagalo] ma faamautinoa mo i tatou lava faamanuiaga e finagalo o Ia e faamatuu mai, e fua lea i lo tatou ōle atu mo na faamanuiaga.²⁴ Tatou te naunau ia agamalu atili, mama atili, mausali atili, ma FaaKeriso atili.²⁵ O nei suiga e faagavaa ai i tatou mo isi faamanuiaga faalelagi.

E ala i le faailoaina atu o mea lelei uma e mai ia Iesu Keriso, o le a tatou faafesootai atili atu ai ma le mataalia lo tatou faatuatua i isi.²⁶ O le a tatou maua le lototele pe a fetaiai ma galuega ma tulaga e ono foliga faigata.²⁷ O le a tatou faamalosia lo tatou naunautauga e tausia feagaiga ua uma ona tatou osia e mulimuli i le Faaola.²⁸ O le a faatumuina i tatou i le alofa i le Atua, mananao e fesoasoani ia i latou e lē tagolima e aunoa ma le faamasino atu, alofa i a tatou fanau ma faafailele i latou i le amiotonu, faatumuina le faamagaloina o a tatou agasala, ma ia olioli pea.²⁹ O fua ofoofogia nei o le manatuaina o le agalelei ma le alofa mutimutivale o le Atua.

I se faatusatusaga na lapatai mai ai le Faaola, “Ua leai se mea e faatausui



ai le tagata i le Atua, pe ua leai ni isi e faamumu faasaga i ai lona toasa, tau lava o i latou o e latou te lē tautinoina lona aao i mea uma.³⁰ Ou te lē manatu e tiga le Atua pe a tatou faagaloina o Ia. Ae, ou te manatu e matua lē fiafia lava o Ia. Na te silafia ua tatou taofia i tatou lava mai le avanoa e faalatalata atili atu ai ia te Ia e ala i le manatuaina o Ia ma Lona agalelei. Ona tatou misia foi lea o Lona faalatalata mai ia i tatou faapea ma faamanu-iaga patino ua Ia folafola mai.³¹

Ou te valaaulia outou ia manatua i aso taitasi le silisiliese o le Tama Faalelagi ma Iesu Keriso ma mea ua La'ua faia mo outou. Ia tuu atu ou mafauauga o lo La'ua agalelei ia fusufusia mausali ai lou loto le matonu ia i La'ua.³² Mafauafau loloto i lo La'ua agaalofa, ma o le a faamanuaina oe i se nofouta faaopoopo faaleagaga ma avea atili ai faapei o Keriso. O le manatunatu ai i lo La'ua tiga alofa o le a fesoasoani ia te oe e "tutumau [ai] i le faamaoni e oo i le iuga," seia "talia

[oe] i le lagi" ina ia "mau faatasi ma le Atua i se tulaga o le fiafia e lē gata."³³

Na fetalai mai lo tatou Tama Faalelagi, a o faasino atu i Lona Alo Pele, "Faalogo ia te Ia!"³⁴ A o e galue i na upu ma faalogo ia te Ia, ia manatua, i le olioli ma le migao, e fiafia le Faaola e toefuatai mea e le mafai ona e toefuataia; e fiafia o Ia e faamalolo i manu'a e le mafai ona e faamaloloina; e fiafia o Ia e faaleleia mea ua gausia e le mafai ona toe faaleleia;³⁵ Na te totogia soo se mea lē talafeagai e oo atu ia te oe;³⁶ ma e Na te fiafia e faaleleia tumau loto ua nutimomoia.³⁷

A o o'u mafauafau i meaalofa mai lo tatou Tama Faalelagi ma Iesu Keriso, ua ou iloa ai lo La'ua alofa le mafuatia ma lo La'ua agaalofa lemafatuasalia mo fanau uma a le Tama Faalelagi.³⁸ O lenei malamalama ua suia ai a'u, ma o le a suia ai foi oe. I le suafa o Iesu Keriso, amene. ■

FAAMATALAGA

1. Tagai, mo se faaitaiga i le, Aperaamo 2:16; Esoto 13:3; Iosua 4:6-9;

- 1 Samuēlu 7:11-12.
2. Itulau autu o le Tusi a Mamona.
3. Moronae 10:3..
4. Mo se faaitaiga, tagai i le Teuteronome 6:12; 11:18; Iosua 4:21-24; 1 Samuēlu 7:12; Roma 2:4; Roma 11:22; 2 Nifae 9:10; 33:14; Iakopo 1:7; Mosaea 5:3; 25:10; 27:22; Alema 34:4; Helamana 12:2; 3 Nifae 4:33; 18:11-12; Mamona 2:13; Mataupu Faavae ma Feagaiga 133:52; 138:2.
5. Tagai i le Isaia 53:3-12; Luka 22:44; John 3:16; Kalatia 2:20; Mosaea 3:5-11; Alema 7:10-13; Mataupu Faavae ma Feagaiga 19:16-19.
6. Mosaea 27:11.
7. Mosaea 27:11.
8. Mosaea 27:9; tagai foi i le fuaiupu 13.
9. Mosaea 27:16.
10. Alema 36:2.
11. Alema 36:27.
12. Tagai i le Alema 36:27-29.
13. Esekielu 36:26-28.
14. 3 Nifae 27:14-15; ua faaopoopo le faamamafa. Tagai foi i le Ioane 12:32; 2 Nifae 26:24.
15. Tagai i le Mosaea 15:7-9; Faaaliga 21:4.
16. Russell M. Nelson, "E Mafai Ona Tatou Faia ia Lelei Atu ma Ia Tatou Lelei Atu," *Liahona*, Me 2019, 67.
17. "Come, Thou Fount of Every Blessing," *Hymns* (1948), no. 70.
18. Mosaea 4:11; tagai foi i le Alema 36:2, 28-29; Eteru 7:27; 10:2; Moronae 9:25.
19. Tagai Moronae 10:4-5.
20. Tagai i le itulau autu ma le faatomuaga i le Tusi a Mamona.
21. Tagai i le Mataupu Faavae ma Feagaiga 19:18-19.
22. Tagai i le Mataupu Faavae ma Feagaiga 14:7.
23. Mose 6:59; tagai foi i le Alema 36:28.
24. Tagai i le Bible Dictionary, "Tatalo."
25. Tagai i le "Faapaia Mai A'u," *Viiga*, nu. 70.
26. Tagai i le Filemoni 1:6.
27. Tagai i le 1 Samuēlu 17:37; 1 Nifae 4:2.
28. Tagai i le Alema 5:6, 13, 26-28.
29. Tagai i le Mosaea 4:11-26.
30. Mataupu Faavae ma Feagaiga 59:21.
31. Tagai i le Mataupu Faavae ma Feagaiga 88:63-64.
32. Tagai i le "Come, Thou Fount of Every Blessing."
33. Mosaea 2:41.
34. Tagai i le Mataio 17:5; Mareko 9:7; Luka 9:35; 3 Nifae 11:7; Iosefa Samita—Talafaasolopito 1:17.
35. Tagai i le Boyd K. Packer, "The Brilliant Morning of Forgiveness," *Ensign*, Nov. 1995, 19-20.
36. Tagai i le Faaaliga 21:4.
37. Tagai i le Salamo 147:3.
38. Tagai i le 2 Nifae 26:33.



Saunia e Elder Benjamin M. Z. Tai
O Le Fitugafulu

O Le Mana o le Tusi a Mamona i le Liuaina

Ua saunia e le Tusi a Mamona se meaai paleni faaleagaga, tusia se fuafuaga o le faatinoga, ma faafesootai atu i tatou i le Agaga Paia.

Ina ua maea ona iloiloaina se lipoti mai se suesuega faaletino talu ai nei, sa ou aoaoina faapea ou te manaomia ona faia ni fetuunaiga o le ituaiga o olaga. Ina ia fesoasoani ia te a'u, sa tusia e lo'u fomai se fuafuaga o meaai paleni ma le faamalositino, lea, afai ou te filifili e mulimuli ai, o le a suia a'u i se tagata maloloina atili.

Afai tatou te faia uma se suesuega faaleagaga, o le a se mea o le a tatou aoaoina e uiga ia i tatou lava? O a ni fetuunaiga o le a tusia e lo tatou foma'i faaleagaga? Mo i tatou e ave ma tagata e tataua ona tatou ave ai, e taua lo tatou iloa o le mea e fai ma faia mea tatou te iloa.

O Iesu Keriso o le Foma'i Sili.¹ E ala mai i Lana Togiola, Na te fusifusia o tatou manu'a, tauave i Ona luga o tatou vaivaiga, ma faamaloloina o tatou loto nutimomoia.² E ala i Lona alofa tunoa, e mafai ai ona faamalosisia o tatou vaivaiga.³ Na te valaaulia i tatou ia mulimuli atu ia te Ia⁴ e ala i le a'oa'o ia te Ia, faalogo i Ana afioga, ma savali i le agamalu o Lona Agaga.⁵ Ua Ia folafola mai e fesoasoani mai ia i tatou⁶ i lenei faagasologa o le liua

i le olaga atoa, lea e suia i tatou ma aumaia le olioli e faavavau.⁷

Ua tuuina mai ia i tatou e le Faaola le Tusi a Mamona o se meafaigaluga mamana e fesoasoani i le liuaina.

Ua saunia e le Tusi a Mamona se meaai paleni faaleagaga, tusia se fuafuaga o le faatinoga, ma faafesootai atu i tatou i le Agaga Paia. Ua tusiaina mo i tatou,⁸ o loo aofia ai le afioga a le Atua i le manino⁹ ma ta'u mai ia i tatou lo tatou faasinomaga, faamoemoega, ma le tau-nuuga.¹⁰ Faatasi ai ma le Tusi Paia, ua molimau mai le Tusi a Mamona ia Iesu Keriso¹¹ ma a'oa'o mai le ala e mafai ai ona tatou iloa upumoni ma ave ai e faapei o Ia.

O Uso Saw Polo sa 58 tausaga ina ua faailoa atu ia te ia le talalelei toefuataiina a Iesu Keriso. Ina ua ou feiloai ia te ia, sa galue o ia o

se peresitene o le paranesi mo le tele o tausaga, ae na ou iloaina na te lei faitauina lava le Tusi a Mamona ona sa le'i maua i lana gagana Burmese. Ina ua ou fesili ia te ia pe faapefea ona ia iloa e moni le tusi e aunoa ma le faitauina, na tali mai o ia na ia suesueina le tusi ata o *Tala o le Tusi a Mamona* i aso uma e ala i le matamata i ata, faaaogaina se lolomifefiloi e faaliliu ai upu faaPeretania, ma tusi faaeteete ni faamatalaga o mea na ia aoaoina. Sa ia faamatala mai, "O taimi uma sa ou suesue ai, ou te tatalo e uiga i mea sa ou a'oa'oaina, ma ou te lagona le filemu ma le olioli, e manino lo'u mafaufau, ma e faamalulūina lo'u loto. Sa ou lagonaina le molimau mai o le Agaga Paia ia te a'u e moni. Ou te iloa o le Tusi a Mamona o le afioga a le Atua."

E pei o Uso Saw Polo, e mafai e i tatou taitoatasi ona suesue le Tusi a



Bountiful, Iuta, ISA

Mamona e tusa ai ma o tatou tulaga. A o tatou naunau e talitonu ma mafau-fau loloto i ana aoaoga i o tatou loto, e mafai ona tatou ole atu i le faatuatua i le Atua pe moni ia aoaoga.¹² Afai tatou te faamaoni i lo tatou naunau ina ia iloa ma maua le mana'o moni e galue, e tali mai o Ia ia i tatou i o tatou loto e ala i le Agaga Paia. Ma o le mana o le Agaga Paia e mafai ona tatou iloa ai le moni o mea uma lava.¹³ Pe a tatou mauaina se molimau paia o le Tusi a Mamona, tatou te iloa foi e ala i lea lava mana e tasi o Iesu Keriso, o le Faaola o le lalolagi, o Iosefa Samita o Lana perofeta, ma o Le Ekalesia a Iesu Keriso o le Au Paia o Aso e Gata Ai o Lana lava Ekalesia toefuataiga.¹⁴

A o avea ma se alii talavou i le amataina o la'u galuega faafaifeautalai, sa ou ulu atu i se vaalele e agai atu i Ausetalia. O le lagonaina o le tuu-atoatasi, popole, ma le le atoatoa ae ua tautino e auauna atu, sa ou matuai manaomia lava se faamautinoaga pe moni mea na ou talitonu i ai. Sa ou tatalo ma faitau ma le naunautai a'u tusitusiga paia, ae a o faagasolo pea le faigamalaga, sa matua faateteleina



lo'u lava ia masalosalo ma na faaletonu lo'u tulaga faaletino. Ina ua mavae lo'u tauivi ai mo le tele o itula, na savali mai se tama o le vaalele ma tu i autafa o lo'u nofoa. Sa ia aveese mai i o'u lima le Tusi a Mamona sa ou faitauina. Na ia tilotilo i le faava'a ma fai mai, "O se tusi maoae lena!" ona toe tuu mai lea o le tusi ia te a'u ma savali ese. Ou te le'i toe vaai lava ia te ia.

A o tatagi mai pea ana upu i o'u taliga, na ou faalogoina ma le manino ma lagonaina i lo'u loto, "O lea ou te iinei, ma ou te iloa le mea o e i ai. Tau lava o le faia o le mea sili e te mafaia, aua o le a ou faia mea o totoe." I luga o lena vaalele i luga a'e o le Vasa Pasefika, sa ou maua ai se molimau patino e ala i a'u suesuega o le Tusi a Mamona ma uunaiga a le Agaga Paia e faapea na silafia e lo'u Faaola lo'u tagata ma e moni le talalelei.

Na a'oa'o mai Elder David A. Bednar: "O le iloaina e moni le talalelei, o le fatu lea o se molimau. O le faamaoni e le aunoa foi i le talalelei, o le fatu lea o le liuaina."¹⁵ O le liua e manaomia ai i tatou ina ia avea ma "ē anaana i le upu ae le na o le faalogo i ai."¹⁶ O le fuafuaga faatino a le Alii mo i tatou—le mataupu faavae a Keriso—o loo a'oa'oina manino i le Tusi a Mamona.¹⁷ Ua aofia ai:

- Muamua, *faatino*ina o le faatuatua ia Iesu Keriso e ala i le *faalagolago ia te Ia*, *taus*i Ana poloaiga, ma le *iloaina* o le a Ia fesoasoani mai ia i tatou.¹⁸
- Lua, *salamo* i aso taitasi i o tatou vaivaiga ma *lagonaina* agonaina le

olioli ma le filemu pe a Ia faamagaloina i tatou.¹⁹ O le salamo e manaomia ai lo tatou *faamagaloina* o isi²⁰ ma fesoasoani ia i tatou ia agai i luma. Ua folafola mai e le Faaola e faamagaloina i tatou i taimi uma tatou te salamo ai.²¹

- Tolu, o le *osia ma le taus*ia o feagai-ga ma le Atua e ala i sauniga e pei o le papatisoga. O lenei mea o le a faatumauina ai i tatou i luga o le ala o feagaiga lea e tau atu ia te Ia.²²
- Fa, *mau*aina o le meaalofo o le Agaga Paia. O lenei meaalofo tatou te maua ai le matufaga faifai pea a lē na te faapaiaina, faamafanafana, ma taiialaina i tatou.²³
- Ma le lima, *tumau* e oo i le iuga e ala i le *fetaomi atu i luma* ma le tumau a o *taumamafa* i aso taitasi i le afioga a Keriso.²⁴ E ala i le taumafa mai le Tusi a Mamona ma le pipii mau i ana aoaoga, e mafai ai ona tatou manumalo i tofotofoga ma maua le taitaiga ma le puipuiga i o tatou olaga atoa.²⁵

O le faaoga pea o le mataupu faavae a Keriso i o tatou olaga, o le a tatou faatolalo ai le lagona o le le fia suia lea e faalavelave i suiga ma le fefe lea e taofiaina faatinoga. O le a tatou mauaina faaaliga faaletagata lava ia, aua o le Agaga Paia "o le a *faali* mai e ia ia te outou mea uma e tatau ona outou faia,"²⁶ ma "o afioga a Keriso o le a *ta'u* mai ai ia te outou mea uma e tatau ona outou faia."²⁷

Mo le 20 tausaga, na tauivi ai Uso Huang Juncong ma le avamalosi, sikareti, ma taaloga faitupe ua

lēmāpuleaina. Ina ua faailoa atu i ai Iesu Keriso ma Lana talalelei toefuataiina, na manao Uso Huang e sui mo le manuia o lona aiga talavou. O lana luitau sili o le ulaula. O se tagata e le malolo le tapaa, sa ia taumafai e tuu i le tele o taimi ae sa le faamanuiaina. I se tasi aso, sa ulufia ai lona mafaufau e upu nei mai le Tusi a Mamona: “ma le loto faamaoni, ma le manatu moni i ai.”²⁸ E ui i taumafaiga muamua na le’i faamanuiaina, ae na ia lagona atonu e mafai ona ia sui i le fesoasoani mai o le Tama Faalelagi ma Iesu Keriso.

Na tuufaatasia e faifeautalai faamisi-ona lo latou faatuatua faatasi ma ia ma saunia se fuafuaga faatino o ni auala talafeagai, faatasi ai ma le tele o tatalo ma le suesueina o le afioga a le Atua. Faatasi ai ma le faamaoni ma le manatu moni i ai, na faatino ai e Uso Huang i le naunautaiga faamaoni ma iloa ai a o ia taulai atili atu i mausa fou na ia manao e atiae, e pei o le suesueina o le Tusi a Mamona, na faaitiitia lona taulai atu i mausa na ia manao e aveese.

O le toe manatuaina ai o lona aafiaga mai le 15 tausaga ua mavave, na ia saunoa ai, “Ou te le manatuaina po o anafea tonu lava na tuu ai la’u ulaula, ae a o ou taumafai malosi i aso uma e fai mea sa ou iloa na manaomia ona ou faia e valaaulia ai le Agaga o le Alii i lo’u olaga ma faia pea i latou, sa ou le toe tosina atu i sikareti talu mai lena taimi.” E ala i le faaaogaina o a’oa’oga o le Tusi a Mamona, ua suia ai le olaga o Uso Huang, ma ua avea ai o ia ma se tane ma se tamā lelei atu.

Ua folafola mai e Peresitene Russell M. Nelson: A o outou suesueina ma le agaga tatalo le Tusi a Mamona i *aso uma*, o le a outou faia ni faaiuga lelei atu—*i aso uma*. Ou te folafola atu a outou mafaufau loloto i mea tou te suesueina, o le a matala mai pupuni o le lagi, ma o le a outou



Aai o Niu loka, Niu loka, ISA

mauaina tali i a outou lava fesili ma le taitaiga mo o outou lava olaga. Ou te folafola atu a e faatofuina oe lava i le Tusi a Mamona i aso taitasi, e mafai ona puipuia oe mai mea leaga o le aso, e aofia ai le mala faataumaoui o ponokalafi ma isi vaisu ua punitia ai le mafaufau i mea faaleagaga.”²⁹

Uo pele, o le Tusi a Mamona o le afioga a le Atua, ma o le a tatou latalata atili atu ia te Ia pe afai tatou suesue i ai.³⁰ Pe a tatou tofotofu i ana upu, o le a tatou mauaina se molimau o lona moni.³¹ Pe a tatou ola ai pea e tusa ma ona a’oa’oga, o le a tatou le mananao e fai mea leaga.³² O le a liua o tatou lotu, foliga, ma le natura ina ia avea atili e faapei o le Faola.³³ Ou te faasoa atu la’u molimau mautinoa o Iesu o le Keriso, lo tatou Faaola, Togiola ma le Uo. I le suafa o Iesu Keriso, amene. ■

FAAMATALAGA

1. Tagai i le Mareko 2:17.
2. Tagai i le Salamo 147:3; Isaia 53:4; Mataio 8:17.
3. Tagai i le 2 Nifae 25:23; Iakopo 4:7; Eteru 12:27.
4. Tagai i le Mataio 19:21; Mareko 10:21; Luka 18:22; 2 Nifae 31:10.
5. Tagai i le Mataupu Faavae ma Feagaiga 19:23.
6. Tagai i le Isaia 41:10.
7. Tagai i le Mosaea 2:41; 3:19; 5:2.

8. Tagai i le 2 Nifae 25:8, 21–22; Mamona 7:1; 8:35.
9. Tagai i le 2 Nifae 25:7; 31:2–3.
10. Tagai i le 2 Nifae 2:25; Alema 40.
11. Tagai i le Isaia 29:4, 11–18; Esekielu 37:16–21; 2 Korinito 13:1; 1 Nifae 13:38–42; 2 Nifae 3:12; 25:26.
12. Tagai i le Alema 32: 26–43.
13. Tagai i le Moronae 10:3–5.
14. Tagai i le faatomuaga i le Tusi a Mamona.
15. David A. Bednar, “Faaliliuina i le Alii,” *Liahona*, Nov. 2012, 109.
16. Iakopo 1:22.
17. Tagai i le 2 Nifae 31; 3 Nifae 11:31–40; 27:13–22.
18. Tagai i le 1 Nifae 3:7; Moronae 7:33.
19. Tagai i le Mosaea 4:3.
20. Tagai i le Mataio 18:21–35; Mareko 11:25–26; Luka 6:37; 3 Nifae 13:14–15; Mataupu Faavae ma Feagaiga 64:10; 82:1.
21. Tagai i le Mosaea 26:30; Moronae 6:8.
22. Tagai i le 2 Nifae 31:17–18.
23. Tagai i le 1 Nifae 10:19; 2 Nifae 33:1; 3 Nifae 11:32; 28:11; Moronae 6:4.
24. Tagai 2 Nifae 31:20.
25. Tagai i le 1 Nifae 15:24.
26. 2 Nifae 32:5; faapoopo le faamamafa.
27. 2 Nifae 32:3; faapoopo le faamamafa.
28. Moronae 10:4.
29. Russell M. Nelson, “O Le Tusi a Mamona: Faamata e Faape’i Lou Olaga e Aunua ma Ia?” *Liahona*, Nov. 2017, 62–63.
30. Na saunoa le Perofeta o Iosefa Samita e uiga i le Tusi a Mamona, “O le a latalata atili atu se tagata i le Atua e ala i le usitaia o ona mataupu, nai lo soo se isi lava tusi” (faatomuaga i le Tusi a Mamona).
31. Tagai i le Iakopo 6:7; Alema 32:26–43.
32. Alema 19:33.
33. Tagai i le 2 Korinito 5:17; Mosaea 3:19; 5:2; Alema 5:14, 19.



Saunia e Elder Gary E. Stevenson
O Le Korama a Aposetolo e Toasefululua

O Se Faavae Lelei mo Aso Atalī

I tausaga a oo mai, sei o tatou faataga ia faaleleiga ua faia i le Malumalu o Sate Leki e uunaia ma musuia ai i tatou.

Talafaasolopito o le Malumalu o Sate Leki

Tatou manatu faapea o loo tatou i ai i se aoauli vevela i le aso 24 Iulai, 1847 pe tusa o le 2:00 i le aoauli. Ina ua mavae se malaga faigata i le 111 aso ma le 148 tagata o le Ekalesia sa tuufaatasia i le uluai vaega na agai atu i sisifo, o le taimi lea na gasegase ai Polika Iaga, a o Peresitene i le Korama a Aposetolo e Toasefululua, ma sa vaivai mai le fiva faavaomatua, ma sa ulufale atu i le Vanu o Sate Leki.

E lua aso mulimuli ane, a o faasolosolo manuia mai lona gasegase, sa taitai ai e Polika Iaga ni isi o uso o le Korama a Aposetolo e Toasefululua ma isi i se malaga suesue. Sa tusifaa-maumau e William Clayton: “Pe tusa ma le tolu kuata o se maila i matu o le tolauapiga, ae matou taunuu i se fanua matagofie e mafola pei se laulau, e mafola lelei ma manaia lona lilifa agai i sisifo”¹

A o vailiilia ma le vaega le fanua, sa faafuasei ona tu Polika Iaga ma sunu’i lona tootoo i le elelee, ma alaga, “O iinei o le a tu ai le Malumalu o lo tatou Atua.” O se tasi o ana soa o Elder Uilifoti Uutilafi, o le sa ta’ua

faapea o le saunoaga “na taia ai o [ia] e pei o se uila,” ma sa ia tutu’iina se lala laau i le elelee e maka ai le mea tonu na iloga i le tootoo o Peresitene Iaga. Sa filifilia le fasefulu eka (16 ha) mo le malumalu, ma sa tonu ai faapea e tatau ona faataatia le aai ia “faatafafa lelei i Matu & Saute, sasae & sisifo” ma le malumalu i le totonugalemu.²

I le konafesi aoao ia Aperila 1851, na autasi ai le palota a tagata o le Ekalesia e lagolagoina se manatu faatu e fau se malumalu “i le suafa o le Alii.”³ E lua tausaga mulimuli ane, i le aso 14 Fepuari, 1853, sa faapaiaina ai le nofoaga e Heber C. Kimball i se sauniga faitele sa auai ai le fia afe o le Au Paia, ma sa suatiaina le elelee mo le faavae o le Malumalu o Sate Leki. I ni nai masina mulimuli ane, i le aso 6 Aperila, na faataoto ai maatulimanu tetele o le malumalu ma sa faapaiaina i sauniga felanulanuai na aofia ai ma se vaega na tauaveina le tagāvai ma faaili ma se solo umi na taitaia e taitai o le Ekalesia mai le tapeneko tuai e oo atu i le tulaga o le malumalu, i le mea na tuuina atu ai saunoaga ma tatalo i le mea na i ai maa taitasi e fa.⁴

I le sauniga o le suatiaina o le elelee, sa toe ta’ua ai e Peresitene Iaga sa ia vaaia se faaaliga ina ua ia faatoa tuvae i le laueleele, a o latou vailiilia le laufanua o le vanu, e faapea, “Sa ou iloa [i lena taimi], e faapei lava ona ou



iloa nei, o le eleele lenei e faatuina ai se malumalu—sa i o’u luma.”⁵

E sefulu tausaga mulimuli ane, ae fofogaina mai e Polika Iaga le malamalamaaga lenei faaperofeta i le konafesi aoao ia Oketopa 1863: “Ou te manao e vaai i [le] malumalu o fauina i se faiga o le a tumau e oo i le meleniuma. E le na o le pau lea o le malumalu o le a tatou fauina; ae o le a faitau selau malumalu e fauina ma faapaiaina i le Alii. O le a lauiloa lenei malumalu o le uluai malumalu e fauina i mauga e le Au Paia o Aso e Gata Ai. . . . Ou te manao i lena malumalu . . . e tu o se maafaamanatu mitamita o le faatuatua, lavapapale, ma le galulue malolosi o le au paia a le Atua i atumauga.”⁶

O le iloiloia o lenei talafaasolopito puupuu, ua ou maofa ai i le mana faaletagatavaai o Polika Iaga—muamua, o lona faamautinoaina faapea, i le mea e gata mai ai le mafai ma le, faaogaina o metotia faufale na i ai i lena taimi ma le nofoaga, o le a fauina ai le Malumalu o Sate Leki i se ala e tumau ai e oo i le Meleniuma ma le lona lua, o lona valoiaina o le faatupulaia o malumalu i le lumanai i le lalolagi atoa, e oo lava i le faanumeraina i le tai selau.



“O iinei e tu ai le Malumalu a lo tatou Atua,” na tautino mai ai Peresitene Polika Iaga.



O faafouga o le Malumalu o Sate Leki o le a saofagā atu i le faataunuuga o le manao o Polika Iaga ia tumau ai le malumalu e oo atu i le Meleniuma.

Toe Faafouga o le Malumalu o Sate Leki

E faapei foi o Polika Iaga, o loo tausia e o tatou perofeta o ona po nei le Malumalu o Sate Leki ma isi malumalu uma ma le faautautaga tele. I le gasologa o tausaga, e fautuina ai le Au Peresitene Sili, mai lea taimi i lea taimi le Au Epikopo Pulefaamalumalu ina ia mautinoa o mausali le faavae o le Malumalu o Sate Leki. A o o’u galue ai i le Au Epikopo Pulefaamalumalu, i le talosaga a le Au Peresitene Sili, sa matou faia ai se toeiloiloga aoao o le Malumalu o Sate Leki, e aofia ai le iloiloga o faafouga aupito lata mai o le mamanu o auala faatusiata mo le puipuiga ma auala o fausaga.



Na suatiaina le eleele mo le Malumalu o Sate Leki i le 1853.

O ni vaega ia o le iloiloga na tuuina atu i le Au Peresitene i lena taimi: “I le mamanu ma le fausaga o le Malumalu o Sate Leki, sa faaogaina ai punaoa faaenisinia aupito silisili, tomai faalegaluega, anomea faufale, o meaafale ma isi punaoa na maua i lea vaiata. Talu mai lona faapaiga i le 1893, sa tu mausali lava le malumalu ma sa avea o se faatusa o le faatuatua [ma le] faamoemoe ma o se malamalama i tagata. Sa faaogaina se faaeteetega tele e faagaioia ai, faamama, ma tausia le malumalu i se tulaga lelei. O tino maamora i fafo ma utupoto fesaua’i mai le tasi itu i le isi i le anoafale o loo tulaga lelei. Ua faamautu i ni suesuega talu ai nei e faapea, o le tulaga na filifilia e Polika Iaga mo le malumalu e lelei tele lona eleele ma e maualuga le maopo lelei e le faaleagaina ai le fausaga.”⁷


Sa faaiuina le iloiloga faapea sa manaomia ni lipea ma ni toe faaleliga masani e toe faafou ma faamautu ai le malumalu, e aofia ai le tafafa taalaelae ma vaega i fafo, o tulaga faaeletise ua le toe aoga i aso nei, ma vaega mo papatisoga. Peitai, sa fautuina foi le fuafuaina o se faafouga lavelave faatusiata mo le puipuiga e amata mai le faavae o le malumalu ma agai atu ai i luga.

O Le Faavae o le Malumalu

Atonu tou te manatua, o Peresitene Polika Iaga lava ia sa aofia tele ai i le fauga o le uluai faavae o le malumalu, lea na tautua lelei ai le malumalu talu mai ona maea i le 127 tausaga talu ai. O itutino uma ma elemene o le faafouga fautuaina mo le puipuiga o le malumalu o le a faaoga ai nofoaga tutasi faatekinolosi, lea sa lei mafau-fauina i le taimi na fausia ai. O lea faiga ua manatulia o le faatufugaga faaenisinia aupito lata mai mo le puipuiga mai mafuie.

O lea tekinolosi, e fou lona atina'ega, ua amata i le faavae tonu o le malumalu, e maua ai se puipuiga malosi mai le faaleagaina e se mafuie. O le itu aupito taua, e faamalosi ai le fausaga o le malumalu ina ia tu mausali, tusa lava pe galulu le elelee ma ona siosiomaga i ni mafuie.

O le faafouga o le malumalu o le a faaoga ai lea tekinolosi sa fofogaina mai e le Au Peresitene Sili i le tausaga ua te'a. I lalo o le taitaiga a le Au Epikopo Pulefaamalumalu, sa amataina le fausaga i ni nai masina talu ai, ia Ianuari 2020. Ua fuafua e mae'a pe a ma le fa tausaga.



O le faafouga faalenatura ua faamoemoeina mo le Malumalu o Sate Leki ua mafau-fauina o se tulaga faaenisinia sili o le faatufugaga mo le puipuiga mai mafuie.

Faamautinoaina o Lou Faavae Patino

A o ou manatunatu loloto i le isi fa tausaga o le ola o lenei Malumalu matagofie, mamalu, faaeaina, ma le ofoofogia o Sate Leki, ou te vaai i ai o se taimi o le *faafouga* nai lo se taimi o le tapunia! I se tulaga e tutusa ai, e mafai ona tatou fesili ifo ia i tatou lava, “E mafai faapefea ona musuia i tatou e lenei faafouga tele o le Malumalu o Sate Leki e fai o tatou lava *faafouga, toefausia, toefanauina, toefaaolaola, pe toefuatai* faaleagaga?”

O se iloiloga o'oo'o e ono faaali mai ai e faapea, e mafai foi e i tatou ma o tatou aiga ona manuia mai lo tatou faia o ni nai teuteuga faaleagaga moomia ma galuega toe faufau, e oo lava i le faafouga mo le puipuiga mai mafuie. E mafai ona tatou amataina se na faagasologa i le fesili:

“E faape'i ni foliga o lo'u faavae?

“O a ni mea o fau ai maatulimanu puipui-mafiafia, mautu, malolosi o se vaega o lo'u faavae patino, lea o loo taoto ai la'u molimau?”

“O a elemene faalefaavae o lo'u tagata faaleagaga ma faalelagona o le a ou mafai ai ma mafai e lo'u aiga ona tumau mausali ma le lē maluelue, e tatalia ai le galulu o le lalolagi ma gaoioiga ogaoga mo le puipuiga o le a oo mai i o matou olaga?”

O nei mea na tutupu, e tai pei o se mafuie, e tele ina faigata ona muai iloa ma e oo mai i maualuga eseese o le malosi—e tauivi ma fesili po o le masalosalo, e fetaia ma mafatiaga po o puapuaga, e aafia mai le lototiga o le tagata ia i taitai o le Ekalesia, i tagata o le ekalesia, i aoaoga faavae, po o aiaiga faavae. O le puipuiga sili lava mai nei mea o loo taoto i lo tatou faavae faaleagaga.

Mata o a ni maatulimanu faaleagaga o o tatou olaga faaletagata lava ia ma faaleaiga? Atonu o mataupu

faavae faigofie, manino, ma le taua o le ola ai i le talalelei—tatalo faaleaiga; suesuega o tusitusiga paia, e aofia ai le Tusi a Mamona; auai i le malumalu; ma le aoaoina o le talalelei e ala i le *Sau, Mulimuli Mai ia te A'u* ma afiafi faaleaiga. O isi punaoa aoga e faamalosi ai lou faavae faaleagaga e mafai ona aofia ai Mataupu Faavae o le Faatuatua, le folafolaga i aiga, ma le “O Le Keriso Soifua.”

Mo a'u lava ia, o mataupu faavae ua aofia ai i fesili e talanoaina o se vaega o le mauaina o se pepa faataga o le malumalu ua avea o se amataga malosi mo se faavae faaleagaga— aemaise o fesili muamua e fa. Ou te vaai i ai o ni maatulimanu faaleagaga.

E moni, ua tatou masani ma nei fesili, e pei ona faitau auaua'i mai e Peresitene Russell M. Nelson ia i tatou i le konafesi aoao talu ai.

1. E i ai sou faatuatua ma sau molimau i le Atua, le Tama Faavavau; o Lona Alo, o Iesu Keriso; ma le Agaga Paia?
2. E i ai sau molimau i le Togiola a Iesu Keriso ma Lana matafaioi i le avea ai ma ou Faaola ma Togiola?
3. E i ai sau molimau i le Toefuataiga o le talalelei a Iesu Keriso?
4. E te lagolagoina le Peresitene o Le Ekalesia a Iesu Keriso o le Au Paia o Aso e Gata Ai o le perofeta, tagatavaai, ma tali faaaliga ma ua na o ia lava le tagata i le lalolagi ua faatagaina e faaogaina ki uma o le perisitua?⁸

Pe o mafai ona e vaai atu i le ala e mafai ona e mafau-fau ai i nei fesili o ni elemene taua i lou faavae patino e fesoasoani ai e fauina ma toefaamalosi ai? Na aoao atu Paulo i Efeso e uiga i se ekalesia sa “atina ae i luga o le faavae o le au aposetolo, atoa ma le au perofeta, o le maa tulimanu o

Iesu Keriso lava lea; ua faatatauina ia te ia le fale atoa, o loo alu ae, ina ia fai ma malumalu paia i le Alii.”⁹

O se tasi o olioliga sili o lo’u olaga o le mafuta lea ma musuia e tagata o le Ekalesia i le salafa o le lalolagi o ē o ni faataitaiga o le faatuatua ia Iesu Keriso ma Lana talalelei. E malolosi o latou faavae patino ua mafai ai e i latou ona tatalia mea matautia e tutupu ma le malamalama mausali, e ui i lo latou loto nutimomoia ma le tiga.

Ina ia faaalua lenei mea i se tulaga sili ona patino, sa ou lauga i le falelauasiga o se āvā lalelei, malosi talavou ma o se tina (o se uo foi a lo matou aiga). Sa avea o ia ma tagata taalo soka iloga i le Vaega 1 ina ua ia feiloai ma faaipopo i lana tane sa a’oga faafomai nifo. Sa faamanuaina i la’ua i se afafine lalelei, ma le atamai. Sa tauivi o ia ma le lototoa ma ituaiga kanesa eseese mo tausaga faigata e ono. E ui i le uogo o tiga faalelagona ma faaletino sa ia oo i ai, ae sa ia faalagolago i lona Tama Faalelagi alofa ma sa tele ina ta’ua soo e i latou sa lagolagoina o ia i faasalalauga faagafesootai i lana faaupuga lauiloa: “O loo i ai le Atua i auiliiliga uma o o tatou olaga.”

I luga o se tasi o ana tusiga faasalalau faagafesootai, sa ia tusia ai e faapea sa fesili atu se tasi ia te ia, “E faapefea ona i ai pea lou faatuatua faatasi ma le lototiga uma o loo vagaia ai oe?” Sa ia tali atu ma le mausali i upu nei: “Aua o le faatuatua o le mea lea o loo mafai ai ona ou ola i nei taimi o le pogisa. O le i ai o le faatuatua e le faapea o le a leai se mea leaga e tupu. O le i ai o le faatuatua e faatagaina a’u e talitonu o le a toe i ai foi le malamalama. Ma o lona malamalama o le a sili atu ona susulu aua sa ou savali e ui atu i le


pogisa. E ui ina tele le pogisa sa ou molimauina i le tele o tausaga, ae ua molimauina le tele atu o le malamalama. Ua ou vaai i vavega. Ua ou lagonaina agelu. Ua ou iloa sa lagolagoina a’u e lo’u Tama Faalelagi. E leai se mea o na mea semanu ou te oo i ai, pe ana faigofie le olaga. Atonu o le a le iloa le lumanai o lenei olaga, ae o lo’u faatuatua e le uma. Afai ou te filifili ia leai so’u faatuatua, ona ou filifili lea e na ona savali i le pogisa. Aua a aunoa ma le faatuatua, ua na o le pogisa e totoe.”¹⁰

O lana molimau e le malulue o le faatuatua i le Alii o Iesu Keriso—i ana upu ma i ana faatinoga—o se musumusuga mo isi. E ui o lona tino sa *vaivai*, ae sa ia siitia isi ina ia *malolosi atu*.

E faapei o lenei tuafafine, ou te mafaufau i le tele o isi tagata o le Ekalesia, o toa e pei o ia, o ē savavali i aso taitasi i le faatuatua, tauivi ia avea ma soo moni e le solomuli o lo tatou Faaola, o Iesu Keriso. Latou te a’oa’o e uiga ia Keriso. Latou te tala’i atu Keriso. Latou te tauivi e faataitai ia te Ia. Pe mausali pe lē mausali aso o o latou olaga, e malosi lava lo latou faavae ma e le masiiese.

O i latou nei o agaga tuuto o e ua malamalama i le uiga loloto o upu “Le faavae malosi, le au paia e” ma le “e sulu ia Iesu e malu i latou.”¹¹ E le mafuatiaina lo’u lotofaafetai i le ola faatasi ai ma i latou o ē ua saunia se faavae faaleagaga ua agavaa ai i le igoa o le *Au Paia* ma i latou e malolosi ma lava le uta e tatalia ai le tele o faigata o le olaga.

Ou te le manatu e mafai ona gata lo tatou faamamafaina o le taua o lona faavae malosi i o tatou olaga patino. E oo lava i le popofou o le olaga, e a’oa’o ina a tatou fanau Peraimeri a o latou pepese i lenei upumoni:



*Le fale o le poto ua fau i luga o le papa,
Ona to mai lea o le timui lalo. . . .
Ua to mai le timuuu alu ae le tafe,
Ona tu pea lea i le papao le fale.*¹²

O loo toe faamalosi e tusitua-siga paia lenei aoaoga faalefaavae. Sa a’oa’o atu e le Faaola ia tagata i Amerika:

“Ma afai tou te faia pea nei mea amuia lava outou, ona ua outou *atiae i luga o la’u papa*.

“Ae o soo se tasi e i totonu ia te outou na te faia se mea e sili atu pe itiiti mai nai lo nei mea, *ua le atiae i luga o la’u papa*, a ua atiae i luga o se faavae oneone; ma pe a to mai uaga, ma oo mai lologa, ma agi mai matagi, ma taia ai i latou, o le a pau i latou.”¹³

O le faamoemoega faamaoni o taitai o le Ekalesia ia saofaga ia faafouga maoae o le Malumalu o Sate Leki i le faataunuuga o le manao o Polika Iaga ia vaai “i [le malumalu o fauina i se faiga o le a tumau ai e oo i le meleniuma.” I tausaga a oo mai, sei o tatou faataga nei faaleleiga ua faia i le Malumalu o Sate Leki e uunaia ma musuia ai i tatou, o ni tagata taitoatasi ma aiga, ina ia faapena foi i tatou—i se faatusatusaga—ina “ia fauina i se auala o le a tumau ai e oo i le meleniuma.”



Saunia e Elder Gerrit W. Gong
O Le Korama a Aposetolo e Toasefululua

O le a tatou faia pe a tatou faa-
taunuuina le poloaiga a le Apose-
tolo o Paulo ia “[teuina] mo [i tatou
lava] oloa o le faavae lelei mo aso
atali, ina ia [tatou] fetagofi atu i
le ola e faavavau.”¹⁴ O la’u tatalo
pulunaunau ia mautu ma mausali
lo tatou faavae faaleagaga, ia avea
la tatou molimau i le Togiola a Iesu
Keriso ma Lana matafaioi i le avea
ai ma o tatou Faaola ma le Togiola,
ma o tatou lava maatulimanu autu,
o le ou te molimau atu ai i Lona
suafa, o Iesu Keriso lea, amene. ■

FAAMATALAGA

1. William Clayton journal, July 26, 1847, Church History Library, Salt Lake City.
2. Tagai i le “I le Tapeneko, sa Tulei Saunoa ai Peresitene Uitalafi ma Samita i le Au Paia i le Afiafi Ananafi,” *Deseret Evening News*, Aug. 30, 1897, 5; “Pioneers’ Day,” *Deseret Evening News*, July 26, 1880, 2; Wilford Woodruff journal, July 28, 1847, Church History Library, Salt Lake City.
3. “Minutes of the General Conference of the Church of Jesus Christ of Latter-day Saints, held at Great Salt Lake City, State of Deseret, April 6, 1851,” *Deseret News*, Apr. 19, 1851, 241.
4. Tagai i le “The Temple,” *Deseret News*, Feb. 19, 1853, 130; “Minutes of the General Conference,” *Deseret News*, Apr. 16, 1853, 146; “Minutes of the General Conference,” *Deseret News*, Apr. 30, 1853, 150.
5. “Address by President Brigham Young,” *Millennial Star*, Apr. 22, 1854, 241.
6. “Remarks by President Brigham Young,” *Deseret News*, Oct. 14, 1863, 97.
7. Folasaga a le Au Epikopo Pulefaamalu-malu i le Au Peresitene Sili e uiga i le Malumalu o Sate Leki, Oke. 2015.
8. See Russell M. Nelson, “Malelega Faaiu,” *Liahona*, Nov. 2019, 121.
9. Efeso 2:20–21.
10. Social media post a Kim Olsen White.
11. “Le Faavae Malosi,” *Viiga*, nu. 45.
12. “Tagata Poto ma le Tagata Valea,” *Tusipese a Tamaiti*, 281; na aveesea le faamamafa i le kopi muamua i leinei vaega.
13. 3 Nifae 18:12–13; faapoopo le faamamafa.
14. 1 Timoteo 6:19; faopoopo le faamamafa.

Osana ma Aleluia—O Le Iesu Keriso Soifua: O Le Fatu lea o le Toefuataiga ma le Eseta

I leinei vaitau o le osana ma le aleluia, pepese aleluia—auā o le a nofotupu o la e faavavau ma faavavau lava!

Uso e ma tuafafine pele: faatasi ai ma le osana ma le aleluia, tatou te faama-natuina ai le Iesu Keriso soifua i leinei vaitau o le faaauauina o le Toefuataiga ma le Eseta. Faatasi ai ma se alofa e atoatoa, ua faamautinoa mai i tatou e lo tatou Faaola: “Ia outou maua le manuia ia te a’u. E maua foi outou e le puapuaga i le lalolagi, a ia outou loto tetele, ua ou manumalo i le lalolagi.”¹

I nai tausaga talu ai, a o ma feiloai atu ma Sister Gong i se aiga matagofie, sa ave ane ma le matamuli e lo la afa-fine talavou, o Ivy, le ato o lana vaiolini. Sa ia aumai i fafo le ’aū vaiolini, faamau ma ligi i ai le suauu. Ona ia toe tuu faalelei lea o le aū i le ato, ifoifo, ma nofo i lalo. O se ua faatoa amata, sa na ona ia faasoa mai o mea uma sa ia iloa e uiga i le vaiolini. I leinei taimi, i ni tausaga mulimuli ane, ua tataina ma le matagofie e Ivy le vaiolini.

I le vaitau o leinei soifuaga, e tai pei uma lava i tatou o Ivy ma lana

vaiolini. Sa tatou amata i le amataga. O le faataitai ma le punoua’i, tatou te tuputupu ae ai ma faaleleia. I le aluga o taimi, e fesoasoani le faitalia e iloa ai ma aafiaga i le olaga nei tatou te avea atili ai e pei o lo tatou Faaola a o tatou galulue faatasi ai ma Ia i Lona tovine² ma mulimuli i Lona ala o feagaiga.

O aso faamanatu, e aofia ai leinei seneturi lona lua, ua fesoasoani tatou te manatua ai mamamu o le



Oslo, Nouei

toefuataiga.³ I le faamanatuina ai o le Toefuataiga faifai pea o le talalelei a Iesu Keriso, ua tatou sauniuni ai foi mo le Eseta. O ia mea e lua, tatou te patipatia ai le toe foi mai o Iesu Keriso. O loo soifua o Ia—e le gata i lena taimi, ae o le taimi nei, e le mona o ni isi, ae mo i tatou uma. Na afio mai o Ia ma e afio mai e faamalolo i e loto momomo, e talai le saolotoga i le tafeaga, ia pupula mata o e tauaso, ma tuu saoloto i e ua faasauaina.⁴ O i tatou uma lava. O Lana folafolaga togiola e faatatau, po o le a lava lo tatou taimi ua tuana'i, lo tatou taimi nei, po o mea tatou te ono mafaufau i ai i lo tatou lumanai.

O a Taea o le Aso Sa o le Lau Pama. I se tulaga masani ai, o lau pama o se faatusa paia e faaalua ai le olioli i lo tatou Alii, e pei o le *Ulufale Atu Faatupu o Keriso i Ierusalemā*, lea sa “ave e tagata . . . lau o pama, ma o mai e faafetaiai ia te ia.”⁵ (Atonu e te fiafia i le iloina o le uluai ata lenei a Harry Anderson o loo tautau i le ofisa o Peresitene Russell M. Nelson, i tua ae o lana kesi.) I le tusi o Faaaliga, o i latou e vivii ae i le Atua ma le Tamai Mamoe latou te faia a o loo “ofu i ofu sisina, ua i ai foi lau pama i o latou lima.”⁶ Faatasi ai ma “ofutalaloa o le amiotonu” ma “pale o le mamalu,” sa aofia ai lau pama i le tatalo o le faapaia o le Malumalu o Katelani.⁷

Ioe, o le taua o le Aso Sa o le Lau Pama e maotua atu i lo le motu o tagata e faafetaia’ia Iesu i lau pama. O le Aso Sa o le Lau Pama, sa afio atu ai Iesu i Ierusalemā i ala na aloaia ai e le au faatuatua le faataunuuga o le valoaga. E pei ona sa muai ta’u mai faavalooaga e Sakaria⁸ ma le fai Salamo, sa afio atu lo tatou Alii i Ierusalemā o tie tie i se tamai asini a o alalaga le motu o tagata ma le iloa lelei “Osana i mea e aupito a luga.”⁹ Osana o lona uiga



O LE MALAGA FAATUPU A KERISO I IERUSALEMA, SAUNIA E HARRY ANDERSON

“faasao nei.”¹⁰ O lena taimi, e faapei o le asō, tatou te vivii ae, “Ia manuia le o maliu mai i le suafa o Ieova.”¹¹

O se vaiaso na sosoo ma le Aso Sa o le Lau Pama, o le Aso Sa o le Eseta. Ua aoa mai e Peresitene Russell M. Nelson e faapea na “afio mai [Iesu Keriso] e totogi se aitalafu Na te lei faia auā sa tatou nofo aitalafu i se aitalafu sa le mafai ona tatou totogi.”¹² E moni lava, e ala i le Togiola a Keriso, “e mafai ai ona faaolaina tagata uma, e ala i le ususitai i tulafono ma sauniga o le Talalelei.”¹³ I le Eseta, tatou te lagiina ai le aleluia. Aleluia o lona uiga “ia viia oe le Alii o Ieova.”¹⁴ O le “Hallelujah Chorus” i le fatuga a Handel o le *Messiah* o se tautinoga matagofie o le Eseta e faapea o Ia o le “Tupu o Tupu, ma le Alii o Alii.”¹⁵

O mea paia na tutupu i le va o le Aso Sa o le Lau Pama ma le Aso Sa o le Eseta o le tala i le osana ma le aleluia. O le Osana o la tatou aioiga i le Atua ia faasao i tatou. O le Aleluia o loo ta’u atu ai le viiga ma le faafetai i le Alii mo le faamoemoe ua i ai i le faaolataga ma le faaeaga. I le osana ma le aleluia tatou te aloaia ai le Iesu Keriso soifua o le fatu o le Eseta ma le toefuataiga i aso e gata ai.

O le toefuataiga i aso e gata ai e amata i le toefani—o le faaali tino mai

lea o le Atua le Tama ma Lona Alo, o Iesu Keriso, i le perofeta talavou o Iosefa Samita. Sa saunua le Perofeta o Iosefa, “A mafai ona e vaai atu i le lagi mo le lima minute, o le a sili atu lou iloa nai lo lou faitauina o mea uma lava ua tusia faatatau i le matupu.”¹⁶ Ona ua toe tatala mai le lagi, o lea ua tatou iloa ai ma “talitonu i le Atua, le Tamā Faavavau, ma Lona Alo, o Iesu Keriso, ma le Agaga Paia”¹⁷—o le Aiga Atua paia.

I le Aso Sa o le Eseta i le aso 3 Aperila, 1836, i ona popofou o le Toefuataiga, sa faaali mai ai le Iesu Keriso soifua ina ua mavae le faapaiaina o le Malumalu o Katelani. O i latou sa vaai ia te Ia iina, na molimau e uiga ia te Ia i eseese logolelei o le afi ma le vai: “O ona fofoga sa pei o se *afi mumū*; o lauao o lona ao sa papa’e e pei o le *kiona mamā*; o ona fofoga sa susulu e sili atu i lo *pupula o le la*; ma o lona siufofoga sa pei o le leo o le *tafe-taalili o vai tetele*, o le siufofoga lava o Ieova.”¹⁸

I lena vaaiga, na malele mai ai lo tatou Faaola, “O A’u o lē muamua ma lē mulimuli; o A’u o lē o ola, o A’u o lē na fasia; o A’u o lo oulua fautua i le Tamā.”¹⁹ Ua toe ta’ua foi eseese logomalie—muamua ma le mulimuli, ola ma le fasiotia. O Ia o le Alefa ma le Omeka, o Ia o le amataga ma le



West Jordan, Iuta, ISA

gataaga,²¹ o le mataisau ma le faatini o lo tatou faatuatua.²¹

Ina ua mavae le afio mai o Iesu Keriso, na o mai foi Mose, Elaia, ma Elia. E ala i le taitaiga mai luga, na toefuatai mai ai e nei perofeta maoae anamua ia ki ma le pule o le perisitua. O lea la, “ua toe tuuina mai ai ki o lenei tisipenisione”²² i totonu o Lana Ekalesia toefuataiina e faamanuiaina ai fanau uma a le Atua.

O le oo mai o Elia i le Malumalu i Katelani ua faataunuaina ai foi le valoaga a le Perofeta o le Feagaiga Tuai o Malaki e faapea o le a toe foi mai Elia “a o lei oo mai le aso o Ieova e sili, ma le matautia.”²³ O le faia o lea, na fetau tonu le oo mai o Elia, e ui e lei faafuaveta, ma le vaitau o le Paseka FaaIutaia o le agamasani e faatalitali ai ma le migao i le toe foi mai o Elia.

E toatele aiga lotu o Iutaia e faavanoaina se nofoa mo Elia ia latou la’o’ai o le Paseka. E toatele e faatumuina se ipu e oo i le augutu e valaaulia ai ma faafeiloai atu ia te ia. Ma o ni isi, i le taimi o le Tausamiga o le Paseka, e auina atu ai se tamaitiiti i le faitotoa, o ni isi taimi e tatala faa’afa ai le faitotoa, e vaai ai pe o faatalitali i fafo Elia e faaefe atu i totonu.²⁴

I le faataunuuga o le valoaga ma e avea o se vaega o le toefuataiga na folafola mai o mea uma,²⁵ na sau Elia e pei ona sa folafolaina mai, i le Eseta ma le amataga o le Paseka. Na ia aumaia le pule o faamauga e fusia faatasi ai aiga i le lalolagi ma i le lagi. E pei ona aaoaina ai e Moronae le

Perofeta o Iosefa, “o le a totoina [e Elia] i loto o fanau folafolaga na faia i tamā, ma o le a liliu atu loto o fanau i o latou tamā. Afai e lē faapea,” na toe ta’ua e Moronae, “o le a faaumatia atoa le lalolagi i le afio mai [o le Alii].”²⁶ O le agaga o Elia, o se faaaliga mai o le Agaga Paia, e tosina atu ai i tatou i o tatou augatupulaga—i le taimi tuanai, o le taimi nei, ma le lumanai—i o tatou gafa, talafaasolopito, ma galuega i malumalu.

Se’i o tatou toe tomanatu vave i le mea e faatusa i ai le Paseka. O le Paseka e faamanatu ai le faasaolotoina o le fanauga a Isaraelu mai le 400 tausaga o le nofopologa. O loo faamatala mai e le tusi o Esoto le ala na oo mai ai lea faasaolotoina ina ua mavae mala o rane, ‘utu, garova, o le mamate o povi, o ma’i fulafula, uato’a ma le afi, o se akerise, ma le pouliuli tele. O le toe mala na faamatauina ai i le fasiotia o ulumatua i le lauelele ae lei afaina fale o le aiga o Isaraelu pe afai—e tuuina e na aiga le toto o se tamai mamoe ulumatua o le lafu e lē pona i luga o uapou o o latou faitotoa.²⁷

Na laaloa e le agelu o le faafanoga ia fale sa faailoga i le toto faatusatusa o le tamai mamoe.²⁸ O lona laaloa, po o le sopo loa, e faatusa i le faatoilaloina moni e Iesu Keriso o le oti. E moni, o le toto togiola o le Tamai Mamoe a le Atua ua tuuina atu ai i le Leoleo Mamoe Lelei le mana e faapotopoto ai Lona nuu i nofoaga uma ma tulaga uma i le saogalemu o Lana lafu i itu uma o le veli.

E ofoofogia, le faamatalatalaina e le tusi a Mamona o le “mana ma le toetu o Keriso”²⁹—o le fatu lea o le Eseta—i tulaga o toefuataiga e lua.

Muamua, o le toefuataiga e aofia ai le toefuataiga faaletino o lo tatou “autino tatau ai ma atoatoa”; o “[vae] ma sooga uma,” “e oo i se lauulu o le ulu o le a le leiloa.”³⁰ O lea folafolaga ua maua ai le faamoemoe e i latou o e ua leai ni aao; o e ua le mafai ona pupula, faalogo, pe savavali; po o e ua manatu ua leiloloa i faama’i ogaoga, faama’i o le mafaufau, po o isi gafatia ua faaitiitia. Na te sueina i tatou ia maua. Na te faaatoatoaina i tatou.

O se folafolaga o le Eseta ma le Togiola a lo tatou Alii e faapea, i le faaleagaga, “o le a toefuataia mea uma i o latou tulaga e tatau ai.”³¹ O lea toefuataiga faaleagaga e atagia mai ai a tatou galuega ma manaoga. E pei o le areto i luga o le vai,³² e na te toefuatai “le mea ua lelei,” “o le amiotonu,” “le mea ua tonu,” ma le “alofa mutimutivale.”³³ E leitioa faaoga e le perofeta o Alema le upu *toefuatai* faa-22³⁴ a o ia tatou “fai mea tonu, faamasino ma le amiotonu, ma fai mea lelei e le aunoa.”³⁵

Talu ai “ua togiola ai e le Atua lava ia mo agasala a le lalolagi,”³⁶ ua mafai ai e le Togiola a le Alii ona toefuatai mai e le gata i mea sa i ai a o mea foi e mafai ona i ai. Talu ai Na te silafia o tatou tiga, mafatiaga, ma’i, o tatou “faaosoosoga o ituaiga uma,”³⁷ e mafai e Ia, faatasi ma le alofa mutimutivale, ona fesoasoani ia i tatou i o tatou vaivaiga.³⁸ Talu ai o le Atua o le “Atua ua atoatoa, faamasinotonu, ma se Atua alofa mutimutivale foi,” e mafai e le fuafuaga o le alofa ona “faamalie ai manaoga o le faamasinotonu.”³⁹ Tatou te salamo ma faia mea uma tatou te mafaia. Na te siosiomia i tatou e faavavau “i aao o lona alofa.”⁴⁰

Ua tatou faamanatuina i le asō le toefuataiga ma le toetu. Faatasi ma outou, ou te faamanu i le Toefuataiga faifai pea o le atoatoaga o le talalelei a Iesu Keriso. E pei ona amatalia i le 200 tausaga talu ai i le tautotogo lenei, o loo faaauau pea ona oo mai le malamalama ma faaaliga e ala mai i le perofeta soifua a le Alii ma Lana Ekalesia ua faaigoa i Lona suafa—O Le Ekalesia a Iesu Keriso o le Au Paia o Aso e Gata Ai—ma e ala mai i faaaliga patino ma musumusuga e ala i le meaalofo ofoofogia a le Agaga Paia.

Faatasi ma outou, i lenei vaitau o le Eseta, ou te molimau atu i le Atua, lo tatou Tama e Faavavau, ma Lona Alo Pele, o Iesu Keriso soifua. O tagata ola na faasatauroina mataga ma sa toetutu mulimuli ane. Ae na o le Iesu Keriso soifua lava i Lona tino na toetu atoatoa mai ai o loo iloga ai pea faailoga o le faasatauroga i Lona lima, vae ma Lona itu. Ua na o Ia lava e mafai ona fetalai, “Ua Ou togitogia oe i luga o alofilima o o’u lima.”⁴¹ Ua na o Ia e mafai ona fetalai: “O A’u o lē na sii a’e i luga. O A’u o Iesu o le na faasatauroina. O A’u o le Atalii o le Atua.”⁴²

E faapei o le teineitiiti o Ivy ma lana vaiolini, o loo tatou aoao pea lava i ni nai itu. E moni, “o mea e lei vaaia e mata, e lei lagona foi e taliga, e lei oo foi i le loto o se tagata, o mea ia ua saunia e le Atua mo i latou o e alofa ia te ia.”⁴³ I nei taimi, e mafai ona tatou aoaoina le tele o le agalelei o le Atua ma lo tatou gafatia paia mo le alofa o le Atua e tuputupu a’e i totonu o i tatou a o tatou sailia o Ia ma aapa atu i le tasi ma le isi. I auala fou ma nofoaga fou, e mafai ona tatou faia ma avea ai, i lea fuaiupu ma lea fuaiupu, lea agalelei ma lea agalelei, taitoatasi ma tuufaatasi.

Uso e ma tuafafine pele i soo se mea, a o tatou mafuta ma tatou aoao


faatasi, ua faatumuina a’u i lo outou faatuatua ma le agalelei i se lagona o le sagisagi fiafia ma le lotofaafetai i le talalelei. O lau molimau ma lau malaga fai i le talalelei ua faamauoaina ai la’u molimau ma la’u foi malaga fai i le talalelei. O ou atugaluga ma olioliga, o lou alofa mo le aiga o le Atua ma le nuu o le Au Paia, ma lou malamalama ola i upu moni toefuatai ma le malamalama ua faateleina ai lo’u atoaga i le talalelei toefuataina, faatasi ai ma le Iesu Keriso soifua i lona fatu. Faatasi ai tatou te faatuatua, “i mala, i manu, Iesu, afio mai.”⁴⁴ Ua tatou iloina faatasi, i le lotolotoi o a tatou avega ma popolega, e mafai ona tatou faitauina o tatou manuia e tele.⁴⁵ I fa’amatalaga o aso taitasi ma mea laiti ma faigofie, e mafai ona tatou va’ai i mea tetele na tutupu i o tatou olaga.⁴⁶

“Ma o le a oo mai o le a faapopototo mai e e amiotonu i fafo mai i atunuu uma, ma o le a o mai i Siona, ma pepese i pese o le olioli e tumau-faavavau.”⁴⁷ I lenei vaitau o le osana ma le aleluia, pepese aleluia—auā o le a nofotupu o Ia e faavavau ma faavavau lava! Alalaga osana i le Atua ma le Tamai Mamoe! I le suafa paia ma le mamalu o Iesu Keriso, amene. ■

FAAMATALAGA

1. Ioane 16:33.
2. Tagai i le Iakopo 5.
3. E pei ona valoia i tusitusiga paia, ua faaaliga e talafaasolopito o tagata soifua vaitau o fesuiaiga o le tuuaititia o le faaleagaga ua tatou ta’ua o le liliuese po o le pa’u’u ese, ma vaitau o le malamalama toefaafouina ua tatou ta’ua o le toefuataiga faaleagaga; tagai, mo se faataitaiga, 2 Tesalonia 2:3.
4. Tagai i le Luka 4:18.
5. Ioane 12:12–13; tagai foi i le Mataio 21:8–9; Mareko 11:8–10.
6. Faaaliga 7:9.
7. Tagai i le Mataupu Faavae ma Feagaiga 109:76.
8. Tagai i le Sakaria 9:9.
9. Mataio 21:9.
10. Tagai i le Bible Dictionary, “Osana Mai taimi o le Feagaiga Tuai, o le taloina o

- lau pama e o faatasi ma le faaupuga o le “Ieova e, ou te aioi atu ia e faaola mai lava.” Salamo 118:25 o le faaaliga atoatoa lea o le tatalo faaKerisiano anamua: “Ieova e, ou te aioi atu ia e faaola mai lava: ou te aioi atu, Ieova e, ia e faamanuia mai lava.”
11. Salamo 118:26; tagai foi i le 3 Nifae 11:17.
 12. Russell M. Nelson, i le *Handel’s Messiah: Debtor’s Prison* (vizio), ChurchofJesusChrist.org/media-library.
 13. Mataupu Faavae o le Faatuatua 1:3.
 14. Tagai i le Bible Dictionary, “Hallelujah.”
 15. George Frideric Handel, *Messiah*, ed. T. Tertius Noble (1912), viii; tagai foi i le Faaaliga 17:14.
 16. *Aooga a Peresitene o le Ekalesia: Iosefa Samita* (2007), 447.
 17. Mataupu Faavae o le Faatuatua 1:1.
 18. Mataupu Faavae ma Feagaiga 110:3; faaopoopo le faamamafa.
 19. Mataupu Faavae ma Feagaiga 110:4.
 20. Tagai i le Faaaliga 1:8; 3 Nifae 9:18; Mataupu Faavae ma Feagaiga 19:1; 38:1; 45:7.
 21. Tagai i le Eperu 12:2; Moronae 6:4.
 22. Mataupu Faavae ma Feagaiga 110:16.
 23. Malaki 4:5.
 24. Tagai Stephen D. Ricks, “The Appearance of Elijah and Moses in the Kirtland Temple and the Jewish Passover,” *BYU Studies*, vol. 23, no. 4 (1986), 483–86, byustudies.byu.edu.
 25. Tagai i le Mataupu Faavae ma Feagaiga 86:10; tagai foi i le Galuega 3:19–21.
 26. Iosefa Samita—Talafaasolopito 1:39; i tausaga talu ai, e toatele na manatu i le taua o le faapitoo o le “laua.”
 27. Tagai Esoto 7–12.
 28. Tagai Esoto 12:23.
 29. Alema 41:2.
 30. Alema 40:23.
 31. Alema 41:4.
 32. Tagai Failauga 11:1.
 33. Alema 41:13.
 34. O upu *toefuatai*, na *toefuatai*, *toefuataiga*, po o isi o loo faaali eeseese mai faa22 taimi i le Alema 40:22–24 ma i le Alema 41, faamamafa ai uma le toefuataiga faaletino ma le faaleagaga.
 35. Alema 41:14.
 36. Alema 42:15.
 37. Alema 7:11.
 38. Tagai i le Alema 7:12.
 39. Alema 42:15.
 40. 2 Nifae 1:15.
 41. Isaia 49:16; 1 Nifae 21:16.
 42. Mataupu Faavae ma Feagaiga 45:52.
 43. 1 Korinito 2:9.
 44. “Afio Mai!” *Viiga*, nu. 92.
 45. Tagai “Faitau Ou Manuia,” *Viiga*, nu. 151.
 46. Tagai i le Alema 37:6.
 47. Mataupu Faavae ma Feagaiga 45:71.



Saunia e Laudy Ruth Kaouk
 Tagata o le Uarota 14 a Slate Canyon (Sipaniolo),
 Siteki a Provo luta

O Le Auala ua Faamanuiaina ai e le Perisitua le Autalavou

*E ala i le perisitua, e mafai ona siitiaina i tatou.
 E aumai e le perisitua le malamalama i lo
 tatou lalolagi.*

Ua ou faafetai lava i le i ai iinei. Ina ua ou muai iloa o le a ou maua le avanoa e lauga atu ai ia te outou i le asō, sa ou lagona le faagaetia tele ae i le taimi lava e tasi ua faamaualaloina tele. Ua ou faaalaina le tele o le taimi e mafaufau ai e uiga i mea e mafai ona ou faasoa atua, ma ou te faamoemoe e fetalai tuusa’o atu le Agaga ia te outou e ala atu i la’u savali.

I le Tusi a Mamona, na avatu ai e Liae se faamanuiaga i ona atalii taitoa-tasi a o le’i malii o ia lea na fesoasoani ai ia te i latou ia iloa o latou malosiaga ma gafatia e faavavau. O a’u le ui’i o le fanau e toavalu, ma o le tausaga na te’a nei sa na o a’u le tama-itiiti i le aiga mo le taimi muamua. O le le latalata mai o o’u tuagane ma uso ma le leai ai foi o se tasi e talanoa i ai i taimi uma sa faigata mo a’u. Sa i ai po sa ou lagona ai le matua tuuatoa-tasi. Ou te faafetai mo o’u matua, sa taumafai i le mea sili la te mafaia e fesoasoani ia te a’u. O se faataitaiga o lenei mea o le taimi sa ofo mai ai lo’u tama e aumai se faamanuiaga

faaleperisitua o le mafanafana i se taimi sa patino le faigata. Ina ua mavae lana faamanuiaga, sa leai se mea na suia i lena taimi, ae sa mafai ona ou lagonaina le filemu ma le alofa mai lo’u Tama Faalelagi ma mai lo’u tama. Ou te lagona le faamanuiaina i le mauaina o se tama agavaa e mafai ona tuuina mai faamanuiaga faaleperisitua i soo se taimi ou te manaomia ai ma fesoasoani ia te a’u ia iloa o’u malosiaga ma le gafatia e faavavau, e

pei ona faia e Liae ina ua ia faamanuiaina ana fanau.

Po o a lava ou tulaga, e mafai lava ona e maua le avanoa i faamanuiaga faaleperisitua. E ala i tagata o aiga, uo, tuagane o auauaga, taitai perisitua, ma se Tama Faalelagi o ē o le a le faatoilaloina lava oe, e mafai ai ona e maua faamanuiaga o le perisitua. Sa saunoa Elder Neil L. Andersen: “O faamanuiaga o le perisitua ua mautinoa lava le sili atu nai lo le tagata lea ua talosagaina e faatautaia le meaalofo. . . . A tatou agavaa, o le a faoaina e sauniga o le perisitua o tatou olaga.”¹

‘Aua ne’i faatuai e talosaga mo se faamanuiaga pe a e manaomia se isi taiala faaopoopo. O o tatou taimi faigata tatou te matua manaomia ai le Agaga e fesoasoani ia i tatou. E leai ma se tasi e atoatoa ma e tatou te oo uma lava i faigata. O nisi o i tatou atonu e mafatia i le popolevale, atu-atuvale, o vaisu, po o lagona e le lava lo tatou lelei. E mafai e faamanuiaga faaleperisitua ona fesoasoani ia i tatou e faatoilalo nei luitau ma maua le filemu a o tatou agai i luma i le lumanai. Ou te faamoemoe tatou te tauivi ia ola agavaa e maua nei faamanuiaga.

O le isi auala e faamanuia ai i tatou e le perisitua e ala lea i faamanuiaga



São Paulo, Pasila

faapeteriaka. Ua ou aoao e liliu atu i lo'u faamanuiaga faapeteriaka i soo se taimi lava ou te lagona ai le faanoanoa po o le tuatoatasi. E fesoasoani lo'u faamanuiaga ia te a'u ia iloa lo'u gafatia ma le fuafuaga patino ua i ai i le Atua mo a'u. Na te faamafanafana ina a'u ma fesoasoani ia te a'u ia vaai i tala atu o la'u vaaiga faalelalolagi. Na te faamanatu mai ia te a'u a'u meaalofa ma faamanuiaga o le a ou maua pe afai ou te ola agavaa. Ua ia fesoasoani foi ia te a'u ia manatua ma lagonaina le filemu faapea o le a tuuina mai e le Atua tali ma tatala faitotoa mo a'u i le taimi sa'o pe a ou matua manaomia ai.

E fesoasoani faamanuiaga faapeteriaka e saunia i tatou e toe foi atu e mau faatasi ma lo tatou Tama Faalelagi. Ou te iloa o faamanuiaga faapeteriaka e aumai mai le Atua ma e mafai ona fesoasoani ia i tatou e liliu o tatou vaivaiga i malosia. E le o ni feau nei mai ni faamatala miti; o nei faamanuiaga ua ta'u maia ia i tatou mea e manaomia ona tatou faalogo i ai. E pei lava o se Liahona mo i tatou taitoatasi. A tatou faamuamua le Atua ma faatuatua ia te Ia, o le a Ia taitaia i tatou i o tatou lava vao fita.

E pei lava ona faamanuiaina e le Atua Iosefa Samita i le perisitua ina ia mafai ona toefuata'i mai faamanuiaga o le talalelei, e mafai foi ona tatou mauaina faamanuiaga o le talalelei i o tatou olaga e ala i le perisitua. O vaiaso taitasi tatou te maua ai le faamanuiaga ma le avanoa e aai ai i le faamanatuga. E ala i lenei sauniga faaleperisitua, e mafai ai ona tatou maua pea le Agaga e faatasi ma i tatou, lea e mafai ona faamamaina ma faapaiaina ai i tatou. Afai e te lagonaina le manaomia ona aveesea o se mea mai i lou olaga, ia aapa atu i se taitai faatuatuaina e mafai ona fesoasoani ia te oe ia toe foi atu i luga o le ala sa'o. E

mafai ona fesoasoani atu ou taitai ia te oe ia maua le mana atoa o le Togiola a Iesu Keriso.

Faafetai i le perisitua, ua mafai ai foi ona tatou maua faamanuiaga o sauniga o le malumalu. Talu lava ona mafai ona ou ulu atu i le malumalu, ua ou faia ai lava se sini ma se faamuamua ia auai soo i ai. E ala i le faaalu o le taimi ma le faia o ni osigataulaga talafeagai ina ia latalata atili i lo'u Tama Faalelagi i totonu o Lona maota paia, ua faamanuiaina ai lava a'u i le mauaina o faaaliga ma uunaiga ua fesoasoani moni ia te a'u i lo'u olaga atoa.

E ala i le perisitua, e mafai ona siitiaina i tatou. E aumai e le perisitua le malamalama i lo tatou lalolagi. Sa saunoa mai Elder Robert D. Hales: "A aunoa ma le mana o le perisitua, 'o le a faama'umauina atoa le lalolagi' (tagai i le MF&F 2:1–3). O le a leai se malamalama, leai se faamoemoe—na o le pogisa."²

O loo tapuai mai le Atua mo i tatou. E finagalo o Ia tatou te toefoi atu ia te Ia. E silafia e Ia i tatou taitoatasi. E silafia e Ia oe. E alofa o Ia ia i tatou. E silafia e Ia i tatou e le aunoa ma faamanuia i tatou e ui ina tatou



lagona e le tatau mo i tatou. E silafia e Ia mea tatou te manaomia ma le taimi tatou te manaomiaina ai.

"Ia outou ole atu, ona foaiina mai ai lea ia te outou; ia outou saili, ona outou maua ai lea; ia outou tu'itu'itu atu, ona toina ai lea ia te outou:

"Aua ai se ole atu, e maua e ia; o le saili foi, e iloa e ia; e toina foi i le tu'itu'itu atu" (Mataio 7:7–8).

Afai e te le'i mauaina lava se moli-mau e uiga i le perisitua, ou te uunaia oe ia tatalo ma ole atu ia iloa mo oe lava ia e uiga i lona mana, ona faitau lea o tusitusiga paia e lagona ai le afioga a le Atua. Ou te iloa afai tatou te faia se taumafaiga e lagonaina ai le mana o le perisitua a le Atua i o tatou olaga, o le a faamanuiaina i tatou. I le suafa, o Iesu Keriso, amene. ■

FAAMATALAGA

1. Neil L. Andersen, "Mana o le Perisitua," *Liahona*, Nov. 2013, 92.
2. Robert D. Hales, "O Faamanuiaga o le Perisitua," *Ensign*, Nov. 1995, 32.



ILUGA O OULUA O'U USO A AUAJINA E, E LINDA CURLEY CHRISTENSEN MA MICHAEL WALBY



Saunia e Enzo Serge Petelo
Tagata o le Ekalesia o le Uarota a Meadow Wood,
Siteki a Provo Iuta Edgemont

O Le Auala ua Faamanuia ai e le Perisitua le Autalavou

Ua tuu mai ia i tatou le avanoa e auauna atu ai e pei o agelu, e tala'i le talalelei i konitineta uma o le lalolagi, ma fesoasoani i agaga ia o mai ia Keriso.

Uso e ma tuafafine, ou te matuai faafetai lava e lauga atu ia te outou i lenei afiafi faasolopito e uiga i le meaalofo paia o le perisitua ma le mana ofoofogia ua i ai e faamanuia ai le autalavou i lenei tisipenisione. Ou te tatalo e ui i ni o'u lē atoatoa, o le a fesoasoani mai le Agaga ia te a'u e a'oa'o atu le upumoni.

Sa faamanatu mai e le Au Perisitene Sili i ē umia le Perisitua Arona e faapea “ua e ola i se taimi o le tele o avanoa ma luitau—o se taimi ua toefuataiina mai ai le perisitua. Ua ia te oe le pule e faatautaia ai sauniga o le Perisitua Arona. A o e faatinoina ma le agaga tatalo ma le agavaa lena pule, o le a e faamanuiaina tele ai soifuaga o i latou e siomia oe.”¹ I le avefa ma alii talavou o le Ekalesia, ua faamanatu mai foi ia i tatou e faapea o i tatou o “[atalii] faapelepele o le Atua, ma ua i ai ia te Ia se galuega mo [i tatou] e fai”² ma tatou te fesoasoani i Lana galuega “ia aumaia le tino ola pea ma le ola faavavau o le tagata” (Mose 1:39).

O le perisitua o le pule e faatautaia ai sauniga ma feagaiga o le talalelei a le Faaola mo i latou o ē agavaa e mauaina. E ala i nei sauniga o le perisitua ma feagaiga paia e oo mai ai faamanuiaga atoatoa o le Togiola a le Faaola lea e fesoasoani ia i tatou e ausia lo tatou taunuuga paia.

O Iosefa Samita o se alii talavou sa valaauina e le Atua e toefuatai mai le talalelei a Iesu Keriso ma, mo lena faamoemoega, na tuu i ai le perisitua,

lea sa ia faaaogaina e faamanuia ai tagata uma. I le Mataupu Faavae ma Feagaiga 135 na faamalamala mai e Ioane Teila le tele o faamanuiaga na tuuina mai e Iosefa i le autalavou o lenei tisipenisione. Tatou te faitauina: “O Iosefa Samita . . . e tele atu mea na ia faia, vagana ai lava Iesu, mo le faaolataga o tagata i lenei lalolagi, nai lo se isi lava tagata na ola ai. . . . Na ia aumaia le Tusi a Mamona . . . ; auina atu le atoatoaga o le talalelei tumau-faavavau . . . i itu e fa o le lalolagi; aumai faaaliga ma poloaiga ua i ai i le tusi lenei [o le] Mataupu Faavae ma Feagaiga . . . ; faapotopoto le tele o afe o le Au Paia o Aso e Gata Ai, . . . ma tuua se ta'uta'ua ma se igoa e lē mafai ona faaumatia” (Mataupu Faavae ma Feagaiga 135:3).

Ina ia auauna atu ma le mataalia e pei ona faia e Iosefa, e tatau ona faamaonia lo tatou agavaa e faaoga le mana o le perisitua a le Alii. A o faaliuina le Tusi a Mamona, sa manana'o Iosefa ma Oliva Kaotui ina ia papatisoina, ae sa le'i i ai ia i la'ua le pule e tatau ai. I le aso 15 o Me, 1829, sa la tootutuli ai i le tatalo ma sa asiasi mai Ioane le Papatiso ia i la'ua, o lē na tuuina atu ia i la'ua ki ma le pule o le Perisitua Arona, ma faapea atu, “I



Eagle Mountain, Iuta, ISA

Luga o oulua o'u uso a auauna e, i le suafa o le Mesia, ou te faaee atu i ai le Perisitua o Arona, ua umia ki o le auaunaga a agelu, ma o le talalelei o le salamo, ma o le papatisoga i le faa-tofuina mo le faamagaloina o agasala” (Mataupu Faavae ma Feagaiga 13).

Ua tuu mai ia i tatou le avanoa e auauna atu ai e pei o agelu, e tala'i le talalelei i konitineta uma o le lalolagi, ma fesoasoani i agaga ia o mai ia Keriso. O lenei auaunaga tatou te galulue faatasi ai ma Ioane le Papatiso, Moronae, Iosefa Samita, Peresitene Russell M. Nelson, ma isi auauna filiga a le Alii.

O la tatou auaunaga i le perisitua ma faatasi ai ma Lana perisitua e aumaia faatasi ai i latou o ē tuuto atu e mulimuli a'ia'i i aoaoga a le Alii, lea ou te iloa e mafai ona faigata a o tatou feagai ai ma luitau o le autalavou. Ae o le tutu faatasi ma nei uso a auauna a le Alii i le faataunuuina o Lana galuega o le a fesoasoani e faamalosi i tatou e faasaga i faaososoga ma mea taufaasese a le fili. E mafai ona aveae o se sulu o le malamalama ia i latou uma e lē o mautonu ia i latou lava. O le a matuā susulu atu le malamalama o loo i totonu ia te oe lea o le a faamanuia ai tagata uma e te fegalegaleai ai ma siomia ai oe. Atonu e faigata i nisi taimi ona iloina le i ai o a tatou soa faaleagaga, ae ou te faafetai i le iloina o a'u o se sui o se korama o le perisitua faatuatua o ē mafai ona matou galulue ia tuputupu a'e ma latalata atili ai ia Keriso.

Faatasi ma a tatou uo ma aiga, o le Agaga Paia o se tasi o a tatou soa sili ona faamaoni ma faatuatua. Ae ina ia valaaulia Lana mafutaga faifai pea, e tatau ona tatou tuu i tatou lava i tulaga ma nofoaga o le a finagalo o Ia e afio ai. E mafai ona amata lenei mea i o tatou lava fale a o tatou galulue ia faia

o ni nofoaga paia i le auai lea i suesuega o tusitusiga paia i aso uma ma tatalo o se aiga, ma sili atu ona taua, a o tatou suesueina patino tusitusiga paia ma tatalo lava le tagata ia.

I le amataga o lenei tausaga, sa tuuina mai ia te a'u se avanoa faafiafiaina ma faamaualaloina e fesoasoani i lo'u tuafafine laitiiti, o Oceane, e agai i luma i luga o le ala o feagaiga i le taliaina lea o le valaaulia e papatiso ma faataunuu se tasi o tulaga manaomia talafeagai e ulu atu ai i le malo selesitila. Sa ia tolopo lona papatisoga i le masina e tasi, seia faauuina a'u o se ositaulaga, e tuu mai ai ia te a'u le avanoa e faatino ai le sauniga, a o maua foi e isi o'u tuafafine le avanoa e galulue ai i lalo o tofiga faaleperisitua ma tutu o ni molimau. A o ma tutu faafesagai i itu o le vai papatiso, ma sauni e ulu atu i le vai, sa ou matauina lona sagisagi fiafia, ma sa tutusa ma lo'u fiafia. Ma sa ou lagona le tuufaatasia ma ia, i le vaai ua ia faia se faaiuga sa'o. O lenei avanoa e faaoga ai le perisitua na manaomia ai a'u ina ia faaeteete atili ma faaitiitia le faasama-samanoa i lo'u ola ai i le talalelei. Ina ia saunia, sa ou alu i le malumalu i aso uma o lena vaiaso, sa lagolagoina [a'u] e lo'u tina, tinamatua, ma le tuafafine, e faatino papatisoga mo ē ua maliliu.

O lenei aafiaga na aoao atili ai a'u e uiga i le perisitua ma le aualea e mafai ona ou faaogaina ai ma le agavaa. Ou te iloa e mafai ona lagona uma e ē umia le perisitua le lagona e tasi sa ou lagonaina pe a tatou mulimuli i le faataitaiga a Nifae e “alu ma fai” (tagai i le 1 Nifae 3:7). E le mafai ona tatou nofo'i ai ma faamoemoe i le Alii e faaoga i tatou i Lana galuega maoae. E le tatau ona tatou faatali mo i latou e manaomia la tatou fesoasoani e saili i tatou; o lo tatou tiute o ē umia le



perisitua o le aveae ma faataitaiga ma tutu o ni molimau a le Atua. Afai o tatou faia ni faaiuga ua taofia ai i tatou mai lo tatou alualu i luma e faavavau, e tatau ona tatou sui nei. O le a tau-mafai Satani i lona malosia tele e taofia i tatou i le tulaga faaletino o le sailia o faafiafiaga faigofie. Ae ou te iloa a tatou tuu i ai le taumafaiga, saili i latou o le a lagolagoina i tatou, ma salamo i aso taitasi, o le a maoae taunuuga o faamanuiaga ma o le a suia e faavavau o tatou olaga a o tatou fetaomi atu i luma i luga o le ala o feagaiga.

Ou te iloa o le Ekalesia moni lenei a Iesu Keriso, o lo tatou Faola ma ua ia tuuina mai ki o le perisitua i Ana Aposetolo, o le faaogaina e taitaia ai i tatou, aemaise lava i nei aso faigata, ma ia saunia ai le lalolagi mo Lona toe afio mai.

Ou te iloa o Iosefa Samita o le perofeta o le Toefuataiga ma o Peresitene Nelson o lo tatou perofeta soifua i aso nei. Ou te valaaulia i tatou uma ia suesue i olaga o nei [tamalii] maoae o ē umia le perisitua ma saili e faaleleia i tatou lava i aso uma ina ia mafai ona tatou saunia e feiloai ma lo tatou Mataisau. I le suafa, o Iesu Keriso, amene. ■

FAAMATALAGA

1. O Le Au Peresitene Sili, i le *Faataunuuina o Lo'u Tiute i le Atua* (tamaitusi, 2010), 5.
2. Autu a le korama o le Perisitua Arona, i le *Tusitaulima Aoao: Auauna Atu i Le Ekalesia a Iesu Keriso o le Au Paia o Aso e Gata Ai*, 10.1.2, ChurchofJesusChrist.org.



Saunia e Jean B. Bingham
Peresitene Aoao o le Aualofa

Tutufaatasi i le Faataunuuina o le Galuega a le Atua

O le auala sili ona lelei e faataunuu ai la tatou faamoemoega paia o le galulue faatasi, faamanuiaina i le mana ma le pule o le perisitua.

Uso e ma tuagane matagofie, o se fiafiaga le i ai faatasi ma outou. Po o fea lava o tou faalogologo mai ai, ou te tuuina atu ni opo i o'u uso ma faatalofa mafana i o'u tuagane. O loo tatou punouai i le galuega a le Alii o Iesu Keriso.

Pe a tatou mafaufau ia Atamu ma Eva, o le tele lava o taimi tatou te mafaufau muamua i lo la olaga atoatoa i le Faatoaga o Etena. Ou te mafaufau sa atoatoa e le aunoa le tau—e lē vevela tele ma e lē malulu tele foi—ma le mau fualaau suamalie ma fualaau faisua lea na ola ae ma mafai ona la aai ai i soo se taimi e mananao ai. Talu ai o se lalolagi fou lea mo i la'ua, sa tele mea la te vailia, o aso uma lava sa mataina a o la faamasani i olaga o meaola ma lo la siosiomaga matagofie. Sa tuuina atu foi ia i la'ua ni poloaiga e usitaia ma sa eseese auala e faia ai na faatonuga, lea na oo mai ai ni popolega ma le le mautonu.¹ Ae a o la faia ni faaiuga ia na suia ai o la olaga e faavavau, sa la aoao e galulue faatasi ma le lotogatasi i le faataunuuina o

faamoemoega o le Atua mo i la'ua—ma mo Ana fanau uma.

Sei vaai faalemafaufau la i lea lava ulugalii i le olaga faitino. Sa tatau ona la galulue mo a la meaai, o nisi o meaola na faapea o i la'ua o ni mea e 'ai, ma sa i ai ni luitau faigata e na o le fefautuuaai ma le tatalo faatasi e faatoilalo ai. Ou te mafaufau sa na o ni nai taimi sa eseese ai o la manatu e uiga i le ala e faafetaia'i ai na luitau. Ae ui i lea, o le Pa'ū, sa la aoaoina ai le taua e faatino i le lotogatasi ma le alofa. I aoaoga sa la maua mai punavai faalelagi, sa la aoao ai i le ata o le faaolataga ma mataupu faavae o le talalelei a Iesu Keriso ia e mafai ai ona faatino le fuafuaga. Talu ai sa la malamalama o o la faamoemoega faalelalogi ma sini faavavau sa tutusa, sa la maua le faamalieleina ma le manuia i le aoao e galulue faatasi i le alofa ma le amiotonu.

A o fananau mai a la fanau, na aoao atu e Atamu ma Eva lo la aiga i mea sa la aoaoina mai avefeau faalelagi. Sa la taulai atu e fesoasoani i a la

fanau ia malamalama foi ma taliaina na mataupu faavae o le a latou maua ai le fiafia i lena olaga, ma saunia e toe foi atu i o latou matua faalelagi ina ua faateleina lo latou tomai ma faamaonia lo latou usiusitai i le Atua. I le gasologa, na aoao Atamu ma Eva e talisapaia o la'ua malosiaga eseese ma lagolagoina e le tasi le isi i la la'ua galuega taua e faavavau.²

A o gasolo mai ma mou atu sene-turi ma sosoo ma le afe tausaga, o le manino o sao musuia ma le felagolagoma'i a alii ma tamaitai ua amata ona nenefu i faamatalaga ma malamalamaaga lē sa'o. I le va o lena amataga ofoofogia i le Faatoaga o Etena ma le taimi nei, sa faamanuiaina le fili i lana sini e tavavae alii ma tamaitai i ana taumafaiga e faatoilalo o tatou agaga. Ua iloa e Lusifelo afai na te faatamaoia le lotogatasi e lagona e alii ma tamaitai, afai e mafai ona ia faalēmautonuina i tatou e uiga i lo tatou taua paia ma tiutetauave o le feagaiga, o le a ia malo i le faatamaoia o aiga, o iunite taua ia o le faavavau.

E faaosooso e Satani le taufaa-tusatusa e faatupu ai ni lagona o le faaususili po o le vaai maulalo, a o natiaina le upumoni faavavau faapea o eseese faalenatura o alii ma tamaitai, ua mai le Atua ma e tutusa lava le taua. Na ia taumafai e faalumaaina sao o tamaitai i le aiga ma i faapotopotoga lautele, ma fa'aitiitia ai lo latou tosinaga faagaetia mo le lelei. O lana sini o le uunaia lea o se tauiviga mo le paoa nai lo le patipatia o sao tulaga ese o alii ma tamaitai e fefaamaloa'i ai le tasi i le isi ma saofagā ai i le lotogatasi.

O le mea lea, i le aluga o tausaga ma i le lalolagi atoa, o se malamalamaaga atoatoa i le felagolagoma'i faalelagi ae eseese sao ma tiutetauave o alii ma tamaitai na matuā mouese atu.



O tamaitai i le tele o faapotopotoga ua faalololo atu i ai alii nai lo o ni paaga soosootau'au, ua faaitiitia ai a latou gaioioga i se tulaga vaiti. O le alualu i luma faaleagaga sa o se tulutulu lona telegese i na taimi pogisa; ioe, sa o se sulu itiiti faaleagaga sa mafai ona ofi atu i mafaufau ma loto ua lilofia i agamasani o le pule malosi.

Ona susulu mai lea o le malamalama o le talalelei toefuataina “ua sili atu le pupula i le la”³ ina ua faaali mai le Atua le Tama ma Lona Alo, o Iesu Keriso, i le tama o Iosefa Samita i le amataga o le tautotogo o le 1820 i lona togavao paia i le setete o Niu Ioka. O lona mea na tupu na amata ai le soloa'i mai o faaaliga mai le lagi i aso nei. O se tasi o uluai elemene o le Ekalesia anamua a Keriso na toefuatai mai o le pule lea o le perisitua a le Atua. A o faagasolo pea le tatala mai o le Toefuataiga, sa amata ona toe iloa e alii ma tamaitai le taua ma le faamoemoe o le galulue o ni paaga, ua faatagaina ma taialaina e Ia i lenei galuega paia.

I le 1842, ina ua mananao tamaitai o le Ekalesia tau atiae e faatulaga se vaega aloaia e fesoasoani ai i le galuega, sa lagona e Peresitene Iosefa Samita le musuia e faatulaga i latou “e ala i le perisitua e mulimuli i le mamanu o le perisitua.”⁴ Na ia saunoa, “ma o lenei ua ou tuina atu le ki ia te outou i le suafa o le Atua . . . —o le amataga lenei o aso sili atu ona lelei.”⁵ Ma talu ona

faaoga lena ki, ua amata ona auauai malie mai le faalateleina o avanoa faaleaoaoga, faaupufai, ma le tamao-aiga mo tamaitai i le lalolagi atoa.⁶

O lenei faalapopotoga fou a le Ekalesia mo tamaitai, ua faaigoaina o le Aualofa, e le pei o isi sosaiete a tamaitai o lona vaitaimi ona sa faavaeina e se perofeta o lē na galue i le pule o le perisitua e tuu atu i tamaitai le pule, tiutetauave paia, ma tofiga aloaia i totonu o le faatulagaga o le Ekalesia, e lē ese mai ai.⁷

Mai i ona po o le Perofeta o Iosefa Samita e oo mai ia i tatou, o le faaauau ai pea o le toefuataiga o mea uma ua oo mai ai le malamalama i le manaomia o le pule ma le mana o le perisitua e fesoasoani i alii ma tamaitai e faataunuu ai o latou tiutetauave paia ua tofia i ai. Talu ai nei na aoaoina ai i tatou, o tamaitai ua vaetofia i lalo o le taitaiga a se tasi e umia ki o le perisitua e galulue i le *pule o le perisitua* i o latou valaauga.⁸

Ia Oketopa 2019, na aoao mai ai Peresitene Russell M. Nelson o

tamaitai o e ua maua faaeega paia i le malumalu ua maua le *mana o le perisitua* i o latou olaga ma i o latou aiga ao latou tausia na feagaiga paia sa latou osia ma le Atua.⁹ Na ia faamalalama mai “e tutusa lava le matala o le lagi i *tamaitai* ua maua faaeega paia i le mana o le Atua e tafe mai ia latou feagaiga faaleperisitua e pei ona matala foi i alii o loo umiaina le perisitua.” Ma sa ia uunaia tamaitai uma ina ia “mauaina e le aunoa le mana o le Faaola e fesoasoani ai i lou aiga ma isi e te alofa i ai.”¹⁰

O le a la le uiga o lona mea ia te oe ma a'u? E faapefea e le malamalama i le pule o le perisitua ma le mana ona suia ai o tatou olaga? O se tasi o ki o le iloa afai e galulue faatasi tamaitai ma alii¹¹ o le a tele atu mea tatou te faataunuuina nai lo le galulue vaoesese. O a tatou matafaioi o le galulue soosoo tauau nai lo le faatautava. E ui e lei faauuina tamaitai i se tofi o le perisitua, e pei ona matauina talu ai nei ae ua faamanuiaina tamaitai i le mana o le perisitua a o latou tausia a



Syracuse, Iuta, ISA

latou feagaiga, ma e latou te galulue i le pule o le perisitua pe a vaetofiaina i latou i se valaauga.

I se aso matagofie ia Aokuso, sa ou maua ai se avanoa e saofafai ai ma Peresitene Russell M. Nelson i le fale ua toe fausia o Iosefa ma Ema Samita i Haramoni, Penisilevania, e lata i le nofoaga na toefuatai ai le Perisitua Arona i aso nei e gata ai. I le ma talanoaga, na saunoa ai Peresitene Nelson e uiga i le taua o le matafaioi a tamaitai o loo faia i le Toefuataiga.

Peresitene Nelson: “O se tasi o vaega sili ona taua e faamanatu mai ia te a’u pe a ou sau i lenei nofoaga o le toefuataiga o le perisitua, o le taua o le matafaioi na faia e tamaitai i le Toefuataiga.

“Ina ua faatoa amata ona faaliliu e Iosefa le Tusi a Mamona, o ai na tusitusi? Ia, na ia faia sina mea itiiti, ae e le’i tele. O Ema na tulai a’e.

“Ona ou mafaufau lea i le auala na alu ai Iosefa i le vao e tatalo e lata i lo latou fale i Palamaira, Niu Ioka O fea na ia alu i ai? Sa alu o ia i le Vao Paia Aisea na ia alu ai iina? Aua o iina na alu ai Tinā pe a manao o ia e tatalo.

“E na o le toalua lenei o tamaitai o e na i ai matafaioi autu i le toefuataiga o le perisitua ma i le Toefuataiga o le Ekalesia. E lē masalomia foi lo tatou faapea atu e tutusa lava le taua o a tatou avā i le asō e pei o na aso. Ioe, o lea lava.”

E pei o Ema ma Lusi ma Iosefa, e sili lo tatou aoga pe a tatou naunau e aoao mai le tasi ma le isi ma tutufaatasi i la tatou sini ia avea ma soo o Iesu Keriso ma fesoasoani i isi i le ala.

Ua aoaoina i tatou o le “perisitua e faamanuiaina olaga o fanau a le Atua i auala e le mafaitauina. . . . I valaauga [i le Ekalesia], sauniga o le malumalu, sootaga faaleaiga, ma auaunaga tai-toatasi lē leoa, e fetaomi atu ai i luma

tamaitai ma alii o le Au Paia o Aso e Gata Ai i le mana ma le pule o le perisitua. O lenei felagolagoma’i o alii ma tamaitai i le faataunuuina o le galuega a le Atua e ala i Lona mana e totonugalemu i le talalelei a Iesu Keriso lea na toefuatai e ala mai i le Perofeta o Iosefa Samita.”¹²

O le tutufaatasi e taua i le galuega paia ua faamanuiaina ai i tatou ma valaauina e faia, ae le’i tupufua. E manaomia ai taumafaiga ma le taimi e fefautuaai faatasi ai—e faalogo ai i le tasi ma le isi, malamalama i vaega a isi, ma fefaasoai poto masani—ae o le gasologa e taunuu i faaiuga sili ona musuia. Pe i ai i le fale pe i tiutetauave o la tatou Ekalesia, o le auala sili ona lelei e faataunuu ai lo tatou faamoemoega paia o le galulue faatasi, faamanuiaina i le mana ma le pule o le perisitua i a tatou matafaioi eseese ae felagolagoma’i.

O a foliga o lenei faapaaga i olaga o tamaitai o le feagaiga i le asō? Sei ou faasoa atu se faataitaiga.

Sa i ai se faapaaga tulaga ese a Alisone ma Ioane. Sa la tietie i se uila vilivae nofoalua i tuuga pupuu ma uumi. Ina ia tauva ma le manuia i lenei uila, e tatau ona ogatusa le au tietie

e toalua. E tatau ona la faatafa i le itu e tasi i le taimi sa’o. E le mafai ona puleaina e le tasi le isi, ae e tatau ona la fesootai manino ma fai le vaega a le tagata lava ia. O le kapeteni, i luma, e pule i le taimi e taofi pe tu ai. O le soatau i tua, e tatau ona gauai atu i le mea o loo tupu ma sauni e tuu atu se isi malosiaga pe a la pa’ū i tua pe faalemu pe a la latalata tele i isi au tietie. E tatau ona la felagolagoma’i e agai ai i luma ma ausia le la sini.

Na faamatalaina e Alisone: “Mo le taimi muamua ao, fai mai le tagata o loo kapeteni, ‘Tu’ pe a manaomia ona ma tu ma ‘Taofi’ pe a tatau ona taofi le viliina. Pe a mavae se taimi, o le a iloa e le soatau le taimi o le a tu pe taofi ai le kapeteni, ma e lē toe tau faia ni upu. Sa ma aoao ia iloa ona ogatasi, ma pe o a mai le tasi ma le isi, ma mafai ona iloa pe a ua faataupepē le tasi [ona] taumafai lea o le isi e ‘apo mai. O le mea moni lava ia, e faatatau i le faatuatuaina ma le galulue faatasi.”¹³

Sa lotogatasi Ioane ma Alisone e le gata i le viliina o le la uila, ae sa la lotogatasi foi i le la faaipopoga. Sa tofu naunau i la’ua i le fiafia o le tasi nai lo ia lava; sa tofu vaavaai mo le lelei o le tasi ma le isi, ma sa la galulue e



Provo, Iuta, ISA



O le vaaia o tamaitai o ni tagata taua i le faatinoina, e lē faapea ai ua fatuina se “faatusatusa” ae o le malamalama i upumoni faalefaavae. Nai lo le faatuina o se polokalama e faatino ai lena mea, e mafai ona tatou galulue lelei, e fa-

faatoilalo mea e le lelei i le taga lava ia. Sa la feauauai e taitai ma feauauai e faapoopo atu i le tasi pe a faataupepē le isi. Sa tofu faatauaina e le tasi le sao o le isi, ma maua ai tali e sili atu i o la’ua luitau a o la tuufaatasia a la taleni ma punaoa. E fusia moni lava i la’ua o le tasi ma le isi e ala i le alofa faaKeriso.

O le ogatusa atili ma le mamanu faalelagi o le galulue faatasi i le lotogatasi e taua i lenei taimi o savali o le “o a’u muamua” lea o loo siomia ai i tatou. Ua i ai i tamaitai ni meaalofa faapitoa ma paia¹⁴ ma ua tuuina atu i ai ni tiutetauave tulaga ese, peitai o na mea e le sili atu—pe itiiti ifo—le taua nai lo meaalofa ma tiutetauave a alii. Ua mamanuina ma manaomia *tagata uma* e faataunuu ai le fuafuaga paia a le Tama Faalelagi o le tuu atu i tagata taitoatasi o Lana fanau o le avanoa sili e ausia ai lona gafatia paia.

O le taimi nei, “tatou te manaomia tamaitai o e lotototoa ma e i ai le vaaiga mamao a lo tatou Tina o Eva”¹⁵ e o mai faatasi i le aumaia o agaga ia Keriso.¹⁶ E tatau i alii ona avea ma paaga faamaoni nai lo le faapea ua na o i latou o i ai le tiute atoa pe galulue o ni paaga “faafoliga” ao faia e tamaitai le tele o le galuega. E tatau i tamaitai ona naunau e “laa i luma [ma] tutu [i o latou] tulaga tonu ma le manaomia”¹⁷ o ni paaga nai lo le mafaufau e tatau ona latou faia na’o i latou pe faatali se’i faatonu atu i le mea e fai.¹⁸

tauaina tamaitai e faapei ona faia e le Atua; o ni paaga taua i le galuega o le faaolataga ma le faaeaga.

Ua tatou sauni? Mata o le a tatou tauivi e faatoilalo le faaitu’au ae talia mamanu ma faiga faalelagi e faavae i luga o aoaoga faalefaavae? Ua valaaulia i tatou e Peresitene Russell M. Nelson ina ia “savavali soosoo tauau i lenei galuega paia . . . [ina ia] fesoasoani i le tapenaina o le lalolagi mo le Afio Mai Faalua o le Alii.”¹⁹ A o tatou faia, o le a tatou aoao i le taua o sao taitasi a tagata ma le faateleina o le lelei lea tatou te faataunuu ai a tatou matafaioi paia. O le a tatou lagonaina le olioli sili nai lo le mea ua tatou oo i ai.

Ia tatou tofu filifili e lotogatasi i le ala musuia a le Alii e fesoasoani ai i Lana galuega ia agai i luma. I le suafa o lo tatou Faola pele, o Iesu Keriso, amene. ■

FAAMATALAGA

1. Tagai i le Kenese 3:1–18; Mose 4:1–19.
2. Tagai i le Mose 5:1–12. O fuaiupu nei o loo aoao mai ia le mafutaga moni a Atamu ma Eva: sa i ai se la fanau faatasi (fuaiupu e 2); sa la galulue faatasi i le sauniaina mo i la’ua lava ma le la aiga (fuaiupu e 1); sa la tatalo faatasi (fuaiupu e 4); sa la usiusitai i poloaiga a le Atua ma ofoina atu faatasi ni taulaga (fuaiupu e 5); sa la aoao (fuaiupu e 4, 6–11) ma aoao atu faatasi le talalelei a Iesu Keriso ia la fanau (fuaiupu e 12).
3. Iosefa Samita—Talafaasolopito 1:16.
4. Iosefa Samita, i le Sarah M. Kimball, “Auto-Biography,” *Woman’s Exponent*, Sept. 1, 1883, 51; tagai foi *Aoaoga a Peresitene o le Ekalesia: Iosefa Samita* (2007), 451.

5. Iosefa Samita, i le “Nauvoo Relief Society Minute Book,” 40, josephsmithpapers.org.
6. Tagai George Albert Smith, “Address to the Members of the Relief Society,” *Relief Society Magazine*, Dec. 1945, 717.
7. Tagai John Taylor, in Nauvoo Relief Society Minutes, Mar. 17, 1842, available at churchhistorianspress.org. E tusa ai ma Eliza R. Snow, na aoao mai foi Iosefa Samita o tamaitai na faatulagaina aloaia i tisipenisione muamua (tagai Eliza R. Snow, “Female Relief Society,” *Deseret News*, Apr. 22, 1868, 81; *O Afafine i Lo’u Malo: O Le Talafaasolopito ma le Galuega a le Aualofa* [2011], 1–7).
8. Tagai Dallin H. Oaks, “O Ki ma le Pule o le Perisitua,” *Liahona*, Me 2014, 49–52.
9. Tagai Russell M. Nelson, “O Oa Faaleagaga,” *Liahona*, Nov. 2019, 78, 79.
10. Russell M. Nelson, “O Oa Faaleagaga,” 77.
11. “Ae ua aoao mai e le talalelei toefuataiina le mataupu faavae faapea o tane ma avā e faalagolago le tasi i le isi. E tutusa i la’ua. O i la’ua o se paaga” (Bruce R. ma Marie K. Hafen, “Faamalolusia o Faaipoipoga ma le Avea ma Paaga Tutusa,” *Liahona*, Aok. 2007, 28).
12. Autu o le Talalelei, “Joseph Smith’s Teachings about Priesthood, Temple, and Women,” topics.ChurchofJesusChrist.org.
13. Tususiga patino.
14. Tagai Russell M. Nelson, “O Se Talosaga i O’u Tuafafine,” *Liahona*, Nov. 2015, 95–97.
15. Russell M. Nelson, “O Se Talosaga i O’u Tuafafine,” 97.
16. Tagai i le *Tusitaulima Aoao: Auauna Atu i Le Ekalesia a Iesu Keriso o le Au Paia o Aso e Gata Ai*, 1.4, ChurchofJesusChrist.org.
17. Russell M. Nelson, “O Se Talosaga i O’u Tuafafine,” 97.
18. “Ou tuafafine pele, po o le a lava lou valaauga, po o a lava ou tulaga, e manaomia ou manatu, o lou silafia, ma au musumusuga. Matou te manaomia oe e te saunoa mai i aufono a uarota ma siteki. Matou te manaomia tuafafine taitoatasi ua faaipoipo e saunoa mai “o se soa e saofaga ma atoa” a o oulula tutu faatasi ma lau tane i le puleaina o lo oulula aiga. Pe faaipoipo pe nofofua, ua ia te outou tuafafine ni gafatia iloga ma uunaiga faapitoa ua outou mauaina o ni meaalofa mai le Atua. E le mafai e i matou o le itupa o alii ona suitulaga i la outou faatosinaga tulaga ese. . . .
“ . . . Matou te manaomia lo outou malosi” (Russell M. Nelson, “O Se Talosaga i O’u Tuafafine.” 97).
19. Russell M. Nelson, “O Se Talosaga i O’u Tuafafine,” 97.

O Au Pulega Aoao ma Taitai Aoao o Le Ekalesia a Iesu Keriso o le Au Paia o Aso e Gata Ai

O LE AU PERESITENE SILI



Dallin H. Oaks
Fesoasoani Muamua



Russell M. Nelson
Peresitene



Henry B. Eyring
Fesoasoani Lua

O LE KORAMA A APOSETOLO E TOASEFULULUA



M. Russell Ballard



Jeffrey R. Holland



Dieter F. Uchtdorf



David A. Bednar




Quentin L. Cook



D. Todd Christofferson



Neil L. Andersen



Ronald A. Rasband



Gary E. Stevenson



Dale G. Renlund



Gerrit W. Gong



Ulisses Soares

O LE AU PERESITENE O FITUGAFULU



L. Whitney Clayton



Patrick Kearon



Carl B. Cook



Robert C. Gay



Terence M. Vinson



José A. Teixeira



Carlos A. Godoy



Saunia e Peresitene Henry B. Eyring
Fesoasoani Lua i le Au Peresitene Sili

E Alu Atu o Ia i o Tatou luma

*O loo taitaia e le Alii le Toefuataiga o Lana talalelei
ma Lana Ekalesia. Na te silafia lelei le lumanai.
Na te valaauliaina oe i le galuega.*

Ou uso e ma tuafafine pele, ou te faafetai i le faatasi ai ma outou i lenei konafesi aoao o Le Ekalesia a Iesu Keriso o le Au Paia o Aso e Gata Ai. I lana valaaulia e manatunatu i le auala ua faamanuiaina ai i tatou ma ē pele ia i tatou e le Toefuataiga a le Alii o Lana Ekalesia i lenei tisipenisione

mulimuli, ua folafola mai ai e Peresitene Russell M. Nelson faapea o o tatou aafiaga e le gata e manatua pea ae o le a lē galo lava.

O lo’u aafiaga e manatua pea, ou te mautinoa e faapena foi outou. Ae o le lē galo o le a faalagolago lava ia i tatou taitoatasi. E taua lena ia te a’u

ona o aafiaga o le sauniuni mo lenei konafesi ua suia ai a’u i se ala ou te manao ai ia tumau. Se’i o’u faamatala atua.

O a’u sauniuniga na ou oo atu ai i faamaumauga o se mea na tupu i le Toefuataiga. Na ou faitau i lena mea na tupu i le tele o taimi, ae na foliga mai lava ia te a’u o se lipoti o se sauniga taua lea na aofia ai Iosefa Samita, le perofeta o le Toefuataiga. Ae o le taimi la lea, sa ou vaai i le tala i le auala na taitai ai e le Alii i tatou, o Ona soo, i Lana Ekalesia. Sa ou vaai i le uiga o le taitaia o i tatou o tagata soifua e le Faaola o le lalolagi, le Fofoa—o lē silafia mea uma, tuanai, taimi nei, ma le lumanai. Na te a’oa’o mai i tatou i lea laasaga ma lea laasaga ma tialaina i tatou, ae lē faamalosiā.

O le sauniga o loo ou faamatalaina o se taimi taua lea i le Toefuataiga. O se sauniga na faia i le aso Sapati i le aso 3 Aperila, 1836, i le Malumalu o Katelani i Ohaio, e fitu aso talu ona maea lona faapaiaina. Na faamatalaina e Iosefa Samita lenei taimi maoae i le talafaasolopito o le lalolagi i se auala faigofie. O le tele o lana tala o loo tusia i le Mataupu Faavae ma Feagai-ga vaega e 110.

“I le aoauli, sa ou fesoasoani atu i isi Peresitene i le tufatufaina atu o le Tausamaaga a le Alii i le Ekalesia, sa mauaina mai i le Toasefululua, o e sa ā latou le avanoa e galulue ai i le la’o’ai paia i lea aso. Ina ua uma ona faatino o lenei auunaga i o’u uso, sa ou tuumuli atu i le pulelaa, sa tuu i lalo veli, ma ou punou ifo, faatasi ma Oliva Kaotui, i se tatalo mamalu ma lē leoa. Ina ua mavae ona ma tutu a’e mai i le tatalo, sa tatala mai le faaaliga vaaia lenei ia i ma’ua uma.”¹

“Sa aveesea le veli mai i o ma’ua mafaufau, ma sa tatalaina mata o o ma’ua malamalama.



O IESU KERISO UA FAAMALU ATU I LE PEROFETA O IOSEFA SAMITA MA OLIVA KAOTUI, SAUNIA E WALTER RANE

“Sa ma vaai i le Alii o tu mai i luga o le si’ofatafata o le pulelāa, i o maua luma; ma o lalo ifo o ona vae sa i ai se mea sa faia sa teuteuina i le auro ma’o’i, i le lanu e pei e mūmū sesega.

“O ona fofoga sa pei o se afi mumū; o lauao o lona ao sa papa’e e pei o le kiona mamā; o ona fofoga sa susulu e sili atu i lo le pupula o le la; ma o lona siufofoga sa pei o le leo o le tafe-taalili o vai tetele, o le siufofoga lava o Ieova, ua fetalai mai:

“O a’u lē muamua ma lē mulimuli; o a’u o lē o loo ola, o a’u o lē na fasiotia; o a’u o lo outou fautua i le Tamā.

“Faauta, ua faamagaloina a oulua agasala mai ia te oulua; ua oulua mama i o’u luma; o lea, ia sii i luga o oulua ulu ma olioli.

“Ia olioli loto o oulua uso, ma ia olioli loto o lo’u nuu uma, o e na latou fausia lenei fale i lo’u igoa, ma lo latou malosi.

“Aua faauta, ua Ou talia lenei fale, ma o le a i ai iinei lo’u igoa; ma o le a Ou faaali atu a’u lava i lo’u nuu i lenei fale i le alofa mutimutivale.

“Ioe, o le a Ou oo atu i a’u auauna, ma tautala atu ia te i latou i lo’u lava leo, pe afai e tausi lo’u nuu i a’u poloaiga, ma ia lē faaeleleaina lenei fale paia.

“Ioe o le a matua olioli tele lava loto o afe ma sefulu o afe ona o faamanuiaga o le a sasaa atu, ma le faaeega ua faaeina ai a’u auauna i lenei fale.

“Ma o le a salalau atu le ta’uta’ua o lenei fale i atunuu ese; ma o le amataga lenei o le faamanuiaga o le a sasaa mai i luga o ulu o lo’u nuu. E faapea lava. Amene.

“Ina ua tapunia lenei faaaliga vaaia, sa toe tatala mai le lagi ia i ma’ua; ma sa oo mai Mose i o ma’ua luma, ma tuu mai ia i ma’ua ki o le faapotopotoina o Isaraelu mai vaega e fa o le

lalolagi, ma le taitaiga mai o ituaiga e sefulu mai le lauelele i matu.

“Ina ua mavae lea, sa oo mai Elaia, ma tuu mai le tisipenisione o le talalelei a Aperamo, fai mai o le a faamanuiaina ia i ma’ua ma a ma’ua fanau, tupulaga uma mulimuli mai pe a mavae atu i ma’ua.

“Ina ua tapunia lenei faaaliga vaaia, sa oo mai i o ma’ua luga se isi faaaliga vaaia tele ma le mamalu; ona sa tu mai i o ma’ua luma Elia le perofeta, o lē na aveina i le lagi e aunoa ma le tofo i le oti, ma fetalai mai:

“Faauta, ua oo atoa mai le taimi, lea na fetalai e le fofoga o Malaki—na molimau mai e tatau ona auina mai o ia [Elia], ae lei oo mai le aso tele ma le mata’utia o le Alii—

“E liliu loto o tamā i fanau ma fanau i tamā, ne’i taia le lalolagi atoa i se fetuu—

“O lea, ua tuu atu i o oulua lima ki o lenei tisipenisione; ma o lenei mea o le a mafai ona outou iloa ai ua lata mai lava le aso tele ma le mata’utia o le Alii, ua i faitotoa lava.”²

Ia, ua ou faitau faafia i lona tala. Ua faamaonia mai e le Agaga Paia ia te a’u e moni le tala. Peitai a’o ou suesue ma saunia mo lenei konafesi, sa oo ina ou vaai manino atili i le mana o le Alii e taitai ai i auililiga Ona soo i Lana galuega.

E fitu tausaga a o le’i tuuina atu e Mose ia Iosefa ki o le faapotopotoina o Isaraelu i le Malumalu o Katelani, “na aoaoina e Iosefa mai le itulau autu o le Tusi a Mamona o lona faamoemoega o le “faailoa atu ai i le toe vaega o le aiga o Isaraelu . . . ina ia latou iloa ai foi feagaiga a le Alii, ua lē lafoaiina ese i latou e faavavau.’ I le

1831, na fetalai atu ai le Alii ia Iosefa o le faapotopotoina o Isaraelu o le a amata i Katelani, ‘Ma mai iina [Katelani], soo se tasi Ou te loto i ai, o le a o atu i totonu o atunuu uma . . . ona o le a laveaiina Isaraelu, ma o le a Ou taitaia i latou.’”³

E ui o le galuega faafaifeautalai na manaomia e faapotopoto ai Isaraelu, ae na musuia e le Alii Ana taitai e aoa atu le Toasefululua, o ē na avea ma nisi o o tatou faifeautalai anamua, “Manatua, ia ē lē alu atu i isi atunuu, seiiloga ua e mauaina ou faaeega paia.”⁴

Na foliga mai o le Malumalu o Katelani sa taua i le fuafuaga auauai a le Alii mo ni mafuaaga se lua: Muamua, sa faatali Mose seia maea le malumalu e toefuatai mai ai ki o le faapotopotoina o Isaraelu. Ma le lona lua, na a’oa’o mai Peresitene Iosefa Filitia Samita e faapea “na poloaiina e le Alii le Au Paia e fausia se malumalu [le Malumalu o Katelani] lea e mafai ona ia faaali atu ai ki o le pule ma e mafai ona faia ai faaeega paia a aporetolo ma saunia ai e teu ma tausia lana togaolive mo le toe taimi.”⁵ E ui o faaeega paia o le malumalu e pei ona tatou iloa ai i le taimi nei e lei faatautaia i le Malumalu o Katelani, i le faataunuuna ai o le valoaga, ae o sauniga sauniuni o le malumalu na amata ona faailoa atu iina, faatasi ai ma le liligi mai o faailoaga faaleagaga lea



São Paulo, Pasila



na faaaupega ai i latou na valaauina i misiona faatasi ai ma le faaeega folafolaina o le “mana mai luga”⁶ lea na taitai atu i se faapotopotoina maoae e ala i le auaunaga faafaifeautalai.

Ina ua uma ona tuuina atu ki o le faapotopotoina o Isaraelu ia Iosefa, na musuia e le Alii le Perofeta e auina atu uso o le Toasefululua i misiona. A o ou suesue, na manino mai ia te a’u ua saunia e le Alii i auililiga le ala mo le Toasefululua e o atu ai i misiona i atunuu mamao lea na saunia ai tagata ia talitonu ma lagolagoina i latou. I taimi tatau ai, e ala mai ia i latou, le faitau afe o tagata na aumaia i totonu o le Ekalesia toefuataiina a le Alii.

E tusa ai ma a tatou faamaumauga, ua fuafuaina e i le va o le 7,500 ma le 8,000 na papatisoina i le taimi o misiona e lua a le Toasefululua i Atumotu o Peretania [British Isles]. Ma faataatia e lenei mea le faavae mo le galuega faafaifeautalai i Europa. E oo atu i le faaiuga o le seneturi lona 19 e tusa ma le 90,000 tagata na potopoto i Amerika ma o le toatele na malaga mai i Atumotu o Peretania ma Scandinavia.⁷ Na musuia e le Alii Iosefa ma na faifeautalai faamaoni o e na galulue e ausia se seleselega na atonu na foliga, i lenei taimi, e sili atu nai lo lo latou gafatia. Ae o le Alii, faatasi ai ma Lana muai silafaga atoa ma sauniuniga, na mafai ai.

E te manatuaina le gagana faigo-fie ma toetoe lava o se solo mai le vaega e 110 o le Mataupu Faavae ma Feagaiga:

“Faauta, ua oo atoa mai le taimi, lea na fetalaia e le fofoga o Malaki—na molimau mai e tatau ona auina mai o

ia [Elia], ae lei oo mai le aso sili ma le mata’utia o le Alii—

“E liliu loto o tamā i fanau ma fanau i tamā, ne’i taia le lalolagi atoa i se fetuu—

“O lea, ua tuu atu i o oulua lima ki o lenei tisipenisione; ma o lenei mea o le a mafai ona outou iloa ai ua lata mai lava le aso tele ma le mata’utia o le Alii, ua i faitotoa lava.”⁸

Ou te molimau atu na silasila mamao atu le Alii i le lumanai ma le auala Na te taitaina ai i tatou e fesoasoani ia te Ia e faataunuu Ona faamoemoega i aso e gata ai.

A o o’u auauna atu i le Au Epikopo Pulefaamalumalu i le tele o tausaga ua mavae, sa tofia a’u e vaaia le vaega o mamanu ma atinaega lea na fatuina le mea ua tatou faaigoaina o le FamilySearch. Ou te faaeteete e fai atu na ou “vaavaaia” lona fatufatuga nai lo le faapea atu na ou “faatonuina.” E toatele tagata atamamai na tuua matata ma o mai e fausia le mea na finagalo i ai le Alii.

Na setiina e le Au Peresitene Sili se sini e faaitiitia le faia faalua o ni sauniga. O lo latou popolega sili o le le mafai ona tatou iloa pe ua uma ona faia sauniga a se tagata. Mo ni tausaga—pe foliga mai o le tele o tausaga—na fesili mai ai le Au Peresitene Sili ia te a’u, “O afea o le a e faia ai?”

Faatasi ai ma le tatalo, maelega, ma le ositaulaga patino a tagata o le tomai sili, na faataunuuina ai le galuega. Na oo mai i lea laasaga ma lea laasaga. O le galuega muamua o le faia lea o le FamilySearch ma se fiafiaga mo i latou o ē lē fiafia tele i komepiuta. Ua tele suiga na oo mai,

ma ou te iloa o le a faaaauu pea ona latou o mai, aua soo se taimi lava matou te agai atu ai e foia se tasi o faafitauli musuia, matou te tatalaina le faitotoa mo nisi faaaliga mo le alualu i luma e talitutusa lava le taua ae e lē vaaia. E oo lava i le asō, o loo ua avea le FamilySearch ma mea e manaomia e le Alii mo se vaega o Lana Toefuataiga—ma e le na o le aloese mai le toe faia faalua o sauniga.

E faatagaina i tatou e le Alii e faia ni faaleleiga e fesoasoani ai i tagata ia maua ni lagona o le masani ma alofa foi mo o latou tuua ma faamaeaina a latou sauniga o le malumalu. I le taimi nei, e pei ona silafia e le Alii o le a tupu, o le a avea tagata talavou ma faiaoga o komepiuta i o latou matua ma tagata o le uarota. Ua latou maua uma le olioli tele i lenei auaunaga.

Ua suia e le agaga o Elia loto o talavou ma tagata matutua, tamaiti ma matua, fanau a fanau ma matua matutua. O le a toe faatulagaina ma le fiafia e malumalu i se taimi e le o toe mamao ia avanoa o papatisoga ma isi sauniga paia. O le naunau e auauna atu i o tatou tuua ma le sootaga o matua ma fanau o loo faatupulaia pea.

Na silafia e le Alii le oo mai o mea uma. Na Ia fuafuaina, i lea laasaga ma lea laasaga, e pei ona Ia faia i isi suiga i Lana Ekalesia. Na Ia tausua ma saunia tagata faamaoni o ē filifili e fai ia lelei mea faigata. E onosa’i ma alofa mai pea o Ia e fesoasoani mai ia i tatou e a’oa’o i “lea fuaitau i luga o lea fuaitau, ma lea mataupu i luga o lea mataupu, o sina mea itiiti i i ma sina mea itiiti i o.”⁹ E mausali o Ia i le faatulagaina o taimi ma le faagasologa o Ona faamoemoega, ae Na te faamautinoaina mai o le ositaulaga e masani ona aumaia pea faamanuiaga tatou te le muai vaaia.

Ou te faaiu atu i le faailoaina o lo’u lotofaafetai i le Alii—o Ia o lē na



Saunia e Peresitene Dallin H. Oaks
Fesoasoani Muamua i le Au Peresitene Sili

musuia Peresitene Nelson e valaaulia a'u e faia se ositaulaga e saunia ai mo lenei konafesi. O itula uma ma tatalo uma i taimi o a'u sauniuniga na aumaia ai se faamanuiaga.

Ou te valaaulia tagata uma o ē faalogo i lenei savali pe faitau i nei upu ina ia faatuatua o loo taitaiina e le Alii le Toefuataiga o Lana talalelei ma Lana Ekalesia. E Alu Atu o Ia i o Tatou Luma. Na te silafia lelei le lumanai. Na te valaauliaina oe i le galuega. Na te faatasi mai ma oe. Ua Ia faia se fuafuaga mo lau auaunaga. Ma e oo lava i au osigataulaga, o le a e lagona le olioli a o e fesoasoani atu i isi ia tulai a'e e saunia mo Lona afio mai.

Ou te molimau atu o loo soifua le Atua le Tama. O Iesu o le Keriso. O Lana Ekalesia lenei. Na te silafia ma alofa ia te oe. Na te taialina oe. Ua Ia saunia le ala mo oe. I le suafa paia o Iesu Keriso, amene. ■

FAAMATALAGA

1. Mataupu Faavae ma Feagaiga 110, ulutala o le vaega; tagai foi Iosefa Samita, "Talafaasolopito, 1838–1856, voluma B-1 [1 Setema 1834–2 Novemua 1838]," Ape. 3, 1836, 727, josephsmithpapers.org.
2. Mataupu Faavae ma Feagaiga 110:1–16.
3. Karl Ricks Anderson, *The Savior in Kirtland: Personal Accounts of Divine Manifestations* (2012), 276; Mataupu Faavae ma Feagaiga 38:33.
4. Given in the apostolic charge administered by Oliver Cowdery, in "Minute Book 1," Feb. 21, 1835, 162, josephsmithpapers.org.
5. Iosefa Filitia Samita, *Doctrines of Salvation*, comp. Bruce R. McConkie [1955], 2:234.
6. Mataupu Faavae ma Feagaiga 38:32.
7. Tagai ia James B. Allen, Ronald K. Esplin, and David J. Whittaker, *Men with a Mission: The Quorum of the Twelve Apostles in the British Isles, 1837–1841* (1992), 53, 302; Brandon S. Plewe, ed., *Mapping Mormonism: An Atlas of Latter-day Saint History* (2012), 104.
8. Mataupu Faavae ma Feagaiga 110:14–16.
9. 2 Nifae 28:30.

O Le Perisitua Mekisateko ma Ki

I totonu o le Ekalesia, o le pule o le perisitua e faaaoga i lalo o le taitaiga a se taitai perisitua o lē e umia ki o lena perisitua.

Ua ou filifili e talanoa atu atili e uiga i le perisitua a le Atua, o le mataupu ua uma ona saunoa i ai ia failauga e toatolu na muamua atu o ē sa a'oa'oina i tatou e uiga i le ala e faamanuiaina ai e le perisitua ia olaga o tamaitai, tamaitai talavou, ma alii talavou.

O le perisitua o se mana ma le pule paia a le Atua e umia ona ua faatuatua, e faaaoga mo le galuega a le Atua mo le manuia o Ana fanau uma. *O le Perisitua* e le o i latou ua faauuina i se tofi o le perisitua po o i latou o ē faaaogaina lana pule. O alii o loo umiaina le perisitua e le o le perisitua. E ui e le tatau ona tatou faasino atu i alii ua faauuina o i latou *o le perisitua*, ae e talafeagai le faasino ia i latou o ē *umia* le perisitua.

O le mana o le perisitua e i ai uma i le Ekalesia ma i le faalapotopotoga o le aiga. Peitai o le mana o le perisitua ma le pule o le perisitua e faaaoga eseese i le Ekalesia nai lo totonu o le aiga. O nei mea uma ua faia e tusa ai ma mataupu faavae sa faatuina e le Alii. O le faamoemoega o le fuafuaga a le Atua o le taitai atu o Ana fanau i le ola e faavavau. O aiga i le olaga nei e taua i lena fuafuaga. Ua i ai le Ekalesia

e aumaia le aoaoga faavae, o le pule, ma sauniga e tatau ai ia faaauau ai sootaga faaleaiga i le faavavau. O lea, o le faalapotopotoga faaleaiga ma le Ekalesia a Iesu Keriso, e i ai se sootaga



Provo, Iuta, ISA

fefaamalosia'i o le tasi ma le isi. O faamanuiaga o le perisitua—e pei o le atoatoaga o le talalelei ma sauniga e pei o le papatisoga, faamauga ma le mauaina o le meaalofo o le Agaga Paia, faaeega paia o le malumalu, ma le faaipoipoga e faavavau—o loo avanoa mo alii faapea foi tamaitai.¹

O le perisitua o loo tatou talanoa ai nei o le Perisitua Mekisateko, na toefuatai mai i le amataga o le Toefuataiga o le talalelei. Sa faauuina Iosefa Samita ma Oliva Kaotui e Peteru, Iakopo, ma Ioane, o ē na ta'utino maia i la'ua lava “o loo umiaina ki o le malo, ma le tisipenisione o le atoaga o taimi” (Mataupu Faavae ma Feagaiga 128:20). O nei Aposetolo sinia na mauaina lena pule mai le Faaola lava Ia. O isi pule uma po o tofi i le perisitua o ni faaopoopoga i le Perisitua Mekisateko (tagai i le Mataupu Faavae ma Feagaiga 107:5), aua na te “umia le aiā o le pulefaamalumalu, ma ua i ai le mana ma le pule i luga o tofi uma i le ekalesia i tupulaga uma o le lalolagi” (Mataupu Faavae ma Feagaiga 107:8).


I totonu o le Ekalesia, o le pule o le perisitua e sili atu, o le Perisitua Mekisateko, ma o le Perisitua Arona e maualalo ifo e faaaoga i lalo o le taitaiga a se taitai perisitua, e pei o se epikopo po o se peresitene, o lē e umia ki o lena perisitua. Ina ia malamalama i le faaaogaina o le pule o le perisitua i le Ekalesia, e tatau ona tatou malamalama i le mataupu faavae o ki o le perisitua.

O ki o le Perisitua Mekisateko o le malo sa faaee mai e Peteru, Iakopo, ma Ioane, ae e le'i mae'a ai le toefuataiga mai o ki o le perisitua. O nisi o ki o le perisitua na oo mai mulimuli ane. Ina ua mae'a le faapaiaga o le uluai malumalu o lena tisipenisione i Katelani, Ohaio, e toatolu perofeta—Mose, Elaia, ma Elia—na toefuatai

maia “ki o le tisipenisione lena,” e aofia ai ki e faatatau i le faapopotoina o Isaraelu ma le galuega o malumalu o le Alii (tagai i le Mataupu Faavae ma Feagaiga 110), e pei ona faatoa faamatalaina atu ma le faatau-anau e Peresitene Eyring.

O le faataitaiga sili ona masani ai i le faaaogaina o ki o loo maua i le faatinoga o sauniga o le perisitua. O se sauniga o se faatinoga paia, e faailo mai ai le osiga o feagaiga ma le folafolaina mai o faamanuiaga. I totonu o le Ekalesia, o sauniga uma e faatino i lalo o le faatagaga a le taitai perisitua o loo umiaina ki mo lena sauniga.

O se sauniga e masani ona faatinoina e tagata ua uma ona faauuina i se tofi i le perisitua, e faia i lalo o le taitaiga a lē o umiaina ki o le perisitua. Mo se faataitaiga, o ē umia tofi eseese o le Perisitua Arona, latou te taitai i le sauniga o le faamanatuga i lalo o ki ma le taitaiga a le epikopo, o lē e umiaina ki o le Perisitua Arona. O lea lava foi mataupu faavae e tasi e faatatau i sauniga o le perisitua ia e taitai ai tamaitai i totonu o le malumalu. E ui e lē umia e tamaitai se tofi i le perisitua, ae latou te faatinoina sauniga paia o le malumalu i lalo o le faatagaga a le peresitene o le malumalu, o lē e umiaina ki mo sauniga o le malumalu.



O se isi faataitaiga o le pule o le perisitua i lalo o le taitaiga a lē o umiaina ki, o aoaoga a alii ma tamaitai e valaauina e a'oa'o atu le talalelei, pe o ni vasega i a latou uarota masani po o le galuega faamisiona. O isi faataitaiga o i latou e umiaina tofiga faaleautaitai i le uarota ma faaaoga le pule o le perisitua ia latou taitaiga, ona o o latou valaauiga ma i lalo o le vaetofaina ma le taitaiga a le taitai perisitua o loo umiaina ki i le uarota po o le siteki. O le auala lena e faaaoga ai le pule ma le mana o le perisitua ma sapi ai i Le Ekalesia a Iesu Keriso o le Au Paia o Aso e Gata Ai.²

E faaaogaina foi le pule o le perisitua ma e vaaia ona faamanuiaga i aiga o le Au Paia o Aso e Gata Ai. A ta'u aiga o lona uiga o se alii e umia le perisitua ma se tamaitai ua faaipoipo ma a la fanau. Ou te faaofiaina ai foi suiga eseese mai mafutaga silisili e afua mai le maliu po o le tatala o faaipoipoga.

O le mataupu faavae e faapea o le pule o le perisitua e faatoa mafai ona faaaoga i lalo o le taitaiga a lē o loo umiaina ki mo lena mafaiaoi e taua tele i le Ekalesia, ae e le faatatau lea i totonu o le aiga. Mo se faataitaiga, o se tama e pulefaamalumalu ma faaaogaina le perisitua i lona aiga e ala i le pule o le perisitua o loo ia umiaina. Na te lē tau manaomia le taitaiga po o le faamaoniga a se tasi o umiaina ki o le perisitua ina ia mafai ai ona faatino ana mafaiaoi eseese faaleaiga. O nei mea e aofia ai le fautuaina o tagata o lona aiga, faia o fonotaga faaleaiga, tuuina atu faamanuiaga faaleperisitua i lona toalua ma le fanau, pe tuu atu foi ni faamanuiaga o faamalologa i tagata o le aiga po o isi.³ E a'oa'o atu e taitai o le Ekalesia ia tagata o aiga ae latou te le faatonuina le faaaogaina o le pule o le perisitua i totonu o le aiga.

O lea lava foi mataupu faavae e faaoga pe a leai se tama ae o le tina o le taitai o le aiga. E pulefaamalumu o ia i lona aiga ma o se meafai-galuega o ia i le aumaia o le mana ma faamanuiaga o le perisitua i totonu o lona aiga e ala i ona faaeega paia ma faamauga i le malumalu. E ui ina le faatagaina o ia e tuuina atu faamanuiaga faaleperisitua ia e na o se tagata o umiaina se tofi patino i le perisitua e tuuina atua, ae mafai ona ia faatino ina isi matafaioi uma po o le taitaiga faaleaiga. O le faia o lona mea na te faaogaina ai le mana o le perisitua mo le manuia o le fanau o loo ia pulefaamalumu ai i lona tulaga faaletaitai i totonu o le aiga.⁴

Afai o le a faalateleina e tamā lo latou perisitua i totonu o o latou lava aiga, o le a faalateleina le misiona a le Ekalesia e pei o le tele o isi mea uma e mafai ona latou faia. O tama o e umia le Perisitua Mekisateko e tatau ona faaogaina la latou pule e ala “i le faatauanau, i le tali-tiga, i le agamaualalo ma le agamalu, ma le alofa faamaoni” (Mataupu Faavae ma Feaiga 121:41). O lona tulaga faatonuina maua luga mo le faaogaina uma o le pule o le perisitua e aupito sili ona taua i totonu o le aiga. O i latou o loo umiaina le perisitua e tatau foi ona tausia poloaiga ina ia latou maua le mana o le perisitua e tuu atu ai faamanuiaga i tagata o o latou aiga. E tatau ona latou faafaileleina sootaga alofa faaleaiga ina ia mananao ai tagata o le aiga e talosaga atu i o latou tamā mo ni faamanuiaga. Ma e tatau i matua ona uunaia ni faamanuiaga faaleperisitua se tele atu i totonu o le aiga.⁵

I nei sauniga faalekonafesi, a o tatou saili atu i sina malutaga mai i o tatou popolega faaletino i se faama'i pipisi faataumaoui, ua a'oa'oina i tatou i mataupu faavae maoae o le faavavau.



Ou te uunaia i tatou taitoatasi ia “tautasi” o tatou mata i le mauaina o nei upumoni o le faavavau ina ia mafai e o tatou tino ona “tumu . . . i le malamalama” (3 Nifae 13:22).

I Lana lauga i le motu o tagata o loo tusia i le Tusi Paia ma i le Tusi a Mamona, sa a'oa'o atu ai e le Faaola e faapea e mafai ona faatumuina tino faaletino i le malamalama pe faatumuina i le pouliuli. O le mea moni, tatou te mananao foi ia faatumuina i le malamalama, ma sa a'oa'oina i tatou e le Faaola i le ala e mafai ai ona tupu lenei mea. E tatau ona tatou faalogo i savali e uiga i upumoni o le faavavau. Sa Ia faaogaina le faataitiga o o tatou mata, ia tatou te tuuina ai le malamalama i o tatou tino. Afai “e tautasi” o tatou mata—i se isi faaupuga afai tatou te gauai atu i le taliaina o le malamalama e faavavau ma le atamai—sa Ia faamatala mai, “o le a tumu lou tino atoa i le malamalama” (Mataio 6:22; 3 Nifae 13:22). Ae afai e “leaga [o tatou] mata”—o lona uiga, afai tatou te vaavaai mo mea leaga ma tuuina i o tatou tino—na Ia lapatai mai, “o le a tumu lou tino atoa i le pouliuli” (fuaiupu 23). I se isi faaupuga, o le malamalama po o le pouliuli i o tatou tino e faalagolago i le ala tatou te vaai ai—pe taliaina ai—upumoni e faavavau o loo a'oa'oina ai i tatou.

E tatau ona tatou mulimuli i valaaulia a le Faaola ia saili ma ôle atu ia malamalama i upumoni o le faavavau.

Ua Ia folafola mai o loo finagalo lo tatou Tama i le Lagi e a'oa'o tagata uma i upumoni latou te sailia (tagai i le 3 Nifae 14:8). Afai tatou te mananao i lona mea ma tautasi o tatou mata ia mauaina, ua folafola mai le Faaola e faapea o upumoni o le faavavau “o le a tatala mai” ia i tatou (tagai i le 3 Nifae 14:7–8).

I se isi itu, ua naunau Satani e faafenumia'i o tatou mafaufauga pe taitai sese i tatou mai mataupu taua e pei o le faagaioiga o le perisitua a le Atua. Sa lapatai mai le Faaola e uiga i na “perofeta pepelo, o e e o mai ia te outou i ofu faamamoe, ae i totonu o luko feai lava i latou. (3 Nifae 14:15). Na Ia tuuina mai ia te i tatou lenei suega e fesoasoani ai ia tatou filifili le upumoni mai aoaga eseese e ono faafenumiai ai i tatou: “O le a outou iloa i latou i o latou fua,” na Ia a'oa'o mai ai (3 Nifae 14:16). “E le mafai i le laau lelei ona fua mai i fua leaga, e le [mafai] foi i le laau leaga ona fua mai i fua lelei.” (fuaiupu 18). O le mea lea, e tatau ai ona tatou vaavaai i taunuuga—“o fua”—o mataupu faavae ua a'oa'o mai ma tagata o loo a'oa'oina mai. O le tali aupito sili lona i le tele o le tete tatou te faalogo i ai e faasaga i le Ekalesia ma ona aoaga faavae ma aiaiga faavae ma le taitaiga. Mulimuli i le suega ua a'oa'o mai e le Faaola. Vaavaai i fua—o taunuuga.

Pe a tatou mafaufau i fua o le talalelei ma le Ekalesia toefuataiina



Saunia e Peresitene Russell M. Nelson
 Peresitene o Le Ekalesia a Iesu Keriso o
 le Au Paia o Aso e Gata Ai

a Iesu Keriso, tatou te olioli i le ala ua faalauteleina ai le Ekalesia, i le soifuaga o ona tagata soifua, mai i aofia i le lotoifale i atumauga i Sisifo e oo atu i mea o nonofo ai le toatele o ona tagata e silia ma le 16 miliona i atunuu e ese mai le Iunaite Setete. Faatasi ma lena tuputupu a’e, ua matou lagonaina le faatelega o le gafatia o le Ekalesia e fesoasoani atu i ona tagata. Tatou te fesoasoani atu i le tausiga o poloaiga, i le faataunuuina o tiutetauave e tala’i atu le talalelei toefuataiina, i le faapotopotoina o Isaraelu, ma i le fauina o malumalu i le lalolagi atoa.

O loo taitaia i tatou e se perofeta, Peresitene Russell M. Nelson, o lana taitaiga ua faaaogaina e le Alii e ausia ai le alualu i luma ua tatou lagonaina i le silia ma le lua tausaga atoa o lana taitaiga. O le a faamanuiaina nei i tatou e faalogologo atu ia Peresitene Nelson, o lē o le a a’oa’o-ina i tatou i le auala e faalauteleina atili ai lo tatou alualu i luma i lenei Ekalesia toefuataiina a Iesu Keriso i nei taimi faigata.

Ou te molimau atu i le moni o nei mea, ma afaatasi ma outou e tatalo mo lo tatou perofeta, o lē o le a tatou faalogologo atu nei i ai, i le suafa o Iesu Keriso, amene. ■

FAAMATALAGA

1. Tagai i le Dallin H. Oaks, “Pule o le Perisitua i le Aiga ma le Ekalesia,” *Liahona*, Nov. 2005, 24–27.
2. Tagai Russell M. Nelson, “O Oa Faaleagaga,” *Liahona*, Nov. 2019, 76–79; Dallin H. Oaks, “Pule o le Perisitua i le Aiga ma le Ekalesia,” 24–27; Dallin H. Oaks, “O Ki ma le Pule o le Perisitua,” *Liahona*, Me 2014, 49–52.
3. Tagai Dallin H. Oaks, “O Mana o le Perisitua,” *Liahona*, Me 2018, 65–68.
4. Russell M. Nelson, “O Oa Faaleagaga,” 76–79.
5. Tagai Russell M. Nelson, “Auauna Atu i le Mana ma le Pule a le Atua,” *Liahona*, Me 2018, 68–75; Dallin H. Oaks, “O Mana o le Perisitua,” 65–68.

Tatalaina o le Lagi mo se Fesoasoani

la tatou tuu lo tatou faatuatua i le Alii o Iesu Keriso i ni faatinoga!

E ma’eu le tulagaese ma le matagofie o lenei sauniga! Faafetai lava Laudy ma Enzo pele. Ua matua lelei le avea o oulua ma sui o tamaitai talavou ma alii talavou ofoofogia o le Ekalesia.

O’u uso e ma tuafafine pele, ua tatou faalogo i le tele o mea i le asō e uiga i le Toefuataiga o le Ekalesia—le Ekalesia lava lea na faatuina e lo tatou Faaola, o Iesu Keriso, i le taimi o Lana galuega i le lalolagi. O lena Toefuataiga na amata i le 200 tausaga talu ai i lenei tautotogo ina ua faaali mai le Atua le Tama ma Lona Alo, o Iesu Keriso i le taule’ale’a o Iosefa Samita.

I le sefulu tausaga talu ona mavae lenei faaaliga maoae, sa valaauina ai le Perofeta o Iosefa Samita ma le isi toalima e avea ma sui faavae o le Ekalesia toefuataiina a le Alii.

Mai lena vaega toalaiti na faapotopototo i le aso 6 o Aperila, 1830, ua oo mai ai se faalapotopotoga i le lalolagi atoa ua silia ma le 16 miliona tagata. O le lelei o loo faataunuuina e lenei Ekalesia i le lalolagi atoa e faamāmā i mafatiaga o tagata ma tuu atu le toomaga mo tagata, ua matua lauiloa. Ae o lona faamoemoega autu lava o le fesoasoani lea i alii, tamaitai, ma tamaiti ia mulimuli i le Alii o Iesu Keriso, tausi i Ana poloaiga, ma

agavaa mo le faamanuiaga aupito silisili o faamanuiaga uma—o le ola e faavavau lea faatasi ma le Atua ma ē pele ia i latou.¹

A o tatou faamanuina ai le mea na tupu na tatalaina i le 1820, e taua le manatuaina e faapea e ui tatou te faaaloalogaia Iosefa Samita o se perofeta a le Atua, ae e le o se lotu lenei a Iosefa Samita, po o se lotu foi a Mamona. O le Ekalesia lenei a Iesu Keriso. Na Ia poloai mai i le igoa tonu e tatau ona faaigoa ai Lana Ekalesia: “Aua e faapea lava ona ta’ua la’u ekalesia i aso e gata ai, O Le Ekalesia a Iesu Keriso o le Au Paia o Aso e Gata Ai.”²

Sa ou talanoa muamua e uiga i se faasa’oga na manaomia i le ala tatou te faasino atu ai i le igoa o le Ekalesia.³ Talu mai lena taimi, e tele mea ua faia e faataunuu ai lenei faasa’oga. Ou te faafetai tele ia Peresitene M. Russell Ballard ma le Korama atoa a Apose-tolo e Toasefululua, o e na faia le tele o mea e taulamua ai i nei taumafaiga faapea ai foi ma i latou e fesoatai i se isi ta’imua lea o le a ou faasilasilaina i lenei afiafi.

O taitai ma matagaluega a le Ekalesia, o totino fesoatai, ma le faitau miliona o tagata o le Ekalesia—ma isi—ua faaaogaina nei le igoa sa’o o

le Ekalesia. Ua toe fetuuna'ia le taiala o le mamanu aloaia a le Ekalesia. O le uepisaite autu a le Ekalesia ua i ai nei o le ChurchofJesusChrist.org. O tuatusi mo imeli, igoa o domain, ma alaleo o faasalalauaga faaagafesootai ua toe faafouina. O le tatou aufaipese faapelepele ua ta'ua nei o le Aufaipese a le Tapeneko i le Lotoa o le Malumalu.

Ua tatou oo i nei taumafaiga tula-gaese aua a tatou aveesea le suafa o le Alii mai le igoa o *Lana* Ekalesia, ua tatou aveesea e aunoa ma le iloaina o *Ia* o le taulaiga totonugalemu o la tatou tapuaiga ma o tatou olaga. Ina ua tatou aveina le suafa o le Faaola i o tatou luga i le papatisoga, ua tatou tautino e molimau atu, e ala i a tatou upu, mafaufauga ma amioga, o Iesu o le Keriso.⁴

Talu ai nei, sa ou folafola atu ai afai o le a tatou "faia le mea sili tatou te mafaia e toefuatai ai le igoa sa'o o le Ekalesia a le Alii," o le a Ia "liligi mai . . . Lona mana i lalo ma

faamanuiaga i luga o ulu o le Au Paia o Aso e Gata Ai, i auala tatou te lei vaaia lava."⁵ Ou te faafouina lena folafola i le asō.

Ina ia fesoasoani ia i tatou ia manatua o Ia ma ia iloa O Le Ekalesia a Iesu Keriso o le Au Paia o Aso e Gata Ai o le *Ekalesia a le Alii* matou te fiafia lava e faalauiloa atu se faatusa o le a faailoa ai le tulaga totonugalemu o Iesu Keriso I Lana Ekalesia.

O lenei faatusa ua aofia ai le igoa o le Ekalesia o loo i ai i totonu o se maatulimanu. O Iesu Keriso o le maatulimanu autu.⁶

I le totonugalemu o le faatusa o loo i ai se ata o le faatagata maamora a Thorvaldsen le *Christus*. O loo faaalua ai le Alii toetu ma *soifua* o loo aapa atu e opo mai tagata uma o le a o mai ia te Ia.

I se faatusa, o loo tu ai Iesu Keriso i lalo o se faaofuofu. O le faaofuofu ua faamanatu mai ai ia i tatou le Faaola toetu ua toetu mai le tuugamau

i le aso tolu na sosoo ma Lona Faasatauroga.

O lenei faatusa e tatau ona masani ai le toatele, aua ua loa ona tatou faailoaina le talalelei toefuataiina i le Keriso *soifua*, ua toetu.

O le a faaoga nei le faatusa e fai ma se faailo vaaia mo tusitusiga aloaia, talafou, ma mea e tutupu a le Ekalesia.⁷ O le a faamanatu atu ai i tagata uma o le Ekalesia lenei a le Faaola ma o mea uma tatou te fai, o ni tagata o Lana Ekalesia, e faatotonugalemu ia Iesu Keriso ma Lana talalelei.

O lenei, o'u uso e ma tuafafine pele, o taeao o le Aso Sa o le Lau-pama, e pei ona matua aoao mai ma le lelei e Elder Gong. Ona tatou ulufale atu ai lea i se vaiaso faapitoa e faamaea i le mea sili ona taua o le Eseta. I le aveai ai ma soo o Iesu Keriso, o le ola ai i se aso ua tuu ai e le faama'i pipisi o le KOVITI-19 le lalolagi atoa i le vāvāō, 'aua ne'i tau na ona tatou talanoa ia Keriso pe tala'i atu Keriso pe faaoga se faatusa e faaalua ai Keriso.

Ia tatou tuu lo tatou faatuatua i le Alii o Iesu Keriso i ni faatinoga!

E pei ona outou silafia, e tausia e tagata o le Ekalesia le tulafono o le anapogi i se aso se tasi o masina taitasi.

O le aoaoga faavae o le anapogi e anamuā. Sa faatinoina e toa faaletusi paia mai i aso anamua. O Mose, Tavita, Esera, Neemia, Eseta, Isaia, Tanielu, Ioelu, ma le toatele o isi na anapopogi ma tala'i atu le anapogi.⁸ E ala i tusitusiga a Isaia, na fetalai mai ai le Alii: "E *le* o lenei ea le anapogi ou te loto i ai? Ina ia tatalaina fusi na faia i le amio leaga, e tatala fusi o le amo, e tuuina atu ia saoloto e ua faasauaina?"⁹

Sa apoapoi mai le Aposetolo o Paulo i le Au Paia i Korinito ia "[outou]



faasaga i le anapogi ma le tatalo.”¹⁰
 Sa tautino mai e le Faaola Lava Ia e faapea e i ai mea faapitoa e “*na o le tatalo ma le anapogi e o ese ai.*”¹¹

Sa ou fai atu talu ai nei lava i se ata o faasalalaua faaagafesootai e faapea “i le avea ai ma se fomai ma se fomai tipitipi, ou te faamemelo tele mo afaigaluega faafomai, saienitisi, ma i latou uma o loo galulue faasoloatoa e faaitiitia le pipisi o le KOVITI-19.”¹²

O lenei, i le avea ai ma Peresitene o Le Ekalesia a Iesu Keriso o le Au Paia o Aso e Gata Ai ma se Aposetolo a Iesu Keriso, ou te *iloa* ua i ai i le Atua le mana uma, ma le potu uma, ma le malamalama uma; ua silafia e ia mea uma, ma o ia o se Tagata alofa muti-mutivale, e oo i le olataga, o i latou o e e salamo ma talitonu i lona suafa.”¹³

O lea la, i taimi o le luluti o tiga, ma pe a oo faama’i i tulaga pipisi ogaoga, o le mea sili ma masani mo i tatou e fai o le valaau atu lea i lo tatou Tama Faalelagi ma Lona Alo—le Fomai Sili—e faali mai lo La’ua mana ofofofia e faamanuia ai tagata o le lalolagi.

I la’u savali faavitio, sa ou valaaulia ai tagata uma ia auai i le anapogi i le Aso Sa, 29 o Mati, 2020. E toatele outou na vaai i le vitio ma auai i le



anapogi. O nisi atonu e le’i anapogi. O loo tatou manaomia pea i le taimi nei le fesoasoani mai le lagi.

O le po nei la, o’u uso e ma tuafafine pele, i le agaga o atalii o Mosaea, o ē na tuu atu i latou lava i le anapogi ma le tatalo tele,¹⁴ ma i le avea ai ma se vaega o la tatou konafesi aoao ia Aperila 2020, ua ou valaau atu ai mo se isi anapogi i le lalolagi atoa. Mo tagata uma e gafatiaina e lona soifua maloloina, ia tatou toe anapopogi, tatalo, ma tuufaatasi lo tatou faatuatua. Ia tatou aioi atu ma le agaga taalo mo se toomaga mai lenei faama’i pipisi i le lalolagi atoa.

Ou te valaaulia *tagata uma*, e aofia ai i latou e le o nisi o lo tatou faatuatuga, ia anapopogi ma tatalo i le Aso Malii, Aso Faraile 10 o Aperila, ina ia mafai ona togafitia le faama’i pipisi o i ai nei, ia puipuia tausima’i, faamalosi le tamaoaga, ma toe foi i le olaga masani.

E faapefea ona tatou anapogi?

E lua meaai po o se taimi 24 itula ua masani ai. Ae tatau ona e filifili po o le a se mea e fai ma se taulaga mo oe, pe a e manatua le taulaga silisili na faia e le Faaola mo oe. Ia tatou lotogatasi i le aioi atu mo se faamalologa i le lalolagi atoa.

O le Aso Malii o le aso sili lea o le a

faafofogaina ai e lo tatou Tama Faalelagi ma Lona Alo i *tatou!*

Uso e ma tuafafine pele, Ou te faailoa atu lo’u alofa loloto mo outou, faatasi ai ma la’u molimau e uiga i le paia o le galuega o loo tatou punouai ai. O Le Ekalesia *lenei* a Iesu Keriso o le Au Paia o Aso e Gata Ai. O loo tu o Ia i lona faauluuluga ma taitai mea uma tatou te faia. Ou te *iloa* o le a Ia tali mai i aioiga a Lona nuu. Ou te molimau atu ai i le suafa paia o Iesu Keriso, amene. ■

FAAMATALAGA

1. Tagai i le Mataupu Faavae ma Feagaiga 14:7.
2. Mataupu Faavae ma Feagaiga 115:4.
3. Tagai i le Russell M. Nelson, “O Le Igoa Sa’o o le Ekalesia,” *Liahona*, Nov. 2018, 87–89.
4. Tagai i le Russell M. Nelson, “O Le Igoa Sa’o o le Ekalesia,” 88.
5. Russell M. Nelson, “O Le Igoa Sa’o o le Ekalesia,” 89.
6. Tagai i le Efeso 2:20.
7. Ina ia faaalologia le natura paia o le faatusa o le Ekalesia ma faasaina puipuga faletulafono, e faato’u faaogaina le faatusa aloaia o le Ekalesia pe a faamaonia e le Au Peresitene Sili ma le Korama a Aposetolo e Toasefululua. E mafai ona maua atu nisi faamatalaga e ala i le faafesootaiina o le Ofisa o Meatotino o Fatufatuga Faaleatamai a le Ekalesia i le cor-intellectualproperty@ChurchofJesusChrist.org.
8. Tagai i le Esoto 34:28; 2 Samuelu 12:16; Esera 10:6; Neemia 1:4; Eseta 4:16; Isaia 58:3; Tanielu 9:3; Ioelu 2:12.
9. Isaia 58:6; faaopoopo le faamamafa.
10. 1 Korinito 7:5.
11. Mataio 17:21; ua faaopoopo le faamamafa.
12. Russell M. Nelson, i le “Prophet Invites All to Fast and Pray for Relief from COVID-19,” Mar. 26, 2020, newsroom. ChurchofJesusChrist.org.
13. Alema 26:35.
14. Tagai i le Alema 17:3.



Lonetona, Egelani



Saunia e Elder Ronald A. Rasband
O Le Korama a Aposetolo e Toasefululua

Faataunuuga o le Valoaga

O valoaga ua faataunuaina e ala i le Toefuataiga o le atoatoaga o le talalelei a Iesu Keriso, e tele.

O’u uso e ma tuafafine pele, ua faamamaluina lava a’u e lauga atu i lenei konafesi aoao iloga e faamanatuina ai le Uluai Faaaliga ia Iosefa Samita, o le Atua le Tama ma Lona Alo o Iesu Keriso, i le mea, e le fesiligia, o se Vao Paia. O lena faaaliga o se amataga ofoofogia i le Toefuataiga mai o le talalelei ma sa folasia mai ai mea uma, mai le Tusi a Mamona i le toefaafoi mai o le pule o le perisitua ma ki, o le faatulagaina o le Ekalesia moni a le Alii, o malumalu o le Atua, ma perofeta ma aposetolo o e o loo taitaia le galuega i nei aso e gata ai.

E ala i le mamanu mai luga, na valoia ai e perofeta anamua a le Atua, pe a uunaia ai e le Agaga Paia, le Toefuataiga ma mea o le a oo mai i o tatou taimi, o le toe tisipenisione ma le atoatoaga o taimi. O le galuega tonu lenei na “uunaia agaga” o uluai tagatavaai.¹ I le gasologa o augatupu-laga o taimi, sa latou muai ta’u maia, moemiti, ma vaaia faaaliga, ma valoia le lumanai o le malo o le Atua i le lalolagi, lea na ta’ua e Isaia “o se galuega ofoofogia ma le mea e ofo ai.”²

O valoaga ua faataunuaina e ala i le Toefuataiga o le atoatoaga o le talalelei a Iesu Keriso, e aofia ai le Ekalesia a Iesu Keriso o le Au Paia o

Aso e Gata Ai, e tele. Ae, i le asō, o le a ou faamamafaina ai na o ni nai mea e pele ia te a’u. O mea ia na aoao mai e o’u faiaoga pele o le Peraimeri ma i vae o lo’u tina amioatua.

O Tanielu, o le na faasegisegia leona e ala i lona faatuatua i le Alii o Iesu Keriso ma le talosāaga a agelu o auaunaga a le Atua, o se tasi na vaaia o tatou aso i se faaaliga. I le faamatalaina o se faalepo mo le Tupu Pape-lonia o Nepukanesa, sa valoia ai e Tanielu le Ekalesia a le Alii o le a tulai mai i aso e gata ai, o se maa itiiti “na tofia i le mauga ae lei tofia e lima.”³ “E lei tofia e lima,” o lona uiga e ala i le faaoololoma’au mai luga, o le a faateleina ai le Ekalesia a le Alii i lona aofai seia oo ina tumu ai le lalolagi

uma “e le faaumatia . . . [ae e] tumau lava e faavavau.”⁴

O se molimau maoae e faapea ua faataunuaina upu a Tanielu ao maimoa mai tagata o le Ekalesia, mai tuluiga uma o le laloagi, ma faafogafoga mai i le konafesi i le asō.

Sa faamatalaina e le Aposetolo tuuto o Peteru ia “tausaga e toe fuatai ai mea uma lava . . . talu mai anamua.”⁵ Sa tusia e le Aposetolo o Paulo e faapea o le atoatoaga o taimi, o le a “faapotopotoina [ai e le Atua] . . . [mea uma] ia Keriso.”⁶ “O Iesu Keriso o le maatulimanu lava Ia.”⁷ Sa ou matua lagonaina malosi na valoaga ina ua ou auai i le faapaiaga o le Malumalu o Roma Italia. Sa i ai uma perofeta ma aposetolo iina ma tuuina atu molimau ia Iesu Keriso, o le Togiola o le lalolagi, e pei foi ona sa faia e Peteru ma Paulo. O le Ekalesia o se faataitaiga ola o lena toefuataiga, uso e ma tuafafine, ma o o tatou tagata o ni molimau o na valoaga ua loa mai luga.

Sa valoia e Iosefa o Aikupito e faapea i aso e gata ai “o le a faatu mai e le Alii lo’u Atua se tagatavāai, o lē o le a avea ma tagatavāai filifilia i le fua o o’u sulugatiti.”⁸ “Ona o le a ia faia [le] galuega [a le Alii].”⁹ O Iosefa Samita, le perofeta o le Toefuataiga, o le tagatavaai lena.



Sate Leki i Matu, Iuta, ISA

Na valoia e Ioane le Talifaaaliga se agelu a le Silisiliese e tuu faatasia elemene taua o le Toefuataiga i upu nei: “Na a’u iloa foi le tasi agelu ua lele i le taulotoaiga o le lagi, ua ia te ia le tala lelei e faavavau e folafola atu i e nonofo i le lalolagi i atunuu uma, ma itu aiga, ma gagana eseese, ma nuu.”¹⁰ O Moronae o le agelu lena. Sa vaai o ia i o tatou taimi e pei ona faamaumauina i totonu o le Tusi a Mamona. I le tele o taimi na faaali mai ai o ia, sa ia saunia ai Iosefa Samita mo lana galuega, e aofia ai le faaliliuga o le Tusi a Mamona: O Se Tasi Molimau ia Iesu Keriso.

Na muai ta’u mai e isi perofeta o tatou taimi. Na tautala Malaki e uiga ia Elia e faaliliuina “loto o matua i fanau, maoto o fanau i o latou matua.”¹¹ Ua sau Elia, ma o le taunuuga, o le taimi nei, ua 168 o tatou malumalu ua faagaioi ma ua salalau i le lalolagi. Ua auauna atu malumalu taitasi i tagata agavaa o le Ekalesia ua osia ai feagaiga ma maua ai sauniga paia mo i latou lava faapea o latou tuua ua maliliu. O lena galuega paia sa faamatalaina e Malaki o le “totonugalemu i le fuafuaga a le Fofoa mo le taunuuga e faavavau o Ana fanau.”¹²

Ua tatou ola i lena taimi na valoia, o i tatou o le nuu na nafa ma le faafeaoina o le Afio Mai Faalua o Iesu Keriso; e tatau ona tatou faapotopotoina mai fanau a le Atua, o i latou o le a faalogo ma talia upumoni, feagaiga, ma folafolaga a le talalelei e faavavau. Ua faaigoaina e Peresitene Nelson “o le *luitau* aupito sili, o le *mafuaaga* aupito sili, ma le *galuega* aupito sili ua i ai i le lalolagi i ona po nei.”¹³ Ou te tuuina atu la’u molimau i lena vavega.

O se galuega na tofia ai a’u e Peresitene Russell M. Nelson, ia Fepuari o le tausaga nei sa ou faapaiaina ai le Malumalu o Durban i Aferika i

Saute. O se aso o le a ou manatuaina pea i lo’u olaga atoa. Sa ou mafuta ai faatasi ma tagata o le Ekalesia o e na o mai i le talalelei e faapei ona sa valoia e Ieremia i ona po ua leva—“e taitasi i aai, ma le taitoalua i aiga.”¹⁴ O le aoaoga faavae a Iesu Keriso ua tuu faatasia ai i tatou uma—i le lalolagi atoa—o ni atalii ma afafine o le Atua, o ni uso ma ni tuafafine i le talalelei. Pe o a lava foliga o o tatou lavalava, o i tatou lava o se nuu e tasi i se Tama i le Lagi, o lana fuafuaga mai le amataga sa i ai ma o loo i ai nei e mo Lona aiga ia tuu faatasia e ala i le osia ma tausia o feagaiga paia i le malumalu.

I se potopotoga toaitiiti o e na umia le perisitua i se faleaoga i Katelani, Ohaio, i le 1834, sa valoia ai e le Perofeta o Iosefa, “Ua na o sina aofaiga toaitiiti lava o le Perisitua o loo outou vaai atu i ai i le po nei, ae o lena Ekalesia o le a faatumulia ai Amerika i Matu ma Saute—o le a faatumulia ai le lalolagi.”¹⁵

I tausaga talu ai nei sa ou femalagaai ai i le salafa o le lalolagi e feiloai i tagata o le Ekalesia. Sa faapena foi ni tofitofiga o o’u Uso o le Korama a le Toasefululua. Ae tusa lava, o ai se na te gafataulimaina le faasologa o malaga a lo tatou perofeta pele, o Peresitene Nelson o ana femalagaai i uluai tausaga e lua o le avea ai ma Peresitene o le Ekalesia ua feiloai atu ai o ia i le Au Paia i le 32 atunuu i teritori o le I.S.¹⁶ e molimau atu i le Keriso soifua.

Ou te manatua ina ua ou mauaina lo’u valaauga o le misiona o se alii talavou. Sa ou manao ou te talai i Siamani, e pei o lo’u tama, uso, ma le toalua o lo’u tuafafine. Ou te lei manao e faatali sei taunu mai se isi i le fale, o lea sa ou faanatinati atu ai i le pusameli ma tatala le valaauga.

Sa ou faitauina e faapea ua valaauina a’u i le Misiona a Setete i Sasae, o le laumua e i le Aai o Niu Ioka. Sa ou le fiafia, o lea sa ou alu ai i totonu ma susue a’u tusitusiga paia mo se faamafanafanaga. Sa amata ona ou faitau i le Mataupu Faavae ma Feagaiga: “Faauta, ma tagai ua ia te au ni tagata e toatele i le nofoaga lena, i itulagi faataamilo ai; ma o le a tatalaina se faitotoa aoga i itulagi faataamilo i le lauelele i sasae.”¹⁷ O lena valoaga, na tuuina atu i le Perofeta o Iosefa Samita i le 1833, o se faaaliga mo a’u. Sa ou iloa ina i lena taimi ua valaauina a’u i le misiona tonu na finagalo le Alii ou te galue ai. Sa ou aoa atu le Toefuataiga ma lona amataga maoae na amata ina ua malele mai lo tatou Tama i le Lagi ia Iosefa Samita ma faapea mai, “O Lo’u Atalii Pele Lenei. Faalogo ia te Ia!”¹⁸

E taua tele i le Ekalesia atoa le valoaga a Isaia, na le silia ma le 700 tausaga a o lei soifua mai Iesu Keriso: “O aso e gata ai, e oo ina faatumauina ai o le mauga o i ai le fale o le Alii . . . , ona gasolo ane ai lea o nuu uma i ai.”¹⁹

I lo’u mafaufau i le asō, ua ou vaaia ai le faitau miliona o o tatou tagata ma uo o loo fesootai mai faaeletonika i nei taualumaga e ala i televise, initoneti, ma isi auala. Ua tatou saofafai i lalo e faapei o faatasitasi “i tumutumu o atu mauga.”²⁰ O Polika Iaga lea na saunoa i upu faaperofeta “O le nofoaga tonu lena.”²¹ O le Au Paia, o ni isi o i latou o o’u lava tuua paionia, sa galulue i le faatuina o Siona i Mauga Papa “e ala i le lotoma le finagalo malie o ia o le pulea atunuu uma o le lalolagi.”²²

Ou te tuu atu nei i luga o le elelee sa na tosina maia le faitau miliona o tagata asiasi mai. I le 2002, na talimalo ai le Aai o Sate Leki i taaloga

Olemipeka o le Taumalulu. Sa pepese le Aufaipese a le Tapeneko i sauniga tatala, ma sa ofoina atu e le Ekalesia ia konaseti ma polokalama mo malo ma i latou sa pa'au mai i ai mai le anoanoai o atunuu. O le a ou manatuaina pea lava le vaaia o le malumalu i tua atu o faasalalauga o talafou i po taitasi i le lalolagi atoa.

I le gasologa o le tele o tausaga, sa autovaa mai ai peresitene o le Iunaite Setete, o tupu, faamasino, palemia, amepasa, ma taitai o le tele o atunuu i le Aai o Sate Leki ma feiloai ai ma o tatou taitai. Sa talimalo Peresitene Nelson i taitai o le National Association for the Advancement of Colored People [Mafutaga Faaleatunuu mo le Siitiaina o Tagata Uli], o se faalapotopotoga i le Iunaite Setete ua matua

faatauaina aia tatau tutusa e aunoa ma se faailogalanu. Ou te manatua lo'u tu ai i autafa o nei uo ma taitai a o faatasi atu Peresitene Nelson ia i latou i le faaaloaloga sili atu ma le nofolelei ma ituaiga i le lalolagi.²³

E anoanoai isi ua malaga mai i le Lotoa o le Malumalu ma fefautuaai ai ma taitai o le Ekalesia. Mo se faataitaiga, o le tausaga na te'a nei, o le a ta'ua na o ni isi, sa matou faafeiloa'ia ai le Konafesi a le Mafutaga Taualoa a Malo Aufaatasia Lona 68, o se aofaiga o atunuu uma o le lalolagi, ma o le uluai tauaofiaga muamua lea ua faia i fafo atu o le Aai o Niu Ioka. Sa matou fono ma le Komiti a Viatenama mo Mataupu Faalelotu ma amepasa mai Kiupa, o Filipaina, Atenitina, Romania, Sutana, Qatar, ma Saudi Arabia. Sa

matou faafeiloaia foi le failautusi aoao o le Au Musalemi o le Lalolagi.

O mea o loo ou faamatalatalaina atu o se faataunuuga o le valoaga a Isaia e faapea o aso e gata ai, o le a lolofi mai malo i "le mauga o i ai le fale o le Alii."²⁴ O le Malumalu tele o Sate Leki, o loo tu i le totonugalemu o lena mamalu malualii.

E le o le faataatiaga o teuga o le laufanua o loo ta'a'ina mai ai tagata, e ui ina matagofie la tatou atamamanu; o le fatu o le faatuatuga mama a'ia'i e faaalii i le agaga, faatupu-laia, tusaafia, ma le agalelei o Le Ekalesia

a Iesu Keriso o le Au Paia o Aso e Gata Ai ma ona tagata; o lo tatou alofa e faapei ona alofa mai o le Atua; o lo tatou tautino atu i se galuega e maualuga atu, lea sa ta'ua e Iosefa Samita, "o le fuafuaga faatuina a Keriso."²⁵

Tatou te le iloa pe o afea e toe foi mai ai le Faaola, ae o le mea lenei ua tatou iloa. E tatau ona tatou saunia i le loto ma le mafaufau, ia agavaa e talia o Ia, ma faamamaluina ia avea o se vaega o mea uma ua loa ona valoia.

Ou te molimau atu o Peresitene Russell M. Nelson o le perofeta a le Alii i le lalolagi, ma o i ona autafa ia Aposetolo na valaauina e le Atua, ma lagolagoina o ni perofeta, tagatavaai, ma talifaaaliga. Ma, o'u uso e ma tuafafine, o loo faaauu pea le Toefuataiga.

Ou te faaiu atu i le valoaga a Iosefa Samita, o upu ou te molimau atu ai e moni: "E leai se lima eleelea e mafai ona taofia le galuega mai le alualu i luma; e ono tula'i mai sauaga, e ono tuufaatasia tagata faatupu faalavelave, e ono faapotopotoina vaegaau, e ono taufaasese tuua'iga, ae o le upumoni a le Atua o le a agai pea i luma ma le manino, mamalu, ma le tutoatasi, seia oo ina so'o uma ai konetineta, ma asi-asi atu i atunuu uma, ma aofia ai malo uma, ma lagonaina e taliga uma, seia oo ina faataunuuina faamoemoega o le Atua, ma seia oo ina fetalai mai le Ieova Silisiliese, ua mae'a le galuega."²⁶ Ou te molimau atu ua faataunuuina nei valoaga a Iosefa Samita.

Ou te folafola atu a outou mulimuli i fautuaga musuia a lo tatou perofeta pele, o Peresitene Russell M. Nelson, o ona fesoasoani, o Aposetolo, ma isi taitai o le Ekalesia, ma a outou gauai atu i perofeta anamua o e sa mua'i ta'ua o tatou aso, o le a faatumuina outou, i le ta'ele o outou loto ma agaga, i le agaga ma



Provo, Iuta, ISA



Saunia e Bonnie H. Cordon
Peresitene Aoao o Tamaitai Talavou

le galuega o le Toefuataiga. Ou te folafola atu o le a outou vaai i le aao o le Atua i o outou olaga, faalogo i Ana uunaiga, ma lagonaina Lona alofa. I le suafa o Iesu Keriso, ma le lotofaafetai mo le Toefuataiga mai o Lana talalelei ma Lana Ekalesia, o se faamaoniga o Lona alofa e le mafua-tiaina, amene. ■

FAAMATALAGA

1. *Aoaoga a Peresitene o le Ekalesia: Iosefa Samita* (2007), 515.
2. Isaia 29:14.
3. Tanielu 2:45; tagai foi i le Mataupu Faavae ma Feagaiga 65:2.
4. Tanielu 2:44.
5. Galuega 3:21.
6. Efeso 1:10.
7. Efeso 2:20.
8. 2 Nifae 3:6.
9. 2 Nifae 3:8.
10. Faaaliga 14:6.
11. Malaki 4:6.
12. “O Le Aiga: O Se Folafolaga i le Lalolagi,” *Liahona*, Me 2017, 145.
13. Russell M. Nelson, “Faamoemoe o Isaraelu” (faigalotu a le autalavou i le lalolagi atoa, 3 Iuni, 2018), HopeofIsrael. ChurchofJesusChrist.org.
14. Ieremia 3:14.
15. Iosefa Samita, i le *Aoaoga a Peresitene o le Ekalesia: Wilford Woodruff* (2004), 26.
16. Tagai ia Valerie Johnson, “President Nelson Became the Prophet 2 Years Ago. O Le a Le Mea na Tupu Talu mai Lena Taimi?” *Church News*, Jan. 13, 2020, thechurchnews.com.
17. Mataupu Faavae ma Feagaiga 100:3.
18. Iosefa Samita—Talafaasolopito 1:17.
19. Isaia 2:2; tagai foi i le Mika 4:1–2.
20. Isaia 2:2.
21. O le fasifuaiteu “O le nofoaga tonu lenei” sa muai selu atu ai Uilifoti Uutilafi ia Polika Iaga a o saunoa i se samiga o se Aso o Paionia ia Iulai 1880 (tagai “Pioneer Day,” *Deseret Evening News*, July 26, 1880, 2).
22. Polika Iaga, 31 Mati, 1861. Historian’s Office reports of speeches, 1845–1885; CR 100 317, Box 4, 9 13, Church History Library, Salt Lake City.
23. Tagai i le “First Presidency and NAACP Leaders Call for Greater Civility, Racial Harmony,” Me 17, 2018, newsroom. ChurchofJesusChrist.org.
24. Isaia 2:2; tagai foi i le Mika 4:1–2.
25. *Aoaoga: Iosefa Samita*, 352.
26. *Teachings: Joseph Smith*, 142.

Ina Ia Latou Vaai

Vaai ma tatalo mo avanoa e faasusulu atu ai lou malamalama ina ia mafai e isi ona vaai i le auala ia Iesu Keriso.

Uso e ma tuagane, ua matua faama-nuiaina ma faafouina o tatou loto e le Agaga na tatou lagonaina i lenei konafesi.

I le lua selau tausaga ua mavae, sa i ai se malamalama faaniutu i luga o se alii talavou i se togavao. I totonu o lena malamalama, sa vaai ai Iosefa Samita i le Atua le Tama ma Lona Alo, o Iesu Keriso. Na aveesea e lo La’ua malamalama le pogisa faaleagaga sa ufitia ai le laueleele ma faasino atu le auala i luma mo Iosefa Samita—ma mo i tatou uma lava. Ona o le malamalama na faaali mai i lena aso, ua mafai ai ona tatou maua le atoatoaga o faa-manuiaga ua avanoa e ala i le Togiola a lo tatou Faaola, o Iesu Keriso.

Ona o le Toefuataiga o Lana talalelei, ua mafai ai ona faatumulia i tatou i le malamalama o lo tatou Faaola. Ae peitai, o lena malamalama e le mo na o oe ma a’u. Ua valaau mai Iesu Keriso ia i tatou ia “faasusulu atu lo outou malamalama i luma o lenei nuu, ina ia

latou vaai ai ia outou galuega lelei ma viia lo outou Tamā o i le lagi.”¹ Ou te fialia lava i le fasifuaiteu “ina ia latou vaai.” O se valaaulia faatauanau mai le Alii ina ia atili naunau e uiga i le fesoasoani i isi e vaai i le ala ma o mai ai ia Keriso.

Ina ua 10 o’u tausaga, sa faamama-luina lo matou aiga e talimalo ia Elder L. Tom Perry o le Korama a Apose-tolo e Toasefululua a o i ai i se tofiga i lo’u nuu.

I le faaiuga o le aso, sa saofafai i lalo lo matou aiga ma le aiga o Perry i le matou potu malolo ma fialia i le pai apu tofo lelei a tina a o toefaamatala e Elder Perry tala i Au Paia i le lalolagi atoa. Sa ou maofa.



Provo, luta, ISA



Brigham City, Iuta, ISA

Sa amata ona pogisa ae valaau a'u e lo'u tina i totonu o le umukuka ma fai mai se fesili faigofie: "Bonnie, na e fafagaina moa?"

Sa ou le fiafia; ou te le'i faia. I le lē manao ai e aluese mai le mea o i ai se Aposetolo a le Alii, sa ou fautua atu e mafai ona anapopogi moa seia oo i le taeao.

Sa ma'oti le tali mai o lo'u tina e "leai." O le taimi lea na ulufale mai ai Elder Perry i le umukuka ma fesili mai ma lona leo malosi ma le naunautai, "Na ou faalogo mai ea e tatau i se tasi ona fafaga moa? E mafai ona ma o atu ma si o'u atalii faatasi ma oe?"

Oka, ua avea nei la le fafagaina o moa ma se fiafiaga sili! Sa ou tamo'e atu e aumai le matou moliuila samasama lapo'a. Ma le fiafia, sa ou muamua atu, ma punapuna i luga o le auala tuai i le pa moa. Faatasi ma le moliuila o loo i lo'u lima, na matou sopoia le togā saga ma pasia le faatoaga saito.

I le taunuu atu i le tamai alavai lea e sopoia le ala, sa ou puna i luga ma le lē manatu i ai e pei ona ou faia i le tele o po na muamua atu. Ou te le'i iloa taumafaiga a Elder Perry e tulituli

mai a'u i luga o se auala pogisa ma lē mailoa. Sa le'i fesoasoani la'u moli lea na luelue solo atu ia ona iloa ai le alavai. E aunoa ma se sulu tumau e vaai ai, sa ia tu tonu lava i le vai ma alaga leotele mai. I le popole, sa ou faliu atu ma vaaia la'u uo fou ua aveese lona vae ua susū pala mai le alavai ma lūlū le vai mai lona seevae pa'u mamafa.

Faatasi ma se seevae na susū pala ma tumu i vai, na fesoasoani lava Elder Perry ia te a'u e fafaga moa. Ina ua uma, sa ia fai mai ma le alofa, "Bonnie, e manaomia ona ou vaai i le auala. Ou te manaomia le faasusulu atu o le sulu i le mea o o'u savali ai."

Sa ou faasusuluina atu lo'u sulu ae sa lē o se auala e fesoasoani ai ia Elder Perry. I le iloa i lea taimi sa ia manaomia lo'u sulu e taiala saogalemua ai le ala, sa ou faataulai atu le moliuila i luma atu o ana la'a ma sa mafai ona matou toe foi i le fale ma le toafimalie.

O'u uso e ma tuagane, sa ou mafaufau loloto mo le tele o tausaga i le mataupu faavae sa ou a'oa'oina mai ia Elder Perry. O le valaaulia a le Alii e faasusulu atu lo tatou sulu e lē na o le talotalo solo o lo tatou sulu ma faia ia

atili malamalama ai le lalolagi. E faata-
tau i le faataulai atu o lo tatou sulu ina
ia mafai ai e isi ona vaai atu i le ala ia
Keriso. O le faapotopotoina o Isaraelu
i lenei itu o le veli—fesoasoani i isi ia
vaai i le laasaga e sosoo ai i luma i le
osia ma le tausia o feagaiga paia ma
le Atua.²


Ua molimau mai le Faaola, "Faauta,
o a'u o le malamalama; ua ou faatuina
se faataitaiga mo outou."³ Se'i o tatou
vaai i se tasi o Ana faataitaiga.

O le fafine i le vai eli o se Samaria
sa le'i iloaina Iesu Keriso ma sa vaai i
ai le toatele o ia o se tagata 'ese i lona
lava nuu. Sa feiloai atu Iesu ia te ia ma
amatalia se talanoaga. Sa ia fetalai atu
ia te ia e uiga i le vai. Ona Ia taitai lea
o ia i le malamalama faateleina a o Ia
tautino atu o Ia Lava o le "vai ola."⁴

Sa silafia ma le alofa e Keriso o
ia ma ona manaoga. Sa feiloai o Ia i
le fafine i le nofoaga sa i ai o ia ma
amata i le fetalai atu e uiga i se mea
masani ma taatele. Ana fai Na te taofi
iina, semanu e avea o se feiloaiga
lelei. Ae semanu e lē alu atu o ia i le
aai e folafola atu, "Ina o mai ia ina
vaai . . . : pe le o le Keriso ea lea?"⁵ Sa
faasolosolo lava, e ala i le talanoaga,
na ia iloaina ai Iesu Keriso, ma e ui i
lona taimi ua tuanai, sa avea o ia ma
se meafaigaluega o le malamalama, na
faasusulu atu le ala mo isi ia vaai ai.⁶

Ia se'i o tatou vaai i ni tagata se
toalua na mulimuli i le faataitaiga a le
Faaola o le faasusuluina atu o le mala-
malama. Talu ai nei sa nofo ai la'u uo
o Kevin i talaane o se tagata fai pisinisi
i le taumafataga o le afiafi. Sa popole
o ia i mea e talanoa i ai mo le lua itula.
I le mulimuli ai i se uunaiga, na fai atu
ai Kevin, "Ta'u mai ia te a'u e uiga i lou
aiga. O fea latou te o mai ai?"

Sa ititi se mea sa iloa e le alii lea e
uiga i lona tupuaga, o lea sa aumai ai
i fafo e Kevin lana telefoni, ma fai atu,



“E i ai sa’u polokalama e fesootai ai tagata i o latou aiga. Se’i ta vaai po o a mea e mafai ona ta mauaina.”

I le mavae ai o se talanoaga umi, na fesili le uo fou a Kevin, “Aisea e taua tele ai aiga i lau lotu?”

Na tali atu faigofie Kevin, “Matou te talitonu e faaauau pea ona tatou feola pe a mavae ona tatou feoti. Afai tatou te faailoa a tatou tuua ma ave o latou igoa i se nofoaga paia ua ta’ua o se malumalu, e mafai ona tatou faatino sauniga o le faaipopoga lea e tuufaatasia ai o tatou aiga e oo lava pea a mavae le oti.”⁷

Sa amata e Kevin se mea sa tutusa ai i la’ua ma lana uo fou. Ona ia maua lea o se auala e molimau atu ai i le malamalama ma le alofa o le Faaola.

O le tala lona lua e uiga ia Ella, o se tagata taalo pasiketipolo i le kolisi. O lana faataitaiga na amata ina ua ia maua lana valaauga o le misiona a o malaga ese i le aoga. Sa ia filifili e tatala lona valaauga i luma o lana au. Toetoe lava a leai se mea latou te iloa e uiga i le Ekalesia a Iesu Keriso ma sa le malamalama i le manao o Ella e auauna atu. Sa ia tatalo pea ia iloa le auala e faamatala ai lona valaauga o

le misiona i se ala e ono lagona ai e lana au taaalo le Agaga. O lana tali?

“Sa ou faia se PowerPoint,” o le tala lea a Ella, “ona e seki a a’u.” Sa ia ta’u atu ia i latou le faamoemoega o le auauna atu i se tasi misiona e 400-ma ona tupu ma e ono aoaina ai se gagana. Sa ia ta’ua le faitau afe o faifeautalai o loo auauna atu. Sa faaiu e Ella i se ata o le Faaola ma le molimau puupuu leni: “O le pasiketipolo o se tasi lea o mea e sili ona taua i lo’u olaga. Sa ou siitia atu i le isi itu o le atunuu ma tuua lo’u aiga ia ou taalo mo leni faiaoga ma faatasi ma leni au. Pau lava mea e lua e sili atu ona taua ia te a’u nai lo le pasiketipolo o lo’u faatuatuaga ma lo’u aiga.”⁸

Ia, ne’i tou mafaufau, “O ni faataitaiga maoae nei e 1,000-uati, ae o a’u o se matāuila e 20-uati,” manatua na molimau mai le Faaola, “O a’u o le malamalama lea e tatau ona outou tuu i luga.”⁹ Ua Ia faamanatu mai ia i tatou o le a Ia aumaia le malamalama pe a tatou faasino atu isi ia te Ia.

Ua lava le malamalama o ia te oe ma a’u e faasoa atu *i le taimi nei*. E mafai ona tatou faamalamalama le isi laasaga e fesoasoani i se tasi ia latalata atili ai ia Iesu Keriso, ona sosoo lea ma le isi laasaga, ma le isi.

Fesili ia te oe lava, “O ai o manaomia le malamalama o ia te oe e maua ai le auala latou te manaomia ae e lē o mafai ona vaai i ai?”

A’u uo pele, aisea ua matuai taua ai lo tatou faasusulu atu o lo tatou malamalama? Ua fetalai mai le Alii ia i tatou e faapea “o loo i ai tagata e toatele i luga o le lalolagi . . . o e ua nao na taofia mai le upumoni ona ua latou lē iloa le mea e maua ai.”¹⁰ E mafai ona tatou fesoasoani atu. E mafai ona tatou loto e faasusulu atu lo tatou malamalama ina ia mafai e isi ona vaai ai. E mafai ona tatou tuuina

atu se valaaulia.¹¹ E mafai ona tatou savalia le faigamalaga ma i latou o ē faia se laasaga agai i le Faaola, e tusa lava pe faigata. Tatou te mafaia ona tatou faapotopoto Isaraelu.

Ou te molimau atu o le a faalauteleina e le Alii taumafaiga laiti uma. O le a musuia i tatou e le Agaga Paia ia iloa mea e ta’u atu ma fai. O ia taumafaiga e ono manaomia ai lo tatou o ‘ese mai o tatou tulaga mafanafana, ae tatou te mautinoa o le a fesoasoani mai le Alii ia susulu atu lo tatou malamalama.

E maeu lo’u faafetai mo le malamalama o le Faaola, lea o loo taitaia pea leni Ekalesia e ala i faaaliga.

Ou te valaaulia i tatou uma ia mulimuli i le faataitaiga a Iesu Keriso ma ia nofouta ma le agaaloa i tagata o siomia i tatou. Vaai ma tatalo mo avanoa e faasusulu atu ai lou malamalama ina ia mafai e isi ona vaai i le auala ia Iesu Keriso. E maoae Lana folafolaga: “O lē mulimuli mai ia te au, e le savali o ia i le pouliuli, a e ia te ia le malamalama o le ola.”¹² Ou te molimau atu o lo tatou Faaola, o Iesu Keriso, o le ala, le upu moni, le ola, malamalama, ma le alofa o le lalolagi. I le suafa o Iesu Keriso, amene. ■

FAAMATALAGA

- 3 Nifae 12:16.
- Tagai ia Russell M. Nelson “Faamoemoe o Isaraelu” (faigalotu a le autalavou i le lalolagi atoa, Iuni 3, 2018), HopeofIsrael. ChurchofJesusChrist.org.
- 3 Nifae 18:16.
- Tagai i le Ioane 4:9–30.
- Ioane 4:29.
- Tagai ia Robert and Marie Lund, “O Le Faaaloalo a le Faaola mo Tamaitai,” *Liahona*, Mat. 2015, 32–36.
- Tusitusiga patino.
- Tusitusiga patino.
- 3 Nifae 18:24.
- Mataupu Faavae ma Feagaiga 123:12.
- Tagai ia Dieter F. Uchtdorf, “Galuega Faafaifeautalai: Faasoaina atu o Mea o Loo i Totonu o Lou Loto,” *Liahona*, Me 2019, 15–18.
- Ioane 8:12.



Saunia e Elder Jeffrey R. Holland
O Le Korama a Aposetolo e Toasefululua

O Se Malamalama Atoatoa o le Faamoemoe

Ona ua toe faamautu mai e le Toefuataiga le upumoni faalefaavae faapea e galue le Atua i lenei lalolagi, e mafai ona tatou faamoemoe, e tatau ona tatou faamoemoe, tusa lava pe tatou te fetai ai ma mea e ono le gafataulimaina.

Ia Oketopa talu ai, na valaaulia ai i tatou e Peresitene Russell M. Nelson e vaavaai atu i *luma* i le konafesi lenei ia Aperila 2020 e ala ia i tatou taitoatasi i o tatou lava auala e toe tepa ai i *tua* ma vaaia le aao maoae o le Atua i le toefuataiina mai o le talalelei a Iesu Keriso. Sa matuai mamafa ia i ma'ua ma Sister Holland lena valaaulia faaperofeta. Sa ma vaai faalemafaufau ia i ma'ua lava faapea o loo ma ola i le

popofou o le vaitau o le 1800, vaavaai atu i talitonuga faalelotu o lena aso. I lena faatulagana faalemafaufau, sa matou fesili ai ia i matou lava, “O le a se mea o misi iinei? O le a se mea ma te moomoo ma'imau pe a na ma maua? O le a se mea o ma *faamoemoe* o le a saunia e le Atua e tali mai ai i o ma moomooga faaleagaga?”

Ia, mo se mea e tasi, sa ma iloa ai o le lua seneturi talu ai, semanu ma te faamoemoe ma le naunautai mo le toefuataiga o se manatu faavae e sili atu ona moni a le Atua nai lo le tele na maua e tagata i lena taimi, na natia e pei ona foliga e tele ina Ona faia ai i tua atu o seneturi o talitonuga sese ma le malamalama sese. I le faaao-gaina o se fasifuaiteu mai ia William Ellery Channing, o se failotu lauiloa i na ona po, semanu ma te sailia le “uiga faamatua o le Atua,” lea na manatu Channing “o le uluai aoaoga faavae sili lea o le faaKerisiano.”¹ O lena aoaoga faavae semanu e aloaia ai le Atua o se Tama i le Lagi e manatu

alofa, nai lo o se faamasino 'ina'inā e tolaulau maia faamasinoga maua'i po o se pule o le fanua ua le o i ai, o sē sa punouai i mataupu faalelalolagi ae ua popona i se isi mea i le atulaulau.

Ioe, o o ma faamoemoega i le 1820 o le sailia o le Atua o loo fetalai mai ma taitaia faalauaitete i le taimi nei e pei ona Ia faia i le taimi ua mavae, o se Tama moni, i le tulaga sili ona alofa o lena upu. E mautinoga lava semanu e *le* o Ia o se tagata e faasausili, tuufaitalia e pule malosi, o le e muai filifilia ni nai tagata mo le faaolataga ona tuu atu lea i e o totoe o le fanauga a tagata ia malaia. E leai, o ia o lē o ana taga uma, e ala i le tautinoga paia, e faia “mo le manuia o le lalolagi; ona ua alofa o ia i le lalolagi”² ma i latou uma o e nonofo ai. O lena alofa o Lana mafuaaga tupito lea mo le auina mai o Iesu Keriso, Lona Alo Pele, i le lalolagi.³

I le ta'ua ai o Iesu, pe ana faapea o ma ola ai i na uluai tausaga o le seneturi 19, semanu ma te iloina ma le atugaluga ma le popole tele o masalosologa e uiga i le moni o le soifuaga o le Faaola ma le Toetu ua amata ona i ai tosinaga tele i atunuu Kerisiano. O le mea lea, semanu ma te faamoemoe mo se faamaoniga e oo mai i le lalolagi atoa e faamautu ai le molimau faatusi paia e faapea o Iesu o *le* Keriso, o le Alo moni o le Atua, le Alefa ma le Omeka, ma na o Ia lava le Faaola o le a iloa e lenei lalolagi. Semanu o se tasi o o ma'ua faamoemoega aupito taua ia aumaia foi i luma isi faamaoniga faatusi paia, o se mea e mafai ona fau ai se isi molimau ia Iesu Keriso, e faalauteleina ma faaleleia ai lo ma'ua iloa o Lona soifua mai faavavega, o Lana misiona ofoofogia, taulaga togiola, ma le Toetu mamalu. O le mea moni o sea pepa o faamatalaga o le “amiotonu [na auina]



Provo, luta, ISA



mai i lalo mai le lagi, ma le upumoni [na auina atu] i fafo mai le eleele.⁴


O le matauina o le lalolagi Kerisiano i na ona po, semanu ma te faamoemoe e saili se tasi na faatagaina e le Atua i le pule moni o le perisitua e mafai ona papatisoina i ma'ua, faaee mai le meaalofo o le Agaga Paia, ma tuuina mai sauniga o le talalelei e tatau ai mo le faaeaga. I le 1820, semanu ma te faamoemoe e vaai o faataunuu ia folafolaga mamana a Isaia, Mika, ma isi perofeta anamua e faatatau i le toefoi mai o le maota mamalu o le Alii.⁵ Semanu ma te sagisagi fiafia e vaai i le mamalu o malumalu paia na toe faatutuina, faatasi ai ma le Agaga, o sauniga, o le mana, ma le pule e a'oa'o atu ai upumoni e faavavau, faamalolo manu'a patino, ma fusia faatasi aiga e faavavau. Semanu ou te suea i soo se mea ma mea uma ia maua se tasi e i ai le pule e fai mai ia te a'u ma si a'u pele o Patricia, o le ma faaipoipoga i sea nofoaga ua faamaufaailogaina mo le olaga nei ma le faavavau atoa, ma le le toe faalogo atu lava pe tau ta'u mai ia i ma'ua le fetuu faatalutalua "seia tatala oulua e le oti." Ou te iloa "e tele maota e nonofo ai i le fale o lo [tatou] Tama,"⁶ ae peitai, i sa'u lava tala, afai ou te laki tele e maua se tasi o na mau maota, atonu e le telē atu ia te a'u nai lo o se faasee pala pe afai matou te le o faatasi ma Pat ma le ma fanau e maua ai lena tofi. Ma mo

ma augatama, o nisi o i latou o e sa soifua ma ua maliliu anamua, e aunoa ma le faalogo i le suafa o Iesu Keriso, semanu ma te faamoemoe mo lena manatu faavae amiotonu ma le alofa mutimutivale faaletusi paia ia toefuatai mai—o le faiga o le ofoina atu e e o soifua ia sauniga faaola mo o latou aiga ua maliliu.⁷ E leai se isi faiga e mafai ona ou mafaufauina e faaalua ai ma le matagofie tele se popolega o se Atua alofa mo tagata uma o Ana fanau i le lalolagi tusa lava pe o anafea sa soifua ai pe o fea foi na maliliu ai.

Ia, o la ma lisi o faamoemoega o le 1820 e mafai ona alu pea lava, ae atonu o le savali aupito taua o le Toefuataiga e faapea, ia 'a'ua ne'i lē taulau na faamoemoega. Na amata i le Vao Paia ma faaauau pea lava e oo mai i lenei taimi, o nei naunauga na amata ona tino moni mai ma avea ai, e pei ona sa a'oa'o mai e le Apose-tolo o Paulo ma isi, o taula moni o le agaga, e le matosina ma ua mausali.⁸ O le mea sa na ona faamoemoe i ai ua avea nei ma talafaasolopito.

O lea la, o le mea lea e tatau ai ona toe tepa i tua i le 200 tausaga o le agalelei o le Atua i le lalolagi. Ae faapefea le ma vaai i luma? O loo i ai lava o ma faamoemoega e le'i faataunuuina lava. E oo lava i lenei taimi o tatou talanoa ai, o loo tatou tau i se taua "ua manaomia uma ai tagata" e faasaga i le KOVITI-19, o se faamanatu paia e mafai e se vairasi⁹ e faa-1,000 lona

ititi ifo i lo le ninii o se oneone¹⁰ ona aveina le lalolagi atoa ma tamaoaiga i le lalolagi atoa i o latou tulivae. Tatou te tatalo mo i latou ua maliliu ē pele ia i latou i lenei mala i aso nei, faapea foi ma i latou o e ua aafia po o lamatia i le taimi nei. E mautinoa lava lo tatou tatalo mo i latou o loo tuuina atu se tausiga matagofie tau le soifua malolo. Pe a tatou manumalo ai i lenei mea—ma o le a tatou [manumalo]—tau ina ia tatou tuuto tutusa atu i le faasaolotoina o le lalolagi mai le vairasi o le fiaai, faasaolotoina o tuaoi ma malo mai le vairasi o le mativa. Tau ina tatou faamoemoe mo a'oga o loo aoaoina ai tamaiti a'oga—ia le fefefe ne'i tafanaina i latou—ma mo le meaalofo o le faaaloalo patino mo fanau taitasi a le Atua, ia le faasi'ugutua i soo se tulaga o le lanu, ituaiga, po o se faiga faailogalanu ona o le lotu. A faapuupuuna nei mea uma o lo ma faamoemoe pea lea mo se tuuto sili atu i poloaiga sili e lua: ia alolofa i le Atua e ala i le tausisia o Lana apoapoaiga ma ia alolofa i o tatou tuaoi e ala i le faailoa atu o le agalelei ma le agaalofo, onosai ma le lotofaamagalo.¹¹ O nei poloaiga paia sili e lua, o loo i ai pea—ma e faavavau ma o le a tumau pea—na pau lo ma faamoemoega moni mo le tuuina atu ia tatou fanau o se lalolagi sili atu nai lo le lalolagi ua latou iloa nei.¹²



Taboão de Serra, São Paulo, Pasila

E faapoopo atu i le mauaina o nei manaoga i le lalolagi, e toatele o i ai i lenei aofia e i ai ni faamoemoega patino loloto: faamoemoe mo se faaipoipoga ia faaleleia, po o nisi taimi e na ona faamoemoe mo se faaipoipoga, faamoemoe mo se vaisu ia faatoilaloina; faamoemoe mo se atalii/afafine ua se ia toe foi mai, faamoemoe mo se tiga faaletino ma faalelagona o le mau ituaiga ia muta. Ona ua toe faamautu mai e le Toefuaiga le upumoni faalefaavae faapea e galue le Atua i lenei lalolagi, e *mafai* ona tatou faamoemoe, e *tatau* ona tatou faamoemoe, tusa lava pe tatou te fetaii ma mea e ono le gafataulimaina. O le uiga lea o le mau ina ua mafai e Aperaamo ona faamoemoe i se mea na ono le mafai ona tupu¹³—o lona uiga, sa mafai ona talitonu o ia e ui lava i mafuaaga uma ia *lē* talitonu ai—faapea e mafai e i la’ua ma Sarai ona fanauina se tamaitiiti ina ua foliga mai e matua le mafai lava. O lea, ou te fesili ai, “afai o le tele na’ua o o tatou faamoemoega o le 1820 sa mafai ona amata ona faataunuina i se emo mai o le malamalama i le lagi i se tama itiiti na tootuli i se pupu laau i matu o le setete o Niu Ioka, aisea la tatou te le faamoemoe ai i manaoga amiotonu ma faanaunauga faaKeriso ia taliina ofoofogia, ma faavavega e le Atua o i ai le faamoemoega uma?” E ao ina tatou talitonu uma o mea tatou te mananao ai i le amiotonu e mafai ona i ai se aso, se ala, e avea ai mo tatou.

Uso e ma tuafafine, ua tatou iloa nisi o vaivaiga faaletonu i le popofou o le seneturi 19. E le gata i lea, ua tatou iloa foi se mea e uiga i faaletonu faalelotu i nei aso o loo tuua ai pea ē fia aai ma le faamoemoe o nisi e lei faataunuina. Ua tatou iloa o na gaulemalie eseese ua taitai ese atu ai nisi mai faapotopotoga faalelotu

masani. Ua tatou iloa foi, e pei ona tusia e se tasi tusitala lē fiafia, e faapea “e toatele taitai faalelotu [o na ona po] e foliga sa matua le malamalama” i le taulimaina o lea ituaiga o tulaga faifo, sa avea ma a latou tali “se meaai sua-vaia, o se ituaiga lotu e manatu ifo ai tagata o la e lelei, e pupū tele ai i mea e lē taua, e faaupu ai ma le faaeteete mea e leaga ia logomalie [po o nisi foi taimi] o talavalea e le musuia”¹⁴—ma o nei mea uma sa faia i se taimi na matua manaomia ai e le lalolagi ni mea e sili atu, o le taimi ua alagataata ai mo tupulaga faia’e le anoanoai o mea, ma i ona po o Iesu sa Ia ofoina mai le anoanoai o mea. I le avea ai ma soo o Keriso, e mafai ona tatou tutula’i i luga a’e o na Isaraelu anamua o e na fai mai, “Ua mamago o matou ivi, ma ua leai so matou faamoemoe.”¹⁵ E moni, afai e iu ina leai so tatou faamoemoe, ua tatou le maua la a tatou toe ‘oa faai tumau. O luga tonu lava o le faitotoa o seoli lea na tusia ai e Dante se lapataiga i ē uma e malaga e ui atu i lana *Divina Commedia*: “Ia lafoai uma le faamoemoe,” na ia fai mai ai, “outou o e ulufale mai iinei.”¹⁶ E moni, pe a mou atu le faamoemoe, o le mea o totoe ia i tatou o le sasao o le afi mumu matamataita o seoli i ona itu uma.

O lea la, a tuta’ia ua leai se faamoemoe ma, pei ona fai mai le viiga “ua toilalo isi fesoasoani ma ua sola foi le filemu,”¹⁷ o loo i ai faatasi ma isi o o tatou uiga faaleatua e sili ona tatau ai lenei meaalofa taua o le faamoemoe e soofaatasi pea i lo tatou faatuatua i le Atua ma lo tatou alofa mama i isi.

I lenei tausaga o le faamanatuina o le luaselau tausaga, pe a tatou toe tepa i tua e vaavaai atu i mea uma ua tatou maua ma olioli i le iloa ai o le tele na’ua o faamoemoega ua faatau- nuina, ou te toe ta’ua ai le manatu

o se tamaitai faifeautalai matagofie ua foi mai, o le na fai mai ia i matou i Johannesburg i na o ni nai masina talu ai, “[Tatou] te lei o mai i lenei mamao, ia tau na ona oo mai i lenei mamao.”¹⁸

I le toefaaupuina o se tasi o saunoga sili ona musuia faalaeiau ua tusia i tusitusiga paia, ou te faapea atu ai faatasi ma le perofeta o Nifae ma lena tuafafine talavou:

“O’u uso e [ma tuafafine] pele, [ona ua maua e outou nei uluai fua o le Toefuataiga], ou te fesili atu, po ua faia ea mea uma? Faauta, ou te fai atu ia te outou, E leai. . . .

“ . . . E tatau ai ona outou fetuomi atu i luma ma le tumau ia Keriso, *ma se susulu atoatoa o le faamoemoe*, ma le alofa i le Atua ma tagata uma. . . . Afai o le a outou faia[,] . . . ua fetalai mai ai le Tama: O le a outou maua le ola e faavavau.”¹⁹

Ou te faafetai, o’u uso e ma tuafafine, mo mea uma ua tuuina mai ia i tatou i lenei tisipenisione faaii ma le aupito sili, o le tisipenisione o le talalelei toefuataiina a Iesu Keriso. O meaalofa ma faamanuiaga ua tafe mai lena talalelei o mea uma ia e taua ia te a’u—mea uma—i se taumafaiga la e faafetai atu i lo’u Tama i le Lagi mo ia mea, ua ia te a’u ni “folafolaga e tausia, ma ni maila e savalia ae ou te le’i moe, ma ni maila e savalia ae ou te le’i moe.”²⁰ Tau ina ia fetuomi atu i luma ma le alofa i o tatou loto, ma savavali i le “atoatoa o le faamoemoe,”²¹ lea e faamalalamalaina le ala o faanaunauga paia ua tatou i ai nei mo le 200 tausaga. Ou te molimau atu o le a tumu le lumanai i vavega ma taumasuasua i faamanuiaga e pei ona sa i ai i le tuanai. Ua ia i tatou mafuaaga uma e faamoemoe ai mo faamanuiaga e sili atu nai lo na faamanuiaga ua uma ona tatou maua aua o le galuega lenei a le Atua Silisiliese,



Saunia e Elder David A. Bednar
O Le Korama a Aposetolo e Toasefululua

o le Ekalesia lenei o faaaliga faifai-
pea, ma o le talalelei lenei a Keriso
o le alofa tunoa ma le agalelei lē
faatuaioia. Ou te molimau atu ai i nei
upumoni uma ma le tele o isi mea i
le suafa o Iesu Keriso, amene. ■

FAAMATALAGA

1. “The Essence of the Christian Religion,” in *The Works of William E. Channing* (1888), 1004.
2. 2 Nifae 26:24.
3. Tagai i le Ioane 3:16–17.
4. Mose 7:62.
5. Tagai i le Isaia 2:1–3; Esekielu 37:26; Mika 4:1–3; Malaki 3:1.
6. Ioane 14:2.
7. Tagai i le 1 Korinito 15:29; Mataupu Faavae ma Feagaiga 128:15–17.
8. Tagai i le Eperu 6:19; Eteru 12:4.
9. Tagai ia Na Zhu ma isi, “A Novel Coronavirus from Patients with Pneumonia in China, 2019,” *New England Journal of Medicine*, Feb. 20, 2020, 727–33.
10. Tagai “Examination and Description of Soil Profiles,” in *Soil Survey Manual*, ed. C. Ditzler, K. Scheffe, and H. C. Monger (2017), nrsc.usda.gov.
11. Tagai i le Mataio 22:36–40; Mareko 12:29–33; tagai foi i le Levitiko 19:18; Teuteronomie 6:1–6.
12. Tagai i le Eeru 12:4.
13. Tagai i le Roma 4:18.
14. R. J. Snell, “Quiet Hope: A New Year’s Resolution,” *Public Discourse: The Journal of the Witherspoon Institute*, Dec. 31, 2019, thepublicdiscourse.com.
15. Esekielu 37:11.
16. O le fasifuaitau lenei e pei ona lauiloa lona faaliliuga. Peitai, o le faaliliuga e sili ona faa’uputo o le “Ia lafoai uma le faamoemoe, outou o e ulufale mai iinei” (Dante Alighieri, “The Vision of Hell,” i le *Divine Comedy*, trans. Henry Francis Cary [1892], canto III, line 9).
17. “Afio Mai” *Viiga*, nu. 92.
18. Judith Mahlangu (multistake conference near Johannesburg, South Africa, Nov. 10, 2019), in Sydney Walker, “Elder Holland Visits Southeast Africa during ‘Remarkable Time of Growth,’” *Church News*, Nov. 27, 2019, thechurchnews.com.
19. 2 Nifae 31:19-20; faapoopo le faamamafa.
20. “Stopping by Woods on a Snowy Evening,” lines 14–16, in *The Poetry of Robert Frost: The Collected Poems*, ed. Edward Connery Lathem (1969), 225.
21. 2 Nifae 31:20.

“Ia Fausia Lenei Fale mo Lo’u Igoa” (Mataupu Faavae ma Feagaiga 124:40)

O feagaiga e mauaina ma sauniga e faatinoia i totonu o malumalu e taua i le faapaiaina o o tatou loto ma mo le faaeaga mulimuli o atalii ma ni afafine o le Atua.

I le Vao Paia i le 200 tausaga talu ai, sa vaai ai ma talanoa le taulealea o Iosefa Samita i le Atua, le Tama Faava-vau, ma Lona Alo, o Iesu Keriso. Mai ia i La’ua, sa aoao ai Iosefa e uiga i le natura moni o le Aiga Atua faapea ai ma faaaliga faifai pea ina ua amatalia e lenei faaaliga faalelagi i aso e gata ai le “tisipenisione o le atoaga o taimi.”¹

Pe tusa ma le tolu tausaga mulimuli ane, i le tali mai i se tatalo naunautai i le afiafi o le aso 21 o Setema, 1823, na faatumulia ai le potumoe o Iosefa i le malamalama seia oo ina “sili atu le malamalama o le potu nai lo le aoauli.”² Sa tu atu se tagata i autafa o lona moega, ma ta’u le taulealea i lona igoa ma ta’u atu “o ia o se avefeau na auina mai mai le Atua . . . ma o lona igoa o

Morona.”³ Sa ia aoaoina Iosefa e uiga i le oo mai o le Tusi a Mamona.

Ona sii mai lea e Morona e se mau mai le tusi a Malaki i le Feagaiga Tuai, e fai si eseese lailaiti i le gagana o loo faaogaina i le King James Version:

“Faauta, o le a Ou faaali atu ia te outou le Perisitua, e ala i le lima o Elia le perofeta, ae lei oo i le oo mai o le aso tele ma le matautia o le Alii. . . .

“Ma o le a ia totona i loto o fanau folafolaga na faia i tamā, ma o le a



Rexburg, Idaho, ISA

liliu atu loto o fanau i o latou tamā. Afai e lē faapea, o le a faaumatia atoa le lalolagi i lona afio mai.”⁴

O le mea taua, o faatonuga a Moronae ia Iosefa Samita e uiga i le misiona a Elia na amatalia ai galuega faalemalumalu ma talafaasolopito o aiga i aso e gata ai ma o se elemene autu i le toefuataiina mai “o mea uma, ua fetalaiā mai e le Atua i fofoga o ana perofeta paia uma lava talu mai anamua.”⁵

Ou te tatalo mo le fesoasoaniga a le Agaga Paia a o tatou a’oa’o faatasi e uiga i feagaiga, sauniga, ma faamanu- iaga o loo avanoa mo i tatou i totonu o malumalu o Le Ekalesia a Iesu Keriso o le Au Paia o Aso e Gata Ai.

O Le Toe Foi mai o Elia

Ou te amata i le fesili atu i se fesili taua: aisea na taua ai le toe foi mai o Elia?

“Ua tatou aoao mai i faaaliga o aso e gata ai o Elia na umiaina le mana o faamauga o le Perisitua Mekisateko”⁶ ma o le perofeta mulimuli lea na ia faia lea mea a o le’i oo atu i le taimi o Iesu Keriso.”⁷

Sa faamalamalama mai e le Perofeta o Iosefa Samita: “O le agaga, mana, ma le valaauga o Elia o le i ai ia te oe o le mana e umia ai ki o le . . . atoatoaga o le Perisitua Mekisateko . . . ; ma ia . . . maua . . . sauniga uma lava o le malo o le Atua, e oo lava i le faali- liuina o loto o tama i fanau, ma loto o fanau i tama, e oo lava ia i latou e o loo i le lagi.”⁸

O leni pule paia o faamauga e taua [aual] “o soo se mea e te faamauina i le lalolagi, o le a faamauina foi lea i le lagi; ma o soo se mea e te tālā i le lalo- lagi, o le a tatalaina foi lea i le lagi.”⁹

Sa faamanino atili mai e Iosefa: “E faapefea ona afio mai le Atua e laveai- ina leni tupulaga? O le a Ia auina mai Elia le perofeta. . . . O le a faaaliga mai

e Elia feagaiga e faamauina ai loto o tama i fanau, ma le fanau i tama.”¹⁰

Sa faaali atu Elia ma Mose i luga o le Mauga o Liua ma faaee atu leni pule i luga o Peteru, Iakopo, ma Ioane.¹¹ Sa toe faaali atu foi Elia ma Mose ma Elaia i le aso 3 o Aperila, 1836, i le Malumalu o Katelani ma faa- ee atu ia lava ki e tasi o le perisitua i luga o Iosefa Samita ma Oliva Kaotui.¹²

O le toefuataiga e Elia o le pule mo faamauga i le 1836 sa tatau ai ina ia saunia le lalolagi mo le Afio Mai Faalua o le Faaola ma amatalia ai se naunau faateleina i le lalolagi atoa i suesuega o talafaasolopito o aiga.

Suiina, Liliuina, ma le Faamamaina o Loto

O le upu *loto* e silia ma le faa-1000 ona faaogaina i tusitusiga faavae. O leni upu faigofie ae taua e tele ina faasino atu i lagona o’oo’o o se tagata. O o tatou loto—o le aofaiga atoa lea o o tatou manaoga, alofa, faamoemoega,

faanaunautaiga, ma uiga—ua faauiga- ina ai po o ai i tatou ma iloa ai tagata o le a avea ai i tatou. Ma o le ute o le galuega a le Alii o loo suiina, liliuina, ma faamamaina loto e ala i feagaiga o le talalelei ma sauniga o le perisitua.

Tatou te le o fausiaina pe ulufale atu i malumalu paia e tau na ona maua ai se aafiaga faaletagata lava ia pe faaleaiga e manatua pea. Ae, o feagaiga e mauaina ma sauniga e faa- tinoina i totonu o malumalu e taua i le faapaiaina o o tatou loto ma mo le faaeaga mulimuli o atalii ma ni afafine o le Atua.

O le totona i loto o fanau o folafolaga na faia i tama—e oo lava ia Aperaamo, Isaako, ma Iakopo— liliuina o loto o fanau i o latou lava tama, faatautaiga o sailiga o talafaasolopito o aiga, ma le faatinoina o sauniga sui o le malumalu, o galuega ia e manuia ai tagata taitoatasi i itu uma e lua o le veli. A o tatou auai ma le naunautai i leni galuega paia, ua



UA TOEFUATAI MAI E ELIA IA KI O LE MANA E FAAMAU AI O LE PERISITUA, SAUNIA E ROBERT T. BARRETT



tatou usitai i poloaiga ia alolofa atu ma auauna atu i le Atua ma o tatou tuaoi.¹³ Ma o lea auaunaga lē manatu faapito ua fesoasoani moni ia i tatou ia “Faa-logolo ia te Ia!”¹⁴ ma o mai i le Faaola.¹⁵

O feagaiga ma sauniga o le perisitua sili ona paia ua na o totonu o se malumalu e maua ai—le maota o le Alii. O mea uma e aoaoina ma mea uma e faia i totonu o le malumalu ua faamamafa mai ai le paia o Iesu Keriso ma Lana matafaioi i le fuafuaga sili o le fiafia a le Tama Faalelagi.

Mai Totonu i Fafo

Sa faamatala mai e Peresitene Ezra Taft Benson se mamana taua e faaaogaina e le Togiola i le aumaia o le “tino ola pea ma le ola faavavau o le tagata.”¹⁶ Sa ia saunoa: “E galue le Alii mai totonu i fafo. E galue le lalolagi mai fafo i totonu. E ave ese e le lalolagi tagata mai tulaga eleelea. E ave ese e Keriso tulaga eleelea mai tagata, ona latou ave ese ai lea o i latou mai tulaga eleelea. E suia e le lalolagi tagata e ala i le suia o lo latou siosiomaga. E suia e Keriso tagata ona latou suia ai lea o lo latou siosiomaga. E sui e le lalolagi amioga faaletagata, ae e mafai e Keriso ona suia uiga faaletagata.”¹⁷

O feagaiga ma sauniga o le perisitua e totonugalemu i le faagasologa faifai pea o le toefanuina ma suiga faaleagaga; o auala foi ia e galue ai le Alii ia i tatou taitoatasi *mai totonu i fafo*. O feagaiga e faamamaluina ma le mausali, e manatua pea i taimi uma, ma tusia i “le Agaga o le Atua

soifua . . . i papatusi aano o le loto”¹⁸ ua maua ai le faamoemoega ma le faamautinoaga o faamanuiaga i le olaga faaletino ma mo le faavavau. O sauniga e taliaina ma le agavaa ma manatuaina e le aunoa, e tatala ai auala faalelagi e mafai ai ona tafe mai le mana o le amio atua i o tatou olaga.

Tatou te le o mai i le malumalu e lalafi ai pe sosola ese ai mai mea leaga o le lalolagi. Ae, tatou te o mai i le malumalu e faatoilalo le lalolagi o mea leaga. Pe a tatou valaaulia i o tatou olaga le “mana o le faale-atua”¹⁹ e ala i le mauaina o sauniga o le perisitua ma osia ma tausia feagaiga, e faamanuiaina i tatou i le malosi e sili atu i lo tatou lava malosi²⁰ e manumalo ai i faaososoga ma luitau o le olaga faaletino ma ia faia le lelei ma ia lelei.

O Le A Salalau Atu le Ta’uta’ua o Lenei Fale

O le uluai malumalu o lenei tisipenisiona sa fausiaina i Katelani, Ohaio ma sa faapaiaina i le aso 27 o Mati, 1836.

I se faaaliga i le Perofeta o Iosefa Samita i le mavae ai o le vaiaso talu ona faapaiaina, na tautino mai ai le Alii:

“Ia olioli loto o lo’u nuu uma, o e na latou fausia lenei fale i lo’u igoa, ma lo latou malosi. . . .

“Ioe o le a matua olioli tele lava loto o afe ma sefulu o afe ona o faamanuiaga o le a sasaa atu, ma le faaeega ua faaeaina ai a’u auauna i lenei fale.

“Ma o le a salalau atu le ta’uta’ua o lenei fale i atunuu ese; ma o le amataga lenei o le faamanuiaga o le a sasaa mai i luga o ulu o lo’u nuu.”²¹

Faamolemole ia matau fasifuaia o le a matua olioli tele lava loto o afe ma sefulu o afe ma o le a salalau atu le ta’uta’ua o lenei fale i atunuu ese. O ni tautinoga ofoofogia nei ia Aperila o le 1836, i le taimi sa na o ni nai tagata toalaiti lava ma le malumalu e tasi a le Ekalesia.

O le asō i le 2020, e 168 a tatou malumalu o loo faaaogaina. E fasefulu-iva ni malumalu faaopoopo o loo fausiaina pe ua faasilasila mai. O maota o le Alii ua fausiaina i luga o “motu o le sami”²² ma i atunuu ma nofoaga sa manatu muamua i ai le toatele e le mafai ona i ai se malumalu.

O le sauniga o le faaeega paia o loo tuuina atu i le taimi nei i gagana e 88 ma o le a maua i le tele o gagana faaopoopo a o fausiaina malumalu e faamanuia ai le toatele o fanau a le Atua. I le isi 15 tausaga e sosoo ai, o le aofai o gagana o le a maua ai sauniga o le malumalu e foliga mai o le a faaluaina.

O lenei tausaga o le a tatou suatiaina eleele ma amatalia le fausiaina o malumalu e 18. I se faatusatusaga, e 150 tausaga na fausia ai uluai malumalu e 18, mai le faatuina o le Ekalesia i le 1830 i le faapaiaiga o le Malumalu o Tokyo Iapani e Peresitene Spencer W. Kimball i le 1980.

Mafaufau i le faanatinatiina o le galuega faalemalumalu ua tupu i le gasologa o le soifuaga o Peresitene Russell M. Nelson. Ina ua soifua mai Peresitene Nelson i le aso 9 o Setema, 1924, sa na o le ono malumalu na i ai i le Ekalesia.

Ina ua faauuina o ia o se Aposetolo i le aso 7 o Aperila, 1984, 60 tausaga

mulimuli ane, sa 26 malumalu na faagaoioia, o se faatelega e 20 malumalu i totonu o le 60 tausaga.

Ina ua lagolagoina Peresitene Nelson o le Peresitene o le Ekalesia, e 159 malumalu na faagaoioia, o se faatelega e 133 malumalu i totonu o le 34 tausaga i le taimi na auuana ai o se uso o le Korama a le Toasefululua.

Talu ona avea ma Peresitene o le Ekalesia i le aso 14 o Ianuari 2018, ua faasilasila mai ai e Peresitene Nelson malumalu fou e 35.

E ivasefulu-ono pasene malumalu o i ai nei na faapaiaina i le gasologa o le soifuaga o Peresitene Nelson; e 84 pasene ua faapaiaina talu ona faauuina o ia o se Aposetolo.

Ia Taulai Atu Pea i Mea E Sili Ona Taua

I le avea ai ma tagata o le Ekalesia toefuataina a le Alii, tatou te tutu ai ma ofo i le saosaoa-faataalise o Lana galuega i aso e gata ia. Ma e tele isi malumalu o loo agai mai.

Na valoia e Polika Iaga, “Ina ia faataunuuna lenei galuega, o lea o le a le na o le tasi ai le malumalu ae o le a faitau afe, ma o le a faitau fiaselau afe alii ma tamaitai o le a o atu i ai i totonu o na malumalu, ma faia sauniga mo tagata, o e na soifua ai, e tau atu i le taimi o le a faaalai mai e le Alii.”²³

Ua malamalama lava, o le faasilasilaga o malumalu fou taitasi o se puna o le olioli tele ma se mafuaaga e avatu ai le faafetai i le Alii. Peitai, o lo tatou taulaiga autu e tatau ona tuu i feagaiga ma sauniga ia e mafai ona suia ai o tatou loto ma faalolotoina ai lo tatou tuuto atu i le Faaola ma ia le tau na ona taulai atu i le nofoaga po o le matagofie o le maota.

O matafaioi autu o loo taoto i luga o i tatou o tagata o le Ekalesia toefuataina a le Alii e (1) ia “Faalogo ia te Ia!”²⁴ ma ia suia o tatou lava loto e



ala i feagaiga ma sauniga, ma le (2) ia faataunuu ma le olioli le tiutetauave na tofia mai le lagi e ofo atu faamaniuaga o le malumalu i le aiga atoa o tagata i itu uma e lua o le veli. Faatasi ma le taitaiga ma le fesoasoani a le Alii, o le a tatou faataunuu moni ai nei tiute paia.

O Le Fausiaina o Siona

Ua lolafola mai e le Perofeta o Iosefa Samita:

“O le fausiaina o Siona o se galuega ua naunau i ai le nuu o le Atua i vaitausaga uma; o se autu sa nopi’i ai perofeta, faitaulaga ma tupu ma le fiafia tulaga ese; sa o latou sagisagi atu ma le naunauga fiafia i le aso tatou te ola ai; ma faasasao atu ai ma naunauga faalelagi ma le olioli sa latou pepese ai ma tusia ma valoia o tatou aso; peitai sa latou malilili e aunoa ma le vaai i ai; . . . ua tuua mo i tatou e vaai i ai, auai i le faatinoga ma fesoasoani e faataavale i luma le mamalu o Aso e Gata Ai.”²⁵

“O le Perisitua i le lagi o le a faatasia ma le perisitua o i le lalolagi, e faataunuuna ai na mafuaaga maoae; . . . o se galuega na manatunatu loloto i ai le Atua ma agelu ma le fiafia mo tupulaga ua mavae; na uunaia agaga o peteriaka ma perofeta anamua; o se galuega ua faamoemoe e aumaia le faaumatiaina o mana o le pouliuli, le faafouina o le lalolagi, le mamalu o le Atua, ma le faolataga o le auaiaga o tagata soifua.”²⁶

Ou te molimau atu ma le faamoni na faaali atu le Tama ma le Alo ia Iosefa Samita, ma na toefuatai mai e

Elia le pule o faaumba. O feagaiga ma sauniga paia o le malumalu e mafai ona faamalosi ai i tatou ma faamama ai o tatou loto pe a tatou “Faalogo ia te Ia!”²⁷ ma maua le mana o le faaleatua i o tatou olaga. Ma ou te molimau atu o lenei galuega o aso e gata ai o le a faaumatiaina mana o le pouliuli ma aumaia le faolataga o le auaiaga o tagata soifua. Ou te molimau atu ai ma le fiafia i nei upumoni i le suafa paia o le Alii o Iesu Keriso, amene. ■

FAAMATALAGA

1. Efeso 1:10.
2. Iosefa Samita—Talafaasolopito 1:30.
3. Iosefa Samita—Talafaasolopito 1:33.
4. Iosefa Samita—Talafaasolopito 1:38–39.
5. Galuega 3:21.
6. Bible Dictionary, “Elijah.”
7. Taiala i Tusitusiga Paia, “Elia.”
8. *Aoaoga a Peresitene o le Ekalesia: Iosefa Samita* (2007), 331; faaopoopo le faamamafa.
9. Mataio 16:19; tagai foi i le Mataio 18:18; Helamana 10:7; Mataupu Faavae ma Feagaiga 124:93; 132:46.
10. *Aoaoga: Iosefa Samita*, 313.
11. Tagai i le Mataio 17:3.
12. Tagai i le Mataupu Faavae ma Feagaiga 110:13–16.
13. Tagai i le Mataio 22:34–40.
14. Iosefa Samita—Talafaasolopito 1:17.
15. Tagai i le Ominae 1:26; Moronae 10:30, 32.
16. Mose 1:39.
17. Ezra Taft Benson, “Fanauna i le le Atua,” *Liahona*, Ian. 1986, 2.
18. 2 Korinito 3:3.
19. Tagai i le Mataupu Faavae ma Feagaiga 84:20–21.
20. Tagai i le “Faaola e Ia Ou Alofa,” *Viiga*, nu. 150.
21. Mataupu Faavae ma Feagaiga 110:6, 9–10.
22. 2 Nifae 29:7.
23. *Aoaoga a Peresitene o le Ekalesia: Polika Iaga* (1997), 316.
24. Iosefa Samita—Talafaasolopito 1:17.
25. *Aoaoga: Iosefa Samita*, 197.
26. *Aoaoga: Iosefa Samita*, 547–48.
27. Iosefa Samita—Talafaasolopito 1:17.



Saunia e Peresitene Russell M. Nelson
 Peresitene o Le Ekalesia a Iesu Keriso o le Au Paia
 o Aso e Gata Ai

Faalogo ia te Ia

Ua silafia e lo tatou Tama pe a siomiaina i tatou e le lē mautonu ma le fefe, o le mea o le a sili ona fesoasoani tele ia i tatou, o le faalogo lea i Lona Alo.

O’u uso e ma tuafafine pele, e ma’eu lo’u lotofaafetai, e ala i le faaaogaina o tekinolosi, ua mafai ai ona tatou feiloai faatasi ma tapuai i lenei taeao o le Aso Sa. E ma’eu le faamanuiaina o i tatou i le iloina ua toefuatai mai le talalelei a Iesu Keriso i le lalolagi.

I nai vaiaso ua tuanai atu, ua oo ai le toatele o i tatou i ni mea faalavefau i o tatou olaga patino. O mafui’e, o mu, lologa, mala, ma aafiaga na mulimuli mai ai ua faalavefauina aga masani ma mafua ai le lē lava o meaai, mea e manaomia, ma teugatupe.

I le lotolotoi ai o nei mea uma, matou te faamalo atu ma faafetai atu ia te outou mo le filifili e faafofoga i le afioga a le Alii i lenei taimi o puapuaga e ala i le auai faatasi ma i matou mo le konafesi. O le faatupu-laia o le pouliuli lea e o mai faatasi ma puapuaga ua atili susulu malamalama ai le malamalama o Iesu Keriso. Se’i mafaufau i le lelei e mafai e i tatou taitoatasi ona faia i lenei taimi o suiga faigata i le lalolagi. O lo outou alofa ma le faatuatua i le Faola e mafai ona avea lelei ma se aloiafi mo se tasi e iloa ai le Toefuataiga o le atoatoaga o le talalelei a Iesu Keriso.

I tausaga e lua ua alu, sa ma feiloai atu ai ma Sister Nelson i le faitau afe o outou i le lalolagi atoa. Sa ma faatasi

ma outou i fale tetele i fafo ma i potu tetele i faletalimalo. I nofoaga taitasi, na ou lagona sa ou i ai faatasi ma le au filifilia a le Alii ma sa ou vaaia i o’u lava mata le faapotopotoina o Isaraelu.

Ua tatou ola i le vaitaimi “sa faatalitali i ai o tatou muātamā mo le faamoemoe naunautai.”¹ Ua tatou vaai tino lava ma *molimau moni* i mea sa *na o le faaaliga* na vaai i ai le perofeta o Nifae e faapena na afio ifo “le mana o le Tamai Mamoe a le Atua” “i luga o tagata o le feagaiga a le Alii o e sa faataapeapeina i luga o le lalolagi; ma sa faaauppegaina i latou i le amiotonu ma le mana o le Atua i le mamalu tele.”²

O outou, o’u uso e ma tuafafine, ua i ai faatasi ma na alii, tamaitai, ma fanau ia na vaai i ai Nifae. Mafaufau i lena mea!

Po o fea lava o outou alala ai po o a foi o outou tulaga o i ai, o le Alii o Iesu Keriso o lo *outou* Faola, ma o le perofeta a le Atua, o Iosefa Samita o la *outou* perofeta. Sa muai faauuina o ia a o le’i faavaeina le lalolagi e avea ma perofeta o lenei tisipenisione mulimuli, le taimi o le a “leai se mea o le a taofia”³ mai le Au Paia. E faaaupu pea ona tafe mai faaaliga mai le Alii i lenei faagasologa faifai pea o le toefuataiga.

O le a le uiga ia te oe o le toefuataiina mai o le talalelei a Iesu Keriso i le lalolagi?

O lona uiga ua mafai ona faamauiina faatasi oe ma lou aiga e faavavau! O lona uiga ona ua papatisoina oe e se tasi ua i ai le pule mai ia Iesu Keriso ma ua faamauiina o se tagata o Lana Ekalesia, ua mafai ona e olioli i le mafutaga tumau a le Agaga Paia. O le a Ia taiala ma puipuia oe. O lona uiga o le a lē tuua lava oe e lē faamafanafanaina pe aunoa ma le mauaina o le mana o le Atua e fesoasoani ia te oe. O lona uiga e mafai e le mana o le perisitua ona faamanuiaina oe a o e mauaina sauniga taua ma osia feagaiga ma le



Aai o Niu Ioka, Niu Ioka, ISA

Atua ma tausi i ai. O se taula lava i o tatou agaga nei upumoni, aemaise lava i taimi faapenei o le pesi mai o āfā.

O loo talatala mai i le Tusi a Mamona le faasologa masani o le tula'i a'e ma le pa'ū o malo tetele e lua. O le la talafaasolopito ua faaalua ai le faigofie mo se anoano o tagata ona faagaloina le Atua, teena lapataiga a perofeta a le Alii, ma saili i le pule, lauiloa, ma mea faafiafia o le tino.⁴ Sa tupu soo, sa tautino atu e perofeta ua mavae “mea tetele ma ofoofogia i tagata, ia sa latou le talitonu i ai.”⁵

E leai ma se eseesea i o tatou aso. I le aluga o tausaga, na faalogoina ai mea tetele ma ofoofogia mai pulelā faapaiaina i le salafa o le lalolagi. Ae anoano tagata e *lē* taliaina nei upumoni—ona a le o lo latou *lē* iloaina o le mea e sue i ai upumoni⁶ pe ona o loo latou faalogo ia i latou e le o i ai le atoaga o le upumoni, po o ua latou teenaina foi le upumoni ona ua sili atu ia i latou le sailiga o mea faalelalolagi.

E atamai le tiapolo. Mo le fia afe tausaga o loo ia faia pea mea lelei ma mea leaga ae o mea leaga e fai ma mea lelei.⁷ O ana savali e leotele, malosi, ma faasausili.

Peitai, o savali mai lo tatou Tama Faalelagi e iloagofie lava le ese. E fesootai mai e Ia ma le faigofie, filemu, ma i se manino matua maofa lava lea e le mafai ona tatou malamalama sese ai ia te Ia.⁸

Mo se faataitaiga, soo se taimi lava e faalauiloa mai ai e Ia Lona Alo Pele e Toatasi na Fanaua i tagata soifua i le lalolagi, e Na te faia lea mea i ni nai upu ofoofogia. I luga o le Mauga o Liua ia Peteru, Iakopo, ma Ioane, sa fetalai atu ai le Atua, “O lo'u atalii pele lenei, faalogo ia te ia,”⁹ O Lana fetalai ia sa Nifae i Nuuma ana-mua e faapea “Faauta i lo'u Atalii Pele, o le ua ou fiafia lava i ai, o le ua ou



O KERISO UA FAALAU ATU I LE ITULAGI / SISIFO, SAUNIA E ARNOLD FRIBERG

faamamaluina ai lo'u igoa—ia outou faalogo ia te ia.”¹⁰ Ma ia Iosefa Samita, i lena tautinoga loloto lea na tatala ai lenei tisipenisione, sa fetalai mai ma le faigofie le Atua, “O Lo'u Atalii Pele lenei. Faalogo ia te Ia!”¹¹

Ia, o'u uso e ma tuafafine, mafau-fau i le mea moni ua faato'a ta'ua i nei faataitaiga e tolu, ae a o le'i faalauiloa atu e le Tama le Alo, o tagata sa auai na i ai i se tulaga o le fefe ma le, i nisi tulaga, atuatuvaile.

Sa fefefe Aposetolo ina ua latou vaai atu ia Iesu Keriso o siomiaina e se ao i luga o le Mauga o Liua.

Sa fefefe sa Nifae ona sa latou oo i le faafanoga ma le pouliuli mo ni aso.

Sa taofia Iosefa Samita i se malo-siaga o le pouliuli ae le'i tatalaina le lagi.

Ua silafia e lo tatou Tama pe a siomiaina i tatou e le *lē* mautonu ma le fefe, o le mea o le a sili ona fesoa-soani tele ia i tatou, o le faalogo lea i Lona Alo.

Ona a tatou saili atu e faalogo—faalogo moni lava—i Lona Alo, o le a taialaina i tatou ia iloa po o le a le mea e fai i soo se tulaga.

O le upu muamua lava i le Mataupu Faavae ma Feagaiga o le *lagona*.¹² O lona uiga “ia faalogo ma le faamoemoe e usiusitai.”¹³ Ina ia lagona (hearken) o lona uiga ia

“faalogo ia te Ia”—ia *faalogo* i mea ua fetalai mai ai le Faaola ona *usitai* (*heed*) lea i Lana fautuaga. I na upu e fa—“Faalogo ia te Ia”—ua aumai ai e le Atua ia i tatou se mamamu mo le manuia, fiafia, ma le olioli i lenei olaga. E ao ona tatou *faalogo* i afioga a le Alii, *lagona* ia mea, ma *usitai* i mea ua Ia faatonu ai i tatou!

A o tatou saili e avea ma soo o Iesu Keriso, o a tatou taumafaiga ia *faalogo ia te Ia* e manaomia ona matua faia ma le faamoemoe sili i ai. E manaomia ai le lotofuatiaifo ma taumafaiga tumau e faatumu o tatou olaga i aso taitasi i Ana afioga, Ana aoaoga, Ana upumoni.

E le mafai ona tau na ona tatou faalagolago i faamatalaga tatou te tau atu ai i luga o ala o faasalalauga faaagafesootai. I le faitau miliona o upu i luga o le initoneti i se lalolagi ua faatumulia i faasalalauga faatosina faifai pea a taumafaiga malomaloā ma leaga tele a le tiapolo, o fea e *mafai* ona tatou o i ai e faalogo ai ia te Ia?

E mafai ona tatou o i tusitusiga paia. Latou te a'oa'o mai i tatou e uiga ia Iesu Keriso ma Lana talalelei, le silisili ese o Lana Togiola, ma le fuafuaga sili a lo tatou Tama o le fiafia ma le togiolaina. O le faatofuina i aso taitasi i le afioga a le Atua e taua tele mo le ola faaleagaga, aemaise lava i nei aso o le faatupulaia o suiga faigata. Pe a tatou

taumamafa i afioga a Keriso i aso taitasi, o le a ta'u mai e afioga a Keriso ia i tatou le auala e tali atu ai i faigata tatou te le'i mafaufauina o le a tatou fetaia'i.

E mafai foi ona tatou *faalogo ia te Ia* i totonu o le malumalu. O le maota o le Alii o se maota o le aoaoga. O iina e a'oa'o mai ai le Alii i Lana lava ala. O iina e a'oa'o mai ai sauniga taitasi e uiga i le Faaola. O iina tatou te a'oa'o ai i le auala e vavae ai le veli ma talanoa ma le manino atili ma le lagi. O iina tatou te a'oa'o ai i le auala e fetuu ai le tiapolo ma utuvai mai le mana o le perisitua a le Alii e faamalosia ai i tatou ma i latou tatou te alolofa i ai. E ma'eu le naunautai e tataua ona oo ia i tatou taitoatasi e saili atu ai i le malutaga iina.

Pe a toe aveesea nei tapu lē tumau o le KOVITI-19, faamolemole ia faatulaga ni taimi e lē aunoa e tapuai ma auauna atu ai i totonu o le malumalu. O minute uma o lena taimi o le a faamanuiaina ai outou ma o outou aiga i auala e *leai* ma se isi lava mea na te mafaia. Faaalu se taimi e mafaufau loloto ai i mea e te faalogo i ai pe a e i ai iina. Ōle atu i le Alii e a'oa'o oe i le auala e tatala ai le lagi e faamanuia ai lou olaga ma olaga o i latou e te alofa ma auauna i ai.

A o lē mafai ai ona tapuai i le taimi nei i totonu o le malumalu, ou te valaaulia outou ia faateleina lou auai i talafaasolopito o aiga, e aofia ai sailiga ma le faavasegaina o talafaasolopito o aiga. Ou te folafola atu pe a e faateleina lou taimi i galuega faalemalumalu ma talafaasolopito o aiga, o le a e faateleina ma faaleleia lou tomai e faalogo ai ia te Ia.

E faapena foi ona tatou *faalogo ia te Ia* i le manino atili pe a tatou faaleleia lo tatou tomai e iloa ai musumusuga a le Agaga Paia. E leai lava se isi taimi ua sili ona matua taua ai le iloa

o le auala e fetalai mai ai le Agaga ia te oe nai lo le taimi nei. I le Aiga Atua, o le Agaga Paia o le avefeau. O le a Ia aumaia mafaufauga i lou mafaufau ia e finagalo le Tama ma le Alo e te mauaina. O Ia o Lē Faamafanafana. O le a Ia aumaia se lagona o le filemu i lou loto. E molimau mai o Ia i le upumoni ma o le a faamautu mai mea e moni a o e faalogo ma faitau i le afioga a le Alii.

Ou te toe faafou atu la'u aioiga mo outou ia fai *po o le a lava le mea* e faateleina ai lo outou gafatia faaleagaga e maua ai faaaliga faaletagata lava ia.

O le faia o lea mea o le a fesoa-soani ia te oe e iloa ai le auala e agai ai i luma i lou olaga, po o le a le mea e fai i taimi o faalavelave, ma le auala e iloaitino ai ma aloese mai faaososoga ma le taufaasese o le tiapolo.

Ma le mea mulimuli, tatou te *faalogo ia te Ia* pe a tatou usitai i upu a perofeta, tagatavaai, ma talifaaaliga. E molimau mai Aposetolo faauuina a Iesu Keriso i taimi uma e uiga ia te Ia. Latou te faasino mai le ala a o tatou savalia lo tatou ala e ui atu i le lavelave ma fita faapopoleina o lo tatou olaga faaletino.

O le a le mea o le a tupu pe a e faalogo, lagona, ma usitai ma le faamoemoe atili i mea ua fetalai mai e le Faaola ma mea o loo Ia fetalai mai nei e ala mai i Ana perofeta? Ou te folafola atu o le a faamanuiaina outou i le mana faapoopoina e taulima ai faaososoga, faigata, ma vaivaiga. Ou te folafola atu vavega i a outou faaipogaga, mafutaga faaleaiga, ma galuega i aso taitasi. Ma ou te folafola atu o le a faateleina lou gafatia e lagona ai le olioli e tusa lava pe faateleina puapuga i lou olaga.

O le konafesi aoao lenei ia Aperila 2020 o lo tatou taimi lea e faamanatu ai se mea na tupu lea na suia ai le

lalolagi. A o tatou tulimatai atu i lenei 200 tausaga o le Uluai Faaaliga a Iosefa Samita, sa mafaufau le Au Perisitene Sili ma le Aufono a Aposetolo e Toasefululua po o le a se mea *tatou* te ono faia e faamanatu ai ma le talafeagai lenei mea ofoofogia na tupu.

O lena teofani po o le faaaliga vaaia na amataina ai le Toefuataiga o le atoaga o le talalelei a Iesu Keriso ma le faafeao mai o le tisipenisione o le atoaga o taimi.

Sa matou mafaufau pe tataua ona faatu se ma'a faamanatu. Ae a o matou iloiloaina le tulaga ese faasolopito ma aafiaga faavaomalo o lena Uluai Faaaliga, sa matou lagonaina le uunaiga e fatu se ma'a faamanatu e le o se karanite po o se ma'a ae o upu—upu o folafolaga faamaoni ma paia—e tusia, e lē vaneina i “papatusi maa” ae ia vaneina i “papatusi aano” o o tatou loto.¹⁴

Talu ona faatulagaina le Ekalesia, e na o le lima folafolaga na fofogaina, faatasi ai ma le folafolaga mulimuli “O Le Aiga: O Se Folafolaga i le Lalolagi,” lea na fofogaina e Perisitene Gordon B. Hinckley i le 1995.

O lea la, a o tatou manatunatu i lenei taimi iloga i le talafaasolopito o le lalolagi ma le poloa'iga a le Alii ina ia faapotopoto Isaraelu mo le Afio Mai Faalua o Iesu Keriso, o i matou, o le Au Perisitene Sili ma le Aufono a Aposetolo e Toasefululua, ua tuuina atu ai le folafolaga lenei. O lona ulutala e faapea, “O Le Toefuataiga o le Atoatoaga o le Talalelei a Iesu Keriso: O Se Folafolaga o le Faamanatuina o le Lua Seneturi i le Lalolagi.” Ua tusiaina e le Au Perisitene Sili ma le Aufono a Aposetolo e Toasefululua o Le Ekalesia a Iesu Keriso o le Au Paia o Aso e Gata Ai. Tusia ia Aperila 2020. Ina ia saunia mo lenei aso, sa ou pueina ai muamua lenei folafolaga i

le Vao Paia, lea na muai vaai ai Iosefa Samita i le Tamā ma le Alo.

“Matou te folafola atu ma le faamaoni e alofa le Atua i Lana fanau i atunuu uma o le lalolagi. Ua foa’i mai e le Atua le Tamā ia i tatou le soifua mai ma le paia, le soifuaga lē mafaa-tusalia, ma le taulaga togiola lē i’u a Lona Alo Pele, o Iesu Keriso. E ala i le mana o le Tamā, na toetu mai ai Iesu ma maua le manumalo i le oti. O Ia o lo tatou Faaola, lo tatou Faaitaiga Sili, ma lo tatou Togiola.

“I le lua selau tausaga talu ai, i se taeao matagofie o le tautotogo i le 1820, a o sailiili le taule’ale’a o Iosefa Samita e fia iloa po o le a le ekalesia e auai ai, sa alu ai e tatalo i le togāvaio e lata ane i lona aiga i le setete o Niu Ioka, ISA. Sa i ai ni ana fesili e faatatau i le faaolataga o lona agaga ma sa faatuatua o le a ta’ita’i o ia e le Atua.

“I le lotomauualalo, matou te tautino atu ai e faapea i le tali mai i lana tatalo, sa faali mai ai le Atua le Tamā ma Lona Alo, o Iesu Keriso ia Iosefa ma amatalia ai loa le ‘toefuata’iga o mea uma’ (Galuega 3:21) e pei ona valo’ia mai i le Tusi Pa’ia. I lenei faaaliga, sa ia aoao ai ina ua mavae le maliliu o ulua’i Aposetolo, sa leiloa ai le Ekalesia a Keriso o le Feagaiga Fou mai le lalolagi. O le a avea Iosefa ma mea faigaluega i le toefo’i mai o le Ekalesia.

Matou te faamautū atu i lalo o le ta’ita’iga a le Tamā ma le Alo, na ō mai ai avefe’au faalelagi e a’oa’o Iosefa ma toe atia’e le Ekalesia a Iesu Keriso. Sa toefuata’i mai e Ioane le Papatiso le pule e papatiso ai e ala i le faatofuina mo le faamagaloga o agasala. O le to’atolu o ulua’i Aposetolo—o Peteru, Iakopo, ma Ioane—sa toefuata’i maia le tofi faa’aposetolo ma ki o le pule o le perisitua. Sa ō mai fo’i isi, e aofia ai Elia, o lē na toefuata’i maia le pule e faamau faatasi ai aiga e faavavau i



Elk Ridge, Iuta, ISA

mafutaga e faavavau lea ua to’ilalo ai le oti.

“Matou te molimau atu fo’i o Iosefa Samita na tu’u i ai le meaalofa ma le mana o le Atua e faaliliu ai se faamau-maunga anamua: le Tusi a Mamona—O Se Tasi Molimau ia Iesu Keriso. O loo aofia ai i itulau o lenei anotusi pa’ia se tala e uiga i le galuega patino a Iesu Keriso i tagata i le Itulagi i Sisifo i le faato’ā mavae ai o Lona Toetu. O loo a’oa’o mai ai le faamoemoega o le olaga ma faamalamalama mai ai le mata’upu faavae a Keriso, lea e faatotonugalemū i ai lena faamoemoega. I le avea ai ma se soa o tusitusiga pa’ia i le Tusi Pa’ia, o loo molimau mai ai le Tusi a Mamona o tagata soifua uma o ni atalii ma ni afafine a se Tamā i le Lagi alofa, ua i ai ia te Ia se fuafuaga pa’ia mo ō tatou olaga, ma o Lona Alo, o Iesu Keriso, o loo fetalai mai i aso nei e pei fo’i ona i ai i aso anamua.

“Matou te tautino atu O Le Ekalesia a Iesu Keriso o le Au Paia o Aso e Gata Ai, sa faatulagaina i le aso 6 o Aperila, 1830, o le Ekalesia lava lea a Keriso o le Feagaiga Fou ua toefuata’i ina. O lenei Ekalesia ua taula i le soifuaga ato’atoa o lona ma’a tulimanu, o Iesu Keriso, ma i Lana Togiola lē i’u ma le Toetu moni. Ua toe vala’auina e Iesu Keriso ia Aposetolo ma tu’u atu ia i latou le pule o le perisitua. Ua Ia vala’aulia i tatou uma ia ō mai ia te Ia

ma Lana Ekalesia, ia maua le Agaga Pa’ia, o sauniga o le faaolataga, ma ia maua le olioli tumau.

“Ua mou atu nei le lua selau tausaga talu ona amatalia lenei Toefuata’iga e le Atua le Tamā ma Lona Alo Pele, o Iesu Keriso. Ua ōpomau e le faitau miliona i le lalolagi atoa se malamalama’aga o nei mea na tutupu sa valo’iaina.

“Matou te ta’utino atu ma le fiafia e aga’i pea i luma le Toefuata’iga folafolaina e ala i faaaliga faifai pea. O le a lē toe tutusa lava le lalolagi, auā o le a ‘faapotopoto faatasi [e le Atua] mea uma ia tasi ia Keriso’ (Efeso 1:10).

“Faatasi ai ma le migao ma le lotofaafetai, i le avea ai ma Ana Aposetolo, matou te vala’aulia ai tagata uma ia iloa—e pei ona matou iloa—o loo matala le lagi. Matou te faamautū atu o loo faailoa mai e le Atua Lona finagalo mo Ōna atalii ma afafine pele. Matou te molimau atu o i latou e su’esu’e ma le agaga tatalo i le sāvali o le Toefuata’iga ma galulue i le faatuatua o le a faamanuiaina e maua ā latou lava molimau e uiga i lona pa’ia ma lona faamoemoega e saunia le lalolagi mo le Afio Mai Faalua o lo tatou Alii ma le Faaola, o Iesu Keriso, ua folafola mai.”¹⁵

Uso e ma tuafafine pele, o la tatou folafolaga lena o le faamanatuina o le lua seneturi i le lalolagi e faatatau i le

Toefuataiga o le talalelei a Iesu Keriso i lona atoatoaga. Ua uma ona faaliliuina i gagana e 12. O isi gagana o le a vave ona sosoo mai ai. O le a vave ona maua i luga o le uepisaite a le Ekalesia, lea e mafai ona e maua mai ai se kopi. Suesue i ai faalilolilo faatasi ai ma tagata o lou aiga ma uo. Mafau-fau loloto i upumoni ma mafau-fau i aafiaga o le a faia e na upumoni i lou olaga pe a fai o le a e lagonaina, faalogo i ai, ma usitai i poloaiga ma fea-gaiga lea e oo mai faatasi ma i latou.

Ou te iloa o Iosefa Samita o le perofeta na muai faauuina, o lē na filifilia e le Alii na te tatalaina lenei tisipenisione. E ala mai ia te ia na toefuatai mai ai le Ekalesia a le Alii i le lalolagi. Sa faamaufaaailogaina e Iosefa lana molimau i lona toto. E ma'eu lo'u alofa ma le faamamaluina o ia!

O loo soifua le Atua! O Iesu o le Keriso! Ua toefuatai mai Lana Ekalesia! O Ia ma Lona Tama, lo tatou Tama Faalelagi, o loo leoleoina i tatou. O lea ou te molimau atu ai i le suafa paia o Iesu Keriso, amene. ■

FAAMATALAGA

1. Mataupu Faavae ma Feagaiga 121:27.
2. 1 Nifaei 14:14.
3. Mataupu Faavae ma Feagaiga 121:28.
4. Tagai i le 1 Nifae 22:23.
5. Eteru 12:5.
6. Tagai i le Mataupu Faavae ma Feagaiga 123:12.
7. Tagai i le Isaia 5:20; 2 Nifae 15:20.
8. Tagai i le 2 Nifae 25:4; Alema 5:43.
9. Mareko 9:7; Luka 9:35.
10. 3 Nifae 11:7.
11. Iosefa Samita—Talafaasolopito 1:17.
12. Tagai i le Mataupu Faavae ma Feagaiga 1:1.
13. I le Feagaiga Tuai, o le upu *hearcken* ua faaliliuina mai le upu Eperu *shama*, o se veape malosi o lona uiga ia “faalogo ma le faamoemoega ia usitai.” *Hearcken* o se upu faatusitusiga paia o loo maua i vaega e 40 o le Mataupu Faavae ma Feagaiga.
14. Tagai i le 2 Korinito 3:3.
15. O lenei faaliliuga o se amataga. O le faaliliuga aloaia o le folafolaga o le a maua i masina a sau.

Alaga Osana

Fofogaina e Peresitene Russell M. Nelson

Peresitene o Le Ekalesia a Iesu Keriso o le Au Paia o Aso e Gata Ai

O lenei, o'u uso e ma tuafafine pele, a o tatou faamanatuina le Uluai Faaaliga a Iosefa Samita o le Tamā ma le Alo, ua tatou lagonaina le talafeuga o le olioli faatasi e ala i le auai i le Alaga Osana.

O lenei alaga paia na muai tuuina atu i lenei tisipenisione i le faapaiaga o le Malumalu o Katelani i le aso 27 o Mati, 1836. Ua faia nei i le faapaiaga o malumalu taitasi. O se sa'afi'afiga paia i le Tamā ma le Alo, e fai ma faatusa o le tali atu o le motu o tagata ina ua faia e le Faa-ola Lana malaga faatupu i totonu o Ierusalem. Ua faamautuina mai ai foi lagona na oo i le taulealea o Iosefa i lenei aso i le Vao Paia—e faapea, o le Tamā ma le Alo o ni Tamalii mamalu se toalua, o e o loo tatou tapuai ma vivii atu i ai.

O le a ou faaitaitai atu nei le ala e tuuina atu ai le Alaga Osana. A o ou faia, ou te valaaulia a tatou paaga i ala o faasalalaua ia tauli-maina lenei faatinoga paia tele i le mamalu ma le migao.

Ia taitoatasi i tatou ma avane se solosolo mama, pa'epa'e, u'u le tulimanu e tasi, ma talotalo a o fai faatasi mai: “Osana, Osana, Osana, i le Atua ma le Tama'i Mamoe,” fai faatolu, sosoo ai ma le “Amene, Amene, ma Amene.” Afai e leai sau solosolo pa'epa'e, ia tau lava ina talotalo mai lou lima.


Uso e ma tuafafine, ou te valaauliaina nei outou e tutu ma auai i le Alaga Osana, a mavae o le a lagiina le “Hosanna Anthem” ma le “O Le Agaga o le Atua”¹.

I se faailo mai le taitaipese, faamolemole ia auai faatasi i le lagiina o le “O Le Agaga o le Atua.”

*Osana, Osana, Osana i le Atua ma le Tama'i Mamoe.
Osana, Osana, Osana i le Atua ma le Tama'i Mamoe.
Osana, Osana, Osana i le Atua ma le Tama'i Mamoe.
Amene, Amene, ma Amene.* ■

FAAMATALAGA

1. *Viiga*, nu. 2.



Bountiful, Iuta, ISA



Saunia e Peresitene Dallin H. Oaks
Fesoasoani Muamua i le Au Peresitene Sili

O Le Fuafuaga Sili

O i tatou ua iloaina le fuafuaga a le Atua ma o ē ua osifeagaiga e auai ai, ua i ai se tiutetauave manino e a’oa’o atu nei upumoni.

E ui lava i le lotolotoi o tofotofoga ma luitau tulagaese, ae ua faamanuiaina moni lava i tatou! O lenei konafesi aoao ua aumaia ia i tatou le anoanoai o oa ma le olioli o le Toefuataiga o le talalelei a Iesu Keriso. Ua tatou olioli i le faaaliga a le Tamā ma le Alo lea na amatalia ai le Toefuataiga. Ua faamanatu mai foi ia i tatou le oo mai faavavega o le Tusi a Mamona, o lona faamoemoega autu o le molimau mai lea ia Iesu Keriso ma Lana mataupu faavae. Ua faafouina i tatou i le moni faafiafaina o faaaliga—i perofeta ma ia i tatou taitoatasi. Ua tatou faalogo i molimau taua o le Togiola le i’u a Iesu Keriso ma Lona Toetu moni mai. Ma ua a’oa’oina i tatou i isi upumoni o le atoatoaga o Lana talalelei na faaali mai

ia Iosefa Samita ina ua uma ona tautino mai e le Atua le Tama i lona perofeta fou faato’a valaauina: “O Lo’u Atalii Pele lenei. Faalogo ia te Ia! (Iosefa Samita—Talafaasolopito 1:17).

Ua faamautu i lo tatou malamalama e uiga i le toefuataiga o le perisitua ma ona ki. Ua toefaaouina i tatou i lo tatou naunautaiga ia faalauiloa le Ekalesia toefuataiina a le Alii i lona igoa e tatau ai, O Le Ekalesia a Iesu Keriso o le Au Paia o Aso e Gata Ai. Ma ua valaauliaina i tatou ia auai i anapogi ma tatalo ia faaitiitia ai aafiaga o le taimi nei ma le lumanai mai se faamai faataumaoui ua pipisi i le lalolagi atoa. Na musuia i tatou i lenei taeao e le perofeta soifua a le Alii i lona fofogaina o se folafolaga faasolopito

o le Toefuataiga. Matou te faamautu atu lea tautinoga e faapea “O i latou e su’esu’e ma le agaga tatalo i le sāvali o le Toefuata’iga ma galulue i le faatuatua o le faamanuiaina e maua ā latou lava molimau e

uiga i lona pa’ia ma lona faamoemoega e saunia le lalolagi mo le Afio Mai Faalua o lo tatou Alii ma le Faaola, o Iesu Keriso, ua folafola mai.”¹

O Le Fuafuaga

O nei mea uma o se vaega o se fuafuaga paia lea e i ai lona faamoemoega ina ia mafai e fanau a le Atua ona faaeaina ma avea e pei o Ia. O loo faasino i ai tusitusiga paia o le “fuafuaga tele o le fiafia,” “o le fuafuaga o le togiolaina,” ma “o le fuafuaga . . . o le olataga” (Alema 42:8, 11, 5), o lona fuafuaga—ua faaaliga i le Toefuataiga—na amata i se Fono i le Lagi. I le avea ai ma ni agaga, sa tatou mananao ai ia ausia le ola e faavavau o loo olioli ai o tatou matua faalelagi. I lona taimi sa tatou alualu i luma i le mea na gata ai lo tatou mafai e aunoa ma se olaga faaletino i se tino faitino. Ina ia maua lona aafiaga, na fuafua ai le Atua le Tama e foafoa lenei lalolagi. I le olaga faaletino na fuafuaina, o le a tatou eleelea ai i le agasala a o tatou feagai ai ma mea faafeagai e manao-mia mo lo tatou tuputupu a’e faale-agaga. O le a noatia foi i tatou i le oti faaletino. Ina ia toe faaola mai i tatou mai le oti ma le agasala, o le a saunia ai e lo tatou Tamā Faalelagi se Faaola. O Lona Toetu o le a togiola ai tagata uma mai le oti, ma o Lana taulaga togiola o le a totogi ai le tau e manao-mia mo tagata uma ina ia faamamaina ai mai agasala e tusa ma tuutuuga ua faatuina e siitia ai lo tatou tuputupu a’e. O lenei Togiola a Iesu Keriso e totonugalemu i le fuafuaga a le Tama.

I le Fono i le Lagi, sa folasia atu ai i fanau agaga uma a le Atua le fuafuaga a le Atua, e aofia ai ona taunuuga faaletino ma tofotofoga, o ana fesoasoaniga faalelagi, ma lona taunuuga mamalu. Na tatou vaaia le i’uga mai le amataga. O tagata soifua lē mafaitaulia



Provo, Iuta, ISA



ua fananau mai i lenei lalolagi na fili-filia le fuafuaga a le Tama ma tau mo lea fuafuaga i le taua i le lagi na sosoo ai. E toatele foi na osia ni feagaiga ma le Tama e faatatau i mea o le a tatou faia i le olaga faitino. I ni auala e le'i faaalua maia, na faatosinaina ai e a tatou amioga i le lalolagi o agaga o tatou tulaga i le olaga nei.

Olaga Faitino ma le Lalolagi o Agaga

O le a ou aoteleina nei nisi o elemene autu o le fuafuaga a le Tama, ona e aafia ai i tatou i la tatou malaga faaletino ma i le lalolagi o agaga e sosoo ai.

O le faamoemoega o le olaga faitino ma le tuputupu a'e e mafai ona sosoo ai pe a mavae lenei olaga mo fanau a le Atua ia avea e pei o Ia. O le finagalo lea o le Tama Faalelagi mo Ana fanau uma. Ina ia ausia lenei taunuuga olioli, ua manaomia ai e tulafono e faavavau i tatou ia tatau ona avea ma ni tagata ua faamamaina e ala i le Togiola a Iesu Keriso ina ia mafai ai ona tatou nonofo i le

afoaga o le Tama ma le Alo ma olioli i faamanuiaga o le faaeaga. E pei ona a'oa'o mai le Tusi a Mamona, ua Ia valaaulia "i latou uma ia o mai ia te Ia ma taumamafa i lona agalelei; ma e le teena e ia se tasi e sau ia te ia, e uliuli pe paepae, e pologa pe saoloto, o tane ma fafine; ma e manatua e ia le ua faapaupau; ma ua tutusa tagata uma i le Atua" (2 Nifae 26:33; tagai foi i le Alema 5:49).

O le fuafuaga paia mo i tatou o le avea lea ma tagata ua faamoemoeina e avea ai e manaomia ai lo tatou faia o filifiliga ia tetee atu i mea faafeagai a le tiapolo ia e faasoosoina tagata soifua ia faia amioga e feteenai ma poloaiga a le Atua ma Lana fuafuaga. O loo manaomia ai foi le noatia o i tatou i isi mea faafeagai faaletino e pei o mea e oo mai agasala a isi pe mai nisi o tulaga lē atoatoa o le fanau mai. O nisi taimi o lo tatou tuputupu a'e manaomia e ausiaina lelei e ala i puapuaga ma mafatiaga nai lo le mafanafana ma le toafimalie. Ma e leai ma se tasi o nei mea faafeagai faaletino e mafai ona

ausia ona faamoemoega e faavavau pe afai e aumai e suiga a le lagi le toomaga ia i tatou mai taunuuga uma lē lelei o le olaga faitino.

Ua faaalua i le fuafuaga lo tatou taunuuga i le ola e faavavau, o faamoemoega ma tuutuuga o la tatou malaga i le olaga faitino, ato'a ai ma fesoasoaniga a le lagi o le a tatou mauaina. O poloaiga a le Atua ua lapatai ai i tatou e faasaga i le o ese atu ma o i tulaga lamatia. O aoaoga a taitai musuia e taiala ai lo tatou ala ma maua ai faamautinoaga ia e siitia ai la tatou malaga e faavavau.

Ua aumai e le fuafuaga a le Atua ia i tatou ni faamautinoaga se fa e lagolago ai la tatou malaga i le olaga faitino. Ua aumai uma ia i tatou e ala mai i le Togiola a Iesu Keriso, o le totonugalemu o le fuafuaga. O le mea *muamua* ua faamautinoaga mai ia i tatou e faapea, e ala i Ona puapuaga mo agasala ia tatou te salamoaina, e mafai ai ona faamamaina i tatou mai na agasala. Ona oo lea i le faamasi-noga alofa mutimutivale mulimuli o le a "le toe manatuaina lava i latou" (Matatupu Faavae ma Feagaiga 58:42).

Lua, o se vaega o le Togiola a lo tatou Faaola, na Ia avea ai i Ona luga isi uma vaivaiga faaletino. Ua faatagaina ai e lenei mea i tatou ia maua le malosi e lavātia ai avega lē ma'alofiaina o le olaga faitino, avega faaletagata lava ia ma lautele, e pei o taua ma faama'i. Ua aumai e le Tusi a Mamona le tatou faamatalaga sili ona manino faatusitusiga paia e uiga i lenei mana taua o le Togiola. Na ave e le Faaola i Ona luga "tiga ma ma'i [ma vaivaiga] o lona nuu. . . . O le a ia ave i ona luga o latou vaivaiga, ina ia mafai ona faatumuina ona loto i le alofa mutimutivale, e tusa ai ma la le tino, ina ia mafai ona ia silafia e tusa ai ma la le tino, le ala e fesoasoani ai i

ona tagata e tusa ma o latou vaivaiga” (Alema 7:11–12).

Tolu, o le Faaola, e ala i Lana Togiola le i’u, na aveesea ai tuutuuga o le mutaaga o le oti ma aumai ia i tatou le faamautinoaga olioli o le a toetutu i tatou uma. Ua a’oa’o mai le Tusi a Mamona, “O lenei toefuataiga o le a oo mai i tagata uma, o e matutua ma e laiti, o e pologa ma e saoloto, o tane ma fafine, o e e amioleaga ma e e amiotonu; ma e oo lava i se lauulu e tasi o o latou ulu o le a lē toesea; ae o le a toefuataiina mea taitasi i lona tulaga atoatoa” (Alema 11:44).

Ua tatou faamanatuina le moni o le Toetu i lenei vaitau o le Eseta. Ua aumaia e lenei toetu le vaaiga ma le malosi e onosaia ai luitau o le olaga faaletino o loo feagai ma i tatou taitoatasi, ma i latou tatou te alolofa i ai, o mea e pei o tulaga lē atoatoa faaletino, faalemafaufau, pe faalelagona ia tatou te o mai ma i tatou ina ua fananau mai pe oo mai foi i le gasologa o le olaga faitino. Ona o le Toetu, ua tatou iloa ai o nei faaletonu faaletino ua na o se taimi lē tumau!

Ua faamautinoa mai e le talalelei toefuataiina ia i tatou o le Toetu e mafai ona aofia ai le avanoa e faatasi ai ma tagata o o tatou aiga—tane, ava, fanau, ma matua. O se faamalosi’auga mamana lea mo i tatou e faataunuu ai o tatou tiutetauave faaleaiga i lenei olaga faitino. E fesoasoani ia i tatou e ola faatasi ai i le alofa i lenei olaga i le tulimatai atu o le toetu faatasiga fiafia ma fegalegaleaiga i le isi olaga.


Fa ma le mea mulimuli, ua a’oa’o i tatou e faaaliga o onapo nei o lo tatou alualu i luma e le manaomia ona muta i le i’uga o le olaga faaletino. E ititi se mea ua faaali mai e uiga i lenei faamautinoaga taua. Ua ta’u mai ia i tatou o lenei olaga o le taimi lea e saunia ai e feiloai ai ma le Atua ma o lea e

lē tatai ai ona faatuai lo tatou salamo (tagai i le Alema 34:32–33). Ae o loo a’oa’o pea i tatou e faapea i le lalolagi o agaga o loo tala’i ai le talalelei e oo lava i “e amioleaga ma lē ususitai o e na teena le upumoni” (Mataupu Faavae ma Feagaiga 138:29) ma o i latou ua aoaoina iina ua mafai ona salamo a o lumanai ai le Faamasinoga Mulimuli (tagai i fuaiupu 31–34, 57–59).

O nisi nei o mea faavae o le fuafuaga a lo tatou Tama Faalelagi.

O le talalelei toefuataiina a Iesu Keriso ua tatou maua ai se vaaiga tulagaese i mataupu o le ola mama, faaiipoipoga, ma le fanauina of fanau. Ua a’oa’o mai o le faaiipoipoga e tusa ma le fuafuaga a le Atua e manaomia mo le faataunuuina o le faamoemoega o le fuafuaga a le Atua, e tuu mai ai le faatulagaga ua tofia mai le lagi mo le fanau mai faaletino, ma le sauniaina o tagata o le aiga mo le ola e faavavau. “O le faaiipoipoga ua faauuina e le Atua mo le tagata,” sa fetalai ai le Alii, “ina ia mafai ona faataunuu e le lalolagi le faamoemoe o lona foafoaga” (Mataupu Faavae ma Feagaiga 49:15–16). I lenei fuafuaga, ioe, o Lana fuafuaga, ua fetai ai ma nisi o malosiaga malolosi faalelalolagi i le tulafono ma tu masani.

O le mana e foafoa ai le ola faaletino o le mana aupito sili lea ona faaeaina ua tuuina mai e le Atua i ana fanau. O lona faaogaaga sa faatonuina mai i le poloaiga muamua, ae sa i ai se isi poloaiga taua sa tuuina mai e faasa ai lona faaogaina sese. I fafo atu o noataga o le faaiipoipoga, o le faaogaina o le mana foafoa i auala uma lava, o ni faaogaina sese ia ma agasala inosia o le uiga paia silisili o tane ma fafine. O le faamamafa ua tuu e le talalelei toefuataiina i luga o leni tulafono o le ola mama, ona o le faamoemoega o o tatou mana foafoa i le faataunuuina o le fuafuaga a le Atua.



Olmúé, Marga Marga, Chile

O Le A le Mea e Sosoo ai?

I lenei faamanatuga o lenei 200 tausaga o le Uluai Faaaliga lea na amatalia ai le Toefuataiga, ua tatou iloa ai le fuafuaga a le Alii ma ua uunaia i tatou e faamanuiaga o seneturi e lua e ala i Lana Ekalesia toefuataiina. I lenei tausaga o le 2020, ua tatou maua ai le mea ua ta’ua e foma’i o le vaaiga mamao 20/20 mo mea na tutupu i le tuanaia.

Peitai, a o tatou vaai atu i le lumanai, ua fai si le manino o le tatou vaaiga mamao. Ua tatou iloa o seneturi e lua ua mavae o le Toefuataiga, ua i ai nei i le lalolagi o agaga le tele o tagata atamamai mai lenei olaga e faataunuu le tala’iga o loo faia iina. Ua tatou iloa foi ua tele nei ni a tatou malumalu e faatino ai sauniga o le faavavau mo i latou o e salamo ma taliaina le talalelei a le Alii i le isi itu o le veli o le oti. O nei mea uma ua faalautele ai le fuafuaga a le Tama Faalelagi. Ua tele na’ua le alofa o le Atua, na Ia saunia ai se taunuuga o le mamalu mo Ana fanau uma, vagana ai nisi toalaiti na loto lava e ave a ma atalii o le malaia (tagai i le Mataupu Faavae ma Feagaiga 76:43).

Ua tatou iloa o le a toe afio mai le Faaola ma o le a i ai se meleniuma o le nofotupu filemu e faamaea ai le vaega faaletino o le fuafuaga le Atua. Ua tatou iloa foi o le a eseese toetutu, o e amiotonu ma e le amiotonu, faatasi ma le faamasinoga mulimuli o



Saunia e Elder Quentin L. Cook
O Le Korama a Aposetolo e Toasefululua

tagata taitoatasi e sosoo ma lona lava toetu mai.

O le a faamasinoina i tatou e tusa ma a tatou amioga, o manaoga o o tatou loto, ma le ituaiga o tagata ua tatou avea ai. O lenei faamasinoga o le a mafai ai e fanau uma a le Atua ona agai atu i se malo o le malumalu na agavaa ai i latou e tusa ma lo latou usiusitai ma le mea o le a latou toafimalie ai. O le faamasino o nei mea uma o lo tatou Faaola, o Iesu Keriso (tagai i le Ioane 5:22; 2 Nifae 9:41). O Lona silisili ese ua Ia maua ai se silafia atoatoa i a tatou amioga ma manaoga uma, e aofia uma ai ē lē salamo pe lē suia ma ē ua salamo po o ē amiotonu. O le mea lea, i le mavae ai o Lana faamasinoga o le a tatou ta'utino atu “ua tonu ana faamasinoga” (Mosaea 16:1).

I le faaiuga, ou te faasoa atu le talitonuga maumaututu na oo mai ia te a'u i le tele o tusi ma e ala i le iloiloaina o le tele o talosaga ia toefoi mai i le Ekalesia i le mavae ai o le aveesega o igoa po o le liliuese. O le toatele o o tatou tagata o le Ekalesia e lē malamalama i lenei fuafuaga o le faaolataga, lea na te taliina le tele o fesili e uiga i aoaoga faavae ma aiaiga faavae musuia a le Ekalesia toefuataina. O i tatou ua iloaina le fuafuaga a le Atua ma o ē ua osifeagaiga e auai ai, ua i ai se tiutetauave manino e a'oa'o atu nei upumoni ma faia mea uma tatou te mafaia e faalatele ai ia mea mo isi ma i o tatou lava tulaga i le olaga faaletino. Ou te molimau ia Iesu Keriso, lo tatou Faaola ma le Togiola, ua mafaia ai mea uma, i le suafa o Iesu Keriso, amene. ■

FAAMATALAGA

1. “O Le Toefuata'iga o le Atoatoaga o le Talalelei a Iesu Keriso: O Se Folafolaga o le Faamanatuina o le Lua Seneturi i le Lalolagi, “Faalogo ia te Ia,” *Liahona*, Me 2020, 91.

O Le Faamanuiaga o Faaaliga Faifai Pea i Perofeta ma Faaaliga Faaletagata Lava Ia e Taiala ai o Tatou Olaga

O faaaliga faifai pea ua maua ma o loo maua pea e ala mai i auala ua faavaeina e le Alii.

O le asō o le a ou lauga atu ai i faaaliga faifai pea i perofeta ma faaaliga faifai pea faaletagata lava ia e taiala ai o tatou olaga.

O nisi taimi tatou te maua ai faaaliga e tusa lava pe tatou te le iloaina ia faamoemoega o le Alii. A o le'i valaauina Elder Jeffrey R. Holland e avea ma se Aposetolo ia Iuni o le 1994, sa

ou maua se aafiaga faafaaaliga matagofie o le a valaauina o ia. Sa avea a'u ma se sui lisone ma sa leai se mafuaaga o le a ou maua ai lena malamalama. Ae sa avea i ma'ua ma ni soa a o avea ma faifeautalai talavou i Egelani i le amataga o le vaitau 1960, ma ou te alofa tele mo ia. Sa ou manatu i lea aafiaga o se alofa mutimutivale



San Bernardo, Santiago, Chile

agamalu mo a'u. I nai tausaga talu ai nei, sa ou mafaufau ai pe sa sauniaina a'u e le Alii ia avea ma se soa laitiiti i le Toasefululua i se soa maoae faafai-feautalai sa avea ma a'u soa laitiiti a o avea ma'ua ma ni faifeautalai talavou.¹ O nisi taimi ou te lapataia ai faifeautalai talavou ia agalelei i a latou soa laiti ona latou te le iloa lava le taimi e ono avea ai i latou ma a latou soa sinia.

E i ai sa'u molimau mausali o lenei Ekalesia toefuataiina o loo taitaia e lo tatou Faaola, o Iesu Keriso. E silafia e Ia po o ai e valaauina e avea ma Ana Aposetolo ma po o le a foi le faasologa e valaau ai i latou. E silafia foi e Ia le auala e saunia ai Ana Aposetolo sinia e avea ma perofeta ma Peresitene o le Ekalesia.

Ua faamanuiaina i tatou i lenei taeao e faalogo atu i lo tatou perofeta pele, Peresitene Russell M. Nelson, na fofogaina se folafolaga loloto o le faamanatuina o le lua seneturi i le lalolagi e faatatau i le Toefuataiga o le atoatoaga o le talalelei a Iesu Keriso.² O lenei tautinoga mamana a Peresitene Nelson ua faamanino mai ai e faapea o le Ekalesia a Iesu Keriso ma lona tupuaga, ola, ma le ala e agai i ai mo le lumanai ua taula atoa i le mataupu faavae o faaaliga faifai pea. O le folafolaga fou ua fai ma faatusa o fesoootaiga a se Tama alofa i Lana fanau.

I se aso ua leva atu, sa faailoa mai ai e Peresitene Spencer W. Kimball ni lagona ia o loo ia te a'u i le asō. Na ia ta'ua: "E ui lava i mea uma . . . ae e tatau ona sili atu lo tatou agaga faafetai i le aso [mo] ona o le tatalaina mai pea o le lagi, ma o le Ekalesia toefuataiina a Iesu Keriso ua faavaeina i luga o le papa o faaaliga. E moni lava o faaaliga faifai pea o le toto ola lea o le talalelei a le Alii ma le Faaola soifua o Iesu Keriso."³


Na muai vaai le perofeta o Enoka i aso ua tatou ola ai nei. Sa faailoa atu e le Alii ia Enoka le amioleaga tele o le a matua salalau ma valoia mai "puapuaga e tele" o le a tutupu. Ae ui i lea, sa folafola mai e le Alii, "ae o lo'u nuu o le a Ou faasaoina."⁴ "Ma o le a Ou auina atu i lalo mai le lagi le amiotonu; ma o le a Ou auina atu le upumoni i fafo mai le elelee, e molimau atu i la'u Toatasi na Fanau."⁵

Sa a'oa'o mai Peresitene Ezra Taft Benson ma le mana tele e faapea o le Tusi a Mamona, le ma'a'au'au o le tatou tapuaga, na sau i fafo mai le elelee i le faataunuuga o le fetalaiga a le Alii ia Enoka. O le Tama ma le Alo ma agelu ma perofeta na faaali atu i le Perofeta o Iosefa Samita na "faatonuina e le lagi e toefuatai mai mana e tatau ai i le malo."⁶

Na maua e le Perofeta o Iosefa Samita lea faaaliga ma lea faaaliga. O nisi [o ia faaaliga] ua uma ona talanoaina i lenei konafesi. E tele faaaliga na maua e le Perofeta o Iosefa ua faasaoina mo i tatou i totonu o le Mataupu Faavae ma Feagaiga. O tusitusiga faavae uma o le Ekalesia o loo i ai le mafaufau ma le finagalo o le Alii mo i tatou i lenei tisipenisione mulimuli.⁷

E faaopoopo atu i nei tusitusiga paia faavae maoae, ua faamanuiaina i tatou i faaaliga faifai pea i perofeta soifua. O perofeta o "sui tofia o le Alii, ua faatagaina e saunoa mo Ia."⁸

O nisi faaaliga e matua ma'eu le taua, ma o isi e faaleleia ai lo tatou malamalama i upumoni paia taua ma maua ai le taiala mo o tatou aso.⁹



Tatou te matua faafetai tele mo le faaaliga ia Peresitene Spencer W. Kimball na faasafua atu ai le perisitua ma faamanuiaga o le malumalu i alii agavaa uma o le Ekalesia i le aso 8 o Iuni, 1978.¹⁰

Ua ou auauna faatasi ma le toatele o le Toasefululua sa i ai ma auai i le taimi na maua ai lena faaaliga taua. Sa faamautu mai e i latou taitoatasi, i talanoaga patino, le taitaiga mamana faaleagaga ma le autasi na latou oo i ai ma Peresitene Kimball. E toatele na fai mai o le faaaliga pito sili lea ona mamana na latou mauaina talu mai lena taimi.¹¹

O i matou o loo auauna atu i le taimi nei i le Korama a Aposetolo e Toasefululua ua faamanuiaina i o matou aso a o oo mai faaaliga taua e ala mai i perofeta o i ai nei.¹² Ua avea Peresitene Russell M. Nelson ma se sui tofia o le Alii *aemaise* e faatatau i faaaliga e fesoasoani ai i aiga ia fausia ni malutaga o le faatuatua i o latou fale, faapotopoto Isaraelu ua faataapeapeina i itu uma e lua o le veli, ma faamanuia tagata ua maua faaeega paia i mataupu tau i sauniga paia o le malumalu.

Ina ua faasilasila mai suiga taua ina ia faamanuia ai o tatou aiga i le konafesi aoao ia Oketopa 2018, ou te molimau atu "i fonotaga a le Aufono a le Au Peresitene Sili ma le Korama a Aposetolo e Toasefululua i totonu



Faaaliga Faaletagata Lava Ia e Taialina ai o Tatou Olaga

O loo avanoa faaaliga faaletagata lava ia i tagata uma e saili atu ma le lotomaulalo i le taitaiga mai le Alii. E taua foi e pei o faaaliga faaperofeta. O faaaliga faaleagaga faaletagata lava ia mai le Agaga Paia ua mauaina ai e le faitau miliona le molimau e manaomia ina ia papatisoina ai ma faamauina o ni tagata o Le Ekalesia a Iesu Keriso o le Au Paia o Aso e Gata Ai.

O faaaliga faaletagata lava ia o le faamanuiaga loloto lea e maua pe a maea le papatisoga i le taimi e “faapaiaina [ai tatou] i le taliaina o le Agaga Paia.”¹⁹ Ou te manatua se faaaliga faaleagaga faapitoa ina ua 15 o’u tausaga. Sa saili atu e lo’u uso pele se taitaiga mai le Alii pe faapefea ona tali atu i lo ma tamā pele, sa le manao e auauna atu lo’u uso i se misiona. Sa ou tatalo foi ma se faamoemoega faamaoni ma maua ai se faaaliga faaletagata lava ia o le moni a’ia’i o le talalelei.

O le matafaioi a le Agaga Paia

O faaaliga faaletagata lava ia e fua i upumoni faaleagaga e maua mai le Agaga Paia.²⁰ O le Agaga Paia o le na te faaali mai ma molimau mai i upumoni uma, aemaise le moni o le Faaola. A unoa ma le Agaga Paia, e le mafai ona tatou iloa moni o Iesu o le Keriso. O lana matafaioi taua tele o le molimau mai lea i le Tama ma le Alo ma o La faalagiga ma lo La mamalu.

E mafai e le Agaga Paia ona faatosinaina tagata uma i se ala mamana.²¹ O lenei faatosinaga o le a le tumau vagana ua papatisoina se tasi ma mauaina le meaalofo o le Agaga Paia. E avea foi le Agaga Paia ma se sui e faamama [i tatou] i le faagasologa o le salamo ma le faamagaloga.

o le malumalu, . . . i le mavae ai ona aioi atu o lo tatou perofeta pele i le Alii mo se faaaliga . . . , sa maua ai se faamautinoaga mamana e uso uma.”¹³

I lenei taimi, o isi faaaliga e fesootai i sauniga paia o le malumalu na mauaina ae sa le’i faasilasilaina pe faatinoina.¹⁴ O lenei taiala sa amatalia i faaaliga faaperofeta patino ia Peresitene Russell M. Nelson ma faamautinoaga agamalua ma mamana ia i latou e auai i le faagasologa. Sa faaauai patino e Peresitene Nelson ia tuafafine o loo pulefaamalumalu i faalapotopotoga a le Aualofa, Tamaitai Talavou, ma le Peraimeri. O le taiala faaiu, i totonu o le malumalu, i le Au Peresitene Sili ma le Korama a Aposetolo e Toasefululua sa matua faaleagaga ma mamana. Sa iloa e i matou taitoatasi sa matou mauaina le mafaufau, finagalo, ma le siufofoga o le Alii.¹⁵

Ou te tautino atu ma le paia atoa o faaaliga faifai pea ua maua ma o loo maua pea e ala mai i auala ua faavaeina e le Alii. Ou te molimau atu o le folafolaga fou na fofogaina e Peresitene Nelson i lenei taeao o se faaaliga e manuia ai tagata uma.

Matou te Tuu Atu se Valaaulia i Tagata Uma ia Taumamafa i le La’o’ai o le Alii

Matou te tautino atu foi lo matou naunautaiga faamaoni ina ia toe faatasia ma i latou o ē o loo tauivi ma a latou molimau, ua le toaaga,

pe ua aveesea foi o latou suafa mai faamaumaga a le Ekalesia. Matou te mananao ia taumamafa faatasi ma outou, “i afioga a Keriso,” i le la’o’ai o le Alii, ia a’oa’o i mea e tatau ona faia e i tatou uma.¹⁶ Matou te manaomia outou! E manaomia outou e le Ekalesia! E manaomia outou e le Alii! O le matou tatalo faamaoni ia outou auai faatasi ma i matou i tapuaiga i le Faaola o le lalolagi. Matou te iloa o nisi o outou atonu na faatiga i ai, agaleagaina, po o isi amioga e le FaaKeriso. Matou te iloa foi o nisi o loo i ai ni luitau i lo latou faatuatua atonu e le o talisapaiaina atoatoa, malamalama i ai, pe foiaina foi.

O nisi o o tatou tagata sili ona faamaoni ma faatuatua ua mafatia i se luitau i lo latou faatuatua mo se vaitau. Ou te fiafia i le tala moni ia W. W. Phelps, o le na tuua le Ekalesia ma molimau e faasagatau i le Perofeta o Iosefa Samita i se fale faamasino i Misuri. Ina ua salamo, sa ia tusi atu ia Iosefa, “Ua ou iloa le tulaga ua ou i ai, ua e iloaina, ma ua silafia e le Atua, ma ou te manao ia laveaiina a’u pe afai e fesoasoani mai a’u uo ia te a’u.”¹⁷ Sa faamagaloga o ia e Iosefa, ma toe faafaigaluegaina o ia, ma tusi atu i ai ma le agaalofo, “O uo sa i ai muamua ua toe uo foi i le faaiuga.”¹⁸

Uso e ma tuafafine, po o a lava ou tulaga, faamolemole ia iloa o le a toe talileleia e le Ekalesia ma ona tagata oel!

E fesootai mai le Agaga i auala ofoofogia. Na faaaoga e le Alii lenei faamatalaga matagofie:

“O le a ou faaali atu ia te oe i lou mafaufau ma lou loto i le Agaga Paia, e oo atu ia te oe ma o le a tumau i lou loto.

O lenei, faauta, o le agaga lenei o faaaliga.”²²

E ui o ona aafiaga e mafai ona matua mamana tele, ae tele lava ina sau filemu o se leo filemu ma itiiti.²³ Ua aofia i tusitusiga paia le tele o faataitaiga o le auala e faatosinaina ai e le Agaga o tatou mafaufau, e aofia ai le fetalai mai o le fielmua i o tatou mafaufau,²⁴ afio i o tatou mafaufau,²⁵ faamalamalamaina o o tatou mafaufau,²⁶ po o se leo i o tatou mafaufau.²⁷

O nisi o mataupu faavae e sauniaina i tatou e maua faaaliga ua aofia ai:

- Tatalo mo le taitaiga faaleagaga. I le faaaloalo ma le lotomaulalo e manaomia ai ona tatou saili atu ma ole atu²⁸ ma ia onosai ma usitai.²⁹
- Saunia mo musumusuga. O lenei mea e manaomia ai lo tatou ogatasi ma a’oa’oga a le Alii ma ia tausisi i Ana poloaiga.

- Taumafa ma le agavaa i le faamanatuga. A tatou faia lenei mea, ua tatou molimau atu ma osifeagaiga ma le Atua tatou te ave i o tatou luga le suafa o Lona Alo Paia ma e tatou te manatua pea o Ia ma tausisi i Ana poloaiga.

O nei mataupu faavae e sauniaina i tatou ia maua, iloa, ma mulimuli i uunaiga ma le taitaiga a le Agaga Paia. Ua aofia i lenei mea ia “mea filemu . . . e maua ai le olioli [ma le] . . . ola e faavavau.”³⁰

O le a matua faaleleia a tatou sauniuniga faaleagaga pe a tatou sue-sue e le aunoa i tusitusiga paia ma upumoni o le talalelei ma mafaufau loloto i o tatou mafaufau le taitaiga tatou te sailia. Ae manatua ina ia onosai ma faalagolago i le taimi a le Alii. O le taitaiga e aumai e se Alii silisili ese pe a Ia “filifili ma le loto i ai e a’oa’o i tatou.”³¹

Faaaliga i o Tatou Valaauga ma Tofiga

O le a tuuina mai foi e le Agaga Paia faaaliga i o tatou valaauga ma tofiga. I lo’u aafiaga, o le taitaiga faaleagaga taua e tele ina oo mai pe

a tatou taumafai e faamanuia isi i le faataunuuina o o tatou tiutetauave.

Ou te manatua a o avea ma se epikopo talavou le mauaina o se valaau faapopoleina mai se ulugalii ae toeitiiti pu’e la’u vaalele mo se fonotaga faapisinisi. Sa ou aioi atu i le Alii a o le’i taunuu mai i la’ua ia iloa pe faapefea ona ou faamanuiaina i la’ua. Sa faaali mai ia te a’u le natura o le faafitauli ma le tali e tatau ona ou avatu i ai. O lena taitaiga faafaaaliga na faatagaina a’u e faataunuu ia tiutetauave paia o lo’u valaauga o se epikopo e ui i se taimi itiiti sa avanoa ai. Ua tausoa uma foi e epikopo i le lalolagi atoa nei ituaiga o aafiaga e tasi faatasi ma a’u. I le avea ai ma se peresitene o le siteki, e le gata sa ou mauaina faaaliga taua ae sa maua foi ni *faasa’oga* patino ia na manaomia e faataunuu ai faamoemoega o le Alii.

Ou te faamautinoa atu ia te outou o le taitaiga faafaaaliga e mafai ona maua e i tatou taitoatasi pe a tatou galulue ma le lotomaulalo i le tovine a le Alii. O le tele o la tatou taitaiga e sau mai le Agaga Paia. O nisi taimi ma mo nisi o faamoemoega, e sau sa’o mai le Alii. Ou te molimau patino atu e moni lenei mea. O le taitaiga mo le Ekalesia atoa, e oo mai i le Peresitene ma le perofeta o le Ekalesia.

I le avea ai ma Aposetolo o onapo nei, ua matou maua le avanoa e galulue ma faimalaga faatasi ai ma lo tatou perofeta o i ai nei, Peresitene Nelson. Ou te tofaapu atu le mea sa saunoa i ai Uilifoti Uutilafi e uiga i le Perofeta o Iosefa Samita; e tutusa lona moni ia Peresitene Nelson. Ua ou vaai “i galuega a le Agaga o le Atua ia te ia, atoa ai ma faaaliga a Iesu Keriso ia te ia ma le faataunuuina o na faaaliga.”³²

O la’u aioiga faamaulalo i le aso ia taitoatasi i tatou ma saili i faaaliga



Rexburg, Idaho, ISA



faifai pea e taiala ai o tatou olaga ma mulimuli i le Agaga a o tatou tapuai atu i le Atua le Tama i le suafa o lo tatou Faaola, o Iesu Keriso, o lē ou te molimau atu ai i le suafa o Iesu Keriso, amene. ■

FAAMATALAGA

1. I le 1960 ina ua tuuaitia mai tausaga mo auunaga faafaifeautalai mo alii talavou mai le 20 i le 19 le matutua, o a'u se tasi o le au 20 mulimuli; o Elder Jeffrey R. Holland o se tasi o le au uluai 19 tausaga le matutua.
2. "O Le Toefuata'iga o le Atoatoaga o le Talalelei a Iesu Keriso: O Se Folafolaga o le Faamanatuina o le Lua Seneturi i le Lalolagi," Faalogo ia te Ia," *Liahona*, Me 2020, 91. O lenei folafolaga ua i ai faatasi ma isi folafolaga e lima ua fofogaina i lenei tisipenisione e le Au Peresitene Sili ma le Korama a Aposetolo e Toasefululua.
3. *Aoaoga a Peresitene o le Ekalesia: Spencer W. Kimball* (2006), 243; tagai foi i le Mataio 16:13–19.
4. Mose 7:61.
5. Mose 7:62. Sa faaaau ona fetalai le Alii, "Ma o le a ou faia ia oo atu i le lalolagi atoa faapei o se lolo le amiotonu ma le upumoni, e faapotopoto mai ai e ua ou filifilia mai i itu e fa o le lalolagi" (Mose 7:62; tagai foi i le Salamo 85:11).
6. Ezra Taft Benson, "O Le Mea Alofa o Faaaliga o Ona Po Nei," *Liahona*, Ian. 1987, 81.
7. Tagai i le Ezra Taft Benson, "O Le Mea Alofa o Faaaliga o Ona Po Nei," 80.

8. Hugh B. Brown, "Joseph Smith among the Prophets" (Sixteenth Annual Joseph Smith Memorial Sermon, Logan Institute of Religion, Dec. 7, 1958), 7.
9. Tagai i le Hugh B. Brown, "Joseph Smith among the Prophets," 7. I tulaga uma lava, o faaaliga e ogatasi ma le afioga a le Atua na tuuina mai i perofeta na muamua atu.
10. Tagai i le Folafolaga Aloaia 2; tagai foi i le 2 Nifae 26:33. O le faaaliga na faatinoina ai le aoaoga faavae o loo aumai i le Tusi a Mamona e faapea "ua tutusa tagata uma i le Atua," e aofia ai le "uliuli pe pa'epa'e, e pologa pe saoloto, o tane ma fafine" (2 Nifae 26:33). O lenei faaaliga ofofofia sa mauaina ma faamaoniaina i le potu aluga paia o le Malumalu o Sate Leki e le Aufono a le Au Peresitene Sili ma le Korama a Aposetolo e Toasefululua.
11. E toatele Aposetolo na faailoa mai o lea faaaliga sa matua mamana ma paia tele lea o le a le lava soo se upu e faaoga e faamatalaina ai ma, i nisi auala, o le a faaitiitia ai le natura loloto ma le mamana o le faaaliga.
12. Tagai i le "O Le Aiga: O Se Folafolaga i le Lalolagi," *Liahona*, Me 2017, 145. Sa fofogaina lenei folafolaga e Peresitene Gordon B. Hinckley, i le Sauniga Aoa o le Aualofa sa faia i le aso 23 o Setema, 1995 i le Aai o Sate Leki, Iuta. Tagai foi i le Thomas S. Monson, "Susu Mai Ia ma Maliu Mai i le Konafesi," *Liahona*, Nov. 2012, 4–5. Sa faasilasila atu ai e Peresitene Monson mea e manaomia mo le tuuaitia o tausaga mo le auunaga faafaifeautalai.
13. Quentin L. Cook, "Liuaia Loloto ma Tumau i le Tama Faalelagi ma le Alii o

Iesu Keriso," *Liahona*, Nov. 2018, 11.

14. O faaaliga e fesootai i sauniga paia o le malumalu na faatinoina i malumalu uma i le amataga o le aso 1 Ianuari, 2019. E taua le malamalama o auililiga patino e uiga i sauniga o le malumalu e na o totonu o le malumalu e talanoaina ai. Peitai, e a'oa'o atu mataupu faavae. Sa a'oa'o mai ma le matagofie e Elder David A. Bednar le taua o feagaiga ma sauniga o le malumalu ma le auala e "tafe mai le mana o le Amio Atua i o tatou olaga" e ala mai i ia sauniga ma feagaiga ("Ia Fausia Lenei Fale mo Lo'u Igoa," *Liahona*, Me 2020, 86).
15. O lenei faagasologa ma fonotaga na faia i totonu o le Malumalu o Sate Leki ia Ianuari, Fepuari, Mati, ma Aperila 2018. O le faaaliga mulimuli i le Au Peresitene Sili ma le Korama a le Toasefululua sa faia i le aso 26 o Aperila, 2018.
16. Tagai i le 2 Nifae 32:3.
17. *Au Paia: O Le Tala o le Ekalesia a Iesu Keriso o le Au Paia i Aso e Gata Ai*, vol. 1, *O Le Tagavai o le Upumoni, 1815–1846* (2018), 418.
18. *Au Paia*, 1:418.
19. 3 Nifae 27:20.
20. O le Agaga Paia o se tasi o le Aiga Atua (tagai i le 1 Ioane 5:7; Mataupu Faavae ma Feagaiga 20:28). E i ai ia te ia se tino o agaga i le faatusa ma foliga o se tagata (tagai i le Mataupu Faavae ma Feagaiga 130:22). O Lana faatosinaga e mafai ona i ai i soo se mea. E tasi o ia i faamoemoega ma lo tatou Tama Faalelagi ma Iesu Keriso, lo tatou Faaola.
21. Mo se malamalama fa'apitoa o le Malamalama o Keriso ma le eseese e le va o le Malamalama o Keriso ma le Agaga Paia, tagai i le 2 Nifae 32; Mataupu Faavae ma Feagaiga 88:7, 11–13; "Malamalama o Keriso," Bible Dictionary. Tagai foi i le, Boyd K. Packer, "O Le Malamalama o Keriso," *Liahona*, Ape. 2005, 8–14.
22. Mataupu Faavae ma Feagaiga 8:2–3.
23. Tagai i le Helamana 5:30; Mataupu Faavae ma Feagaiga 85:6.
24. Tagai i le Mataupu Faavae ma Feagaiga 6:23.
25. Tagai i le Mataupu Faavae ma Feagaiga 128:1.
26. Tagai i le Mataupu Faavae ma Feagaiga 11:13.
27. Tagai i le Enosa 1:10.
28. Tagai i le Mataio 7:7–8.
29. Tagai i le Mosaea 3:19.
30. Mataupu Faavae ma Feagaiga 42:61.
31. Neal A. Maxwell, *All These Things Shall Give Thee Experience* (2007), 31.
32. Ulilifoti Uutilafai, i le *Aoaoga a Peresitene o le Ekalesia: Josefa Samita* (2007), 283.



Saunia e Elder Ricardo P. Giménez
O Le Fitugafulu

Mauaina o le Malutaga mai Āfā o le Olaga

O Iesu Keriso ma Lana Togiola o le malutaga lea tatou te manaomia uma, e tusa lava po o a āfā o taiaina o tatou olaga.

I le ogatotonu o le vaitau ivasefulu, i le taimi o o’u tausaga i le kolisi, sa avea a’u ma se vaega o le Kamupani Lona Fa o le Matagaluega o Tineimu i Santiago i Chile. A o auuauna ai iina, sa ou nofo ai i le ofisa tineimu o se vaega o le au leoleo po. A o tulata atu i le faaiuga o le tausaga, sa ta’u mai ia te a’u e ao ona ou i ai i le ofisa tineimu i le Afiāfi e sosoo ma le Tausaga Fou ona o lena aso e toetoe lava o taimi uma e i ai lava se faalavelave. I le faate’ia ai, sa ou tali atu, “E mo’i?”

Ia, ou te manatua le faatalitali ai ma a’u uo i le vaeluapo, ae amata loa ona tafana i luga mea faapāpā i le taulaga o Santiago. Sa amata ona matou feopoa’i le tasi ma le isi ma faamanuia le tausaga fou. Sa faafuasei ona amata tatagi logo o le fale fuimu, e faailo ai ua i ai se faalavelave faafuasei. Sa aumai matou meafaigaluega ma feosofi loa i luga o le loli fuimu. I le agai atu i le faalavelave, a o matou pasia motu o tagata o loo faamanatuina le tausaga fou, sa ou matauina ai e toatele e le o popole ma o loo saoloto. Sa toafimalie ma fialia i le po mafanafana o le taumafanafana. Ae i se vaimea o lata ane, o tagata ia sa

matou faataalise atu e fesoasoani i ai sa matua mafatia lava.

O lenei aafiaga sa fesoasoani ia te a’u e iloa ai e ui e i ai taimi o o tatou olaga e sologa lelei, ae o le a oo mai le taimi mo i tatou taitoatasi o le a tatou feagai ai ma luitau ma āfā e le’i faamoemoeina ia o le a tuleia tapulaa o lo tatou gafatia e onosai ai. O luitau faaletino, faalemafaufau, faaleaiga, ma faalegaluega; faalavelave faalenatura; ma isi faafitauli tau i le ola ma le oti, o nisi ia o faaitaiga o āfā o le a tatou feagai ai i lenei olaga.

Pe a feagai ma nei āfā, e tele ina tatou aafia i lagona o le faanoanoa po o le fefe. Sa saunoa Peresitene Russell M. Nelson, “O le faatuatua o le vaifofo lea o le fefe”—*faatuatua i lo tatou Alii o Iesu Keriso* (“Ia Faaali Atu Lou Faatuatua,” *Liahona*, Me 2014, 29). A o ou vaai i āfā ua aafia ai olaga o tagata, ua ou maua se faaiuga e

faapea, e le afaina po o le a le ituaiga o āfā o loo taiaina i tatou—e tusa lava pe o i ai se vaifofo pe o i ai foi se mutaaga o iloa atu—e na o le tasi lava le malutaga o i ai, ma e tutusa mo ituaiga uma o āfā. O lenei malutaga e tasi ua saunia e lo tatou Tama Faalelagi, o lo tatou Alii o Iesu Keriso ma Lana Togiola.

E leai ma se tasi o i tatou e tuusaunoa mai le feagai ai ma nei āfā. Sa a’oa’o mai Helamana, o se perofeta o le Tusi a Mamona ia i tatou le mea lenei: “Ia manatua o luga lava o le papa o lo tatou Togiola, o le o Keriso lea, le Alo o le Atua, e ao ina oulua atinae ai lo oulua faavae; ina ia pe a auina mai e le tiapolo ana matagi malolosi, ioe, ana ufanafana i le asiosio, ioe, pe a pesi mai ia te oulua ana uatoa uma ma lana afa malosi, o le a leai sona mana i luga o oulua e toso ifo ai oulua i lalo i le to o le pagatia ma le malaia e le gata, ona o le papa lea ua oulua atinae ai i luga, o le faavae mautinoa lea, o se faavae lea afai e atiae ai tagata e le mafai lava ona pauu i latou” (Helamana 5:12).

Sa saunoa Elder Robert D. Hales, o lē sa i ai foi ona lava ia aafiaga i le onosaia o āfā e faapea, “O mafatiaga e faaleatulaulau; o le auala tatou te tali atu ai i mafatiaga e patino i le tagata lava ia. O mafatiaga e mafai ona tauaveina



Oslo, Nouei

ai i tatou i ni ala se lua. E mafai ona avea o se aafiaga e faamalosi ma faamamaina e o faatasi ma le faatuatua, pe e mafai foi ona avea o se malosiaga faataumaoui i o tatou olaga pe afai e leai so tatou faatuatua i le taulaga togiola a le Alii” (“Your Sorrow Shall Be Turned to Joy,” *Ensign*, Nov. 1983, 66).

Ina ia olioli i le malutaga ua ofo mai e Iesu Keriso ma Lana Togiola, e tatau ona tatou faatuatua ia te Ia—o se faatuatua o le a faatagaina ai i tatou e tutulai i luga a’e o tiga uma o se vaaiga faalelalagi e tapulaa. Ua Ia folafola mai o le a Ia faamāmāina a tatou avega pe afai tatou te o mai ia te Ia i mea uma tatou te faia.

“Ia outou o mai ia te a’u, o outou uma o ē tīgaina ma mafatia i avega, o a’u foi e malolo ai outou.”

“Ia outou amoina la’u amo, ma ia outou faaa’oa’o ia te a’u, aua o a’u lē agamalu ma le loto maulalo, ona maua lea e outou o le malologa mo outou agaga.

“Aua e avegofie la’u amo, o la’u avega foi e māmā ia” (Mataio 11:28–30; tagai foi i le Mosaea 24:14–15).

Ua faapea mai “i lē e i ai le faatuatua, e le manaomia se

faamalalamalama. I lē e aunoa ma le faatuatua, e leai se faamalalamalama e mafai.” (This statement has been attributed to Thomas Aquinas but is most likely a loose paraphrase of things he taught.) Peitai, e tapulaa lo tatou malamalama i mea e tutupu iinei i le lalolagi, ma e tele lava ina leai ni a tatou tali i le fesili o le *aisea*. Aisea ua tupu ai lenei mea? Aisea e tupu ai lenei mea ia te *a’u*? O le a le mea e ao ona ou a’oa’oina? Pe a oo ina le maua ni tali i a tatou fesili, o le taimi lena e matua fitoitonu ai loa le fetalaiga a lo tatou Faaola i le Perofeta o Iosefa Samita i le Falepuipui o Liperate:

“Lo’u atalii e, ia filemu lou agaga; o lou tiga ma ou puapuaga o le a nao sina minute laitiiti;

“Ma ona oo lea, afai e te talitalia lelei, o le a faaeaina oe e le Atua i luga” (Mataupu Faavae ma Feagaiga 121:7–8).

E ui e toatele tagata e talitonu moni ia Iesu Keriso, ae o le fesili autu pe tatou te *talitonu* ia te Ia ma pe tatou te *talitonu* i mea ua Ia a’oa’o mai ia i tatou ma poloaiina i tatou e fai. Masalo atonu e manatu se tasi, “O le a se mea

e silafia e Iesu Keriso e uiga i mea o loo tutupu ia te a’u? E faapefea ona Ia silafia mea ou te manaomia ina ia fiafia ai?” E moni lava, o Ia o lo tatou Togiola ma le Puluvaiga lea na faatatau i ai le perofeta o Isaia ina ua ia fai mai:

“Ua inosia ma tuulafoaiina o Ia e tagata; o le tagata faanoanoa, ua masani foi ma le tiga. . . .

“E moni, ua na tauave o tatou tiga, ma na tauave o tatou faanoanoa. . . .

“A ua manu’a o ia ona o a tatou solitulafono, ua momomo o ia ona o a tatou amio leaga; o le aoaiga sa filemu ai i tatou sa i ona luga lea; o ona faalavalava foi ua malolo ai tatou.” (Isaia 53:3–5).

Sa a’oa’o foi i tatou e le Aposetolo o Peteru e uiga i le Faaola, e faapea, “O le na aveina e ia lava a tatou agasala i lona lava tino i luga o le laau, ina ia tete’a outou ma agasala, tatou te nofo ai i le amiotonu. O ona faalavalava ua malolo ai i tatou” (1 Peteru 2:24).

E ui sa latalata mai le taimi o le maliu faamaturu o Peteru, ae o ana upu sa le’i faatumuliaina i le fefe ma le masalosalo; ae, sa ia a’oa’o atu i le Au Paia ia “olioli,” e ui sa latou “faanoanoa i tofotofoga eseese.” Sa fautuaina i tatou e Peteru ia manatua “o le tofotofoga foi o lo [tatou] faatuatua, . . . e ui lava ina tofotofoina i le afi,” ae o le a taitai atu ai i le “viiga ma le mamalu ma le manuia pe a faaali mai Iesu Keriso” ma “i le faaolaina lea o [tatou] agaga” (1 Peteru 1:6–7, 9).

Sa faaauau le saunoaga a Peteru:

“Le au pele e, aua tou te ofo i le tofotofoga pei o le afi, ua oo ia te outou e fai ma tofotofoga ia te outou, peiseai o se mea fou ua oo ia te outou:

“A e faapei ona tofusua o outou faatasi i tiga o Keriso, ia outou olioli ai, ina ia fiafia outou ma le olioli tele, pe a faaalia mai lona mamalu” (1 Peteru 4:12–13).



O KERISO / KETESEMANE, SAUNIA E MICHAEL T. MALIM


Sa a'oa'o mai Peresitene Russell M. Nelson e faapea "O le au paia e mafai ona maua le fiafia i lalo o soo se tulaga. . . . Afai o le taulaiga o o tatou olaga e i le fuafuaga o le faaolataga a le Atua . . . ma ia Iesu Keriso ma Lana talalelei, e mafai ona tatou lagona le olioli e tusa lava po o a mea o tutupu—pe le o tutupu foi—i o tatou olaga. O le olioli e sau mai ia te Ia ma ona o Ia. O Ia o le puna o le olioli uma" ("Olioli ma le Ola ai Faale-agaga," *Liahona*, Nov. 2016, 82).

Ioe, e faigofie atu ona fai atu na mea i taimi tatou te le o i ai i le lotolotoi o se āfā nai lo le ola ma faaaoga mea na i le taimi o le āfā. Ae i le avea ai ma ou uso, ou te faamoemoe e mafai ona e lagonaina ou te manao ma le faamaoni ia faasoia atu ia te oe le taua tele o le iloa ina o Iesu Keriso ma Lana Togiola o le malutaga lea tatou te manaomia uma, e tusa lava po o a āfā o taiaina i tatou.

Ou te iloa o i tatou uma o fanau a le Atua, e alofa o Ia ia i tatou, ma e le o tuua na o i tatou. Ou te valaaulia outou ia o mai ia inā matamata e mafai ona Ia faamāmāina a outou avega ma avega ma malutaga o loo outou sailia. O mai ma fesoasoani i isi ia maua le malutaga o loo latou matua faanaunau i ai. O mai ma nofomau ma i matou i lenei malutaga, lea o le a fesoasoani ia te outou ia tetee atu i āfā o le olaga. E leai se masalosalo o lo'u loto afai tou te o mai, o le a outou vaai, o le a outou fesoasoani, ma o le a outou nofomau.

Sa molimau atu e le perofeta o Alema le mea lenei i lona atalii o Helamana: "Ua ou iloa o ai lava e tuu atu lo latou faalagolago i le Atua e lagolagoina i o latou tofotofoga, ma o latou faalavelave, ma o latou puapuga, ma o le a sii ae i latou i luga i le aso gataaga" (Alema 36:3).

Sa fetalai mai le Faaola lava Ia:



"Ia faamafanafanaina o outou loto . . . ; aua ua i ai tagata uma i o'u lima; ia filemu ma iloa o A'u o le Atua. . . .

"O le mea lea, aua le fefefe e oo lava i le oti; ona e lē atoatoa lo outou olioli i le lalolagi lenei, ae o a'u e atoatoa ai lo outou olioli" (Mataupu Faavae ma Feagaiga 101:16, 36).

O le viiga "Be Still, My Soul (Ia Filemu Lo'u Agaga)," ua ootia ai lo'u loto i le tele o taimi, o loo i ai se savali o le faamafanafanaga mo o tatou agaga. O upu e faitauina faapenei:

Ia filemu, lo'u agaga: Ua faanatinati le itula

Tatou te faatasi ai e faavavau ma le Alii,

Pe a mou atu le ita, tiga, ma le fefe, E galo le faanoanoa, e toefuatai le olioli paia o le alofa.

Ia filemu, lo'u agaga: Pe a tuanai suiga ma loimata, I le saogalemu ma le manuia tatou te feiloai mulimuli ane ai. (Hymns, no. 124)

A o tatou feagai ai ma āfā o le olaga, ou te iloa afai tatou te faia a tatou taumafaiga silisili ma faalagolago ia Iesu Keriso ma Lana Togiola e fai ma o tatou malutaga, o le a faamanuiaina i tatou i le toomaga, mafanafana, malosi, faapalepale, ma le filemu o loo tatou sailia, faatasi ma le mautinoa i o tatou loto i le faaiuga o lo tatou taimi iinei i le lalolagi, o le a tatou faalago atu i le fetalaiga a le Matai: "Ua lelei ia, le auauna lelei e ma le faamaoni: ina ulufale mai ia i le fiafia o lou alii" (Mataio 25:21). I le suafa, o Iesu Keriso, amene. ■



Olmué, Marga Marga, Chile



Saunia e Elder Dieter F. Uchtdorf
O Le Korama a Aposetolo e Toasefululua

O Mai ma Avea ma ni Ō

Matou te valaaulia fanau uma a le Atua i le lalolagi atoa ia auai faatasi ma i tatou i lenei taumafaiga tele.

O’u uso e ma tuafafine pele, a’u uo pele, o vaiaso taitasi, e tapuai ai tagata o Le Ekalesia a Iesu Keriso o le Au Paia o Aso e Gata Ai i le lalolagi atoa i lo tatou Tama Faalelagi pele, o le Atua ma le Tupu o le atulaulau, ma Lona Alo Pele, o Iesu Keriso. Tatou te manatunatu loloto ai i le soifuaga ma aoaoga a Iesu Keriso—na o le pau lea o le tamaalii e leai se agasala sa soifua ai, o le Tamai Mamoe lē ponā a le Atua. Tatou te aai ma feinu i le faamanatuga e manatua ai Lana taulaga ma aloaia ai o Ia o le totonugalemu o o tatou olaga.

Tatou te alolofa ia te Ia ma faamaluina o Ia. Ona o Lona alofa maoae ma le faavavau, sa puapuagatia ai Iesu Keriso ma malii mo oe ma a’u. Na Ia talaia faitotoa o le oti, ma nutililii papupuni sa tuueseesea ai uo ma ē pele,¹ ma aumaia le faamoemoe i ē ua leai ni faamoemoe, faamalolo i ē mama’i, ma faasaolotoina ē nofopologa.²

Tatou te tuuto atu o tatou loto ia te Ia, o o tatou ola, ma a tatou tapuaiga i aso taitasi. Mo lea mafuaaga, “tatou te tautalatala ai ia Keriso, [ma] tatou olioli ia Keriso, [ma] tatou tala’i atu Keriso, . . . ina ia mafai ona iloa e a tatou fanau po o le a le puna e mafai ona latou tepa tulaia i ai mo se faamagaloga o a latou agasala.”³

Faataitai Ona Avea ma So’o

Peitai, o le avea ai ma se so’o o Iesu Keriso e aofia ai le anoanoai o mea nai lo le talanoa ma tala’i atu Keriso. O le Faaola lava Ia na toefua-taiina mai Lana Ekalesia e fesoasoani ai ia te i tatou i luga o le ala ia avea atili ai e faapei o Ia. O Le Ekalesia a Iesu Keriso o le Au Paia o Aso e Gata Ai ua mamanuina e maua ai avanoa e faatino ai elemene faavae o le avea ai ma so’o. E ala i lo tatou auai e faatino i le Ekalesia, tatou te aoao ai ma faatinoina uunaiga a le Agaga Paia. Tatou te atiina ae le mausa o le aapa atu i le agaalofa ma le agalelei i isi.



Millcreek, Iuta, ISA

O se taumafaiga lenei o le olaga atoa, e manaomia ai le faataitai.

O le au afeleti e faamanuiaiina, latou te faaalua itula e le mafaitaulia e faataitai ai elemene faavae o a latou taaloga. O tausisoifua, o le augalulue i upega tafailagi, o enisinia niukilia, ma e oo lava ia te a’u o se kuka fiatautavā i le umukuka a Harriet e gafataulimaina ma popoto pe afai tatou te faata’ita’ia ma le maelega a tatou faivaalofilima.

I le avea ai ma se kapeteni vaalele, e tele taimi sa ou aoaoina ai pailate i le faaaogaina o se masini faafoliga—o se masini faatonotonu na te toe faata’ita’ia le potomasani faalele. O le masini faafoliga e le gata ina fesoasoani i pailate e a’oa’o ai ia elemene faavae o le lele, ae e mafai ai foi e i latou ona maua le poto masani e tali atu ai i mea tutupu faafuasei e mafai ona latou fetaiai pe a latou faatautaia le vaalele moni.

E faatatau foi ia mataupu faavae e tasi mo so’o o Iesu Keriso.

O le auai atoatoa i le Ekalesia a Iesu Keriso ma ona avanoa eseese e tele, o le a fesoasoani ia i tatou e saunia lelei ai mo tulaga fesuia’i o le olaga, pe o a lava ia mea. I le avea ai ma ni tagata o le Ekalesia, ua uunaia i tatou e faatofu i tatou lava i afioga a le Atua e ala i Ana perofeta, anamua ma ona po nei. E ala i le tatalo faamaoni ma le lotomauualalo i lo tatou Tama Faalelagi, tatou te a’oa’o ai ia iloa le siufofoga o le Agaga Paia. Tatou te taliaina valaauga e galulue, faiaoga, fuafua, auauna atu, ma faatautaia. O nei avanoa ua mafai ai e i tatou ona tuputupu ae i le agaga, mafaufau, ma uiga faaletagata.

O le a fesoasoani ia i tatou e saunia e osia ma tausia feagaiga paia o le a faamanuiaiina ai i tatou i lenei olaga ma le olaga a sau.

Sau, Auai faatasi ma i Matou!

Matou te valaaulia fanau uma a le Atua i le lalolagi atoa ia auai faatasi ma i tatou i lenei taumafaiga tele. O Mai ia ina matamata! E oo lava i lenei taimi faigata o le koronavairasi, tatou feiloai i le upega tafailagi. Feiloai ma o matou faifeautalaiti i le upega tafailagi. Saili mo outou lava mea uma e uiga i lenei Ekalesia! A oo ina mavae atu lenei taimi faigata, tatou feiloai i o matou fale ma i o matou nofoaga tapuai!

Matou te valaaulia outou e o mai ma fesoasoani mai! O mai ma auauna faatasi ma i matou, auauna atu i fanau a le Atua, mulimuli i tulagaaoo o le Faaola, ma faia lenei lalolagi o se nofoaga e sili atu.

O mai ma avea ma ni ò! O le a outou faamalosi atili i matou. Ma o le a outou lelei atili, agalelei atili, ma fiafia atili foi. O le a faalolotoina lo outou faatuatua ma tupu atili le maufetuunai—atili gafatia ona tatalia faatalalualū (po o faigata) ma tofotofoga e lei faamoemoeina o le olaga.

Ma e faapefea la ona tatou amata? E tele auala e mafai ai.

Matou te valaaulia outou e faitau le Tusi a Mamona. Afai e leai sau kopi, e mafai ona e faitau i ai i luga o le ChurchofJesusChrist.org⁴ pe sii mai le app o le Tusi a Mamona. O le Tusi a Mamona o se tasi molimau ia Iesu Keriso ma o se soa i le Feagaiga Tuai ma le Feagaiga Fou. Matou te fiafia lava i nei tusitusiga paia uma ma a'oa'o mai ai.

Matou te valaaulia outou e faaalu sina taimi i le ComeuntoChrist.org e iloa ai pe o a mea o a'oa'o atu e tagata o le Ekalesia ma talitonu i ai.

Valaaulia ia faifeautalaiti tou te talatalanoa i luga o upega tafailagi pe i lou fale i nofoaga e mafai ai lenei mea—e i ai sa latou savali o le faamoemoe ma le faamalologa. O nei

faifeautalaiti o o matou atalii ma afafine faapelepele o e galulue i le tele o nofoaga i le lalolagi atoa i o latou lava taimi ma a latou lava tupe.

I le Ekalesia a Iesu Keriso, o le a e maua ai se aiga o tagata e matua ese lava mai ia te outou. O le a outou maua ai tagata e manaomia la outou fesoasoani ma o ni e e mananao e fesoasoani ia te oe, a o e taumafai ia avea oe ma lou lava tagata aupito sili—le tagata sa foafoaina e le Atua ia avea ai oe.

O Le Opoopo a le Faaola e Mo Tagata Uma

Atonu e te mafaufau, “Sa ou faia ni mea sese i lo'u olaga. Ou te le iloa pe mafai ona ou lagonaina o ni ò a'u o le Ekalesia a Iesu Keriso. E le fia naunau mai le Atua i se tasi e pei o a'u.”

O Iesu le Keriso, e ui o Ia o le “Tupu o tupu,”⁵ o le Mesia, “o le Alo o le Atua soifua,”⁶ ae popole tele o Ia i fanau taitasi uma a le Atua. E popole mai tusa lava po o le a le tulaga o se tagata—pe o le a le mativa po o le mauoa, po o le a le lē atoatoa po o le faamaonia o le agavaa o se tagata. I le taimi o Lona soifuaga faaletino, sa auauna atu le Faaola i tagata uma: i ē fiafia ma faamanuiaina, i ē lotomomomo ma ua sē, ma i latou ua leai se faamoemoe. O le tele o taimi, o tagata na Ia tautuaina ma auauna atu i ai e le o ni tagata lauiloa, aulelei, pe maumea. O le tele o taimi, o tagata na Ia siitia i luga sa leai ni mea latou te toe avatu ae o le lotofaafetai, o se loto ua faamaulalo, ma le manao ia i ai le faatuatua.

Afai na faaalu e Iesu Lona soifuaga faaletino e auauna atu ai i “se aupito itiiti o i latou nei,”⁷ mata o le a le alofa foi o Ia ia i latou i le asō? Pe le o i ai ea se nofoaga i Lana Ekalesia mo fanau uma a le Atua? E oo lava mo i latou o ē lagonaina le lē agavaa, ua faagaloina, pe tuuatoatasi?

E leai se maualuga patino o le atoatoaga e tatau ona e maua ina ia mafai ai ona e agavaa mo le alofa tunoa o le Atua. O au tatalo e le tau faaleoteleina pe susua pe sa'o le kalama ina ia mafai ai ona au i le lagi.

O le mea moni, e le faaalua mai e le Atua se alofa faapito⁸—o mea e faataua e le lalolagi o mea noa ia ia te Ia. Na te silafia lou loto, ma e alofa o Ia ia te oe tusa lava po o le a lou tulaga, pe o le a le tele o au tupe, po o le tele o e taumulimuli ia oe i le Instagram.

A o lilifa atu o tatou loto i lo tatou Tama Faalelagi ma faalatalata atu ia te Ia, o le a tatou lagonaina o Ia o latalata mai ia i tatou.⁹

O i tatou uma o Ana fanau pele.

E oo lava ia i latou e teenaina o Ia.

E oo foi ia i latou o ē, faapei o se tamaitiiti ulumalo, ma faalogogata, ua ita i le Atua ma Lana Ekalesia, ua tapena latou ato ma tele'a'i i fafo o le faitotoa ma folafola mai e sosola ese ma e le toe foi mai lava.

A oo ina solaese se tamaitiiti mai le fale, atonu na te matauina ia matua popole o autilo atu mai le faamalama. Faatasi ai ma loto momomo, la te vaai atu i lo la atalii po o se afafine o alu—ma le faamoemoe o le a aoaoina e le la tama pele se mea mai lenei aafiaga taufaamata'u ma atonu e vaai atu i le olaga i ni mata fou—ma i'u ai ina toe foi mai i le fale.

E faapena foi i lo tatou Tama Faalelagi alofa. O loo faatalitali mai o Ia mo lo tatou toe foi atu.

O loo faatalitali mai lou Faaola, ma loifofoga o le alofa ma le agalelei i Ona fofoga mo lou toe foi atu. E oo lava pe a e lagonaina ua e mamao ese mai le Atua, o le a Ia silasila atu ia te oe; o le a agaalofa o Ia ia te oe ma faataalise atu e opo mai oe.¹⁰

O mai ma avea ma ni ò.

E Faataga e le Atua i Tatou e A'oa'o mai ia Tatou Mea Sese

O i tatou o tagata malaga sopo i le ala o le olaga nei i se sailiga tele mo le uiga ma le upumoni taua. E tele taimi, na pau lava le mea tatou te vaai i ai o le ala o loo i luma tonu—e le mafai ona tatou iloa atu le mea e tau i ai pi'oga o le ala. E le'i tuuina mai e lo tatou Tama Faalelagi alofa ia i tatou tali uma. O loo faamoemoe o Ia tatou te faavasegaina le tele o mea mo i tatou lava. O loo faamoemoe o Ia ia tatou talitonu—tusa lava pe faigata ona faia.

O loo faamoemoe o Ia tatou te faamalolosa o tatou tau'au ma atia'e sina faaiuga—sina ivitu itiiti—ma fai se isi laa i luma.

O le auala lena tatou te a'oa'o ai ma tuputupu ae.

Mata e te manao moni e sipela atu mea uma i ona auiliiliga uma? Mata e te manao moni e tali atu fesili uma? Ma faasino atu taunuuga uma?

Ou te talitonu o le toatele o i tatou o le a vave ona mumusu i lenei ituaiga o pulega malosi auiliili faalelagi. Tatou te aoaoina lesona taua o le olaga e ala i aafiaga. E ala i le aoaoina mai i a tatou mea sese. E ala i le salamo ma le iloaina mo i tatou lava o le “amioleaga e le o le fiafia lea.”¹¹

O Iesu Keriso, le Alo o le Atua, na maliu ina ia mafai ai ona le ta'usalaina i tatou i a tatou mea sese ma nape ai e faavavau lo tatou alualu i luma. Ona o Ia, ua mafai ai ona tatou salamo, ma ua mafai ai ona avea a tatou mea sese ma ala tatou te oo atu ai i le mamalu e sili atu.

E te le tau uia na o oe lenei auala. E le'i tuua i tatou e lo tatou Tama Faalelagi e feseta'i i le pogisa.”

O le pogai lea, i le tautotogo o le 1820, na Ia faaali atu ai ma Lona Alo, o Iesu Keriso i se alii talavou, o Iosefa Samita.

Mafaufau i lena mea mo sina minute! Ua faaali mai le Atua o le atulaulau i le tagata!

O le uluai taimi lea o le mau taimi ua fetai ai Iosefa ma le Atua ma isi tamaalii faalelagi. O le tele o upu na tulei atu ai na tamaalii paia ia te ia o loo tusia i tusitusiga paia a Le Ekalesia a Iesu Keriso o le Au Paia o Aso e Gata Ai. E faigofie lava ona maua. Soo se tasi e mafai ona faitauina ma a'oa'o ai mo i latou lava le savali a le Atua mo i tatou i o tatou taimi.

Matou te valaaulia oe ia suesue i ai mo oe lava.

Sa fai lava si talavou o Iosefa Samita ina ua ia mauaina nei faaaliga. O le tele lava na oo mai a o lei atoa lona 30 tausaga le matua.¹² Sa le'i i ai sona poto masani, ma i nisi o tagata, atonu sa foliga e lei agavaa o ia e avea ma perofeta a le Alii.

Ae peitai, na valaauina lava o ia e le Alii—o loo mulimulitaia se mamantu tatou te maua i tusitusiga paia uma.

Sa le'i faatali le Atua e sue se tagata e atoatoa e toefuataia Lana talalelei.

Pe ana faapea na Ia suea [se tagata atoatoa], se manu o lae lava e faataliali o Ia.

O Iosefa sa pei lava foi o oe ma a'u. E ui sa ia faia ni mea sese, ae sa faaaogaina e le Atua o ia e faataunuaina Ona faamoemoega sili.

Sa tele taimi e fai soo ai e Peresitene Thomas S. Monson upu nei o le fautuaga: “O le ua valaauina e le Alii, e faagavaaina e le Alii.”¹³

Sa apoapoi atu le Aposetolo o Paulo i le Au Paia i Korinito: “Ua outou iloa lo outou valaauina, le au uso e; e le toatele o e popoto i la le tino, e le toatele faipule, e le toatele alii.”¹⁴

E faaaoga e le Atua mea vaivai ma le manino e faataunu ai Ona faamoemoega. E tu atu lenei upumoni o se molimau o le mana o le Atua, ae le o

le tagata, e faataunuina Lana galuega i le lalolagi.¹⁵

Faalogo ia te Ia, Mulimuli ia te Ia

Ina ua faaali atu le Atua ia Iosefa Samita, sa Ia faailoa atu Lona Alo, o Iesu Keriso, ma fetalai atu, “Faalogo ia te Ia.”¹⁶

Sa faaaluina aso na totoe o lona soifua e faalogo atu ai ia te Ia ma mlulimuli ia te Ia.

E faapei foi o Iosefa, o lo tatou avea ai ma soo e amata i le faaiuga e faalogo ma mulimuli i le Faaola o Iesu Keriso.

Afai tou te mananao e mulimuli ia te Ia, faaputupu lo outou faatua ma ave i o outou lava luga Lona satauro.

O le a e iloa ai o oe lava o ni o i Lana Ekalesia—o se nofoaga o le mafanafana ma le talileleia, lea e mafai ai ona e auai i le sailiga tele o le avea ai ma soo ma fiafiaga.

O lo'u faamoemoega, i lenei faamanatuga o le lua seneturi o le Uluai Faaaliga, a o tatou manatunatu ma a'oa'o e uiga i le Toefuataiga o le Ekalesia a Iesu Keriso, o le a tatou iloaina ai ua le na o se mea faasolopito na tupu. E tofu i ta'ua ma se vaega taua e fai i lenei tala maoae ma faifai pea.

O le a la lau vaega ma la'u vaega?



Oslo, Nouei



Saunia e Elder L. Whitney Clayton
O Le Au Peresitene o Fitugafulu

O le a’oa’o lea e uiga ia Iesu Keriso. Ia suesue Ana afioga. Ia faalogo ia te Ia ma mulimuli ia te Ia e ala i le auai ma le mataalia i lenei galuega tele. Ou te valaaulia outou ia omai ma ave a ma ni ō [le Ekalesia]!

E le faapea se’i outou atoatoa. Pua le mea ia i ai sou manao e atia’e lou faatuatua ma faalatalata atili atu ia te Ia i aso taitasi.

O la tatou vaega o le alolofa ma auauna atu i le Atua ma alofa ma auauna atu i fanau a le Atua.

A outou faia lena mea, o le a siomia outou e le Atua i Lona alofa, olioli, ma le taiala patino i lenei olaga atoa, e oo lava i tulaga aupito sili ona ogaoga ma sili atu.

Ou te molimau atu ai i lenei mea ma tuu atu la’u faamanuiaga ma le lotofaafetai loloto ma le alofa mo outou taitoatasi, i le suafa paia o lo tatou Faaola, o lo tatou Matai—i le suafa o Iesu Keriso, amene. ■

FAAMATALAGA

1. Tagai i le Efeso 2:13–14.
2. Tagai i le Luka 4:18.
3. 2 Nifae 25:26.
4. Tagai i le Tusi a Mamona i le ChurchofJesusChrist.org/study/scriptures/bofm.
5. 1 Timoteo 6:15.
6. Tagai i le Mataio 16:15–17.
7. Mataio 25:40.
8. Tagai i le Galuega 10:34.
9. Tagai Mataupu Faavae ma Feagaiga 88:63.
10. Tagai i taga a le tama o le ua vaai atu i le toe foi mai o lona atalii faamaumauoa i le Luka 15:20.
11. Alema 41:10.
12. Mo se faataitaiga, i le vaega e 138 o le Mataupu Faavae ma Feagaiga, e silia ma le 100 ia faaaliga na mauaina e Iosefa Samita a o le’i atoa lona 30 tausaga, i le aso 23 Tesema 1835.
13. Thomas S. Monson, “Tiute o Valaauga,” *Liahona*, Iulai 1996, 44.
14. 1 Korinitio 1:26, New Revised Standard Version.
15. Tagai i le 1 Korinitio 1:28–29; 2 Korinitio 4:7.
16. Iosefa Samita—Talafaasolopito 1:17.

O Fale e Sili Ona Matagofie

O le Faaola o le enisinia atoatoa, tufuga, ma le mamanu anoafale. O Lana galuega faatino o le faaatoatoaga ma le olioli e faavavau o o tatou agaga.

Talu ai nei lava sa tosina ai la’u vaai i se laupapa mo faasilasilaga i le Aai o Sate Leki. Sa faasalalauina ai se meaafale ma le kamupani e mamananuina totonu o fale. Sa faigofie lona faaupuga, “Tautuaina Fale e Sili Ona Matagofie i le Aai o Sate Leki.”

Sa le galo le savali—o le a le uiga o se “fale e sili ona matagofie”? Sa oo ina ou iloaina ua ou mafaufau lava i lena fesili, aemaise lo’u mafaufau i le fanau sa o ma tausia ma lo’u toalua o Kathy, ma fanau ua latou tausia nei. E faapei o matua i soo se mea, sa tatou popole ma tatalo mo o tatou aiga. Ma o loo tatou faia pea lava. Tatou te mananao moni mo mea sili ona lelei mo i latou. E mafai faapefea ona latou ola i fale e sili ona matagofie? Sa ou tomanatu i fale o tagata o le Ekalesia sa ma maua le avanoa ma Kathy e asiasi atu i ai. Sa valaaulia i ma’ua i totonu o fale i Korea ma Kenya, i Filipaina ma Peru, i Laos ma Lativia. Se’i ou faasoa atu ni matauga se fa e uiga i fale matagofie.

Muamua, mai le silafaga a le Alii, o le faavaeina o fale e sili ona

matagofie, e faalagolago mea uma i uiga auaumama patino o tagata e nonofo ai iina. O nei fale e le faia ia matagofie i se isi lava ala taua pe mau-sali e ala i meaafale po o le tausaaafia po o tulaga faaagafesootai o tagata e anaina. O uiga aupito matagofie o soo se fale o foliga o Keriso e atagia mai i tagata e nonofo i le fale. O le mea e taua o le mamanu o anoafale o agaga o e nonofo ai i le fale, ae le o le fausaga lava ia.

O uiga paia o Keriso e maua i le “gasologa o taimi”¹ e ala i le agaigai i luma ma le loto atoa i le ala o feaigaga. O uiga paia faa-Keriso e teuteuina ai olaga o i latou e taumafai e ola i le amiolelei. Latou te faatutumuina fale i le malamalama o le talalelei, pe o le palapala e fola ai pe o le alei. Tusa lava pe na o oe i lou aiga e mulimuli i le poloaiga e “saili i nei mea,”² e mafai lava ona e saofaga i le faatotogaina faaleagaga o le fale o lou aiga.

Tatou te mulimuli i le timaiga a le Alii ia “faatulaga [i tatou lava]; ia saunia mea manaomia uma; ma faatu se fale” e ala i le faatulagaina, saunia,

ma faavae o tatou olaga faaleagaga, ae lo o tatou fale ma fanua. A o tatou tulitulimatai atu ma le onosai i le ala o feagaiga a le Faaola, o le a avea o tatou fale “o se fale o le mamalu, o se fale o le tulaga maopooo, [ma] o se fale o le Atua.”³

Lua, o e nonofo i fale e sili ona matagofie e faaavanoa se taimi e suesue ai i tusitusiga paia ma upu a perofeta soifua i aso uma. Na valaaulia i tatou e Peresitene Russell M. Nelson “ia liua” ma “toe faafou” o tatou fale e ala i le suesueina o le talalelei.⁴ O lana valaaulia ua faailoa mai ai e faapea o fale e sili ona matagofie e nofoia e galuega mu’amu’a taua o le tuputupu ae patino ma le toe faafouina o o tatou vaivaiga. O le salamo i aso taitasi o se meafaigaluega o le liua lea e mafai ai ona tatou ola ae ma si agalelei teisi, sili atu ona alolofa, ma sili atu ona malamalama. O le suesueina o tusitusiga paia tatou te latalata atili ai i le Faaola, o le o lona alofa agalelei ma le alofa tunoa e fesoasoani ia i tatou i lo tatou tuputupu ae.

O le Tusi Paia, Tusi a Mamona, ma le Penina Tau Tele o loo ta’u mai ai tala i aiga, o le mea lea e le o se mea e ofo ai i na voluma paia o ni tusitaulima e le mafaatusalia mo le fauina o fale e sili ona matagofie. O loo faamatala mai ai popolega a matua, o le malaia o faaosoosoga, o le manumalo o le amiotonu, o tofotofoga o le oge ma le mau, ma matautia o taua ma tau i le filemu. O loo faaali mai pea lava pea e tusitusiga paia ia i tatou le ala e faamanuina ai aiga e ala i le ala amiotonu ma le ala e toilalo ai e ala i le tulimata’ia o isi ala.

Tolu, o fale matagofie e mulimuli i le atatusi tupito na fatuina e le Alii mo Lona fale e sili ona matagofie, o le malumalu lea. O le fauina o se malumalu e amata i laasaga

faavae—faamamaina o le vao ma faalaugatasia le laueleele. O na uluai taumafaiga e tapena le laueleele e ono faatusa i le tausia o poloaiga faavae. O poloaiga o le faavae lea e fausia ai le tulaga faalesoo. O le tulaga faalesoo mautu e taitai atu ai i tatou ia mausali, tumau, ma le le maluelue,⁵ e faapei o le auivi u’amea mo se malumalu. O lenei auivi mautu e mafai ai e le Alii ona auina mai Lona Agaga e suia o tatou loto.⁶ O le iloa ai o se suiga maoae o le loto e faapei o le faaopopo atu o ni vaega matagofie i le anoafale o se malumalu.

A o tatou faaaauu pea i le faatua-tua, o le a suia malie e le Alii i tatou. Tatou te mauaina Ona fofoga i o tatou mata ma amata ai ona atagia mai le alofa ma le matagofie o Ona uiga.⁷ A o tatou avea atili e faapei o Ia, o le a tatou lagonaina le toafimalie i Lona Maota, ma o le a Ia lagonaina foi le toafimalie i o tatou foi lava [fale].

E mafai ona tatou tausisia le fesootai valalata atu o o tatou fale i Lona maota e ala i le faaagavaaina mo le ma le faaogaina o se pepa faataga o le malumalu i le tele e mafai ai i tulaga. A o tatou faia lena mea, o le a i ai foi le paia o le maota o le Atua i o tatou foi fale.

O le Malumalu matagofie o Sate Leki o loo tu lata ane. Na fauina e paionia i meafaigaluega matavale, o ano-mea i le lotoifale, ma galuega fita e le uma, ma na fauina le malumalu mai le 1858 e oo atu i le 1893. O le mea aupito sili na ofoina atu e uluai tagata o le Ekalesia i le faa-enisinia, tusiata fale, ma le mamauina o le anoafale, na fofoina ai se fatuga maoae ua lauiloa i le faitau miliona.

Toeitiiti atoa le 130 tausaga ua mavae talu ona faapaiaina le malumalu. E pei ona ta’ua e Elder Gary E. Stevenson ananafi, o mataupu faavae

faaenisinia na faaoga e mamau ai le malumalu ua suia nei i tulaga e fou atu ma saogalemu. O le le faamalolosia o le tulaga faaenisinia ma le le toe faaleleia o vaivaiga faalefausaga o le malumalu o le a faalataina ai le talitonuga o paionia, o e sa faia mea uma sa latou mafaia ona tuua ai lea o le vaaiga o le malumalu i augatupulaga e sosoo ai.

Sa amataina e le Ekalesia se galuega faatino e fa-tausaga o le toefuataiga e toe faaleleia ai le malosiaga faalefausaga ma malosiaga faalenatura o le malumalu.⁸ O le faavae, fola, ma puipui o le a faamalolosia. O le potu aupito sili faaenisinia o i ai i le taimi nei, o le a aumaia ai le malumalu i tulaga faaona po nei. O le a le mafai ona tatou vaai i suiga faalefausaga, ae o o latou aafiaga o le a tino mai ma e taua. I lenei galuega uma, o le a faapolopoloina ia vaega matagofie o le mamau o le anoafale.

E ao ina tatou mulimuli i le faataitaga ua tuuina mai ia i tatou e le toe faafouga o le Malumalu o Sate Leki ma faaalu se taimi e iloilo ai o tatou lava tulaga faaenisinia faalenatura faaleagaga ina ia mautinoa o tatou ogatusa ma le taimi. O le iloiloina faavaitaimi o oe lava ia; e o faatasi ma le fesili i le Alii, “Se a se mea o toe ou te lei faia?”⁹ e mafai ona fesoasoani ia i tatou taitoatasi e saofaga atu ai i le fauina o ni fale e sili ona matagofie.

Fa, o fale sili ona matagofie o ni malutaga mai afā o le olaga. Ua fola-fola mai e le Alii e faapea, o i latou o e tausia poloaiga a le Atua e “manuia i le laueleele.”¹⁰ O le manuia a le Atua o le mana lea e fetaomi atu ai i luma e ui lava i faafitauli o le olaga.

I le 2002, sa ou aoaoina ai se lesona taua e uiga i faafitauli. A o i ai i Asunción, Parakuei, sa matou fonoma peresitene o steki o le aai. I le taimi lena, sa feagai Parakuei ma se

mafatiaga matuia tautupe, ma e toa-tele tagata o le Ekalesia sa mafatia ma sa le i gafataulimaina mea e manaomia. Ou te lei toe oo i Amerika i Saute talu mai la'u misiona ma ou te lei vaai lava i Parakuei. Sa na o ni nai vaiaso talu ona ou auuana atu i le Au Peresitene o le Eria. O lo'u le mautonu e uiga i lo'u le gafatia ona tuuina atu se taitaiga i na peresitene o siteki, sa ou fesili atu ai ia te i latou e ta'u mai ia te a'u na o ni mea o sologa lelei ia latou siteki. O le peresitene o le siteki na muamua, sa ia ta'u mai e uiga i mea sa sologa lelei. Sa ta'u mai e le isi na sosoo ai ia mea sa sologa lelei ma ni nai faafitauli. E oo atu i le taimi o le peresitene o le siteki na mulimuli, sa ia ta'ua na o se soloa'iga o luitau na oso ai le le fiafia. A o faamalamalama mai e peresitene o siteki le ogaoga o le tulaga, sa faateleina lo'u popole, toetoe ina a le mautonu i le tala e fai.

Ina ua taufaaiuiu tala a le toe peresitene o le siteki, sa oo mai se manatu i lo'u mafaufau: "Elder Clayton, fai atu ia i latou le fesili lea: 'Peresitene, mai tagata o a outou siteki o e totogi atoa se sefuluai, totogi se taulaga anapogi limafoai, faalatele o latou valaauga i le Ekalesia, e asiasi moni i a latou aiga o ni faiaoga o aiga po o faiaoga asiasi¹¹ i masina taitasi, faia afiafi faaleaiga, suesue i tusitusiga paia, ma faia tatalo faaleaiga i aso taitasi, e toafia o i ai ni faafitauli e le mafai ona latou taulimaina e i latou lava e aunoa ma le tau la'a atu o le Ekalesia e foia ia faafitauli mo i latou?"

I le tali atu i le uunaiga sa ou mauaina, sa ou fesili ai i peresitene o siteki i lena fesili.

Sa latou tilotilo mai ia te a'u ua tete'i ma le lē magagana ona faapea mai lea, "Pues, ninguno," o lona uiga "Ia, e leai a se isi." Sa latou faamatala mai ia te a'u e leai se tagata, o e na



Olmué, Marga Marga, Chile

faiua uma na mea e i ai ni faafitauli sa latou le mafaia ona foia e i latou lava. Aisea? Aua sa latou nonofo i fale e sili ona matagofie. O lo latou ola faatuatua na latou maua ai le malosiaga, vaaiga mamao, ma le fesoasoani faalelagi sa latou manaomia i faigata o le tamaoiga lea e siomia ai i latou.

E le faapea ai o le a le mama'i e amiotonu, mafatia i faalavelave faafua-sei, feagai ma faaletonu tau pisinisi, pe fetai ai foi ma isi faigata o le olaga. E aumaia pea lava e le olaga nei ia luitau, ae i le aula'iga o taimi ua ou vaai ai ia i latou o e taumafai e usiusitai i poloaiga e faamanuiaina i lo latou agai pea i luma ma le toafilemu ma le faamoemoe. O loo avanoa na faamanuiaga i tagata uma i soo se mea.¹²

Na tautino mai e Tavita, "Afa i le atiina ae e le Alii le fale, e galulue fua i latou o e atiina ae."¹³ Po o fea lava e te nofo ai, pe o a lava foliga o lou fale, ma pe o le a lava foi le tulaga o lou aiga, e mafai lava ona e fesoasoani e fauina le fale e sili ona matagofie mo lou aiga. Ua saunia e le talalelei toefuataina a Iesu Keriso ia fuafuaga mo lena fale. O le Faaola o le enisinia atoatoa, tufuga, ma le mamanu anoafale. O Lana galuega faatino o le faaatoatoaga ma le olioli e faavavau o o tatou agaga. Faatasi ai ma Lana fesoasoani alofa, e mafai ai e lou agaga ona aveia ma mea uma e finagalo ai o Ia e aveia ai, ma e mafai ona aveia oe ma ituaiga aupito silisili o lou lava tagata.

Ou te molimau atu ma le agaga faafetai o loo soifua le Atua ma le Tama o i tatou uma. O Lona Alo, le Alii o Iesu Keriso, o le Faaola ma le Togiola o tagata uma. E alolofa atoatoa i La'ua ia i tatou. O le Ekalesia a Iesu Keriso o le Au Paia o Aso e Gata Ai o le malo o le Alii i le lalolagi. O loo taialaina e perofeta soifua ma aposetolo i ona po nei. E moni le Tusi a Mamona. O le talalelei toefuataina a Iesu Keriso o le atatusi tupito atoatoa mo le faavaeina o fale e silisili ona matagofie. I le suafa o Iesu Keriso, amene. ■

FAAMATALAGA

1. Mose 7:21.
2. Mataupu Faavae o le Faatuatua 1:13.
3. Mataupu Faavae ma Feagaiga 88:119.
4. Tagai Russell M. Nelson, "Avea ma Faataitaiga Lelei o le Au Paia o Aso e Gata Ai," *Liahona*, Nov. 2018, 113.
5. Tagai i le 1 Nifae 2:10; Mosaea 5:15; 3 Nifae 6:14.
6. Tagai i le Mosaea 5:2; Alema 5:7.
7. Tagai i le Alema 5:14, 19.
8. O se mafuie i le aso 18 o Mati, 2020, ua faaalua mai ai le manaomia ona faia o le galuega faatino.
9. Mataio 19:20.
10. Mosaea 2:22.
11. Sa faaleaogaina faiaoga o aiga ma faiaoga asiasi ma sa amatia ai le auunaga i le 2018 (tagai Russell M. Nelson, "Auaunaga," *Liahona*, Me 2018, 100).
12. Pe a tatou filifili e aua nei ola e tusa ai ma poloaiga, ona aveia lea o faamanuiaga a le Alii mai ia i tatou i sina tikeri. O lenei mamanu tupu soo o loo vaaia i le Tusi a Mamona o nisi taimi e faasino i ai o le taamilosaga o le amiotonu ma le amioleaga (tagai i le *Tusi Lesona a le Tamaititi Aoga o le Tusi a Mamona* [Church Educational System manual, 2009], 414, ChurchofJesusChrist.org).
13. Salamo 127:1.



Saunia e Elder D. Todd Christofferson
O Le Korama a Aposestolo e Toasefululua

Faasoaina Atu o le Savali o le Toefuataiga ma le Toetu

O le Toefuataiga e patino i le lalolagi, ma o lana savali e matuā taua lava i aso nei.

I lenei konafesi aoao atoa ua tatou tautatala ma pepese ma le olioli e uiga i le faataunuuga o le valoaga anamua o le “toe fuatai ai o mea uma lava,”¹ e uiga i le aumaia “ina ia na faaopopopoina [ia tasi mea uma] ia Keriso,”² e uiga i le toefoi mai o le atoatoaga o le talalelei, perisitua, ma le Ekalesia a Iesu Keriso i le lalolagi, lea ua tatou mauaina uma i le ulutala “o le Toefuataiga.”

Ae o le Toefuataiga e le mo na o i tatou o ē o olioli i ai i le asō. O faaaliga o le Uluai Faaaliga sa le mo na o Iosefa Samita lava ia ae o loo ofoina mai o se malamalama ma le upumoni mo soo se tasi o e “leai se potu.”³ O le Tusi a Mamona o le meatotino a tagata soifua. O sauniga o le olataga ma le faaeaga o le perisitua na saunia mo tagata uma, e aofia ai i latou o ē le o toe i ai i le olaga faitino. O Le Ekalesia a Iesu Keriso o le Au Paia o Aso e Gata Ai ma ona faamanuiaga ua faamoemoe mo i latou uma o ē e mananao i ai. O le meaalofa o le Agaga Paia ua faamoemoe mo tagata uma. O le Toefuataiga e patino i le lalolagi, ma o lana savali e matuā taua lava i aso nei.

“O le mea lea, ua taua tele ai le faailoa atu o nei mea i tagata o le lalolagi, ina ia latou iloa e lē mafai e se tagata ona mau i le afioaga o le Atua, vagana ai ua ala atu i galuega, ma le alofa mutimutivale, ma le alofa tunoa o le Mesia Paia, o lē ua tuuina i lalo lona soifua e tusa ma la le tino, ma toe ave e ala i le mana o le Agaga, ina ia mafai ona ia faataunuaina le toetutu mai o e ua oti, i le aveai ai o ia ma lē e muamua toetu mai.”⁴

Mai le aso na faatumuina ai e le uso o le Perofeta, o Samuelu Samita lana tamai ato i ni kopi lolomi fou o le Tusi a Mamona ma savali atu e faasoia atu le tusitusiga paia fou, ua galulue ai lava le Au Paia e aunoa ma le malolo i le “faailoa atu o nei mea i tagata o le lalolagi.”

I le 1920, i le taimi lena-o Elder Tavita o MaKei o le Korama a Aposestolo e Toasefululua, sa ia amatalia ai se malaga taamilo i le tausaga atoa i misiona a le Ekalesia. E oo atu ia Me 1921, ua tu o ia i se tama’i fanuatanu i Fagali’i, i Samoa, i luma o ni tuugamau o tausia lelei o ni tamaiti laiti se toatolu, o le afafine ma atalii e toalua o Thomas ma Sarah Hilton. O nei tamaiti laiti—o le ulumatua e lua—na oti i le taimi o galulue ai Thomas ma Sarah o se ulugalii faifeautalai talavou i le faaiuga o le vaitau o le 1800.

A o le’i tuua e ia Iuta, na folafola atu e Elder MaKei ia Sarah, ua malii nei lana tane, o le a ia asia tuugamau o lana fanau i Samoa ona e lei toe mafai ona toefoi atu o ia iina. Na tusi atu Elder MaKei ia te ia, “Tuafafine Hilton, o lau fanau iti ia e toatolu, i se filemu e aunoa ma se upu . . . o loo



Bluffdale, Iuta, ISA

faaaauina lau galuega faafaifeautalai malualii lea na amataina i le toetiiti tolusefulu tausaga talu ai.” Ona ia faaopopo lea o se fuaiupu o sana lava ia fatuga:

*O lima agaalofa na tapunia o latou mata ua talioti,
O lima agaalofa na saunia i latou e falelauasi,
Na faamatagofieina o latou tuugamau faatauvaa e tagata ese,
Na faamamaluina e tagata ese, ma na faavauvau ai tagata ese.⁵*

O lenei tala ua na o se tasi o le faitau afe, selau o afe, o loo talanoa i le taimi, oa, ma soifua na ositaulagaina i le 200 tausaga talu ai e faasoa atu le savali o le Toefuataiga. O lo tatou faa-naunauga ia oo atu i atunuu uma, itu-aiga, gagana, ma tagata e le o faaitiitia i le asō e pei ona molimauina e le silia ma le 68,000 o alii talavou, tamaitai talavou, ma ulugalii o loo auuina atu i le taimi nei i lalo o ni valaauga faafaifeautalai faamisiona; e ala atu i tagata o le Ekalesia o e masani lava ona toe ta’ua le valaaulia a Filipino ia o mai ia inā matamata,⁶ ma e ala i le faitau miliona o tupe na faaaluina i tausaga taitasi e lagolagoina ai lena taumafaiga i le salafa o le lalolagi.

E ui o a tatou valaaulia e le faama-losia, ae tatou te faamoemoe o le a iloa e tagata lo latou faatauanauina. Ina ia tupu lena mea, ou te talitonu e tolu lava mea e manaomia: muamua, o lou alofa; lua, o lau faaitaiga; ma le tolu, o lou faaagaina o le Tusi a Mamona.

O a tatou valaaulia e le mafai ona aveia ma se mataupu o mea e loto i ai le tagata lava ia; ae, e tatau ona aveia ma se faailoaga o le alofa lē faatuaioia.⁷ O lenei alofa, ua lauiloa o le alofa mamā, le alofa lē ponā o

Keriso, e ā tatou pe a tatou ōle atu ai. Ua valaauliaina i tatou, ua poloaiina foi, ina ia “tatalo atu i le Tamā ma le malosi atoa o le loto, ina ia faatumulia [tatou] i lenei alofa.”⁸

O se faaitaiga, ou te faasoa atu se aafiaga na faamatala mai e Sister Lanett Ho Ching, o loo auuina atu i le taimi nei ma lona toalu, o Peresitene Francis Ho Ching, o loo pulefaamalumu i le Misiona a Samoa Apia. Na ta’ua e Sister Ho Ching:

“I tausaga ua mavae, na siitia atu ai lo ma aiga talavou i se tama’i fale i Laie, Hawaii. O le faletaavale o lo matou fale na suia i se tama’i potu mautotogi lea sa nofo ai se tamaloa e igoa ia Ionatana. Na aveia Ionatana ma o matou tuaoi i se isi nofoaga. O le lagonaina e pei e le o se mea faafuaveta le tuufaatasia e le Alii o i matou, na tonu ai ia i matou ina ia talanoa saoloto atili e uiga i a matou gaoioiga ma lo matou auai ai i le Ekalesia. Sa fiafia Ionatana i la matou

faigauo ma fiafia e faaaluina le taimi ma lo matou aiga. Sa fiafia o ia e a’oa’o e uiga i le talalelei, ae sa le’i naunau e tuuto atu i le Ekalesia.

“Mulimuli ane, sa maua e Ionatana se igoa valaau o ‘Uncle Jonathan’ mai le ma fanau. A o faaaauu pea ona tuputupu ae lo matou aiga, na faapena foi le fiafia o Ionatana ia matou mea na fai. O a matou valaaulia i pati i aso malolo, aso fanau, gaoioiga faalea’oga, ma gaoioiga a le Ekalesia ua faalautele atu i afiafi faaleaiga ma papatisoga o le fanau.

“I se tasi aso sa ou mauaina ai se valaau i le telefoni mai ia Ionatana. Sa ia manaomia le fesoasoani. Sa mafatia o ia i le ma’i suka ma sa i ai se manu’a tugā i le vae lea sa manaomia ai ona tipiese. Sa fesoasoani lo matou aiga ma tagata tuaoi o le uarota ia te ia i lena taimi o tofotofoga. Sa matou auuina i le falema’i, ma tuuina atu faamanuiaga faaleperisitua. A o fai togafitiga o Ionatana, faatasi ai ma le



O LE LEO O PETERU, AKOPO, MA IOANE, SAUNIA E LINDA, CURLEY, CHRISTENSEN MA MICHAEL T. MALIM

fesoasoani a tuafafine o le Aualofa, sa matou faamamaina lona potu mautotogi. Sa fausia e uso o le perisitua se auala e oo i lona faitotoa ma ni uamea e pipii ai i le falelēta'ua. Ina ou toe foi mai Ionatana i le fale, na lofituina o ia i lagona ootia.

“Sa toe amata ona fai lesona a faifeautalai a Ionatana. O le vaiaso a o lumanai le Tausaga Fou, na ia vili mai ai ia te a'u ma fesili mai, 'O le a lau mea e fai i le Vaeluaga o le Tausaga Fou?' Sa ou faamanatu atu ia te ia le matou patī faaletausaga. Ae, sa ia tali mai, 'Ou te manao e te sau i lo'u papatisoga! Ou te manao ia sa'o le amataina o lenei tausaga.' I le mavae ai o le 20 tausaga o le 'o mai inā matamata,' 'o mai ma fesoasoani,' ma le 'o mai ma nofomau,' ua saunia lenei agaga faapelepele ina ia papatisoina.”

I le 2018, ina ua valaauina i maua e avea ma peresitene ma soa i le misi-ona, na amata ona faaletonu le soifua maloloina o Ionatana. Na ma aioi atu ia te ia ia faamalosi e faatali mai lo ma toe foi atu. Na ia malosi pe a ma le tausaga, peitai na saunia o ia e le Alii e toe foi atu i le aiga. Na maliu filemu o ia ia Aperila 2019. Na auai le ma fanau teine i le falelauasiga o 'Uncle Jonathan' ma usuina le pese lava e tasi na matou usuina i lona papatisoga.”

Ou te faailoa atu se mea manaomia lona lua mo le faasoaina atu ma le manuia o le savali o le Toefuataiga i lenei fesili: o le a le mea o le a tosina ai se tasi i lau valaaulia? Pe lē o oe ea, le faaitaitaiga o lou olaga? O le toatele ua faalogo ma mauaina le savali o le Toefuataiga na muai tosina atu i mea na latou vaaia i se tagata po o tagata o le Ekalesia a Iesu Keriso. Atonu o se auala na latou taulimaina ai isi, o upu sa latou tautatala ai pe le'i tautatala ai, o le mausali na latou faaalua i tulaga faigata, pe na o o latou lava foliga.⁹

Po o le a lava, e le mafai ona tatou o ese mai le mea moni faapea e tatau ona tatou malamalama ma ola i mataupu faavae o le talalelei toefuataiina i le mea sili tatou te mafaia ina ia faatosinaina a tatou valaaulia. O se mea e tele ina faasino i ai i aso nei o le mea moni. Afai e mau le alofa o Keriso i totonu o i tatou, o le a iloa e isi e moni lo tatou alolofa mo i latou. Afai o mumu le Agaga Paia i totonu o i tatou, o le a toe faamumuina le malamalama o Keriso i totonu o i latou.¹⁰ O le tagata e i ai oe o le a avatua le mea moni i lau valaaulia ia o mai ma lagona le olioli o le atoatoga o le talalelei a Iesu Keriso.

O le mea manaomia lona tolu ou te fia ta'ua, o le faaaogaina soo o mea-faigaluega o le liua lea ua mamanuina e le Alii mo le tisipenisione mulimuli lenei o le talalelei, o le Tusi a Mamona. O le faamaoniga faaletino lea o le vala-uga faaperofeta a Iosefa Samita ma le faamaoniga maumaututu o le paia ma le Toetu o Iesu Keriso. O lona faamatalaina o le fuafuaga o le togiola a lo tatou Tamā Faalelagi e lēmafaatusalia. Pe a e faasoa atua le Tusi a Mamona, ua e faasoa atua le Toefuataiga.

A o talavou Jason Olsen, sa lapataia pea lava pea o ia e tagata o le aiga ma isi e tete e i le avea ma se tagata Kerisiano. Peitai, e toalua ni ana uo lelei, o ni tagata o Le Ekalesia a Iesu Keriso o le Au Paia o Aso e Gata Ai, ma e masani ona latou talanoa i lotu. O ana uo, o Shea ma Dave, na tali atu ma le faaaloalo i finauga na tuuina atu e isi ia Jason e tete ai i le faatuatua ia Iesu Keriso. I le faaiuga, na la tuuina atu ia te ia se kopi o le Tusi a Mamona, ma faapea atu, “O le a taliina e lenei tusi au fesili. Faamolemole faitau i ai.” Sa ia taliaina ma le musuā le tusi ma tuu i totonu o lana atofaafafa, lea na nofo ai mo le fia masina. Na te le'i manao e tuu i le fale ne'i vaai i ai lona aiga, ma

e na te le'i manao ia lē fiafia Shea ma Dave i le toe faafoi atu i ai. Mulimuliane, na tonu ia te ia e susunu le tusi.

I se tasi po, ma le afitusi i le tasi lima ma le Tusi a Mamona i le isi, sa sauni o ia e susunu le tusi ae ona faalogoina se leo i lona mafaufau o faapea mai, “Aua ne'i susunuina la'u tusi.” I le te'i, sa ia tu. Ona, manatu lea faapea sa ia mafaufauina le leo, sa ia toe taumafai e tutu le afi. Na toe oo mai le leo i lona mafaufau: “Alu i lou potu ma faitau la'u tusi.” Na tuuese e Jason le afitusi, savali i lona potumoe, susue le Tusi a Mamona, ma amata ona faitau. Sa ia faaaauuina i lea aso ma lea aso, e tele lava i le taimi o le vaveao. Ina ua oo Jason i le faaiuga ma tatalo, sa ia faamaumauina, “Sa faatumulia a'u mai le tumutumu o lo'u ulu e oo i o'u alofivae i le Agaga. . . . Sa ou lagona le faatumulia i le malamalama. . . . O se aafiaga sili ona fiafia ou te lei lagoina muamua lava i lo'u olaga.” Sa ia saili e papatiso ma mulimuli ane avea o ia lava ma se faifeautalai.

Masalo e le tau faamatalaina le faapea atu e ui i le alofa moni ma le faamaoni, o le tele o a tatou valaaulia e faasoa atu le savali o le Toefuataiga o le a teenaina. Ae ia manatua lenei mea: e agavaa tagata uma mo sea valaaulia—“ua tutusa tagata uma i le Atua”;¹¹ e fiafia le Alii i taumafaiga uma tatou te faia, e tusa lava pe o le a le taunuuga; o se valaauga ua lē taliaina e lē o se mafuaaga lea e faamuta ai a tatou mafutaga; ma o le leai o se fiafia i le asō e ono liua i le fiafia i se aso o i le lumanai. Po o le a lava, e tumau pea lo tatou alofa i taimi uma.

Aua lava ne'i galo ia i tatou, ua oo mai le Toefuataiga mai faigata matuia ma le ositaulaga. O le mataupu lena mo se isi aso. Ua tatou fiafia i le asō i fua o le Toefuataiga, o se tasi o mana sili ona ofoofogia e toe fusifusia ai i



le lalolagi ma i le lagi.¹² E pei ona faamatalaina i le tele o tausaga ua mavae e Peresitene Gordon B. Hinckley, “Afa i leai lava se isi mea na maua mai faanoanoaga ma mafatiaga ma tiga o le toefuataiga nai lo le mana o faamauga o le perisitua paia e fusia faatasi ai aiga e faavavau, o le a aoga uma i lona tau.”¹³

O le folafolaga sili o le Toefuataiga o le togiolaina lea e ala atu ia Iesu Keriso. O le Toetu o Iesu Keriso o le faamaoniga lea, e moni lava, o loo Ia umia le mana e togiola ai tagata uma o ē o le a o mai ia te Ia—togiolaina i latou mai le faanoanoa, faamasinoga lē tonu, le fiafia, agasala, ma le oti foi. O le asō o le Aso Sa o le Laupama; o se vaiaso mai lenei aso o le Eseta lea. Tatou te manatuaina, tatou te manatuaina pea, puapuaga ma le maliu o Keriso e togiola mo a tatou agasala, ma e tatou te faamanatuina lena Aso Sa sili ona matagofie, o le aso o le Alii, lea na Ia toetu ai mai le oti. Ona o le Toetu o Iesu Keriso, ua i ai se uiga o le Toefuataiga, ua i ai le uiga i o tatou olaga faitino, ma le mea mulimuli ua i ai se uiga i lo tatou i ai iinei.

Ua ofoina mai e Iosefa Samita, le perofeta sili o le Toefuataiga le moli-mau malosi mo lo tatou taimi e uiga i le Keriso toetu: “O loo soifua o ia! Aua sa ma vaai ia te ia, i le lima taumatau lava o le Atua.”¹⁴ Ou te faaopoopo atu ma le lotomauualalo la’u molimau i le [molimau] a Iosefa ma i [molimau] a le au aposetolo ma perofeta na muamua atu ia te ia faapea aposetolo ma perofeta o e na suitulaga ia te ia, o Iesu o Nasareta o le Mesia folafolaina, o le Alo e Toatasi na Fanaua o le Atua, ma o le Togiola toetu o tagata uma.

“Matou te moli-mau atu o i latou e su’esu’e ma le agaga tatalo i le sāvali o le Toefuata’iga ma galulue i le faatuatua o le a faamanuaina e maua ā latou lava molimau e uiga i lona pa’ia ma lona faamoemoega e saunia le lalolagi mo le Afito Mai Faalua o lo tatou Alii ma le Faaola, o Iesu Keriso, ua

folafola mai.”¹⁵ O le Toetu o Keriso ua mautinoa ai Ana folafolaga. I le suafa o Iesu Keriso, amene. ■

FAAMATALAGA

1. Galuega 3:21.
2. Efeso 1:10.
3. Iakopo 1:5.
4. 2 Nifae 2:8.
5. David O. McKay, letter to Sarah M. Hilton, June 3, 1921, Church History Library, Salt Lake City.
6. Ioane 1:46.
7. Tagai i le 1 Ioane 4:18.
8. Moronae 7:48.
9. Na matauina e Peresitene Tavita O. MaKei faapea: “O tagata uma lava o ola i lenei lalolagi na te faia se faatosinaga, pe mo le lelei pe mo le leaga foi. E le na o mea e fai atu ai o ia, e le na o mea e faia e ia. Ae o se tagata e i ai o ia. O alii uma, o tagata uma e sulugia mai ai le ituaiga tagata e i ai o ia” (*Aoaoga a Peresitene o le Ekalesia: Tavita O. MaKei* [2003], 253).
10. Tagai i le Ioane 1:9; Mataupu Faavae ma Feagaiga 88:6–13; 93:2.
11. 2 Nifae 26:33.
12. Tagai i le Mataio 16:19; 18:18; Mataupu Faavae ma Feagaiga 110:14–16; 132:19, 46.
13. Gordon B. Hinckley, “As One Who Loves the Prophet,” in Susan Easton Black and Charles D. Tate Jr., eds., *Joseph Smith: The Prophet, the Man* (1993), 6.
14. Tagai i le Mataupu Faavae ma Feagaiga 76:22–24.
15. “O Le Toefuata’iga o le Atoatoaga o le Talalelei a Iesu Keriso: O Se Folafolaga o le Faamanatuina o le Lua Seneturi i le Lalolagi, “Faalogo ia te Ia,” *Liahona*, Me 2020, 91.



Sandy, luta, ISA



Saunia e Peresitene Russell M. Nelson
 Peresitene o Le Ekalesia a Iesu Keriso o
 le Au Paia o Aso e Gata Ai

Agai i Luma i le Faatuatua

Ou te faamanuia ia te outou i le filemu ma le faateleina o le faatuatua i le Alii.

Ou uso e ma tuafafine pele, a o tatou oo mai ai i le faaiuga o lenei konafesi faasolopito, tatou te faailoa atu lo tatou lotofaafetai i le Alii. O musika sa maofa ma o savali sa musuia.

I lenei konafesi, ua tatou oo ai i le tele o mea tulaga ese. I lenei faamanatuina o le lua seneturi, ua matou folasia atu ai se folafolaga i le lalolagi e tautino atu ai le moni o le Toefua-taiga o le talalelei a Iesu Keriso i lona atoatoaga.

Na tatou faamanatuina ai le Toefua-taiga i le Alalaga Osana.

Na tatou faalauiloaina ai se faatusa fou e faailoa ai lo tatou faatuatua i le Alii o Iesu Keriso ma mo le aloa’iaina faavisio o faamatalaga ma anomea aloaia o le Ekalesia.

Ua matou valaau atu mo se aso o anapogi ma tatalo i le lalolagi atoa, ina ia mafai ona togafitia le faama’i pipisi o i ai nei, ia pui-puia tausima’i, faamallosia le tamaoiga, ma toe foi i le olaga masani. O lenei anapogi o le a faia i le Aso Maliu, Aso Faraile, 10 Aperila. E ma’eu lenei Aso Faraile o le a i ai!

O le Aso Sa a sau nei o le Aso Sa o le Eseta, lea o le a tatou toe faamanatuina ai le Togiola ma le Toetu o lo tatou Alii o Iesu Keriso. Ona o Lana

Togiola, o le a oo mai ai Lana mea-alofa o le toetu i tagata uma o ē soifua mai. Ma o Lana mea-alofa o le ola e faavavau o le a oo mai i tagata uma o ē agavaa e ala i le faamaoni a’ia’i i sauniga ma feagaiga na osia i totonu o Ona malumalu paia.

O vaega e tele o lenei koanfesi aoa ia Aperila 2020—atoa ai ma le vaiaso paia lea ua tatou amataina nei—e mafai ona aoteleina i upu paia faapoloaiga se fa: “Faalogo ia te Ia.”¹ Matou te tatalo mo la outou taulaiga i le Tama Faalelagi, o lē na fetalai mai na upu, ma i Lona Alo Pele, o Iesu Keriso, ia avea ma mea sili ona taua e manatua



pea mai mea uma na tutupu. Matou te tatalo ia amata ona outou toetuutu atu *moni* e faalogo, lagona, ma usitai i afioga a le Faaola.² Ou te folafola atu o le a mulimuli mai le faaititia o le fefe ma le faatuatua faateleina.

Faafetai atu mo lo outou naunautauga ia faia o outou fale o ni malutaga moni o le faatuatua, lea e mafai ona afio ai le Agaga o le Alii. O le tatou mataupu talanoaina mo suesuega o le talalelei, *Sau, Mulimuli Mai ia te A’u*, o le a faaauau pea ona faamanuiaina ai o outou olaga. O a outou taumafaiga faifai pea i lenei galuega—e oo lava i na taimi e te lagonaina ai e te le o manuia patino—o le a suia ai lou olaga, le olaga o lou aiga, ma le lalolagi. O le a faamallosia i tatou pe a tatou avea atili ma ni soo totoa o le Alii, e tutu atu ma tautatala atu mo Ia, i soo se mea tatou te i ai.

Ia, sei o tatou talanoa i malumalu. E 168 tatou malumalu ua faapaiaina i le lalolagi atoa. O isi o loo i ai i le tele o tulaga eseese o le fuafuaina ma le fauina. A faasilasila atu ni fuafuaga e fausia se malumalu fou, e avea ma se vaega o la tatou talafaasolopito paia.

Atonu e foliga lē talafeauga le faasilasila atu o malumalu fou a o tapunia ai a tatou malumalu uma mo se taimi.

E silia ma se seneturi talu ai, sa muai vaai ai Peresitene Uilifoti Uutilafi i tulaga e pei o o tatou tulaga i nei vai-taimi, e pei ona faamaumauina i lana tatalo o le faapaiaga o le Malumalu o Sate Leki, na tuuina atu i le 1893. O nisi o outou atonu ua outou tagai talu ai nei i ni vaega mai lenei tatalo ofoofogia i luga o ala o faasalalauga faaagafesootai.

Faalogo i nei olega mai se perofeta malosi a le Atua: “Afai o le a lē maua e Lou nuu le avanoa e ulufale mai ai i lenei maota paia . . . ma ua sauāina i latou ma oo i puapuaga, ma siomia e

faafitauli . . . ma o le a liliu mai o latou fofoga agai mai i Lou maota paia nei ma òle atu i Lau Afio mo se laveaiga, mo se fesoasoani, mo Lou mana ina ia faaloaloa mai mo i latou, matou te aioi faatauana atu i Lau Afio, ia silasila mai ou fofoga mai Lou afoaga paia i le alofa mutimutivale . . . ma faafofoga gaina a latou tagi. Po o se taimi foi i ni tausaga a sau, o le a vavaeeseina ai le fanau a Lou nuu, e ala i soo se mafuaaga, mai lenei maota, . . . ma o le a latou tagi atu i Lau Afio mai le loloto o latou mafatiaga ma faanoanoaga e faamatuu mai se toomaga ma se laveaiga ia i latou, matou te faatoga atu ma le faamaulalo i Lau Afio ia . . . faafofoga ina a latou tagi, ma faamatuu mai ia i latou faamanuiaga ua latou òle atu ai.”³

Uso e ma tuafafine, i taimi o o *tatou* tiga pe *a* tapunia malumalu, e mafai lava ona e utuvai mai le mana o au feagaiga ma faaeega paia o le malumalu pe a e faamamaluina au feagaiga. Faamolemole ia faaoga lenei taimi a o tapunia ai malumalu ia faauau ai ona ola i se olaga agavaa mo le malumalu, pe ia faagavaa foi mo le malumalu.

Talatalanoa e uiga i le malumalu faatasi ma lou aiga ma uo. Ona o Iesu Keriso o loo i le totonugalemu o mea uma tatou te faia i totonu o le malumalu, a e mafafau atili e uiga i le malumalu o le a e mafafau atili foi e uiga ia te Ia. Suesue ma tatalo ia a’oa’o atili e uiga i le mana ma le potelea na maua ai ou faaeega paia—pe o le a e maua ai ou faaeega paia.

O le asō, matou te fiafia lava e faasilasila atu ni fuafuaga e fausia ni malumalu fou se valu i nofoaga nei: Bahía Blanca, Atenitina; Tallahassee, Florida; Lubumbashi, Democratic Republic of the Congo; Pittsburgh, Penisilevania; Benin City, Nigeria; Syracuse, Iuta; Dubai, United Arab



O MALOSIAGA O LE MALAMALAMA MA LE FOFGA, SAUNIA E WARREN LUCH, FAAALOALOGA A LE FALEMATAGA O TALAPAASOLOPTO O LE EKALLESIA

Emirates; ma Shanghai, People’s Republic of China.

I nofoaga uma e valu, o le a galulue ai tusiata o le Ekalesia faatasi ma taitai i le lotoifale ina ia mafai ona ogatusa ma ia avea ma se faaopopoga matagofie i nuu taitasi.

O le fuafuaga mo se malumalu i Dubai ua oo mai i se tali atu i la latou valaaulia mamalu, lea na matou aloaiaina ma le lotofaafetai.

O anotusi mo le fuafuaga mo Shanghai e taua tele. Mo le silia ma le luasefulu tausaga, o tagata agavaa o le Ekalesia i le Malo o Saina na auai i le Malumalu o Hong Kong i Saina. Ae ia Iulai 2019, na tapunia ai lena malumalu mo ni faaleleiga ua loa ona fuafuaina ma sili ona manaomia.

I Shanghai, o se nofoaga tauagafau e feiloai ai mo ni faamoemoega se tele o le a saunia se ala mo tagata o Saina e faauau ai ona auai i sauniga o le malumalu—i le People’s Republic of China—mo i latou ma o latou tuua.⁴

I atunuu uma, ua aoao ai e lenei Ekalesia ona tagata ia faamamalu, usitai ma lagolagoina le tulafono.⁵ Tatou te aoao atu le taua o le aiga, le avea ma matua lelei, ma ni tagatanuu lelei. Ona tatou te faaaloaloga ina tulafono a le Malo o Saina, e *le* auina atua ai e le Ekalesia

ni faifeautalai e tala’i iina; pe o le a tatou auina atua i le taimi nei.

O tagata faigaluega mai fafo i totonu o Saina ma aulotu i Saina o le a faauau pea ona feiloai i nofoaga eseese. O le tulaga faaletulafono o le Ekalesia iina e tumau pea le *le suia*. I se uluai tulaga o le faaogaina o fale, o le ulufale atu i ai i le maota e mo na o taimi faatulagaina. O le maota o le Alii i Shanghai o le a le avea ma nofoaga mo tagata tafafao mai isi atunuu.

O nei malumalu fou e valu o le a faamanuiaina ai olaga o le toatele o tagata i itu uma e lua o le veli o le oti. O malumalu o se vaega silisili o le Toefuataiga o le atoatoaga o le talalelei a Iesu Keriso. I le lelei ma le agaalofo o le Atua, o loo Ia aumaia ai faamanuiaga o le malumalu ia latalata atili mai i Ana fanau i *soo se mea*.

A o faauau pea le Toefuataiga, ou te iloa o le a faauau pea ona faaali mai e le Atua le tele o mea silisili ma le taua tau i Lona malo iinei i le



Aai o Niu Taipei, Taiuani

Lipoti Faafuainumera, 2019

lalolagi.⁶ O lena malo o le Ekalesia a Iesu Keriso o le Au Paia o Aso e Gata Ai.

Uso e ma tuafafine pele, ou te faailoa atu lo'u alofa mo outou. I lenei taimi o popolega ma le lē mau-tonu, ma i le faaaogaina o le pule ua tuuina mai ia te a'u, ou te fia faaee atu ai i o outou luga se faamanuiaga faaaposetolo.

Ou te faamanuia ia te outou i le filemu ma le faateleina o le faatuatua i le Alii.⁷

Ou te faamanuia ia te outou i se manao ia salamo ma avea atili teisi e faapei o Ia i aso taitasi.⁸

Ou te faamanuia ia te outou ia iloa o le Perofeta o Iosefa Samita o le perofeta o le Toefuataiga o le talalelei a Iesu Keriso i lona atoatoaga.

Afai o i ai se ma'i ia te outou po o sē pele ia te outou, ou te tuua se faamanuiaga o le faamalologa, e ogatusa ma le finagalo o le Alii.

Ou te faamanuia ai ia te outou, ma toe faaopoopo tasi atu le faailoaga o lo'u alofa mo outou taitoatasi, i le suafa paia o Iesu Keriso, amene. ■

FAAMATALAGA

1. Iosefa Samita—Talafaasolopito 1:17; tagai foi i le Luka 9:35.
2. Tagai i le Ioane 10:27; Faaaliga 3:20; Mosaea 26:21, 28; Mataupu Faavae ma Feagaiga 29:7.
3. Wilford Woodruff, dedicatory prayer of the Salt Lake Temple, Apr. 6, 1893, ChurchofJesusChrist.org; emphasis added.
4. Mo le fia afe o tausaga, na tausia ai e tagata Saina ni talafaasolopito o ituaiga faapea ma gafa. O faafiafiaga faaganuu Saina e faaalai ai le faaaloalo mo o latou tuua, e pei o le Qingming Festival (清明节). O le Qingming Festival i lenei tausaga (清明节) na faakalenaina mo Aperila 4–5.
5. Tagai i le Mataupu Faavae o le Faatuatua 1:12.
6. Tagai i le Mataupu Faavae o le Faatuatua 1:9.
7. Tagai i le Ioane 14:27.
8. Tagai i le 3 Nifae 27:27.

Mo le silafia e tagata o le Ekalesia, ua tuuina mai e le Au Peresitene Sili le lipoti faafuainumera lenei e faatatau i le tuputupu ae o le Ekalesia e oo mai i le aso 31 o Tesema, 2019.

IUNITE A LE EKALEZIA

| | |
|--------------------|--------|
| Siteki | 3,437 |
| Misiona | 399 |
| Itu | 542 |
| Uarota ma Paranesi | 30,940 |

TAGATA AUAI O LE EKALEZIA

| | |
|------------------------------------|------------|
| Aofai o tagata auai | 16,565,036 |
| Tamaiti fou ua i ai pepa faamaumau | 94,266 |
| Tagata liliu mai na papatisoina | 248,835 |

FAIFEAUTALAI

| | |
|---------------------------------------|--------|
| Faifeautalai Faamisiona | 67,021 |
| Faifeautalai Auauna Atu a le Ekalesia | 31,333 |

MALUMALU

| | |
|--|-----|
| O Malumalu na Faapaiaina i le 2019 (Roma Italia, Kinshasa Ripapelika Temokarasi o Congo, Fortaleza Pasila, Port-au-Prince Haiti, Lisbon Portugal, ma Arequipa Peru) | 6 |
| O Malumalu na Toefaapaiaina i le 2019 (Memphis Tennessee, Oklahoma City Oklahoma, Oakland Kalefonia, Raleigh North Carolina, Frankfurt Siamani, Asunción Paraguay, ma Baton Rouge Louisiana) | 7 |
| O Malumalu o loo Faaogaina e oo mai i le Faaiuga o le Tausaga | 167 |



Elder Jorge T. Becerra

Fitugafulu o le Pulega Aoao

O Elder Jorge T. Becerra sa matamuli ma le gaioia a o tupu-tupu ae, ae na tuuina i ai e lona peresitene o le misiona ia avanoa e taitai ai. Sa toe taliu mai Jorge mai le Misiona i Kalefonia Arcadia ma se naunautaiga e punouai i le galuega a le Alii mo aso o totoe o lona soifua.

E lei pine ae oo mai isi mau avanoa faaletaitai nai lo le mea sa ia faamoemoeina. I le 27 o ona tausaga sa valaauina ai o ia i se au epikopo. I le 32 o ona tausaga sa valaauina ai o ia e avea ma epikopo. I le taimi muamua sa ia lagonaina lona le agavaa ao o atu tagata ia te ia ma o latou luitau.

“E matuai o’u le leiloa lava la’u mea o loo fai,” sa ia fai atu ai i lona tamā.

O le tali a lona tamā na aoao ai o ia i se lesonea mamana, ma faamanatu atu ai ia te ia le faatuatuaga o lona peresitene o le misiona ia te ia, ma sa fesoasoani ai ia te ia e saunia mo valaauaga faaletaitai i le lumanai, e aofia ai ona valaauaga o se peresitene o le siteki i le 37 o ona tausaga.

“Sa fai mai lo’u tamā, ‘Atalii, o le a le matua o le Agaga Paia?’ Na faamatalaina e Elder Becerra: “O se taimi maoae lea o le aoaoina o au aua sa ou iloaia e mafai ona ou faia soo se mea e poloi mai ai le Alii ia te au.”

O lona lesonea na tumau ai ia Elder Becerra i le aluga o le tele o tausaga o le auauna atu ma le loto i Le Ekalesia a Iesu Keriso o le Au Paia o Aso e Gata Ai.

Na soifua mai Jorge Eduardo Torres Becerra i le aso 18 o Tesema, 1962, ia Juan C. Becerra ma Celia T. Becerra i le Aai o Sate I, Iuta, USA, lea na faafaileleina ai o ia.

Ina ua maea lana misiona, sa faaipoipo Elder Becerra ma Debbie Ilene Schneberger i le Malumalu o Sate leki i le aso 10 Aokuso, 1984. O i la’ua o matua o se fanau e toailima.

Na maua e Elder Becerra sona faailoga i suesuega lautele mai le Iunivesite o Iuta ma se faailoga amata o faatufugaga i le faatausitusi mai le Community College i Sate Leki. Sa ia aoaoina foi mea faapisinisi i le Iunivesite o Phoenix. I le 1998, na avea ai o ia ma se paaga a le Allegis Advisor Group, o se kamupani faufautua o mea tautupe. I le taimi o lona valaauaga o se Fitugafulu o Pulega Aoao, sa faigaluega o ia o se faufautua o teugatupe a le Intermountain Financial Partners.

Sa avea Elder Becerra ma peresitene o Alii Talavou a le uarota, fesoasoani i se au peresitene o le misiona, fesoasoani i se au peresitene o le paranesi, faiaoga seminare, fesoasoani i se au epikopo, epikopo, peresitene o le siteki, ma se peresitene o le Misiona a Kalefonia Arcadia. I le taimi o lona valaauaga, sa avea o ia o se Fitugafulu Eria. ■



Elder Matthew S. Holland

Fitugafulu o le Pulega Aoao

O Elder Matthew S. Holland e le o se tagata ese i le Au Pulega Aoao po o konafesi aoao.

E toatele le Au Paia o Aso e Gata Ai e silafia o ia o le alo o Elder Jeffrey R. Holland o le Korama a Aposetolo e Toasefululua. Atonu e manatua e isi o ia a o 17 tausaga lona matua sa saunoa ai i le konafesi aoao ia Aperila 1983 i le sauniga a le au perisitua.

“O se faamanuiaga matagofie i lo’u olaga atoa, le matauina o le ala na soifua ai lo’u tina ma lo’u tamā, o mea sa la tautino atu e fai, ma mea sa poloaiina ai i laua e fai,” na saunoa ai Elder Holland, o lē o loo pulefaamalumalu i le taimi nei i le Misiona a North Carolina Raleigh.

“Ae, ona o nei matauga patino, ua matou iloa ai le tele naua o mea e uiga i lenei valaauaga e manatu ai ua lava faaaaupegaina i matou mo lea mea,” na ia faaopoopo mai ai. “O le mea e lelei ai, sa matou aoaoina foi e faapea e faagavaa e le Alii i latou Na Te valaauina, ma ua matou maua le tele o le faatuuatua ma le mafanafana i lona mea.”

E manatua e Elder Holland o le lauga ai i le konafesi aoao e tauaafefe. O le sauniunia o se savali e faasolosolo malie ona oo mai “o lea fuaiupu ma lea fuaiupu, o lea mataupu ma lea mataupu” (2 Nifae 28:30) na avea “o se faamanuiaga faamautinoa vave ia iloa ai, pe a e taliaina tofitofiga mai le Alii, o le a Ia fesoasoani ia te oe ma avatu ia te oe ia mafauauga ma uunaiga o mea e moomia ona faasoa.”

Na soifua mai Matthew Scott Holland i le aso 7 Iuni, 1966, i Provo, Iuta, ISA, o le alo o Jeffrey R. ma Patricia Holland. Na faaipoipo atu o ia ia Paige Bateman i le aso 20 Me, 1996, i le Malumalu o St. George Iuta. O i la’ua o matua o se fanau e toafa.

O tulimataiga faaleaoaoga a Elder Holland e aofia ai faailoga e tolu i le saienisi faaupufai—o se faailoga tagata malaga o faatufugaga mai le Iunivesite o Polika Iaga i le 1991, ma se matuaofaiva o faatufugaga ma le tofamanino o mafauauga, e mai uma le lua lea i le Iunivesite o Duke, i le 1997 ma le 2001.

A o galue o ia o se polofesa soofaatasi o le saienisi faaupufai i le BYU (2001–2009), sa avea o ia ma peresitene o le Iunivesite o Utah Valley i le 2009, ma sa tautua ai seia oo i lona valaauaga o se peresitene o le misiona i le 2018.

Sa avea o ia o se epikopo, fautua maualuga, fesoasoani i se au epikopo, fautua o Alii Talavou i le uarota, taitai misiona a le uarota, faiaoga o le Aoga Sa, ma se faifeautalafi faamisiona i le Misiona a Sikotilani Edinburgh. ■



Elder William K. Jackson

Fitugafulu o le Pulega Aoao

Ina ua mavae le 23 tausaga o avea ma alii fomai faarisone i le Tautua Taufafu a le I.S., sa talosagaina William K. Jackson e faasoa mai ni ona aafiaga faatumutumuga se 20 a o soifua ma galue ai i itulagi aupito mauualalo o le lalolagi.

A o ia mafaufau loloto e uiga i lea talosaga a o lei amataina le sauniga o lona litaea, sa ia iloaia o “lau 20 uma o faatumutumuga e 20 sa faatatau i le Ekalesia—po o le aiga,” na ia saunoa ai.

Sa soifua mai William King Jackson i le aso 29 o Tesema, 1956, i Uosigitone D.C., ISA ia E. William ma Lois Andrey Jackson. Sa soifua ae o ia i Ojai, Kalefonia, ISA, ae ona o galuega faavolenitia a ona matua, o lea sa ia maua ai foi le aotauina i Honduras, Algeria, ma Afakanisitana.

Ina ua maea lana auanuga faamisiona i le Misiona a Polivia La Paz, sa feiloai Elder Jackson ma Ann Kesler i le taumafanafana o le 1977.

“Sa o se alofa i le uluai taimi mo au,” na ia saunoa ai. “Sa ou faaaluina le toega o lona taumafanafana e taumafai ai e faatalitonu o ia e faapea, o au lava lea.”

Sa la faaipoipo i le aso 29 Tesema, 1977 i le Malumalu o Los Angeles Kalefonia. O i laua o ni matua o se fanau e toavalu, e toatolu e vaetamaina—mai Initia, Nepal, ma Kemupotia.

Sa aoga Elder Jackson i le Iunivesite o Polika Iaga, ma maua ai sona faailoga o le tagata malaga o le saienisi mai le Iunivesite o Berkeley, Kalefonia, ma sa maua sona faailoga o le tofamanino o vailaau mai le Iunivesite o San Francisco, Kalefonia i le 1983.

Ina ua maea lona vaitau faaa'oa'o faafomai, sa faigaluega o ia i atunuu i fafo mo le 26 tausaga. Sa faigaluega talu ai nei o se fomai faatonu i le Valley Health Care, faatasi ai ma ona lala i Idaho ma Oregon, ISA.

I le taimi sa latou nonofo ai i fafo atu o le Iunaite Setete, sa laua faaaluina ma Sister Jackson le tele o o la taimi ma tagata o uluai augatupulaga ua auai i le Ekalesia.

“O se tasi o vaega aupito telē o la'u molimau o le talalelei o le matauina lea o mea ua faia e le talalelei i nei tagata ma te alolofa i ai,” na ia saunoa ai. “Ua suia ai i latou.”

Na avea Elder Jackson o se Fitugafulu Eria, peresitene o le Misiona a Initia New Delhi, peresitene o Alii Talavou o le paranesi, faiaoga inisitituti, ma le faiaoga o Mataupu Faavae o le Talalelei. I le taimi o lona valaau e avea ma se Fitugafulu o le Pulega Aoao, o auaua o ia o se epikopo. ■



Elder Jeremy R. Jaggi

Fitugafulu o le Pulega Aoao

A o talavou Elder Jeremy R. Jaggi, sa satia lona tuafafine e fitu-tausaga-le-matua, o Kristen i se siama na afaina ai lona faiai. Sa fai mai fomai o le a le ola o ia.

Sa tootuli ifo le alii talavou o Jeremy i autafa o lona moega i le fale o le aiga i le Aai o Sate Leki, Iuta, ISA, ma aioi atu i le Alii ia ona iloa pe aisea e tatau ai ona oti o ia ae laitiiti tele. Peitai, na maua se faamanuiaga faaleperisitua o lona tuafafine, ma sa ola pea.

Sa o se auala lea mo Jeremy na 17-tausaga-le-matua, e “faaleleia ai ia lava ma le Atua,” ma taitai atu ai o ia e faitauina ma le lotonaunau le Tusi a Mamona mo le uluai taimi. Mulimuli ane na auaua o ia o se faamisiona talai i le Misiona a Cleveland, Ohio.

Na toe foi lava Jeremy i ona tulivae i le tatalo ma le loto atoa i tausaga mulimuli ane, ina ua vave ona luluti tiga o lona faletua, o Amy i le la tama lona tolu. “O le taimi lea, sa ou lagonaina ai se toafilemu lofituina—o se filemu e pau lava le ala e mafai ona faamatalaina ai, o le siomia o au e aao alofa o se Tama Faalelagi i le mafanafana o le Agaga Paia,” na ia saunoa ai.

O lona lava filemu na lagolagoina ai au i se taimi puupuu na ola ai le pepe ma masina o le lotofaanoanoa na sosoo ai ina ua toe fafano se isi maitaga. “E tofotofoina i tatou i o tatou ala,” na ia saunoa ai, “peitai tatou te manatu ‘o le mea e fiafia tele ai’ [Iakopo 1:2] ua saunia e le Faaola se ala mo i tatou e maua ai le filemu ma le fiafia.”

Na soifua mai Jeremy Robert Jaggi i le Aai o Sate Leki, Iuta, ISA, i le aso 23 Mati, 1973 ia Robert Stanley Jaggi ma Judy Anne Roos. Na ia faaipoipo ia Amy Anne Stewart i le Malumalu o Sate Leki i le aso 12 Iuni, 1995. O i laua o ni matua o se fanau e toalima.

Sa maua le faailoga o le tagata malaga o Elder Jaggi i le saienisi o le amio ma le soifua maloloina mai le Iunivesite o Iuta ma se faailoga o le matuaofaiva o le pulega faatonusili taupisinisi mai le Iunivesite o Pepperdine. Sa taiulu o ia i fefaatauaiga faale-itulagi mo Alkermes ma le pulea faapisinisi o fale ma fanua i le HCA Investments i le taimi o lona valaaua.

Na tautua Elder Jaggi o se Fitugafulu Eria, peresitene o le Misiona a Iuta Ogden, fesoasoani i le failautusi faapitoa o le siteki, epikopo, peresitene o le korama a toeaina, faiaoga seminare, fesoasoani i se au peresitene o Alii Talavou i le uarota, faiaoga o faifeautalai sauniuni a le siteki, ma se taitai misiona a le uarota. ■



Elder Kelly R. Johnson

Fitugafulu o le Pulega Aoa

E manatua lelei e Elder Kelly R. Johnson le aso na valaauina ai o ia o se epikopo i le 31 o ona tausaga. O le aso foi lava lena, sa ta'u atu ai e le fomai ua maua o ia i le pe o Foliga [Bell's palsy]—o se gasegase e pepē ai pe vaivai ia uaua o le tasi itu o foliga.

O se taimi faigata, e le gata ona o le le lagolelei ma le maasiasi e afua ona o le tulaga ua i ai, ae faapea foi ona o ona mau tiutetauave fou. Ae ua avea lena taimi faigata o se faamanuiaga.

“Ma le le iloaina pe o le a le umi o le a i ai i lea tulaga, sa ou amatalia ai se alofa naunau mo tagata taitoatasi sa matou mafuta e oo i le iuga o lo'u ola,” na ia saunoa ai. “Sa ou matua aoaoina moni e faapea, e feagai tagata ma mea matuia ma faanoanoa e le mafai ona latou pulea, ia e aafia ai o latou tomai, lagona, ma le mautinoa.”

E i ai taimi, e le faigofie ai ona auuina i le Ekalesia a le Alii. Ae e faapei lava o soo o le Faaola na “tuua loa lava o latou upega” (Mataio 4:20) ina ia mulimuli ia te Ia, “po o le a lava le mea e poloaiina ai i tatou e fai, tatou te naunau foi e faia,” o le saunoaga lea a Elder Johnson.

Po o fea lava e valaau i ai o ia po o lona aiga e le Alii, latou te o ma loto ma mafaufau naunautai, ma vaavaai e saili mea e lelei tusa lava po o a o latou tulaga e i ai.

Sa soifua mai i Kelly Ray Johnson i Pleasant View, Iuta i le aso 16 Ianuari, 1963 ia Harold Raymond Johnson Jr. ma Helen Cragaun Johnson. Sa soifua ae o ia i Ogden, Iuta, ma sa faaiipoipo ai ia Teressa Lynn Bartrum i le Malumalu o le Aai o Sate Leki i le aso 27 Mati, 1986. E toalima le la fanau.

Na faauu Elder Johnson mai le Weber i le 1987, ma se faailoga o le tagata malaga saienisi i le suetusi ma sa maua lona faailoga o le matuaofaiva i le pulega o mea tau pisinisi mai le Iunivesite o Polika Iaga i le 1989. Sa faigaluega o ia o se suetusi su'esu'e faaletulafono mo le KPMG International Cooperative ma talu ai nei sa faigaluega ai o se suetusi su'esu'e faaletulafono ma se paaga mo Norman, Townsend, ma Johnson.

O Elder Johnson, o lē sa avea o se Fitugafulu Eria i le taimi o lona valaauaga, sa tautua o se peresitene o le Misiona a Taialani Bangkok, lea foi sa faamisiona talai ai, ma sa avea foi o se peresitene o le siteki, fesoasoani i se au peresitene o le siteki, fautua maualuga, epikopo, peresitene o le korama a toeaina, taitai misiona a le uarota, ma le faiaoga o le vasega sauniuni a faifeautalai i le siteki. ■



Elder Thierry K. Mutombo

Fitugafulu o le Pulega Aoa

Sa i ai ia Elder Thierry K. Mutombo se molimau malosi o le talalelei ina ua ia maua lona valaauaga o le misiona o se alii talavou. Sa papatiso faatasi ma lona aiga ina ua 10 ona tausaga, ma sa ia molimauina le ala mamana na suia ai e le talalelei lona aiga.

Ae e oo lava i le taimi sa ia tapenapena ai e auuina atu i le Misiona a Côte d'Ivoire Abidjan, sa lei i ai sana molimau malosi i le Tusi a Mamona. Na te lei faitauina lava muamua.

Sa lu'iina e le epikopo musuia a Thierry o ia e faitau le Tusi a Mamona i aso uma a o lei alu i lana misiona. Sa ia tuuina foi ia Thierry se ki i lo latou falelotu ina ia mafai ona ia suesue filemu ai.

Sa faitauina e Thierry i aso uma mo le tolu masina. E oo atu i le taimi na ia ulufale ai i le galuega faamisiona, sa le gata ina ia maua se molimau malosi o le Tusi a Mamona, ae sa ia amatalia foi ni mausa suesue sa fesoasoani ia te ia o se faifeautalai.

“O le meafaigaluega aupito silisili ua tatou maua e aumaia ai tagata i le malamalama o le talalelei ma faapotopoto Isaraelu ua taapeape, o le Tusi a Mamona,” na ia saunoa ai.

Na soifua mai Thierry Kasuangi Mutombo i Kinshasa, Ripapelika Temokarasi o Congo, i le aso 31 Ianuari, 1976 ia Antoine Kasuangi Mutombo ma Marie Therese Matsanga Mutombo. Na faaiipoipo o ia ia Tshayi Nathalie Sinda i se sauniga faalemalo i le aso 29 Novema, 2002. Na faamauiina i la'ua mulimuli ane i le Malumalu o Johannesburg Aferika i Saute i le aso 19 Novema, 2004. E toaono le la fanau.

Na faauu Elder Mutombo i le 2010 mai le Iunivesite o Cepromad ma se faailoga o le pulega o mea tau pisinisi ma i le 2012, ma se faailoga o le tagata malaga i le pulega o punaoa mo tagata faigaluega. Sa faigaluega o ia i le Ekalesia i le Ripapelika Temokarasi o Congo o se pule i Matagaluega o Talafaasolopito o Aiga ma Punaoa mo Tagata Faigaluega ma se supavaisa i le Matagaluega o le Pulega o Meatotino.

I le taimi o lona valaauaga o se Fitugafulu o le Pulega Aoa, o auuina atu Elder Mutombo o se peresitene o le Misiona a Baltimore, Maryland. Na avea muamua o se peresitene o le siteki, fesoasoani i se au peresitene o le siteki, taitai misiona a le uarota, faiaoga i le Aoga Sa, ma se failautusi faapitoa a le siteki. ■



Elder Adeyinka A. Ojediran

Fitugafulu o le Pulega Aoao

O le konafesi aoao ia Aperila 2020 o “se faaiuga o le vaiaso e le mafaagaloina” mo Elder Adeyinka A. Ojediran.

Sa lagolagoina le sa liliu mai i le Ekalesia e avea o se Fitugafulu Pulega Aoao—o se uluai tamaalii o le Au Paia o Aso e Gata Ai o Nigeria ma Aferika i Sisifo. O lona lotofaafetai lofituina ma lona olioli na faateleina atili ina ua fofoga mai e Peresitene Russell M. Nelson o le a fausia le malumalu lona tolu o Nigeria i le Aai o Benin.

“Ou te le’i faamoemoeina lena mea,” na saunoa ai Elder Ojediran, ma se ataata lapoa. “O le faalogo atu o saunoa mai lo tatou perofeta i se isi malumalu o le a fausia i Nigeria, sa o se mea matua matagofie tele. Ia te au lava ia, o se faamautuuga ua taalise le alu o le galuega a le Alii. E tofu uma i tatou ma le mau mea e fai e saunia ai fanau a le Atua mo le Afio Mai Faalua o Lona Alo.”

Na soifua mai i Ibadan, Nigeria, i le aso 5 Aperila, 1967, ia Amos Adeniyi ma Caroline Anike Ojediran, na maua muamua e Adeyinka Ayodeji Ojediran se faailoga o le tagata malaga i le Iunivesite o Ilorin i le 1991, ma mulimuli ane maua lona tikeri o le matuaofaiva i pulega tau pisinisi mai le Iunivesite o Tekinolosi i Ladoke Akintola. Sa ia tulitulimatagauina se faiva i mea tautupe ma le pulega o pisinisi o se polofesa faatausitusi faapitoa. Sa faigaluega o ia o se pule o mea tautupe faapisinisi mo le Shell Nigeria a o lei valaauina e avea o se Pulega Aoao.

E tolu tausaga talu ona uma lona papatisoga, sa ia feiloai ai ia Olufunmilayo Omolola Akinbebije i se siva. Na iu ina amata ona tafafao faamasani i la’ua, ae ona e eseese aai sa faigaluega ai, o lona uiga “sa na o le telefoni sa ma fesooteai ai.”

Sa mulimuli ane faaipoi o la’ua i Nigeria i le 1998 ma sa faamauina i le Malumalu i Johannesburg Aferika i Saute i le aso 14 Novema 2002. E toatasi le alo tamaitai o le au Ojedirans.

E faafetai Elder Ojediran mo valaaua uma a le Ekalesia ia ia maua, talu ona auai ai i le Ekalesia i le 1990 ina ua 23 ona tausaga. O ona tofiga taitasi faalelotu na fesoasoani ia te ia e tuputupu ae ai ma sa ia maua ai avanoa paia e fesoasoani ai i isi e atiina ae i o latou foi valaaua ma tiute.

O Elder Ojediran, sa auaina atu o se Fitugafulu Eria i le taimi o lona valaauina, sa avea foi o se fesoasoani i se au peresitene o se misiona, peresitene o le siteki, fesoasoani i se au peresitene o le siteki, epikopo, fesoasoani i se au epikopo, ma se peresitene o le paranesi. ■



Elder Ciro Schmeil

Fitugafulu o le Pulega Aoao

Sa taumafai pea lava Elder Ciro Schmeil ia usiusitai i le Alii, e tusa lava foi pe sa lei malamalama o ia i le mafuaaga e i tua atu o se poloaiga patino. “A o tatou usiusitai, a o tatou tausaga ia poloaiga,” na ia aoaoina ai, “o le a faamanuia e le Alii i tatou e le aunoa.”

I le faataunuuina o ona valaaua, ua ia vaaia ai faamanuia iaga e maua mai le usiusitai. A o tautua ai o se epikopo ma se peresitene o le siteki, sa ia maua ni avanoa taua e “vaaia ai tagata o suia o latou olaga ona o a latou molimau i le Faaola ma le Tusi a Mamona.”

Na soifua mai Elder Schmeil i le aso 16 Aperila, 1971, i Ponta Grossa, Paraná, Pasila ia Bruno ma Erica Schmeil, e taufai liliu mai uma i le Ekalesia. Sa soifua ae o ia i Curitiba, Pasila ma pe tusa o le taimi na valaauina ai ona matua e pulefaamalumalu i le Misiona a Pasila Campinas, na ia alu ai foi e auaina i le Misiona a Ogden, Iuta.

A o aoga o ia i le Iunivesite o Iuta, sa feiloai ia Elder Schmeil ia Alessandra Machado Louza, o se tamaitai a’oga i le Iunivesite a Polika Iaga, i se faigalotu. “Ina ua ma feiloai mo le uluai taimi i le faigalotu, sa ia matua le amanaia lava au,” na ia saunoa ai. Ae mo ia, [Elder Schmeil], sa o se alofa i le uluai vaaiga.

Sa faaipoi o la’ua i le Malumalu o São Paulo Pasila ia Iulai 1994 ma faamaea ai a la’ua aoga i le Iunite Setete. Sa la toe taliu i Pasila mo le 20 tausaga a o lei masii atu i Colorado, ISA, ona sosoo ai lea ma Florida, ISA. O Elder ma Sister Schmeil o ni matua o se fanau e toalua.

Sa maua le faailoga o le tagata malaga o Elder Schmeil i suesuega faatusiata fale mai le Iunivesite o Iuta i le 1995, ma se faailoga o le matuaofaiva i le pulefaatonu taupisinisi mai le Iunivesite o Ohio i le 2010. Sa faigaluega o ia mo le Walmart Brasil o se sui peresitene ma le faatonusili o le matata o fale ma fanua, o se pulefaatonusili o le Scopel, o se pule sili o le Cia City, ma aupito lata mai, o se faaao o le pulega o fale ma fanua mo le JBS S.A.

Na avea Elder Schmeil ma Fitugafulu Eria, peresitene o le siteki, fesoasoani i se au peresitene o le siteki, epikopo, peresitene o le korama a toaina, ma le peresitene o le paranesi. ■



Elder Moisés Villanueva

Fitugafulu o le Pulega Aoao

Sa na o le 10 ona tausaga i le taimi lea, ae e le galo ia Moisés Villanueva ona lagona ao aoaoina o ia ma lona aiga e faifeautalai i le talalelei i Oaxaca, Mekisiko.

“Ou te manatua le Agaga sa la tuua, le filemu sa ou lagonaina i lo’u lotu,” na ia saunoa ai.

Ina ua papatisoina Moisés faatasi ma nai ona tei e toafa, o lona tina—o se tina nofotoatasi sa tausia Moisés ma nai ona tei e toafitu i ni tulaga faigata—sa toe malosi i le Lotu.

Mulimuli ane, a o sauniuni Moisés ua 18 ona tausaga mo lana misiona, sa feagai pea lona aiga ma luitau faaletino. Sa faaluafesasi lana faaiuga e alu ma sa fai atu i lona tina ua manao e nofo i le fale e fesoasoani ia te ia.

“Afai e te manao moni e fesoasoani mai ia te au,” sa ia fai atu ai ia te ia, “alu e auauna i le Alii.”

A o tootuli o ia i autafa o lona moega i le faaiuga o lona uluai aso i le Misiona i Mekisiko Hermosillo, sa lagona e Moisés sa fiafia le Alii i lana faaiuga. Na te ave le faamalo i lana misiona mo le faatupulaia o lana molimau i le talalelei toefuataiina.

“O lenei Ekalesia o loo taitaia e lo tatou Faaola o Iesu Keriso,” na saunoa ai Elder Villanueva. “Na te silafia i tatou taitoatasi i o tatou igoa. Na te silafia o tatou manaoga, o tatou luitau, ma o tatou popolega. Na te silafia foi o tatou malosiaga, e oo lava i naunauga o o tatou lotu.”

Na soifua mai Moisés Villanueva López i le aso 13 Tesema, 1966, i Oaxaca, Oaxaca, Mekisiko, ia Rubén Villanueva Platas ma Delfina López Domínguez. Na ia faaiipoipo ia Leticia Ávalos Lozano i le Malumalu o le Aai o Mekisiko i Mekisiko i le aso 30 Iuni, 1995. E toatolu le la fanau.

Sa maua e Elder Villanueva se faailoga o le tagata malaga i le pulega o mea tau pisinisi mai le Iunivesite o Southeast Regional i le 1997, ma se faailoga o le matuaofaiva i le taulamua i faaleleiga o pisinisi mai le Tecnológico de Monterrey i le 2011. Sa galue talu ai nei o se faatonu sili o le Sertexa, o se kamupani mo femalagaaiga.

I le taimi o lona valaauga, sa auauna atu Elder Villanueva o se Fitugafulu Eria i Mekisiko. Sa avea foi o ia o se peresitene o le Misiona a Arcadia, Kalefonia ma se fautua maua-luga, fesoasoani i se au peresitene o le siteki, epikopo, ma se faatonusili o mataupu tau i le va i fafo. ■



Steven J. Lund.

Peresitene Aoao o Alii Talavou

I le avea ai ma Peresitene Aoao fou o Alii Talavou, ua talia-ina ai e Steven J. Lund se poloaiga paia e fesoasoani e taiala le fia selau o afe o alii talavou i le vaitausaga o le Perisitua Arona i se Ekalesia i le lalolagi atoa.

Pe a na fai e mafai ona feiloai tai-tasi-tasi ma i latou uma, na te iloa lelei lava le mea e fai atu ai: “O le avea o se tagata faamanuiaina i le malo o le Atua e le faigata. E alofa le Tama Faalelagi ia te oe. Pau le mea e te manaomia o le toe alofa atu ia te Ia. Ma afai tatou te faia lena mea, o le a tatou saogalemua ma fiafia. . . . O le a ’anoa o tatou olaga.”

O le tauaveina ma le lotu i ai o le Ekalesia, e le na o le Aso Sa e tupu ai. O se avanoa i aso uma, e tusa ai ma le saunoaga a le loia ae ua sui nei i le pulefaatonu i pisinisi.

“O le faitauina o tusitusiga paia, alu i le lotu, salamo i se taimi vave pe a tatou se ese mai le ala, tatalaina o o tatou gutu, ma avea o se faataitaiga o le talalelei—o le fuafuaga lena a lo tatou Tama Faalelagi,” na ia saunoa ai.

Sa soifua mai Uso Lund i le aso 30 Oketopa, 1953, ia Jay ma Toy Ellen Lund ma sa soifua a’e i Kalefonia i Matu (Santa Rosa) ma Kalefonia i Saute (Long Beach, ISA). O lana tautua i le Ami a le I.S. na toe molimoli ai o ia i Europa, o se kone-tineta sa ia alofa i ai, i le taimi o lana auaunaga i le Misiona a Netalani Amsterdam.

Ina ua mavae lona ulufalega, sa ia lesitala i le Iunivesite a Polika Iaga, lea sa ia toe feiloai ai ia Kalleen Kirk, o se tamaitai talavou sa la masani a o nonofo i Siamani. Sa iu ina faaiipoipo Steven ma Kalleen i le Malumalu o Sate Leki i le aso 8 o Aokuso, 1980. O i la’ua o matua o se fanau e toafa.

Ina ua uma ona maua sona faailoga faaloia i le BYU, sa faigaluega Uso Lund o se loia a o lei oo ina avea ma peresitene ma Faatonusili o le Nu Skin Enterprises. O le taimi nei o loo avea o ia ma taitaifono taiulu o le fono a le afaatonu o le kamupani. O ia foi o se sui tupito o le Utah System o A’oga Maua-luga Atu.

Sa avea Uso Lund ma peresitene o le Misiona a Atlanta, Georgia ma se taitai faamaopoopo o le Komiti o le Faapaiaga o le Malumalu o Provo City Center. Sa avea foi o ia o se sui o le afaatonu o Alii Talavou aoao ma se Fitugafulu Eria. ■



Ahmad S. Corbitt

*Fesoasoani Muamua i le Au
Peresitene Aoao o Alii Talavou*

O Ahmad S. Corbitt, 57, na soifua mai ia Aokuso 1962 ia James Earl Corbitt ma Amelia Corbitt. Sa matitiva le aiga ma sa nonofo i falemautotogi taugofie o le malo i Filatelefia Penisilevania, ISA, sa vagaia e le au solitulafono ma faatupu faalavelave. Sa le'i saogalemu le feoi mai lea pitonuu i lea pitonuu.

Ae o uunaiga faaleagaga a lona tina sa taialaina ai lana fanau e toa 10 ma sa tausisia ai lo latou saogalemu. Sa ia iloa lelei lava le taimi e tatau ai ona taaalo lana fanau i fafo ma le taimi e tatau ai ona nonofo i totonu.

O le nofouta faaleagaga lona na taitai mulimuli ane ai o ia e valaaulia ia faifeautalai mai Le Ekalesia a Iesu Keriso o le Au Paia o Aso e Gata Ai i totonu o lona fale. O le tele o lona soifuaga faatamaitiiti ma lona talavou, sa tapuai ai Ahmad ma lona aiga faatasi ma le Nuu o Isalama, ma sa mulimuli ane papatiso o ia i le lotu Porotesano. Ae o le taimi nei sa ia lagonaina le alofagia o ia e le faapotopotoga o le Au Paia o Aso e Gata Ai.

Sa papatisoina lona tina ma nisi o nai ona tei i le masina na sosoo ai. I le aso 16 o Aokuso, i lona aso fanau lona 18, sa ulu ifo ai foi Ahmad i le vai o le papatisoga. Na auai lona tama fai, o Henry Brandford Campbell, i le Ekalesia i le tausaga na sosoo ai.

“Sa le o se mea na faatatau moni ia i matou,” o lona tala lea. “Sa o se mea na faatatau i le Atua ma le mea sa Ia finalo matou te faia. Sa matou naunau e lotomauualalo ma i ai le faitalia. Sa Ia taitaia i matou.”

Ina ua uma le Kolisi o Ricks, ma auuina i le Misiona a Puerto Rico San Juan mai le 1982 i le 1984, sa feiloai i la'ua ma Jayne Joslin i se malaga a le autalavou matutua nonofo-fua i le malumalu. Sa faaipoipo i la'ua i le aso 24 Aokuso, 1985, i le Malumalu o Uosigitone D.C, ma o i laua o ni matua o se fanau e toaono.

Mo le iva tausaga na sosoo ai, sa faigaluega o ia i le ao ma a'oga i le po, ma sa maua ai ona faailoga mai le Kolisi a Richard Stockton o New Jersey ma le Aoga Faaloia a le Iunivesite o Rutgers.

Sa avea o ia ma fesoasoani i le au peresitene o se siteki, peresitene o le siteki, fautua maua, ma le peresitene o le Misiona a Dominican Republic Santo Domingo East.

Sa faigaluega Uso Corbitt o se loia faatitai, i sootaga a tagata lautele ma o se faatonusili o le Ofisa o le Ekalesia i Niu Ioka o Mataupu Lautele ma Faavaomalo. O loo faafaigaluega nei o ia e le Matagaluga o Faifeautalai a le Ekalesia. ■



Bradley R. Wilcox

*Fesoasoani Lua i le Au
Peresitene Aoao o Alii Talavou*

A o auai i se konafesi a le autalavou i Kalefonia, sa feiloai ia Bradley (Brad) R. Wilcox i se alii talavou sa lei manao e i ai iina. Sa mafuta atu o ia i le taulealea i lalo o se laau paolo, ma e lei pine ae o la talatalanoa i le autu e fiafia i ai le talavou—o le faasee i laupapa faasee.

Sa fai atu Uso Wilcox i le talavou e faaali atu ia te ia ni nai fegi faasee. O le faagaetia ai, sa ia valaaulia ai le talavou e na te faia se faataitaiga o le faasee i le laupapa faasee i le polokalama Faapitoa mo Talavou [Especially for Youth] i le taumafanafana i lona tausaga. Na musu le alii talavou ae na iu lava ina ioe atu i ai. I le EFY, sa ia maua ai se aafiaga na suia ai lona olaga ma maua ai lana molimau i le talalelei.

“Na alu atu o ia i le EFY i se laupapa faasee, ae na ia foi o se faifeautalai,” o le tala lea a Uso Wilcox.

“Na ou faaluina lo'u olaga e mafuta ai ma tamaiti ma tupulaga talavou,” na saunoa ai Uso Wilcox, “ma ou te alofa i le autalavou.”

Sa soifua mai Bradley Ray Wilcox i Provo, Iuta, ISA, i le aso 25 Tesema, 1959 ia Ray T. Wilcox ma Val C. Wilcox. Sa soifua ae o ia i Provo sei vagana ai le faaluina o ni nai tausaga a o laitiiti i Itiopia.

Ina ua maea lana misiona talai i le Misiona a Chile Viña del Mar, sa faaipoipo Uso Wilcox ia Deborah Gunnell i le Malumalu o Provo Iuta i le aso 7 Oketopa, 1982. O i la'ua o matua o se fanau e toafa.

Na maua e Uso Wilcox lona faailoga o le tagata malaga ma le matuaofaiva mai le Iunivesite o Polika Iaga ma lona faailoga o le tofamanino i aoaoga mai le Iunivesite o Wyoming. E tele ni faailoga na faamamaluina ai Uso Wilcox mo lona galuega i a'oga, ma sa tuuto atu le silia ma le 30 tausaga i le polokalama a le BYU o le Especially for Youth, ma sa fiafia tele o ia i le avefa ma faiaoga i le Campus Educational Week.

Sa nonofo Uso Wilcox ma lona aiga i Niu Sila ma Sepania a o ia faatonotonuina polokalama o suesuega i fafo mo le BYU. E tele ni tusi na ia tusia ma o le taimi nei o ia o se polofesa i le Matagaluga o Tusitusiga Paia Anamua i le BYU.

Sa auuina Uso Wilcox o se peresitene o le Misiona a Chile Santiago i Sasa'e, ma o se sui auai o le afaatonu aoao o le Aoga Sa, fesoasoani i se au peresitene o le siteki, ma se epikopo o se uarota a le autalavou matutua nofofua. I le taimi o lona valaauaga, sa auuina atu o ia o se fautua maua-luga ma se peresitene o Alii Talavou o le siteki. ■



O Taimi e Manatua Pea i le Konafesi

E pei ona sa folafola mai e Peresitene Russell M. Nelson, o le konafesi aoao lenei o le a le mafaagaloina lava i le tele o itu.¹ O ni nai taimi ia e manatua pea o le konafesi.

Faatusa Fou

Ua fofogaina mai e Peresitene Nelson se faatusa fou mo le Ekalesia (tagai itulau 73). O lenei faatusa ua aofia ai le igoa o le Ekalesia o loo si’o-ina i se faatafafa e le tutusa, ua avea o se maatulimanu. I luga a’e o lena o loo tu ai se faatusa o le Keriso i lalo o se lo’u, e faamanatu mai ai ia i tatou le Faaola ma Lona tuugamau avanoa.

Folafolaga o le Lua Seneturi

Na faitauina e Peresitene Nelson “O Le Toefuata’iga o le Atoatoaga o le Talalelei a Iesu Keriso: O Se Folafolaga o le Faamanatuina o le Lua Seneturi i le Lalolagi,” lea e valaaulia ai tagata i soo se mea e aoao o le talalelei a Iesu Keriso sa talanoa i ai i le Feagaiga Fou ua toe i ai nei i le lalolagi. O le faaliliuga aloaia e mafai ona maua i totonu o le faavaa i luma o le lomiga lenei i

gagana e 12. O tagata o le ekalesia o loo faatalitali pea mo se faaliliuga aloaia e mafai ona maua uluai faaliliuga o le folafolaga i le saunoaga a Peresitene Nelson (tagai itulau 91).

Faapotopotoga Paia

O se “faapotopotoga paia” sa faia i le taeao o le Aso Sa o se vaega o le faamanatuga e le Ekalesia o le lua seneturi o le Uluai Faaaliga. I le taimi o lea sauniga paia, sa taitaia ai e Peresitene Nelson le Au Paia i le Alaga Osana, o se faaaliga tuufaatasi o le faaneetaga sa faaaoga i mea tutupu faapitoa e pei o faapaiaaga o malumalu (tagai itulau 92).

Anapogi Lona Lua a le Lalolagi Atoa

Mo le taimi lona lua i aso e iva, sa valaaulia ai e Peresitene Nelson le lalolagi e anapopogi ma tatalo “ina ia mafai ona togafitia le faama’i oti o i ai nei, ia pui puia tausima’i, ia faamalosia le tamaoaga, ma toe foi i le olaga masani” (itulau 74). O lenei anapogi lona lua a le lalolagi atoa na faia i le Aso Malii i le Aso Faraile, 10 Aperila, 2020.

Malumalu Fou

Na fofogaina mai e Peresitene Russell M. Nelson fuafuaga e fausiaina ni malumalu fou se valu i le salafa o le lalolagi (tagai itulau 115). Ua 168 malumalu ua maea ona faapaiaina i le lalolagi atoa, ma le 7 o malumalu o loo fausiaina.

Failauga Talavou

O le sauniga i le afiafi o le Aso Toonai na mata’ina ai lauga mai talavou e toalua, o Laudy Ruth Kaouk ma Enzo Serge Petelo, o e na talanoa e uiga i le ala ua faamanuiaina ai talavou e le perisitua (tagai itulau 56 ma le 58). Ua silia ma le 20 tausaga talu ona aofia ai failauga talavou i se konafesi aoao.

Musika Mamana

O musika mo le konafesi sa muai pueina. Sa faaiiina e le Au Paia i le lalolagi atoa le konafesi e ala i le lagiina o le “Ia Viiā Oe le Atua” faatasi ai ma aufaipese i Kana, Niu Sila, Mekisiko, Korea i Saute, Siamani, ma Pasila (tagai itulau 2). ■

FAAMATALAGA

1. Tagai Peresitene Russell M. Nelson, “Malelega Faaii,” *Ensign* po o le *Liahona*, Nov. 2019, 122.

KOVITI-19: O Savali o le Faasinoala, Faamalologa, ma le Faamoemoe

Ua molimauina e tagata o le ekalesia le vaaia o le aao o le Alii e oo lava i lenei vaitau o suiga, atuatuwale, ma le maliu.

Manatu o Faatonu: A o amata le konafesi aoao i le aso 4 Aperila, o ata o le Maota Autu filemu mo Konafesi o ni faamanatu o le faama'i oti ua si'omia ai i tatou, ae o savali mai o tatou taitai sa taulai atu i pu'eomanu ma le faamoemoe. I vaiaso talu ai, sa matou taulimaina ai tala talitutusa e uiga i le faatuatua mai tagata o le Ekalesia i le salafa o le lalolagi. O itulau o sosoo ai, o loo i ai tusiga mai nisi o a outou tala, faapea foi ni faamatalaga e uiga i tala faaopoopo i le upega tafa'ilagi. Faatasi ai ma le agaalofa faa-Keriso, e mafai ai ona faaaauu pea lo tatou fesoasoania'i o le tasi ma le isi ia faamaloloina mai aafiaga o lenei faama'i oti.

Sa Faatasi o Ia ma A'u i Lena Taimi; O Loo Faatasi Foi o Ia ma A'u i le Taimi Nei

A o ou nofonofa i le fale ma tau-mafai e faatoafilemu lo'u atuatuwale i le mea o loo tupu i le lalolagi, sa ou soona susueina la'u api talaaga ma ou tau atu ai i le faaupuga lea: "E anoa-noai atuatuvalega e oo mai pe a ala a'e i luga i aso taitasi i lenei lalolagi, ae faatasi ai ma le faatuatua i aoaoga o le talalelei, e mafai ai ona tuu atu le vae e tasi i luma o le isi. . . E faatoilalo e le faatuatua i taimi uma le fefe."

Sa ou iloaina ua faatoa ou mauaina le faaaliga patino mamana ma na tuuina mai e le Tama Faalelagi ia te au e ala i a'u lava tusiga i la'u api talaaga mai le tele o tausaga ua mavae. Sa faamanuiaina au i se taimi o le filemu ma le malamalama sa faatasi le Tama

Faalelagi ma au i lenei taimi, ma o loo ai nei o Ia faatasi ma au i le taimi nei.

Danette Gray, Iuta, ISA

E Mafai e le Agaga Paia ona Galue i le Upega Tafa'ilagi

Sa musuia au e amata ona fai ia vasega seminare e ala i talanoaga faavitio i vaega [group video chats]. E lua aso a o lei taofia lo matou aai i lalo o le kuarenitini, sa faia ai le uluai lesonea a le matou vasega i le initoneti.

O nisi o matua sa auai faatasi mai i le matou vasega, e aofia ai i latou e le auai i le ekalesia. Sa oono lo'u tagi a o matou susesueina faatasi le Mosaea mataupu e 2. Sa matou tau fai lagona ina le Agaga a o matou aoaoina o le auauna atu i isi o le auauna lava lea i le Atua. Na tele ni mea sa ou aoaoina

e uiga i le mauaina ma le iloaina o faaaliga faaletagata lava ia. O le a faaaliga mai e le Agaga Paia le moni o le talalelei i le tele o ituaiga mamananu. Po o a lava mea o loo tutupu i le lalolagi, e leai se mea e mafai ona taofia le galuega a le Tama Faalelagi mo le faaolagata o Ana fanau mai le agai i luma.

Marites Pineda, Mindanao, Filipaina

Matou Te Lei Misia se Aso o le Seminare

Tusa lava foi i mea uma ua tutupu i le korona vairasi, ou te fiafia lava e faapea atu matou te lei misia lava se aso o le seminare. O le aoaoina o a'u vasega i talanoaga i le vitio e tulai mai ai ni nai luitau, ae ou te fiafia lava e matauina matua ma tei laiti o faalogologo mai i a matou talatalanoaga. Ou te fiafia aua o loo maua ai se lagona o le faia e le aunoa ma masani a o matou aiga, ma e sili lo'u fiafia ua mafai ona matou faaaauu pea ona fefaasoai molimau i le tasi ma le isi e uiga ia Iesu Keriso ma Lona alofa mo i tatou.

Mandi Crandell, Yigo, Guam

Auauna Atu ia i Latou i Itu Uma e Lua o le Veli

Sa ou galue o se tamaitai faifeautalatai faamisiona sinia i le Misiona i Initipene, Misuri ina ua le toe faia sauniga Lotu, ma sa amata ona faaesea le tagata lava ia i o matou potu ma totogi. Sa matou faaaogaina a matou telefoni ma komepiuta e fesoatai ai ma tagata o le au paia ma aapa atu ai ia i latou sa matou galulue, ma se lei o mai i taimi uma i le lotu.

Ina ia faaaoga le taimi, sa tonu ia te au e fai ni nai gafa faaleaiga, e ui ina sa fai si umi o faigata ia te au ona sue nisi igoa fou. Ina ua ou alu i totonu o le FamilySearch, sa ou maua ai se faailo o se faamaumauga o loo faatalitali ina ia faaopoopoina. O lenei faamaumauga e tasi na ou maua ai pe tusa ma le 70 tagata i la'u laina. Ina ua mavae aso e lima, sa muta le gasolo



mai o igoa. I se taimi mulimuli ane i lena aso, sa matou iloa ai ua faataga i matou e o i o matou aiga. Ua ou faanoanoa e tuua, ae sa ou lagonaina foi le faamanuiaina ona sa mafai ona ou auauna atu i lo'u aiga i le isi itu o le veli, i lenei taimi faigata.

Kim Nielson, Oregon, ISA

O Le Faia o La Tatou Vaega ia Faagaoioia ai Pea le Galuega a le Alii

Ina ua fautuaina faifeautalai o la matou eria e nonofo i o latou faleapi, sa matou taumafai e faia la matou vaega, o le valaaulia o se uo e aoao e uiga i le Ekalesia. O loo faasoa atu e faifeautalai a latou lesona i le telefoni i la matou uo. Matou te lagonaina le Agaga i lo matou fale ma e faafetai ai i le tekinolosi ua tatou maua i nei ona po. E maoae le vaaia o le galuega a le Alii o loo gasolosolo pea e ui i luitau uma o i le lalolagi

Elaina Reich, Uosigitone, ISA

E Faafofoga mai le Faaola i a Tatou Pesepelega

Ou te galue o se faifeau faamisiona auauna atu a le Ekalesia i le polokalama o le PathwayConnect i le Siteki o Kyiv Ukraine. Sa tonu i taitai o le polokalama e aoao faamasani i matou uma o e taitai patino i tauaofiaga ina ia mafai ai ona matou faatautaia e aunoa ma le vaaitino. O le aso lava na sosoo ai, sa faasilasila mai ai e le malo aiaiga o le kuarenitini i Kyiv.

Ou te fiafia lava i le avanoa e tauaofia faatasi ai mo le PathwayConnect. Ma ou te fiafia lava i le avanoa e tauaofia faatasi ai e tapuai ma pepese faatasi i le fale i Aso Sa. Ou te faafetai lava mo le faamautinoaga e faapea, o le mea e faapotopoto ai le toalua po o le toatolu i Lona suafa, e i ai foi o Ia iina. E leai se tasi e iloa pe o le a le umi o le a kuarenitini ai matou i Kyiv, ae ua matou iloa o le a faafofogaina e le Faaola a matou pesepelega.

Kateryna Serdyuk, Kyiv, Iukureini

“Ua Oo i le Taimi e Toe Ave ai Lou Aiga”

Ina ua faasalalau mai talafou e uiga i le KOVITI-19, sa faalogoina e pei ua



o le talalelei a Iesu Keriso. E mafai ona ou lelemoina i lalo nisi o nei tosinaga 'oona i le lalolagi ae taulai atu i le aoaoina o la'u fanau e vaavaai atu ia Keriso. E silafia lelei e lo tatou Tama o i le Lagi i tatou. Ua ou lagonaina lena mea i le taimi nei nai lo se isi lava taimi.

Mary Ostler, Nebraska, Iuta, ISA

Ua Uma Ona Saunia i Tatou e le Alii mo Lenei Mea

Ina ua ou faatoa maua le tala faapea ua taofia mo se taimi le tumau ia potopotoga faale-Lotu, sa fai si o'u le fiafia. Ae o le taimi nei ua mafai ona ou iloa le ala na saunia ai e le Alii i tatou mo lenei taimi e ala i Ana perofeta. O suesuega o le talalelei e totonugalemu i le aiga, e mafai ona fesoasoani ia i tatou i taimi faigata. Ou te faafetai lava ona o loo mafai lava ona ou 'ai ma inu i le faamana-tuga i Aso Sa ma maua afioga a perofeta. E mafanafana lava le iloa ai, seia oo i le taimi ua mafai ona tatou toe potopoto faatasi ai, ae e mafai lava ona tatou lagonaina lea lava Agaga e tasi.

Emma van As, Gauteng, Aferika i Saute

Ua Uma Ona Aoaoina i Tatou i le Ala e Tapuai Ai

A o ma auai ma lo'u toalua i le faatinoga o le sauniga o le faamana-tuga i lo matou fale mo le uluai taimi, sa ou lagonaina le matua malosi o le Agaga ma sa le mafai ai ona ou usuina le viiga sa matou filifilia. I le 70 ma ona tupu tausaga sa ou auai ai i sauniga tapuai, ou te le manatuaina so'u talisapaia loloto o faamanuiaga ua tatou maua e ala i le avea o i tatou ma tagata o le ekalesia ma le auai ai i le Ekalesia a Iesu Keriso o le Au Paia o Aso e Gata Ai.

Ua uma ona aoaoina i tatou i le ala e tapuai ai ma lē tatou te tapuai i ai. Ioe, tatou te misia mafutaga ma o tatou uso a Au Paia ma o le a tatou fiafia e toe foi i le mea “masani” i se taimi vave e mafai ai, ae ou te faafetai lava mo lesona o loo tatou aoaoina i le taimi nei ao tatou mulimuli

soona faatele lē mafaufau. Ona oo lea ina gasolo pea aso, sa amata ona ou lagonaina le le to'a ma sa oo ai lava ina [ou] gatete e uiga i le lumanai o lo tatou lalolagi.

I se tasi taeao, sa le mafai ona ou toe moe ma sa ou saofai ma manatunatu loloto pe o le a le uiga o nei mea uma. Ona oo mai ai lea o le toafilemu. Sa aoao mai au e le Agaga e faapea, ua tuuina mai e le Alii ia te au se meaalofo. Sa Ia faapea mai, “Ua oo i le taimi e toe ave ai lou aiga.”

Ua pisi naua le olaga. O lenei faama'i oti ua aumaia ai i lo matou aiga le avanoa e taulai atu ai i mea e taua:

i le fautuaga a le perofeta i la tatou tapuaiga, “tonugalemu i le aiga, e lagolago-e le Ekalesia.”

Susan Preator, Montana, ISA

Mauaina o le Filemu ma le Lotogatasi

O le faia o afiafi faaleaiga o se mea ma te sagisagi atu lava i ai ma la’u tama tama i vaiaso taitasi. E masani ona ma aumaia tagata o le au paia, uo, ma faifeautalai i lo matou fale. Ona matua suia ai lea o mea ona o le faama’i oti. O le taimi nei ua fai a matou afiafi faaleaiga ma uo i luga o le telefoni. I le aluga o lenei taimi ua mafai ona tele mea matou te faia e matou te felata’i ai.

Ou te faafetai mo lo tatou perofeta pele, o lē sa valaauliaina i tatou e anapopogi. O le toatele o i tatou sa mafai ona lagonaina le mana o le lotogatasi ma le filemu e ala i lenei aafiaga. I taimi faapenei, o le filemu tatou te manaomia e sau mai le Faaola o Iesu Keriso.

Roshene McKenzie, Kingston, Jamaica

E Pule le Atua

Sa amata la’u misiona i le na o le lua ma le afa masina talu ai. Sa tofia au e galue i Hermosillo, Mekisiko. O aso uma sa ou maua ai le avanoa e feiloai atu i tagata matagofie o e sa saunia ia talia le talalelei toefuataiina. Sa ou lagonaina ua faatoa amata ona ou faataunuuna lo’u faamoemoe-ega i le taimi na faasalaveia ai e le KOVITI-19 la’u misiona.

E tiga le tuua o na tagata ua ou matua alofa tele i ai, ae sa ou lagonaina foi le filemu tele ma le malupuipua aua ua ou iloa o loo tumau pea ona i ai i le Atua le pule. Ou te faafetai ua ia i tatou se perofeta ma Aposetolo e taialaina i tatou i lenei taimi. E faapei o le toatele o faifeautalai i le lalolagi, ou te mautinoa e le o le mutaaga lea o la’u misiona. E le o toe mamao ona mafai lea ona ou toe fesoasoani e tulei i luma le galuega a le Alii ma faaauu pea ona avea o se meafaigaluega i Ona aao, e aumaia nisi agaga ia salamo. ■

Carolina Roman, Puerto Rico

Faaauu Sailiiliga i le Upega Tafa’ilagi

Faitau atili nisi tala e uiga i le ala na tali atu ai tagata o le ekalesia i aafiaga o le faama’i oti i o latou olaga, i le faatuatua ma le faamoemoe.

Pe o e manaomia le faamoemoe?

- Aoa pe na faapefea ona maua e tagata o le Ekalesia i le lalolagi atoa le faamoemoe faapea o loo vaavaaia i tatou e le Atua.
- Faitau e uiga i le ala na agai ai i luma tagata o le Ekalesia i isi taimi i le talafaasolopito o le Ekalesia ina ua le faataunuuna sauniga faamanatuga.

Manaomia le fesoasoani?

- Aoa pe faapefea ona iloa le lototiga ia te oe lava ma pe faapefea ona faanoanoa faatasi ma i latou o e faanoanoa.
- Sue pe o faapefea e isi ona fetuunai i le tapuai i le fale.

Pe manaomia ni aitia?

- Saili ni aitia pe mafai faapefea ona e faaauu ona auauna atu i nei tulaga uigaese.
- Aoa pe na faapefea ona fetuunai isi faifeautalai faamisiona i suiga ia latou tofitofiga. Ina ia faitauina nei tala ma isi, asiasi i le vaega faapitoa o le *Ensign* po o le *Liahona*, “COVID-19: Messages of Faith.” E maua le vaega lea i le asiasi i mekasini i le polokalama o le Gospel Library po o le initoneti i le [ChurchofJesusChrist.org](https://www.ChurchofJesusChrist.org).

Punaoa Faaopoopo e Aoga mo Matua

- O le lomiga o Me o le *Uo* o loo aofia ai tala e uiga i tamaiti o loo aoa ma auauna atu
- Tatala le polokalama o le Gospel Living ma lomiga talu ai nei o le *New Era* e vaai ai i tala e uiga i autalavou o loo agai i luma i le faatuatua ma le mauaina o auala tulagaese e auauna atu ai.
- O le nonofo papuipua faatasi i ni api fepiita’i e mafai ona luitauina. Mo ni aitia e uiga i le fausiaina o se sootaga malosi atu ma lou toalu ma le aiga, siaki tusiga nei:
 - “Falling Out of Love . . . And Climbing Back In,” *Liahona*, Ian. 2005.
 - “Nurturing a Love That Lasts,” *Liahona*, Me 2000.
 - “Mo Le Filemu i le Aiga,” *Liahona*, Me 2013.
 - “Ia Matua Maelega ma Popole i le Aiga,” *Liahona*, Nov. 2009.
- O le mea e faanoanoa ai, o nisi atonu e tali atu i lenei taimi pagatia e ala i le sauaina o isi. Afai ua e tiga, faamolemole saili ia punaoa o i le [abuse.ChurchofJesusChrist.org](https://www.abuse.ChurchofJesusChrist.org) ma aapa atu mo se fesoasoani. E tatau ona e maua le saogalemu ma le faaaloalo.

Suesue Atili

- Mo tala aupito lata mai mai le Ekalesia e uiga i aafiaga o le KOVITI-19, alu i le [ChurchofJesusChrist.org](https://www.ChurchofJesusChrist.org).




Manatu mo Gaoioiga

E tele lava ni auala e fesoasoani atu ai i tagata e aoao mai savali o le konafesi aoao. O nisi nei o nai faaitaiga: atonu o i ai nisi au auala o le a sili ona aoga i lau korama po o le Aualofa.




- **Talanoa i vaega.**
Vaevae tagata i ni vaega laiti, ma atofa atu i vaega taitasi ni vaega eseese o le savali o le konafesi e faitau ma talanoaina. Ona fai atu lea i vaega taitasi e faasoa mai se upumoni sa latou aoaoina. Pe e mafai foi ona e faatulagaina ni vaega mai tagata o e na suesue i isi vaega ma tuu atu ia i latou e faasoa atu i le tasi ma le isi mea sa latou aoaoina.
- **Tali fesili.**
Valaaulia tagata e tali i fesili e pei o [fesili] nei e uiga i le savali o le konafesi: O a ni upumoni o le talalelei o tatou mauaina i lenei savali? E mafai faapefea ona tatou faaaogaina nei upumoni? O a valaaulia ma faamanuiga na folafola mai na tuuina atu? O le a se mea o aoao mai e lenei savali ia i tatou e uiga i le galuega o loo finagalo le Atua tatou te faia?
- **Faasoa atu upusii.**
Valaaulia tagata e faasoa atu ni upusii mai le savali o le konafesi lea na musuia i latou e faataunuu a latou tiutetauave i le galuega o le faaolataga. Uunaia i latou e mafaufau pe faapefea ona latou faasoa atu nei upusii e faamanuia ai se isi tagata, e aofia e pele ia i latou ma tagata latou te auauna atu i ai.
- **Faasoa se lesona faitino.**
Ia muai valaaulia ni nai tagata e aumai ni mea faitino mai le fale e mafai ona latou faaaogaina e aoao atu ai e uiga i le savali o le konafesi. I le fonotaga, fai atu i tagata e faamatala mai pe faapefea ona fesoatani nei mea faitino i le savali.
- **Saunia se lesona e aoao atu i le fale.**
Fai atu i tagata e galulue i ni paga e fuafua ai se lesona o le afiafi faaleaiga e faatatau i le savali o le konafesi. E mafai faapefea ona tatou faatatauina lenei savali i o tatou aiga? E mafai faapefea ona tatou faasoaina atu lenei savali i tagata tatou te auauna atu i ai?
- **Fetufaai atu mea na tutupu [ia te oe].**
Faitau faatasi nisi o faamatalaga mai le savali o le konafesi. Fai atu i tagata e faasoa mai ni faaitaiga mai tusitusiga paia ma mai i o latou olaga lea e faaalua ai pe faamalosi ai le aoaoga faavae lea na aoaoina i nei faamatalaga.
- **Aoao e uiga i se mau.**
Valaaulia tagata e faitau se mau faasino i le savali o le konafesi. Fai atu ia i latou e talanoa i le auala e mafai ai ona fesoasoani ia aoaoga o loo i le savali latou te malamalama atili ai i le mau.
- **Sue se tali.**
Ia muai fatuina ni nai fesili e mafai ona taliina e faaaoga ai le savali o le konafesi. Ia taulai atu i fesili ia e uunaiaina le mafaufau loloto po o le faaaogaina o mataupu faavae o le talalelei (tagai *Aoao Atu i le Ala a le Faaola*, 31-32). Ona tuu atu lea i tagata e filifili se fesili ona sue lea o tali i le savali. Valaaulia i latou e talanoa ia latou tali i ni vaega toalaiti.
- **Sue se fasifuitau.**
Valaaulia tagata e saili i le savali o le konafesi, e vaavaai mo fuitau lea e taua ia i latou. Fai atu ia i latou e faasoa mai ni fasifuitau ma mea sa latou aoaoina mai i ai. E faapefea ona fesoasoani nei aoaoga ia i tatou e faataunuu ai le galuega a le Alii?
- **Fatu se mea.**
Valaaulia tagata e fai se pepa lautele o i ai se savali po o se faailogatusi lea e aofia ai se faamatalaga musuia puupuu mai le savali o le konafesi. Tuu atu ia i latou se avanoa e faasoa atu ai se mea sa latou faia. ■



O Le Nofoga Tutotonu o le Faola

Sa fofogaina e Peresitene Russell M. Nelson se faatusa fou e faailoa ai Le Ekalesia a Iesu Keriso o le Au Paia o Aso e Gata Ai (tagai i le itulau 73). Ua faamamafaina e le faatusa le suafa o Iesu Keriso ma Lona matafaioi tutotonu i mea uma e faia e le Ekalesia. O le igoa o le Ekalesia o loo i totonu o se mamananu faatafāfā laumiūmi o loo fa'i ma sui o se ma'atulimanu—o Iesu Keriso o le ma'atulimanu autu lea o loo fausia ai le Ekalesia (tagai i le Efeso 2:19–21). I le totonugalemu o le faatusa o loo i ai se ata o le faatagata maamora a Thorvaldsen le Christus. O le ata o loo faaalua ai le Alii soifua toetu, o loo tu i lalo o le faitotoa e avea o se faamanatu o Lona toetu mai le tuugamau i aso e tolu i le mavae ai o Lona malū.

Ina ia faaalologia le natura paia o le faatusa o le Ekalesia ma tausisia puipuiga faaletulafono, ua na o le faamaoniga lava a le Au Peresitene Sili ma le Korama a Aposetolo e Toasefululua e mafai ai ona faaogaina le faatusa aloaia o le Ekalesia.



“O le a le uiga ia te oe o le toefuataiina mai o le talalelei a Iesu Keriso i le lalolagi?” Na fesili ai Peresitene Russell M. Nelson i le faagasologa o le Konafesi Aoao Faaletausaga Lona 190 a le Ekalesia.

“O lona uiga ua mafai ona faamauina faatasi oe ma lou aiga e faavavau! O lona uiga ona ua papatisoina oe e se tasi ua i ai le pule mai ia Iesu Keriso ma ua faamauina o se tagata o Lana Ekalesia, ua mafai ona e olioli i le mafutaga tumau a le Agaga Paia. . . . O lona uiga o le a lē tuua lava oe e lē faamafanafanaina pe aunoa ma le mauaina o le mana o le Atua e fesoasoani ia te oe. O lona uiga e mafai e le mana o le perisitua ona faamanuiaina oe a o e mauaina sauniga taua ma osia feagaiga ma le Atua ma tausi i ai. O se taula lava i o tatou agaga nei upumoni, aemaise lava i taimi faapenei o le pesi mai o āfā.”

